

Namo tassa bhagavato arahato sammāsambuddhassa

# Khuddakanikāye

## Jātaka-aṭṭhakathā

(Sattamo bhāgo)

### 22. Mahānipāto

[543] 6. Bhūridattajātakavaṇṇanā

#### Nagaraḅhaṅgaṃ

**Yaṃ kiñci ratanaṃ atthīti** idaṃ satthā sāvattiṃ upanissāya jetavane viharanto uposathike upāsake ārabha kathesi. Te kira uposathadivase pātova uposathaṃ adhiṭṭhāya dānaṃ datvā pacchābhattaṃ gandhamālādihattā jetavanaṃ gantvā dhammassavanavelāya ekamantaṃ nisīdimṣu. Satthā dhammasabhaṃ āgantvā alaṅkatabuddhāsane nisīditvā bhikkhusaṅghaṃ oloketvā bhikkhuādisu pana ye ārabha dhammakathā samuṭṭhāti, tehi saddhiṃ tathāgatā sallapanti, tasmā ajja upāsake ārabha pubbacariyappaṭisaṃyuttā dhammakathā samuṭṭhahissatīti ṅatvā upāsakehi saddhiṃ sallapanto “uposathikattha, upāsakā”ti upāsake pucchitvā “āma, bhante”ti vutte “sādhu, upāsakā, kalyāṇaṃ vo kataṃ, apica anacchariyaṃ kho panetaṃ, yaṃ tumhe mādisaṃ buddhaṃ ovādadāyakaṃ ācariyaṃ labhantaṃ uposathaṃ kareyyātha. Porāṇapaṇḍitā pana anācariyakāpi mahantaṃ yasaṃ pahāya uposathaṃ karimsuyevā”ti vatvā tehi yācito atītaṃ āhari.

Atīte bārāṇasiyaṃ brahmadatto nāma rājā rajjaṃ kārento puttassa uparajjaṃ datvā tassa mahantaṃ yasaṃ disvā “rajjampi me gaṇḥeyyā”ti uppannāsanko “tāta, tvaṃ ito nikkhamitvā yattha te rucati, tattha vasitvā mama accayena kulasantaṃ rajjaṃ gaṇḥāhi”ti āha. So “sādhū”ti sampaticchitvā pitaraṃ vanditvā nikkhamitvā anupubbena yamunaṃ gantvā yamunāya ca samuddassa ca pabbatassa ca antare paṇṇasālaṃ māpetvā vanamūlaphalāhāro paṭivasati. Tadā samuddassa heṭṭhime nāgabhaveane ekā matapatikā nāgamāṇavikā aññāsaṃ sapatikānaṃ yasaṃ oloketvā kilesaṃ nissāya nāgabhavanā nikkhamitvā samuddatīre vicarantī rājaputtassa padavalaṅgaṃ disvā padānusārena gantvā taṃ paṇṇasālaṃ addasa. Tadā rājaputto phalāphalattāya gato hoti. Sā paṇṇasālaṃ pavisitvā katṭhattharaṇaṅceva sesaparikkhāre ca disvā cintesi “idaṃ ekassa pabbajitassa vasanaṭṭhānaṃ, vīmaṃsissāmi naṃ ‘saddhāya pabbajito nu kho no’ti, sace hi saddhāya pabbajito bhavissati nekkhammādhimutto, na me alaṅkatasayanaṃ sādīyissati. Sace kāmābhirato bhavissati, na saddhāpabbajito, mama sayanasmiṃyeva nipajjissati. Atha naṃ gahetvā attano sāmikaṃ katvā idheva vasissāmi”ti. Sā nāgabhavanaṃ gantvā dibbapupphāni ceva dibbagandhe ca āharitvā dibbapupphasayanaṃ sajjetvā paṇṇasālāyaṃ pupphūpahāraṃ katvā gandhacūṇaṃ vikiritvā paṇṇasālaṃ alaṅkaritvā nāgabhavanameva gatā.

Rājaputto sāyanhasamayaṃ āgantvā paṇṇasālaṃ pavitṭho taṃ pavattiṃ disvā “kena nu kho imaṃ sayanaṃ sajjita”nti phalāphalaṃ paribhuṅgitvā “aho sugandhāni pupphāni, manāpaṃ vata katvā sayanaṃ paññatta”nti na saddhāpabbajitabhāvena somanassajāto pupphasayane parivattitvā nipanno niddaṃ okkamitvā punadivase sūriyuggamane uṭṭhāya paṇṇasālaṃ asammajjitvā phalāphalattāya agamāsi. Nāgamāṇavikā tasmīṃ khaṇe āgantvā milātāni pupphāni disvā “kāmādhimutto esa, na saddhāpabbajito, sakkā naṃ gaṇḥitu”nti ṅatvā purāṇapupphāni nīharitvā aññāni pupphāni āharitvā tatheva navapupphasayanaṃ sajjetvā paṇṇasālaṃ alaṅkaritvā caṅkame pupphāni vikiritvā nāgabhavanameva gatā. So taṃ divasampi pupphasayane sayitvā punadivase cintesi “ko nu kho imaṃ paṇṇasālaṃ alaṅkarotī”ti? So phalāphalattāya āgantvā paṇṇasālato avidūre paṭicchanno aṭṭhāsi. Itarāpi

bahū gandhe ceva pupphāni ca ādāya assamapadaṃ agamāsi. Rājaputto uttamarūpadharaṃ nāgamāṇavikaṃ disvāva paṭibaddhacitto attānaṃ adassetvā tassā paṇṇasālaṃ pavisitvā sayanaṃ sajjanakāle pavisitvā “kāsi tva”nti pucchi. “Ahaṃ nāgamāṇavikā, sāmī”ti. “Sasāmikā assāmikāsi”ti. “Sāmi, ahaṃ pubbe sasāmikā, idāni pana assāmikā vidhavā”. “Tvaṃ pana kattha vāsikosī”ti? “Ahaṃ bārāṇasirañño putto brahmadattakumāro nāma”. “Tvaṃ nāgabhanāṃ pahāya kasmā idha vicarasi”ti? “Sāmi, ahaṃ tattha sasāmikānaṃ nāgamāṇavikānaṃ yasaṃ oloketvā kilesaṃ nissāya ukkaṇṭhitvā tato nikkhamitvā sāmikaṃ pariyesantī vicarāmi”ti. “Tena hi bhaddhe, sādhu, ahampi na saddhāya pabbajito, pitarā pana me nīharitattā idha vasāmi, tvaṃ mā cintayi, ahaṃ te sāmiko bhavissāmi, ubhopi idha samaggavāsaṃ vasissāmā”ti. Sā “sādhu”ti sampaṭicchi. Tato paṭṭhāya te ubhopi tattheva samaggavāsaṃ vasiṃsu. Sā attano ānubhāvena mahārahaṃ gehaṃ māpetvā mahārahaṃ pallaṅkaṃ āharitvā sayanaṃ paññapesi. Tato paṭṭhāya mūlaphalāphalaṃ na khādi, dibbaannaṃpanameva bhujjivā jīvikaṃ kappesi.

Aparabhāge nāgamāṇavikā gabbhaṃ paṭilabhivā puttaṃ vijāyi, sāgaratīre jātattā tassa “sāgarabrahmadatto”ti nāmaṃ karimṃsu. Tassa padasā gamanakāle nāgamāṇavikā dhītaraṃ vijāyi, tassā samuddatīre jātattā “samuddajā”ti nāmaṃ karimṃsu. Atheko bārāṇasivāsiko vanacarako taṃ ṭhānaṃ patvā katapaṭisanthāro rājaputtaṃ sañjānitvā katipāhaṃ tattha vasitvā “deva, ahaṃ tumhākaṃ idha vasanabhāvaṃ rājakulassa āroccasāmi”ti taṃ vanditvā nikkhamitvā nagaraṃ agamāsi. Tadā rājā kālamakāsi. Amaccā tassa sarīrakiccaṃ katvā sattame divase sannipatitvā “arājakaṃ rajjaṃ nāma na saṅghāti, rājaputtassa vasanaṭṭhānaṃ vā atthibhāvaṃ vā na jānāma, phussarathaṃ vissajjetvā rājānaṃ gaṇhissāmā”ti mantayimṃsu. Tasmim̐ khaṇe vanacarako nagaraṃ patvā taṃ kathaṃ sutvā amaccānaṃ santikaṃ gantvā “ahaṃ rājaputtassa santike tayo cattāro divase vasitvā āgatomhī”ti taṃ pavattim̐ ācikkhi. Amaccā tassa sakkāraṃ katvā tena magganāyakena saddhim̐ tattha gantvā katapaṭisanthārā rañño kālakatabhāvaṃ ārocetvā “deva, rajjaṃ paṭipajjāhi”ti āhaṃsu.

So “nāgamāṇavikāya cittaṃ jānissāmī”ti taṃ upasaṅkamitvā “bhaddhe, pitā me kālakato, amaccā mayhaṃ chattaṃ ussāpetuṃ āgatā, gacchāma, bhaddhe, ubhopi dvādasayojanikāya bārāṇasiyā rajjaṃ kāressāma, tvaṃ soḷasannaṃ itthisahassānaṃ jeṭṭhikā bhavissasi”ti āha. “Sāmi, na sakkā mayā gantu”nti. “Kimkāraṇā”ti? “Mayaṃ ghoravisā khippakopā appamattakenapi kujjhāma, sapattiroso ca nāma bhāriyo. Sacāhaṃ kiñci disvā vā sutvā vā kuddhā oloccasāmi, bhasmāmuṭṭhi viya vippakirissati. Iminā kāraṇena na sakkā mayā gantu”nti. Rājaputto punadivasepi yācateva. Atha naṃ sā evamāha – “ahaṃ tāva kenaci pariyāyena na gamissāmi, ime pana me puttā nāgakumārā tava sambhavana jātattā manussajātikā. Sace te mayi sineho atthi, imesu appamatto bhava. Ime kho pana udakabījākaṃ sukhumālā maggaṃ gacchantā vātātapena kilamitvā mareyyuṃ, tasmā ekaṃ nāvaṃ khaṇāpetvā udakassa pūrāpetvā tāya dve puttake udakakīlaṃ kīlāpetvā nagarepi antovatthusmim̐yeva pokkharāṇim̐kāreyyāsi, evaṃ te na kilamissantī”ti.

Sā evaṅca pana vatvā rājaputtaṃ vanditvā padakkhiṇaṃ katvā puttake āliṅgitvā thanantare nipajjāpetvā sīse cumbitvā rājaputtassa niyyādetvā roditvā kanditvā tattheva antaradhāyitvā nāgabhanāṃ agamāsi. Rājaputtopi domanassappatto assupuṇṇehi nettehi nivesanā nikkhamitvā akkhīni puñchitvā amacce upasaṅkami. Te taṃ tattheva abhisiñcitvā “deva, amhākaṃ nagaraṃ gacchāmā”ti vadimṃsu. Tena hi sīghaṃ nāvaṃ khaṇitvā sakaṭaṃ āropetvā udakassa pūretvā udakapiṭṭhe vaṇṇagandhasampannāni nānāpupphāni vikiratha, mama puttā udakabījākaṃ, te tattha kīlāntā sukhaṃ gamissantī”ti. Amaccā tathā karimṃsu. Rājā bārāṇasiṃ patvā alaṅkatanagaraṃ pavisitvā soḷasasahassāhi nāṭakittihī amaccādīhi ca parivuto mahātale nisīditvā sattāhaṃ mahāpānaṃ pivitvā puttānaṃ atthāya pokkharāṇim̐ kāresi. Te nibaddhaṃ tattha kīlimṃsu.

Athekadivasāṃ pokkharāṇiyaṃ udake pavesiyamāne eko kacchapo pavisitvā nikkhamanaṭṭhānaṃ apassanto pokkharāṇitale nipajjivā dāraṅkaṃ kīlānakāle udakato utṭhāya sīsaṃ nīharitvā te oloketvā puna udake nimujji. Te taṃ disvā bhītā pitu santikaṃ gantvā “tāta, pokkharāṇiyaṃ eko yakkho amhe tāsetī”ti āhaṃsu. Rājā “gacchatha naṃ gaṇhathā”ti purise āñāpesi. Te jālaṃ khipitvā kacchapaṃ ādāya

rañño dassetum. Kumārā taṃ disvā “esa, tāta, pisāco”ti viraviṃsu. Rājā puttasiṃhena kacchapassa kujjhivā “gacchathassa kammakāraṇaṃ karothā”ti āṇāpesi. Tatra ekacce “ayaṃ rājaveriko, etaṃ udukkhale musalehi cuṇṇavicuṇṇaṃ kātuṃ vaṭṭati”ti āhaṃsu, ekacce “tīhi pākehi pacitvā khādītum”, ekacce “aṅgāresu uttāpetum,” ekacce “antokaṭāheyeva naṃ pacitum vaṭṭati”ti āhaṃsu. Eko pana udakabhīruko amacco “imaṃ yamunāya āvaṭṭe khipītum vaṭṭati, so tatha mahāvināsaṃ pāpuṇissati. Evarūpā hissa kammakāraṇā natthi”ti āha. Kacchapo tassa kathaṃ sutvā sīsaṃ nīharitvā evamāha – “ambho, kiṃ te mayā aparādho kato, kena maṃ evarūpaṃ kammakāraṇaṃ vicāresi. Mayā hi sakkā itarā kammakāraṇā sahitum, ayaṃ pana atikakkaḷo, mā evaṃ avacā”ti. Taṃ sutvā rājā “imaṃ etadeva kāretum vaṭṭati”ti yamunāya āvaṭṭe khipāpesi. Puriso tathā akāsi. So ekaṃ nāgabhanagāmiṃ udakavāhaṃ patvā nāgabhanamaṃ agamāsi.

Atha naṃ tasmim udakavāhe kīlāntā dhataratṭhanāgarañño puttā nāgamāṇavakā disvā “gaṇhatha naṃ dāsa”nti āhaṃsu. So cintesi “ahaṃ bārāṇasirañño hatthā mucchivā evarūpaṇaṃ pharusānaṃ nāgānaṃ hatthaṃ patto, kena nu kho upāyena mucceyya”nti. So “attheso upāyo”ti musāvādaṃ katvā “tumhe dhataratṭhassa nāgarañño santakā hutvā kasmā evaṃ vadetha, ahaṃ cittaṅgūlo nāma kacchapo bārāṇasirañño dūto, dhataratṭhassa santikaṃ āgato, amhākaṃ rājā dhataratṭhassa dhītaṃ dātukāmo maṃ paṇiṇi, tassa maṃ dassethā”ti āha. Te somanassajātā taṃ ādāya rañño santikaṃ gantvā tamatthaṃ ārocesum. Rājā “ānetha na”nti taṃ pakkosāpetvā disvāva anattamaṇo hutvā “evaṃ lāmakasārīro dūtakammaṃ kātuṃ na sakkoti”ti āha. Taṃ sutvā kacchapo “kiṃ pana, mahārāja, dūtehi nāma tālappamaṇehi bhavitabbaṃ, sarīrañhi khuddakaṃ vā mahantaṃ vā appamaṇaṃ, gatagataṭṭhāne kammanippādanameva pamāṇaṃ. Mahārāja, amhākaṃ rañño bahū dūtā. Thale kammaṃ manussā karonti, ākāse pakkhino, udake ahameva. Ahañhi cittaṅgūlo nāma kacchapo ṭhānantarappatto rājavallabho, mā maṃ paribhāsathā”ti attano guṇaṃ vaṇṇesi. Atha naṃ dhataratṭho pucchi “kena panatthena rañña pesitosi”ti. Mahārāja, rājā maṃ evamāha “mayā sakalajambudīpe rājūhi saddhiṃ mittadhammo kato, idāni dhataratṭhena nāgarañña saddhiṃ mittadhammaṃ kātuṃ mama dhītaṃ samuddajaṃ dammi”ti vatvā maṃ paṇiṇi. “Tumhe papañcaṃ akatvā mayā saddhiṃyeva purisaṃ pesetvā divasaṃ vavatthapetvā dārikaṃ gaṇhathā”ti. So tussitvā tassa sakkāraṃ katvā tena saddhiṃ cattāro nāgamāṇavake pesesi “gacchatha, rañño vacanaṃ sutvā divasaṃ vavatthapetvā ethā”ti. Te “sādhū”ti vatvā kacchapaṃ gahetvā nāgabhanā nikkhamiṃsu.

Kacchapo yamunāya bārāṇasiyā ca antare ekaṃ padumasaraṃ disvā ekenupāyena palāyitukāmo evamāha – “bho nāgamāṇavakā, amhākaṃ rājā puttadārā cassa maṃ udake gocarattā rājanivesanaṃ āgataṃ disvāva padumāni no dehi, bhisamūlāni dehīti yācanti. Ahaṃ tesaṃ atthāya tāni gaṇhissāmi, ettha maṃ vissajjetvā maṃ apassantāpi puretaraṃ rañño santikaṃ gacchatha, ahaṃ vo tattheva passissāmi”ti. Te tassa saddahitvā taṃ vissajjesum. So tatha ekamante nilīyi. Itarepi naṃ adisvā “rañño santikaṃ gato bhavissati”ti māṇavakavaṇṇena rājānaṃ upasaṅkamimsu. Rājā paṭisanthāraṃ katvā “kuto āgatathā”ti pucchi. “Dhataratṭhassa santikā, mahārāja”ti. “Kiṃkāraṇā idhāgatā”ti? “Mahārāja, mayā tassa dūtā, dhataratṭho vo ārogyaṃ pucchati. Sace yaṃ vo icchatha, taṃ no vadetha. Tumhākaṃ kira dhītaṃ samuddajaṃ amhākaṃ rañño pādapariṇāyikaṃ katvā dethā”ti imamatthaṃ pakāsentā paṭhamāṃ gāthamāhaṃsu –

**784.** “Yaṃ kiñci ratanaṃ atthi, dhataratṭhanivesane;  
Sabbāni te upayantu, dhītaṃ dehi rājino”ti.

Tattha **sabbāni te upayantūti** tassa nivesane sabbāni ratanāni tava nivesanaṃ upagacchantu.

Taṃ sutvā rājā dutiyaṃ gāthamāha –

**785.** “Na no vivāho nāgehi, katapubbo kudācanaṃ;  
Taṃ vivāhaṃ asaṃyuttaṃ, kathaṃ amhe karomase”ti.

Tattha **asamyuttanti** ayuttaṃ tiracchānehi saddhiṃ samsaggaṃ ananucchavikaṃ. **Amheti** amhe manussajātikā samānā kathaṃ tiracchānagatasambandhaṃ karomāti.

Taṃ sutvā nāgamāṇavakā “sace te dhataratṭhena saddhiṃ sambandho ananucchaviko, atha kasmā attano upatṭhākaṃ cittacūlaṃ nāma kacchapaṃ ‘samuddajaṃ nāma te dhītaraṃ dammi’ ti amhākaṃ rañño pesesi? Evaṃ pesetvā idāni te amhākaṃ rājānaṃ paribhavaṃ karontassa kattabbayuttakaṃ mayaṃ jānissāma. Mayañhi nāgamāṇavakā” ti vatvā rājānaṃ tajjentā dve gāthā abhāsimsu –

**786.** “Jīvitaṃ nūna te cattaṃ, ratṭhaṃ vā manujādhipa;  
Na hi nāge kupitamhi, ciraṃ jīvanti tādisā.

**787.** “Yo tvaṃ deva manussosi, iddhimantaṃ aniddhimā;  
Varuṇassa niyaṃ puttaṃ, yāmuṇaṃ atimaññasī” ti.

Tattha **ratṭhaṃ vāti** ekamsena tayā jīvitaṃ vā ratṭhaṃ vā cattaṃ. **Tādisāti** tumhādisā evaṃ mahānubhāve nāge kupite ciraṃ jīvituṃ na sakkonti, antarāva antaradhāyanti. **Yo tvaṃ, deva, manussosīti** deva, yo tvaṃ manusso samāno. **Varuṇassāti** varuṇanāgarājassa. **Niyaṃ puttanti** ajjhattikaputtaṃ. **Yāmunanti** yamunāya heṭṭhā jātaṃ.

Tato rājā dve gāthā abhāsi –

**788.** “Nātimaññāmi rājānaṃ, dhataratṭhaṃ yasassinaṃ;  
Dhataratṭho hi nāgānaṃ, bahūnamapi issaro.

**789.** “Ahi mahānubhāvopi, na me dhītaramāraho;  
Khattiyo ca videhānaṃ, abhijātā samuddajā” ti.

Tattha **bahūnamapīti** pañcayojanasatikassa nāgabhavanassa issarabhāvaṃ sandhāyevamāha. **Na me dhītaramārahoti** evaṃ mahānubhāvopi pana so ahijātikattā mama dhītaraṃ araho na hoti. **“Khattiyo ca videhāna”** nti idaṃ mātīpakke ñātake dassento āha. **Samuddajāti** so ca videharājaputto mama dhītā samuddajā cāti ubhopi abhijātā. Te aññamaññaṃ saṃvāsaṃ arahanti. Na hesā maṇḍūkabhakkhassa sappassa anucchavikāti āha.

Nāgamāṇavakā taṃ tattheva nāsāvātena māretukāmā hutvāpi “amhākaṃ divasaṃ vavattāpanatthāya pesitā, imaṃ māretvā gantuṃ na yuttaṃ, gantvā rañño ācikkhitvā jānissāmā” ti tattheva antarahitā “kiṃ, tātā, laddhā vo rājadhītā” ti raññā pucchitā kujjhivā “kiṃ, deva, amhe akāraṇā yattha vā tattha vā pesesi. Sacepi māretukāmo, idheva no mārehi. So tumhe akkosati paribhāsati, attano dhītaraṃ jātimānena ukkipatī” ti tena vuttañca avuttañca vatvā rañño kodhaṃ uppādayimsu. So attano parisāṃ sannipātetuṃ āṇāpento āha –

**790.** “Kambalassatarā utṭhentu, sabbe nāge nivedaya;  
Bārāṇasiṃ pavajjantu, mā ca kañci viheṭṭhayu” nti.

Tattha **kambalassatarā utṭhentūti** kambalassatarā nāma tassa mātupakkhikā sinerupāde vasananāgā, te ca utṭhahantu. Aññe ca catūsu disāsu anudisāsu yattakā vā mayhaṃ vacanakarā, te sabbe nāge nivedaya, gantvā jānāpetha, khippaṃ kira sannipātetthāti āṇāpento evamāha. Tato sabbeheva sīghaṃ sannipātehi “kiṃ karoma, devā” ti vutte “sabbepi te nāgā bārāṇasiṃ pavajjantū” ti āha. “Tattha gantvā kiṃ kātappaṃ, deva, taṃ nāsāvātappahārena bhasmaṃ karomā” ti ca vutte rājadhītari paṭibaddhacittatāya tassā vināsaṃ anicchanto **“mā ca kañci viheṭṭhayu”** nti āha, tumhesu koci kañci mā viheṭṭhayāti attho. Ayameva vā paṭho.

Atha naṃ nāgā “sace koci manusso na viheṭhetabbo, tattha gantvā kiṃ karissāmā”ti āhaṃsu. Atha ne “idañcidañca karotha, ahampi idaṃ nāma karissāmī”ti ācikkhanto gāthādvayamāha –

791. “Nivesanesu sobbhesu, rathiyā caccasesu ca;  
Rukkhaggesu ca lambantu, vitatā toraṇesu ca.

792. “Ahampi sabbasetena, mahatā sumahaṃ purama;  
Parikkhipissaṃ bhogehi, kāsīnaṃ janayaṃ bhaya”nti.

Tattha **sobbhesūti** pokkharāṇīsu. **Rathiyāti** rathikāya. **Vitatāti** vitatasarīrā mahāsarīrā hutvā etesu ceva nivesanādīsu dvārorāṇesu ca olambantu, ettakaṃ nāgā karontu, karontā ca nivesane tāva mañcapīṭhānaṃ heṭṭhā ca upari ca antogabbhabahigabbhādīsu ca pokkharāṇīyaṃ udakapīṭṭhe rathikādīnaṃ passesu ceva thalesu ca mahantāni sarīrāni māpetvā mahante phaṇe katvā kammāragaggārī viya dhamamānā “susū”ti saddaṃ karontā olambatha ca nipajjatha ca. Attānaṃ pana taruṇadārakānaṃ jarājiṇṇānaṃ gabbhinīṭṭhīnaṃ samuddajāya cāti imesaṃ catunnaṃ mā dassayittha. Ahampi sabbasetena mahantena sarīrena gantvā sumahantaṃ kāsīpuraṃ sattakkhattuṃ bhogehi parikkhipissaṃ, mahantena phaṇena naṃ chādetvā ekandhakāraṃ katvā kāsīnaṃ bhayaṃ janayanto “susū”ti saddaṃ muñcissāmīti.

Atha sabbe nāgā tathā akaṃsu. Tamatthaṃ pakāsento satthā āha –

793. “Tassa taṃ vacanaṃ sutvā, uragānekavaṇṇino;  
Bārāṇasiṃ pavajjimsu, na ca kañci viheṭṭhayuṃ.

794. “Nivesanesu sobbhesu, rathiyā caccasesu ca;  
Rukkhaggesu ca lambimsu, vitatā toraṇesu ca.

795. “Tesu disvāna lambante, puthū kandimsu nāriyo;  
Nāge soṇḍikate disvā, passasante muhuṃ muhuṃ.

796. “Bārāṇasī pabyathitā, āturā samapajjatha;  
Bāhā paggayha pakkanduṃ, dhītaraṃ dehi rājino”ti.

Tattha **anekavaṇṇinoti** nīlādivasena anekavaṇṇā. Evarūpāni hi te rūpāni māpayimsu. **Pavajjimsūti** aḍḍharattasamaye pavisiṃsu. **Lambimsūti** dhataratṭhena vuttaniyāmeneva te sabbesu ṭhānesu manussānaṃ sañcāraṃ pacchinditvā olambimsu. Dūtā hutvā āgatā pana cattāro nāgamāṇavakā raṇo sayanassa cattāro pāde parikkhipitvā uparisīse mahante phaṇe katvā tuṇḍehi sīsaṃ paharantā viya dāṭhā vivaritvā passasantā aṭṭhaṃsu. Dhataratṭhopi attanā vuttaniyāmena nagaraṃ paṭicchādesi. Pabujjhamānā purisā yato yato hatthaṃ vā pādaṃ vā pasārenti, tattha tattha sappe chupitvā “sappo, sappo”ti viravanti. **Puthū kandimsūti** yesu gehesu dīpā jalanti, tesu itthiyo pabuddhā dvārorāṇagopānasiyo oloketvā olambante nāge disvā bahū ekappahāreneva kandimsu. Evaṃ sakalanagaraṃ ekakolāhalaṃ ahoṣi. **Soṇḍikateti** kataphaṇe.

**Pakkandunti** vibhātāya rattiyā nāgānaṃ assāsavātena sakalanagare rājanivesane ca uppātiyamāne viya bhītā manussā “nāgarājāno kissa no viheṭṭhathā”ti vatvā tumhākaṃ rājā “dhītaraṃ dassāmī”ti dhataratṭhassa dūtaṃ pesetvā puna tassa dūtehi āgantvā “dehī”ti vutto amhākaṃ rājānaṃ akkosati paribhāsati. “Sace amhākaṃ raṇṇo dhītaraṃ na dassati, sakalanagarassa jīvitaṃ natthī”ti vutte “tena hi no, sāmi, okāsaṃ detha, mayaṃ gantvā rājānaṃ yācissāmā”ti yācantā okāsaṃ labhitvā rājadvāraṃ gantvā mahantena ravena pakkantiṃsu. Bhariyāyopissa attano attano gabbhesu nipannakāva “deva, dhītaraṃ dhataratṭharaṇṇo dehī”ti ekappahārena kandimsu. Tepi cattāro nāgamāṇavakā “dehī”ti tuṇḍehi sīsaṃ paharantā viya dāṭhā vivaritvā passasantā aṭṭhaṃsu.

So nipannakova nagaravāsīnañca attano ca bhariyānaṃ paridevitasaddaṃ sutvā catūhi ca nāgamāṇavakehi tajjitattā maraṇabhaya bhīto “mama dhītarāṃ samuddajaṃ dhataratthassa dammi”ti tikkhattuṃ avaca. Taṃ sutvā sabbe pi nāgarājāno tigāvutamattaṃ paṭikkamitvā devanagaraṃ viya ekaṃ nagaraṃ māpetvā tattha tthitā “dhītarāṃ kira no pesetū”ti paṇṇākāraṃ paṇiṇiṃsu. Rājā tehi ābhataṃ paṇṇākāraṃ gahetvā “tumhe gacchatha, ahaṃ dhītarāṃ amaccānaṃ hatthe paṇiṇissāmi”ti te uyyojetvā dhītarāṃ pakkosāpetvā uparipāsādaṃ āropetvā sīhapañjaraṃ vivaritvā “amma, passetaṃ alaṅkatanagaraṃ, tvaṃ ettha etassa rañño aggamaheṣī bhavissasi, na dūre ito taṃ nagaraṃ, ukkaṇṭhitakāleyeva idha āgantūṃ sakkā, ettha gantabba”nti saññāpetvā sīsaṃ nhāpetvā sabbālaṅkārehi alaṅkaritvā paṭicchannayogge nisīdāpetvā amaccānaṃ hatthe datvā pāhesi. Nāgarājāno paccuggamaṇaṃ katvā mahāsakkāraṃ kariṃsu. Amaccā nagaraṃ pavisitvā taṃ tassa datvā bahūṃ dhaṇaṃ ādāya nivattiṃsu. Te rājadhītarāṃ pāsādaṃ āropetvā alaṅkatadibbasayane nipajjāpesuṃ. Taṅkhaṇaṇṇeva naṃ nāgamāṇavikā khujjādivesaṃ gahetvā manussaparicārikā viya parivārayiṃsu. Sā dibbasayane nipannamattāva dibbaphassaṃ phusitvā niddaṃ okkami.

Dhatarattho taṃ gahetvā saddhiṃ nāgāparisāya tattha antarahito nāgabhaneyeva pāturaḥosi. Rājadhītaṃ pabujjhitvā alaṅkatadibbasayanaṃ aññe ca suvaṇṇapāsādamaṇipāsādādayo uyyānapokkharāṇiyo alaṅkatadevanagaraṃ viya nāgabhanānaṃ disvā khujjādiviparicārikāyo pucchi “idaṃ nagaraṃ ativiya alaṅkataṃ, na amhākaṃ nagaraṃ viya, kassetā”nti. “Sāmikassa te santakaṃ, devi, na appapuñña evarūpaṃ sampattiṃ labhanti, mahāpuññaṭāya te ayaṃ laddhā”ti. Dhataratthopi pañcayojanasatike nāgabhanāne bheriṃ carāpesi “yo samuddajāya sappavaṇṇaṃ dasseti, tassa rājadaṇḍo bhavissati”ti. Tasmā ekopi tassā sappavaṇṇaṃ dassetuṃ samattho nāma nāhosi. Sā manussalokasaññāya eva tattha tena saddhiṃ sammodamānā piyasaṃvāsaṃ vasi.

Nagarakaṇḍaṃ niṭṭhitaṃ.

### Uposathakaṇḍaṃ

Sā aparabhāge dhatarattham paṭicca gabbhaṃ paṭilabhivā puttaṃ vijāyi, tassa piyadassanattā “sudassano”ti nāmaṃ kariṃsu. Punāparaṃ puttaṃ vijāyi, tassa “datto”ti nāmaṃ akaṃsu. So pana bodhisatto. Punekaṃ puttaṃ vijāyi, tassa “subhogo”ti nāmaṃ kariṃsu. Aparampi puttaṃ vijāyi, tassa “ariṭṭho”ti nāmaṃ kariṃsu. Iti sā cattāro putte vijāyitvāpi nāgabhanabhāvaṃ na jānāti. Athekadivasaṃ taruṇanāgā ariṭṭhassa ācikkhiṃsu “tava mātā manussitthī, na nāginī”ti. Ariṭṭho “vīmaṃsissāmi na”nti ekadivasaṃ thanaṃ pivantova sappasarīraṃ māpetvā naṅguṭṭhakhaṇḍena mātu piṭṭhipāde ghaṭṭesi. Sā tassa sappasarīraṃ disvā bhītatasiṭā mahāravaṃ ravitvā taṃ bhūmiyaṃ khipanti nakhena tassa akkhiṃ bhindi. Tato lohitaṃ pagghari. Rājā tassā saddaṃ sutvā “kissesā viravati”ti pucchitvā ariṭṭhena katakiriyāṃ sutvā “gaṇhatha, naṃ dāsaṃ gahetvā jīvitaṅkhaṇḍaṃ pāpethā”ti tajjento āgacchi. Rājadhītaṃ tassa kuddhabhāvaṃ ṇatvā puttasiṇehena “deva, puttassa me akkhi bhinnaṃ, khamathetassāparādha”nti āha. Rājā etāya evaṃ vadantiyā “kiṃ sakkā kātu”nti khami. Taṃ divasaṃ sā “idaṃ nāgabhanāna”nti aññāsi. Tato ca paṭṭhāya ariṭṭho kāṇāriṭṭho nāma jāto. Cattāropi puttā viññutaṃ pāpuṇiṃsu.

Atha nesāṃ pitā yojanasatikāṃ yojanasatikāṃ katvā rajjamadāsi, mahanto yaso ahoṣi. Soḷasa soḷasa nāgakaññāsahassāni parivārayiṃsu. Pitu ekayojanasatikameva rajjaṃ ahoṣi. Tayo puttā māse māse mātāpitaro passitūṃ āgacchanti, bodhisatto pana anvaddhamāsaṃ āgacchati. Nāgabhanāne samuṭṭhitaṃ pañhaṃ bodhisattova katheti. Pitarā saddhiṃ virūpakkhamahārājassapi upaṭṭhānaṃ gacchati, tassa santike samuṭṭhitaṃ pañhampi sova katheti. Athekadivasaṃ virūpakkhe nāgāparisāya saddhiṃ tidasapuraṃ gantvā sakkāṃ parivāretvā nisinne devānaṃ antare pañho samuṭṭhāsi. Taṃ koci kathetuṃ nāsakkhi, pallaṅkavaragato pana hutvā mahāsattova kathesi. Atha naṃ devarājā dibbagandhapupphehi pūjetvā “datta, tvaṃ pathavisamāya vipulāya paññāya samannāgato, ito paṭṭhāya bhūridatto nāma hohī”ti “bhūridatto” tissa nāmaṃ akāsi. So tato paṭṭhāya sakkassa upaṭṭhānaṃ gacchanto alaṅkatavejayaṇṇapāsādaṃ devaccharāhi ākiṇṇaṃ atimanoharaṃ sakkassa sampattiṃ disvā

devaloke piyaṃ katvā “kiṃ me iminā maṇḍūkabhakkhena attabhāvena, nāgabhanam gantvā uposathavāsam vasitvā imasmiṃ devaloke uppattikāraṇaṃ karissāmi”ti cintetvā nāgabhanam gantvā mātāpitaro āpucchi “ammatā, ahaṃ uposathakammaṃ karissāmi”ti. “Sādhu, tāta, karohi, karonto pana bahi agantvā imasmiññeva nāgabhavane ekasmiṃ suññavimāne karohi, bahigatānaṃ pana nāgānaṃ mahantaṃ bhaya”nti.

So “sādhu”ti paṭissuṇitvā tattheva suññavimāne rājuyyāne uposathavāsam vasati. Atha naṃ nānātūriyahatthā nāgakaññā parivārenti. So “na mayhaṃ idha vasantassa uposathakammaṃ matthakaṃ pāpuṇissati, manussapathaṃ gantvā karissāmi”ti cintetvā nivāraṇabhayena mātāpitūnaṃ anārocetvā attano bhariyāyo āmantetvā “bhadde, ahaṃ manussalokaṃ gantvā yamunātīre nigrodharukkho atthi, tassavidūre vammikamatthake bhoge ābhujitvā caturaṅgasamannāgataṃ uposathaṃ adhiṭṭhāya nipajjitvā uposathakammaṃ karissāmi. Mayā sabbarattim nipajjitvā uposathakamme kate aruṇuggamanavelāyameva tumhe dasa dasa itthiyo ādāya vārena vārena tūriyahatthā mama santikaṃ āgantvā maṃ gandhehi ca pupphehi ca pūjetvā gāyitvā naccitvā maṃ ādāya nāgabhanameva āgacchathā”ti vatvā tattha gantvā vammikamatthake bhoge ābhujitvā “yo mama cammaṃ vā nhāruṃ vā aṭṭhiṃ vā ruhiraṃ vā icchati, so āharatū”ti caturaṅgasamannāgataṃ uposathaṃ adhiṭṭhāya naṅgalasīappamāṇaṃ sarīraṃ māpetvā nipanno uposathakammamakāsi. Aruṇe uṭṭhahanteyeva taṃ nāgamānavikā āgantvā yathānusiṭṭhaṃ paṭipajjitvā nāgabhanam ānenti. Tassa iminā niyāmena uposathaṃ karontassa dīgho addhā vītivatto.

Uposathakhaṇḍaṃ niṭṭhitaṃ.

### Garulakhaṇḍaṃ

Tadā eko bārāṇasidvāragāmaṃvāsī brāhmaṇo somadattena nāma puttana saddhim araññaṃ gantvā sūlayantapāsavāgurādīhi oḍḍetvā mige vadhitvā maṃsaṃ kājenāharitvā vikkiṇanto jīvikaṃ kappesi. So ekadivasam antamaso godhāmatampi alabhitvā “tāta somadatta, sace tucchahatthā gamissāma, mātā te kujjhissati, yaṃ kiñci gahetvā gamissāma”ti vatvā bodhisattassa nipannavammikattāhānābhimukho gantvā pānīyaṃ pātuṃ yamunaṃ otarantānaṃ migānaṃ padavalañjaṃ disvā “tāta, migamaggo paññāyati, tvaṃ paṭikkamitvā tiṭṭhāhi, ahaṃ pānīyattāya āgataṃ migam vijjhissāmi”ti dhanuṃ ādāya migam olokeno ekasmiṃ rukkhamūle aṭṭhāsi. Atheko migo sāyanhasamaye pānīyaṃ pātuṃ āgato. So taṃ vijjhi. Migo tattha apatitvā saravegena tajjito lohiteṇa paggharantena palāyi. Pitāputtā naṃ anubandhitvā patitattāhāne maṃsaṃ gahetvā araññaṃ nikkhamitvā sūriyatthaṅgamanavelāya taṃ nigrodham patvā “idāni akālo, na sakkā gantuṃ, idheva vasissāma”ti maṃsaṃ ekamante ṭhapetvā rukkham āruya viṭapantare nipajjimsu. Brāhmaṇo paccūsasamaye pabujjhivā migasaddasavanāya sotam odahi.

Tasmiṃ khaṇe nāgamānavikāyo āgantvā bodhisattassa pupphāsanaṃ paññāpesuṃ. So ahisarīraṃ antaradhāpetvā sabbālankārapaṭimaṇḍitaṃ dibbasarīraṃ māpetvā sakkalīlāya pupphāsane nisīdi. Nāgamānavikāpi naṃ gandhamālādīhi pūjetvā dibbatūriyāni vādetvā naccagītaṃ paṭṭhapesuṃ. Brāhmaṇo taṃ saddaṃ sutvā “ko nu kho esa, jānissāmi na”nti cintetvā “putta, puttā”ti vatvāpi puttaṃ pabodhetuṃ asakkonto “sayatu esa, kilanto bhavissati, ahameva gamissāmi”ti rukkhaṃ oruyha tassa santikaṃ agamāsi. Nāgamānavikā taṃ disvā saddhim tūriyehi bhūmiyaṃ nimujjitvā attano nāgabhanameva gatā. Bodhisatto ekakova ahoṣi. Brāhmaṇo tassa santikaṃ gantvā pucchanto gāthādvayamāha –

797. “Pupphābhihārassa vanassa majjhe, ko lohitakkho vitatantaramso;  
Kā kambukāyūradharā suvatthā, tiṭṭhanti nāriyo dasa vandamānā.

798. “Ko tvaṃ brahābāhu vanassa majjhe, virocasi ghatasittova aggi;  
Mahesakkho aññatarosi yakkho, udāhu nāgosi mahānubhāvo”ti.

Tattha **pupphābhīhārassā**ti bodhisattassa pūjanatthāya ābhatena dibbapupphābhīhārena samannāgatassa. **Koti** ko nāma tvaṃ. **Lohitakkho**ti rattakkho. **Vitatantaraṃsoti** puthulaantaraṃso. **Kambukāyūradharā**ti suvaṇṇālaṅkāradharā. **Brahābhū**ti mahābhū.

Taṃ sutvā mahāsatto “sacepi ‘sakkādīsu aññatarohamasmi’ti vakkhāmi, saddahissatevāyaṃ brāhmaṇo, ajja pana mayā saccameva kathetum vaṭṭati”ti cintevā attano nāgarājabhāvaṃ kathento āha –

**799.** “Nāgohamasmi iddhimā, tejasī duratikkamo;  
Ḍaṃseyyaṃ tejasā kuddho, phītaṃ janapadaṃ api.

**800.** “Samuddajā hi me mātā, dhatarattho ca me pitā;  
Sudassanakaniṭṭhosmi, bhūridattoti maṃ vidū”ti.

Tattha **tejasī**ti visatejena tejavā. **Duratikkamoti** aññena atikkamituṃ asakkuṇeyyo. **Ḍaṃseyyanti** sacāhaṃ kuddho phītaṃ janapadaṃ api ḍaṃseyyaṃ, pathaviyaṃ mama dāṭhāya patitamattāya saddhiṃ pathaviyā mama tejena so sabbo janapado bhasmā bhavyeyāti vadati. **Sudassanakaniṭṭhosmī**ti ahaṃ mama bhātu sudassanassa kaniṭṭho asmi. **Vidū**ti evaṃ mamaṃ pañcayojanasatike nāgabhavane jānantīti.

Idaṅca pana vatvā mahāsatto cintesi “ayaṃ brāhmaṇo caṇḍo pharuso, ahituṇḍikassa ārocetvā uposathakammaṃ me antarāyampi kareyya, yaṃ nūnāhaṃ imaṃ nāgabhavanaṃ netvā mahantaṃ yasaṃ datvā uposathakammaṃ addhaniyaṃ kareyya”nti. Atha naṃ āha “brāhmaṇa, mahantaṃ te yasaṃ dassāmi, ramaṇīyaṃ nāgabhavanaṃ, ehi tattha gacchāmā”ti. “Sāmi, putto me atthi, tasmim gacchante āgamissāmi”ti. Atha naṃ mahāsatto “gaccha, brāhmaṇa, ānehi na”nti vatvā attano āvāsaṃ ācikkhanto āha –

**801.** “Yaṃ gambhīraṃ sadāvaṭṭaṃ, rahadaṃ bhesmaṃ pekkhasi;  
Esa dībyo mamāvāso, anekasataporiso.

**802.** “Mayūraakoṅcābhirudaṃ, nīlodaṃ vanamajjhato;  
Yamaṃ pavisa mā bhīto, khemaṃ vattavataṃ siva”nti.

Tattha **sadāvaṭṭanti** sadā pavattaṃ āvaṭṭaṃ. **Bhesmanti** bhayānakaṃ. **Pekkkhasī**ti yaṃ evarūpaṃ rahadaṃ passasi. **Mayūraakoṅcābhirudanti** ubhosu tīresu vanaghaṭṭāyaṃ vasantehi mayūrehi ca koṅcehi ca abhirudaṃ upakūjitaṃ. **Nīlodanti** nīlasalilaṃ. **Vanamajjhato**ti vanamajjhena sandamānaṃ. **Pavisa mā bhīto**ti evarūpaṃ yamaṃ abhīto hutvā pavisa. **Vattavataṃ**ti vattasampannānaṃ ācāravantaṃ vasanabhūmiṃ pavisa, gaccha, brāhmaṇa, puttaṃ ānehīti.

Brāhmaṇo gantvā puttassa tamatthaṃ ārocetvā puttaṃ ānesi. Mahāsatto te ubhopi ādāya yamunātīraṃ gantvā tīre ṭhito āha –

**803.** “Tattha patto sānucaro, saha puttena brāhmaṇa;  
Pūjito mayhaṃ kāmehi, sukhaṃ brāhmaṇa vacchasī”ti.

Tattha **tattha pattoti** tvaṃ amhākaṃ nāgabhavanaṃ patto hutvā. **Mayhanti** mama santakehi kāmehi pūjito. **Vacchasī**ti tattha nāgabhavane sukhaṃ vasissati.

Evaṃ vatvā mahāsatto ubhopi te pitāputte attano ānubhāvena nāgabhavanaṃ ānesi. Tesam tattha dibbo attabhāvo pātubhavi. Atha nesam mahāsatto dibbasampattiṃ datvā cattāri cattāri nāgakaññāsātāni adāsi. Te mahāsampattiṃ anubhaviṃsu. Bodhisattopi appamatto uposathakammaṃ akāsi. Anvaḍḍhamāsaṃ mātāpitūnaṃ upaṭṭhānaṃ gantvā dhammakathaṃ kathetvā tato ca brāhmaṇassa santikaṃ gantvā ārogyaṃ pucchitvā “yena te attho, taṃ vadeyyāsi, anukkaṇṭhamāno abhiramā”ti vatvā



somadattenapi saddhiṃ paṭisanthāraṃ katvā attano nivesanaṃ agacchi. Brāhmaṇo ekasaṃvaccharam nāgabhavane vasitvā mandapuññātāya ukkaṇṭhito manussalokaṃ gantukāmo ahoṣi. Nāgabhavanamassa lokantaranirayo viya alaṅkatapāsādo bandhanāgāraṃ viya alaṅkatanāgakaññā yakkhiniyo viya upaṭṭhahiṃsu. So “ahaṃ tāva ukkaṇṭhito, somadattassapi cittaṃ jānissāmī” ti tassa santikaṃ gantvā āha “kiṃ, tāta, ukkaṇṭhasī” ti? “Kasmā ukkaṇṭhissāmi na ukkaṇṭhāmi, tvaṃ pana ukkaṇṭhasi, tāta” ti? “Āma tāta” ti. “Kiṃkāraṇā” ti. “Tava mātu ceva bhātubhaginīnañca adassanena ukkaṇṭhāmi, ehi, tāta somadatta, gacchāmā” ti. So “na gacchāmī” ti vatvāpi punappunaṃ pitarā yāciyamāno “sādhū” ti sampaṭicchi.

Brāhmaṇo “puttassa tāva me mano laddho, sace panāhaṃ bhūridattassa ‘ukkaṇṭhitomhī’ ti vakkhāmi, atirekataraṃ me yasaṃ dassati, evaṃ me gamanaṃ na bhavissati. Ekena pana upāyena tassa sampattiṃ vaṇṇetvā ‘tvaṃ evarūpaṃ sampattiṃ pahāya kiṃkāraṇā manussalokaṃ gantvā uposathakammaṃ karosī’ ti pucchitvā ‘saggaṭṭhāyā’ ti vutte ‘tvaṃ tāva evarūpaṃ sampattiṃ pahāya saggaṭṭhāyā uposathakammaṃ karosi, kimaṅgaṃ pana mayaṃyeva paradhanena jīvikaṃ kappema, ahampi manussalokaṃ gantvā ñātaka disvā pabbajitvā samaṇadhammaṃ karissāmī’ ti naṃ saññāpessāmi. Atha me so gamanaṃ anujānissati” ti cintetvā ekadivasaṃ tenāgantvā “kiṃ, brāhmaṇa, ukkaṇṭhasī” ti pucchito “tumhākaṃ santikā amhākaṃ na kiñci parihāyati” ti kiñci gamanapaṭibaddhaṃ avatvāva ādito tāva tassa sampattiṃ vaṇṇento āha –

- 804.** “Samā samantaparito, pahūtatagarā mahī;  
Indagopakasañchannā, sobhati harituttamā.
- 805.** “Rammāni vanacetyāni, rammā haṃsūpakūjitā;  
Opupphapaddhā tiṭṭhanti, pokkharañño sunimmitā.
- 806.** “Aṭṭhaṃsā sukatā thambhā, sabbe veḷuriyāmayā;  
Sahassathambhā pāsādā, pūrā kaññāhi jotare.
- 807.** “Vimānaṃ upapannosi, dibyaṃ puññehi attano;  
Asambādhaṃ sivaṃ rammaṃ, accantasukhasaṃhitā.
- 808.** “Maññe sahasanettassa, vimānaṃ nābhikaṅkhasi;  
Iddhī hi tyāyaṃ vipulā, sakkasseva jutīmato” ti.

Tattha **samā samantaparitoti** parisamantato sabbadisābhāgesu ayaṃ tava nāgabhavane mahī suvaṇṇarajatamaṇi muttvāvalukāparikiṇṇā samatalā. **Pahūtatagarā mahīti** bahukehi tagaragacchehi samannāgatā. **Indagopakasañchannāti** suvaṇṇaindagopakehi sañchannā. **Sobhati harituttamāti** haritavaṇṇadabbatiṇasañchannā sobhatīti attho. **Vanacetyānīti** vanaghaṭā. **Opupphapaddhāti** pupphitvā patitehi padumapattehi sañchannā udakapiṭṭhā. **Sunimmitāti** tava puññasampattiyā suṭṭhu nimmitā. **Aṭṭhaṃsāti** tava vasanaṃpāsādesu aṭṭhaṃsā sukatā veḷuriyāmayā thambhā. Tehi thambhehi sahasathambhā tava pāsādā nāgakaññāhi pūrā vijjotanti. **Upapannosīti** evarūpe vimāne nibbattosīti attho. **Sahasanettassa vimānanti** sakkassa vejayantapāsādaṃ. **Iddhī hi tyāyaṃ vipulāti** yasmā tavāyaṃ vipulā iddhi, tasmā tvaṃ tena uposathakammaṃ sakkassa vimānampi na patthesi, aññaṃ tato uttari mahantaṃ ṭhānaṃ patthesīti maññāmi.

Taṃ sutvā mahāsatto “mā hevaṃ, brāhmaṇa, avaca, sakkassa yasaṃ paṭicca amhākaṃ yaso sinerusantike sāsapo viya, mayaṃ tassa paricārakepi na agghāmā” ti vatvā gāthamāha –

- 809.** “Manasāpi na pattabbo, ānubhāvo jutīmato;  
Paricārayamānānaṃ, saindānaṃ vasavattina” nti.

Tassattho – brāhmaṇa, sakkassa yaso nāma ekaṃ dve tayo cattāro vā divase “ettako siyā” ti manasā cintentenapi na abhipattabbo. Yepi naṃ cattāro mahārājāno paricārenti, tesam devarājānaṃ paricārayamānānaṃ indaṃ nāyakaṃ katvā carantānaṃ saindānaṃ vasavattīnaṃ catunnaṃ lokapālānaṃ yasassapi amhākaṃ tiracchānagatānaṃ yaso soḷasiṃ kalaṃ nagghatīti.

Evañca pana vatvā “idaṃ te maññe saḥassanettassa vimāna” nti vacanaṃ sutvā ahaṃ taṃ anussarim. “Ahañhi vejayantaṃ patthento uposathakammaṃ karomī” ti tassa attano patthanaṃ ācikkhanto āha –

**810.** “Taṃ vimānaṃ abhihjhāya, amarānaṃ sukhesinaṃ;  
Uposathaṃ upavasanto, semi vammikamuddhanī” ti.

Tattha **abhihjhāyā**ti patthetvā. **Amarānanti** dīghāyukānaṃ devānaṃ. **Sukhesinanti** esitasukhānaṃ sukhe patiṭṭhitānaṃ.

Kaṃ sutvā brāhmaṇo “idāni me okāso laddho” ti somanassappatto gantuṃ āpucchanto gāthādvayamāha –

**811.** “Ahañca migamesāno, saputto pāvisiṃ vanaṃ;  
Taṃ maṃ mataṃ vā jīvaṃ vā, nābhivedenti ñātakā.

**812.** “Āmantaye bhūridattaṃ, kāsiputtaṃ yasassinaṃ;  
Tayā no samanūññātā, api passemu ñātake” ti.

Tattha **nābhivedentī**ti na jānanti, kathentopi nesaṃ natthi. **Āmantayeti** āmantayāmi. **Kāsiputtanti** kāsirājadhītāya puttaṃ.

Tato bodhisatto āha –

**813.** “Eso hi vata me chando, yaṃ vasesi mamantike;  
Na hi etādisā kāmā, sulabhā honti mānuse.

**814.** “Sace tvaṃ nicchase vatthuṃ, mama kāmehi pūjito;  
Mayā tvaṃ samanūññāto, sotthiṃ passāhi ñātake” ti.

Mahāsatto gāthādvayaṃ vatvā cintesi – “ayaṃ maṇiṃ nissāya sukhaṃ jīvanto kassaci nācikkhissati, etassa sabbakāmadadaṃ maṇiṃ dassamī” ti. Athassa taṃ dadanto āha –

**815.** “Dhārayimaṃ maṇiṃ dibyaṃ, pasuṃ putte ca vindati;  
Arogo sukhito hoti, gacchevādāya brāhmaṇā” ti.

Tattha **pasuṃ putte ca vindatī**ti imaṃ maṇiṃ dhārayamāno imassānubhāvena pasuñca putte ca aññañca yaṃ icchati, taṃ sabbaṃ labhati.

Tato brāhmaṇo gāthamāha –

**816.** “Kusalaṃ paṭinandāmi, bhūridatta vaco tava;  
Pabbajissāmi jiṇṇosmi, na kāme abhipatthayē” ti.

Tassattho – bhūridatta, tava vacanaṃ kusalaṃ anavajjaṃ, taṃ paṭinandāmi na paṭikkhipāmi. Ahaṃ pana jiṇṇo asmi, tasmā pabbajissāmi, na kāme abhipatthayāmi, kiṃ me maṇināti.

Bodhisatto āha –

**817.** “Brahmacariyassa ce bhaṅgo, hoti bhogehi kāriyaṃ;  
Avikampamāno eyyāsi, bahuṃ dassāmi te dhana”nti.

Tattha **ce bhaṅgoti** brahmacariyavāso nāma dukkaro, anabhiratassa brahmacariyassa ce bhaṅgo hoti, tadā gihibhūtaṃ bhogehi kāriyaṃ hoti, evarūpe kāle tvaṃ nirāsaṅko hutvā mama santikaṃ āgaccheyyāsi, bahuṃ te dhanaṃ dassāmīti.

Brāhmaṇo āha –

**818.** “Kusalaṃ paṭinandāmi, bhūridatta vaco tava;  
Punapī āgamissāmi, sace attho bhavissatī”ti.

Tattha **punapīti** puna api, ayameva vā pāṭho.

Athassa tattha avasitukāmatam ṇatvā mahāsatto nāgamāṇavake āṇāpetvā brāhmaṇam manussalokaṃ pāpesi. Tamattham pakāsento satthā āha –

**819.** “Idaṃ vatvā bhūridatto, pesesi caturo jane;  
Etha gacchatha uṭṭhetha, khippaṃ pāpetha brāhmaṇam.

**820.** “Tassa taṃ vacanaṃ sutvā, uṭṭhāya caturo janā;  
Pesitā bhūridattena, khippaṃ pāpesu brāhmaṇa”nti.

Tattha **pāpesūti** yamunāto uttāretvā bārāṇasimaggaṃ pāpayiṃsu, pāpayitvā ca pana “tumhe gacchathā”ti vatvā nāgabhanameva paccāgamiṃsu.

Brāhmaṇopi “tāta somadatta, imasmiṃ ṭhāne migam vijjhimhā, imasmiṃ sūkara”nti puttassa ācikkhanto antarāmagge pokkharāṇiṃ disvā “tāta somadatta, nhāyāmā”ti vatvā “sādhu, tāta”ti vutte ubhopi dibbābharaṇāni ceva dibbavatthāni ca omuñcitvā bhaṅḍikaṃ katvā pokkharāṇītiṃ ṭhapetvā otarivā nhāyiṃsu. Tasmim khaṇe tāni antaradhāyitvā nāgabhanameva agamaṃsu. Paṭhamam nivatthakāsāvapilotikāva nesaṃ sarīre paṭimuñciṃsu, dhanusarasattiyopi pākātikāva ahesuṃ. Somadatto “nāsītāmhā tayā, tāta”ti paridevi. Atha naṃ pitā “mā cintayi, migesu santesu araṇṇe mige vadhitvā jīvikaṃ kappessāmā”ti assāsesi. Somadattassa mātā tesam āgamaṃ sutvā paccuggantvā gharaṃ netvā annapānena santappesi. Brāhmaṇo bhuñjitvā niddam okkamī. Itarā puttaṃ pucchi “tāta, ettakaṃ kālam kuhiṃ gatathā”ti? “Amma, bhūridattanāgarājena amhe nāgabhanam nītā, tato ukkaṇṭhitvā idāni āgatā”ti. “Kiñci pana vo ratanam ābhata”nti. “Nābhataṃ amma”ti. “Kiṃ tumhākaṃ tena kiñci na dinna”nti. “Amma, bhūridattena me pitu sabbakāmadado maṇi dinno ahoṣi, iminā pana na gahito”ti. “Kiṃkāraṇā”ti. “Pabbajissati kirā”ti. Sā “ettakaṃ kālam dārake mama bhāram karonto nāgabhanave vasitvā idāni kira pabbajissatī”ti kujjhitvā vīhibhaṇjanadabbiyā piṭṭhiṃ pothentī “are, duṭṭhabrāhmaṇa, pabbajissāmīti kira maṇiratanam na gaṇhasi, atha kasmā apabbajitvā idhāgatosi, nikkhama mama gharā sīgha”nti santajjesi. Atha naṃ “bhadde, mā kujjhi, araṇṇe migesu santesu aham taṃ possessāmī”ti vatvā puttana saddhiṃ araṇṇam gantvā purimaniyāmeneva jīvikaṃ kappesi.

Tadā dakkhiṇamahāsamuddassa disābhāge simbalivāsī eko garuḷo pakkhavātehi samudde udakaṃ viyūhitvā ekaṃ nāgarājānam sīse gaṇhi. Tadāhi supaṇṇā nāgam gahetuṃ ajānanakāyeva, pacchā paṇḍarajātaka jāniṃsu. So pana taṃ sīse gahetvāpi uduke anottaranteyeva ukkhipitvā olambantaṃ ādāya himavantamatthakena pāyāsi. Tadā ceko kāsiratthavāsī brāhmaṇo isipabbajjam pabbajitvā himavantappadese paṇṇasālam māpetvā paṭivasatī. Tassa caṅkamanakoṭiyam mahānigrodharukkho atthi. So tassa mūle divāvihāram karoti. Supaṇṇo nigrodhamatthakena nāgam harati. Nāgo olambanto

mokkhatthāya naṅguṭṭhena nigrodhaviṭapaṃ veṭhesi. Supaṇṇo taṃ ajānantova mahabbalatāya ākāse pakkhandiyeva. Nigrodharukkho samūlo uppāṭito. Supaṇṇo nāgaṃ simbalivanam netvā tuṇḍena paharitvā kucchiṃ phāletvā nāgamedam khādītvā sarīraṃ samuddakucchimhi chaḍḍesi. Nigrodharukkho patanto mahāsaddamakāsi. Supaṇṇo “kissa eso saddo”ti adho olovento nigrodharukkham disvā “kuto esa mayā uppāṭito”ti cintetvā “tāpasassa caṅkamanakoṭiyā nigrodho eso”ti tathato ñatvā “ayaṃ tassa bahūpakāro, ‘akusalam nu kho me pasutam, udāhu no’ti tameva pucchitvā jānissāmī”ti māṇavakavesena tassa santikaṃ agamāsi.

Tasmiṃ khaṇe tāpaso taṃ ṭhānaṃ samaṃ karoti. Supaṇṇarājā tāpasam vanditvā ekamantaṃ nisinnō ajānanto viya “kissa ṭhānaṃ, bhante, ida”nti pucchi. “Upāsaka, eko supaṇṇo bhojanatthāya nāgaṃ haranto nāgena mokkhatthāya nigrodhaviṭapaṃ naṅguṭṭhena veṭhitāyapi attano mahabbalatāya pakkhantivā gato, atha nigrodharukkho uppāṭito, idaṃ tassa uppāṭitaṭṭhāna”nti. “Kiṃ pana, bhante, tassa supaṇṇassa akusalam hoti, udāhu no”ti? “Sace na jānāti, acetanakammaṃ nāma akusalam na hotī”ti. “Kiṃ nāgassa pana, bhante”ti? “So imaṃ nāsetuṃ na gaṇhi, mokkhatthāya gaṇhi, tasmā tassapi na hotiyevā”ti. Supaṇṇo tāpasassa tussitvā “bhante, ahaṃ so supaṇṇarājā, tumhākañhi pañhaveyyākaraṇena tuṭṭho. Tumhe araññe vasatha, ahañcekam alampāyanamantaṃ jānāmi, anaggho manto. Tamahaṃ tumhākam ācariyabhāgaṃ katvā dammi, paṭiggaṇhatha na”nti āha. “Alaṃ mayham mantena, gacchatha tumhe”ti. So taṃ punappunaṃ yācitvā sampaṭicchāpetvā mantam datvā osadhāni ācikkhitvā pakkāmi.

Garūkaṇḍam niṭṭhitam.

### Kīlanakaṇḍam

Tasmiṃ kāle bārānasiyaṃ eko daliddabrāhmaṇo bahuṃ iṇam gahetvā iṇasāmikehi codiyamāno “kiṃ me idha vāseṇa, araññaṃ pavisitvā mataṃ seyyo”ti nikkhamitvā vanaṃ pavisitvā anupubbena taṃ assamapadam patvā tāpasam vattasampadāya ārādhesi. Tāpaso “ayaṃ brāhmaṇo mayham ativiya upakārako, supaṇṇarājena dinnaṃ dibbamantamassa dassāmī”ti cintetvā “brāhmaṇa, ahaṃ alampāyanamantaṃ jānāmi, taṃ te dammi, gaṇhāhi na”nti vatvā “alaṃ, bhante, na mayham mantenattho”ti vuttepi punappunaṃ vatvā nippīletvā sampaṭicchāpetvā adāsiyeva. Tassa ca mantassa anucchavikāni osadhāni ceva mantupacāraṇa sabbaṃ kathesi. Brāhmaṇo “laddho me jīvitupāyo”ti katipāham vasitvā “vātābādho me, bhante, bādhatī”ti apadesam katvā tāpasena vissajjito taṃ vanditvā khamāpetvā araññaṃ nikkhamitvā anupubbena yamunāya tīraṃ patvā taṃ mantam sajjhāyanto mahāmaggaṃ gacchati.

Tasmiṃ kāle sahasamattā bhūridattassa paricārīkā nāgamāṇavikā taṃ sabbakāmadadam maṇiratanam ādāya nāgabhanā nikkhamitvā yamunāṭire vālukaṇāsīmhi ṭhapetvā tassa obhāseṇa sabbarattim udakakīlam kīlitvā aruṇuggamane sabbālaṅkāreṇa alaṅkaritvā maṇiratanam parivāretvā sirim pavesayamānā nisīdiṃsu. Brāhmaṇopi mantam sajjhāyanto taṃ ṭhānaṃ pāpuṇi. Tā mantasaddam sutvāva “iminā supaṇṇena bhavitabba”nti maraṇabhayaṭajjitā maṇiratanam aggahetvā pathaviyaṃ nimujjitvā nāgabhanam agamiṃsu. Brāhmaṇopi maṇiratanam disvā “idāneva me manto samiddho”ti tuṭṭhamānaso maṇiratanam ādāya pāyāsi. Tasmiṃ khaṇe nesādaḥbrahmaṇo somadattena saddhim migavadhāya araññaṃ pavisanto tassa hatthe taṃ maṇiratanam disvā puttam āha “tāta, nanu eso amhākam bhūridattena dinno maṇī”ti? “Āma, tāta, eso maṇī”ti. “Tena hissa aḅgaṇam kathetvā imaṃ brāhmaṇam vañcetvā gaṇhāmetam maṇiratanam”nti. “Tāta, pubbe bhūridattena dīyamānam na gaṇhi, idāni panesa brāhmaṇo taññeva vañcessati, tuṇhī hohī”ti. Brāhmaṇo “hotu, tāta, passasi etassa vā mama vā vañcanabhāva”nti alampāyanena saddhim sallapanto āha –

**821.** “Maṇim paggayha maṅgalyam, sādhuvitam manoramam;  
Selam byañjanasampannam, ko imaṃ maṇimajjhagā”ti.

Tattha **maṅgalyanti** maṅgalasammataṃ sabbakāmadadaṃ. **Ko imanti** kuhiṃ imaṃ maṇiṃ adhigatosi.

Tato alampāyano gāthamāha –

**822.** “Lohitakkhasahassāhi, samantā parivāritaṃ;  
Ajjā kālaṃ pathaṃ gacchaṃ, ajjhagāhaṃ maṇiṃ ima’nti.

Tassattho – ahaṃ ajja kālaṃ pātova pathaṃ maggaṃ gacchanto rattakkhikāhi sahasamattāhi nāgamānavikāhi samantā parivāritaṃ imaṃ maṇiṃ ajjhagā. Maṃ disvā hi sabbāva etā bhayatajjitā imaṃ chaḍḍetvā palātāti.

Nesādabrāhmaṇo taṃ vañcetukāmo maṇiratanassa aguṇaṃ pakāsento attanā gaṇhitukāmo tisso gāthā abhāsi –

**823.** “Sūpaciṇṇo ayaṃ selo, accito mānito sadā;  
Sudhārito sunikkhitto, sabbatthamabhisādhaye.

**824.** “Upacāravipannassa, nikkhepe dhāraṇāya vā;  
Ayaṃ selo vināsāya, pariciṇṇo ayoniso.

**825.** “Na imaṃ akusalo dibyaṃ, maṇiṃ dhāretumāraho;  
Paṭipajja sataṃ nikkhaṃ, dehimaṃ ratanaṃ mama’nti.

Tattha **sabbatthanti** yo imaṃ selaṃ suṭṭhu upacarituṃ accituṃ attano jīvitam viya mamāyituṃ suṭṭhu dhāretuṃ suṭṭhu nikkhipituṃ jānāti, tasseva sūpaciṇṇo accito mānito sudhārito sunikkhitto ayaṃ selo sabbam atthaṃ sādhetīti attho. **Upacāravipannassāti** yo pana upacāravipanno hoti, tasseso anupāyena pariciṇṇo vināsameva vahaṭīti vadati. **Dhāretumārahoti** dhāretuṃ araho. **Paṭipajja sataṃ nikkhanti** amhākaṃ gehe bahū maṇī, mayametaṃ gahetuṃ jānāma. Ahaṃ te nikkhasataṃ dassāmi, taṃ paṭipajja, dehi imaṃ maṇiratanam mamanti. Tassa hi gehe ekopi suvaṇṇanikkho natthi. So pana tassa maṇino sabbakāmadadabhāvaṃ jānāti. Tenassa etadahosi “ahaṃ sasīsaṃ nhatvā maṇiṃ udakena paripphosivā ‘nikkhasataṃ me dehī’ti vakkhāmi, athesa me dassati, tamahaṃ etassa dassāmi’”ti. Tasmā sūro hutvā evamāha.

Tato alampāyano gāthamāha –

**826.** “Na ca myāyaṃ maṇī keyyo, gohi vā ratanehi vā;  
Selo byañjanasampanno, neva keyyo maṇi mamā’nti.

Tattha **na ca myāyanti** ayaṃ maṇi mama santako kenaci vikkiṇitabbo nāma na hoti. **Neva keyyoti** ayaṅca mama maṇi lakkhaṇasampanno, tasmā neva keyyo kenaci vatthunāpi vikkiṇitabbo nāma na hotīti.

Nesādabrāhmaṇo āha –

**827.** “No ce tayā maṇī keyyo, gohi vā ratanehi vā;  
Atha kena maṇī keyyo, taṃ me akkhāhi pucchito’nti.

Alampāyano āha –

**828.** “Yo me saṃse mahānāgaṃ, tejassiṃ duratikkamaṃ;

Tassa dajjaṃ imaṃ selaṃ, jalantamiva tejasā’’ti.

Tattha **jalantamiva tejasā**ti pabhāya jalantaṃ viya.

Nesādabrāhmaṇo āha –

**829.** ‘‘Ko nu brāhmaṇavaṇṇena, supaṇṇo patataṃ varo;  
Nāgaṃ jigīsamanvesi, anvesaṃ bhakkhamattano’’ti.

Tattha **ko nū**ti idaṃ nesādabrāhmaṇo ‘‘attano bhakkhaṃ anvesantena garuḷena bhavitabba’’nti cintetvā evamāha.

Alampāyano evamāha –

**830.** ‘‘Nāhaṃ dijādhipo homi, adiṭṭho garuḷo mayā;  
Āsīvisena vittoti, vejjo brāhmaṇa maṃ vidū’’ti.

Tattha **maṃ vidū**ti maṃ ‘‘esa āsīvisena vittako alampāyano nāma vejjo’’ti jānanti.

Nesādabrāhmaṇo āha –

**831.** ‘‘Kiṃ nu tuyhaṃ phalaṃ atthi, kiṃ sippaṃ vijjate tava;  
Kismiṃ vā tvaṃ paratthaddho, uragaṃ nāpacāyasi’’ti.

Tattha **kismiṃ vā tvaṃ paratthaddhoti** tvaṃ kismiṃ vā upatthaddho hutvā, kiṃ nissayaṃ katvā uragaṃ āsīvisaṃ na apacāyasi jeṭṭhakaṃ akatvā avajānāsīti pucchati.

So attano balaṃ dīpento āha –

**832.** ‘‘Āraññikassa isino, cirarattaṃ tapassino;  
Supaṇṇo kosiyassakkhā, visavijjaṃ anuttaraṃ.

**833.** ‘‘Taṃ bhāvitattaññataraṃ, sammantaṃ pabbatantare;  
Sakkaccaṃ taṃ upaṭṭhāsiṃ, rattindivamatandito.

**834.** ‘‘So tadā pariciṇṇo me, vattavā brahmacariyavā;  
Dibbaṃ pātukarī mantaṃ, kāmasā bhagavā mama.

**835.** ‘‘Tyāhaṃ mante paratthaddho, nāhaṃ bhāyāmi bhoginaṃ;  
Ācariyo visaghātānaṃ, alampānoti maṃ vidū’’ti.

Tattha **kosiyassakkhā**ti kosiyagottassa isino supaṇṇo ācikkhi. Tena akkhātakāraṇaṃ pana sabbhaṃ vitthāretvā kathetabbaṃ. **Bhāvitattaññataranti** bhāvitattānaṃ isīnaṃ aññataraṃ. **Sammantanti** vasantaṃ. **Kāmasā**ti attano icchāya. **Mamā**ti taṃ mantaṃ mayhaṃ pakāsesi. **Tyāhaṃ mante, paratthaddhoti** ahaṃ te mante upatthaddho nissito. **Bhoginanti** nāgānaṃ. **Visaghātānanti** visaghātakavejjānaṃ.

Taṃ sutvā nesādabrāhmaṇo cintesi ‘‘ayaṃ alampāyano yvāssa nāgaṃ dasseti, tassa maṇiratanāṃ dassati, bhūridattamassa dassetvā maṇiṃ gaṇhissāmi’’ti. Tato puttana saddhiṃ mantento gāthamāha –

**836.** ‘‘Gaṇhāmase maṇiṃ tāta, somadatta vijānahi;

Mā daṇḍena siriṃ pattam, kāmasā pajahimhase’’ti.

Tattha **gaṇhāma**seti gaṇhāma. **Kāmasā**ti attano ruciyā daṇḍena paharivā mā jahāma.

Somadatto āha –

**837.** ‘‘Sakaṃ nivesanaṃ pattam, yo taṃ brāhmaṇa pūjayi;  
Evaṃ kalyāṇakārissa, kiṃ mohā dubbhimicchasi.

**838.** ‘‘Sace tvam dhanakāmosi, bhūridatto padassati;  
Tameva gantvā yācassu, bahuṃ dassati te dhana’’nti.

Tattha **pūjayī**ti dibbakāmehi pūjayittha. **Dubbhimicchasi**ti kiṃ tathārūpassa mittassa dubbhikammaṃ kātuṃ icchasi tātāti.

Brāhmaṇo āha –

**839.** ‘‘Hatthagataṃ pattagataṃ, nikiṇṇaṃ khādituṃ varam;  
Mā no sandiṭṭhiko attho, somadatta upaccagā’’ti.

Tattha **hatthagatanti** tāta somadatta, tvam taruṇako lokapavattiṃ na jānāsi. Yañhi hatthagataṃ vā hoti pattagataṃ vā purato vā nikiṇṇaṃ ṭhapitaṃ, tadeva me khādituṃ varam, na dūre ṭhitaṃ.

Somadatto āha –

**840.** ‘‘Paccati niraye ghore, mahissamapi vivarati;  
Mittadubbhī hitaccāgī, jīvarevāpi sussati.

**841.** ‘‘Sace tvam dhanakāmosi, bhūridatto padassati;  
Maññe attakataṃ veraṃ, na ciraṃ vedayissasī’’ti.

Tattha **mahissamapi vivaratī**ti tāta, mittadubbhino jīvantasseva pathavī bhijjitvā vivaraṃ deti. **Hitaccāgī**ti attano hitapariccāgī. **Jīvarevāpi sussatī**ti jīvamānova sussati, manussapeto hoti. **Attakataṃ veranti** attanā kataṃ pāpaṃ. **Na ciranti** na cirasseva vedayissasīti maññāmi.

Brāhmaṇo āha –

**842.** ‘‘Mahāyaññaṃ yajitvāna, evaṃ sujjhanti brāhmaṇā;  
Mahāyaññaṃ yajissāma, evaṃ mokkhāma pāpakā’’ti.

Tattha **sujjhantī**ti tāta somadatta, tvam daharo na kiñci jānāsi, brāhmaṇā nāma yaṃ kiñci pāpaṃ katvā yaññena sujjhantīti dassento evamāha.

Somadatto āha –

**843.** ‘‘Handa dāni apāyāmi, nāhaṃ ajja tayā saha;  
Padampekaṃ na gaccheyyaṃ, evaṃ kibbisakārinā’’ti.

Tattha **apāyāmī**ti apagacchāmi, palāyāmīti attho.

Evañca pana vatvā paṇḍito māṇavo pitaraṃ attano vacanaṃ gāhāpetuṃ asakkonto mahantena

saddena devatā ujjhāpetvā “evarūpena pāpakārinā saddhiṃ na gamissāmī”ti pitu passantasseva palāyitvā himavantam pavisitvā pabbajitvā abhiññā ca samāpattiyo ca nibbattetvā aparihīnajjhāno brahmaloke uppajji. Tamattham pakāsento sathā āha –

**844.** “Idam vatvāna pitaram, somadatto bahussuto;  
Ujjhāpetvāna bhūtāni, tamhā thānā apakkamī”ti.

Nesādabrāhmaṇo “somadatto thāpetvā attano geham kuhiṃ gamissatī”ti cintento alampāyanam thokam anattamanam disvā “alampāyana, mā cintayī, dassessāmi te bhūridatta”nti tam ādāya nāgarājassa uposathakaraṇaṭṭhānam gantvā vammikamatthake bhoge ābhujitvā nipannam nāgarājānam disvā avidūre thito hattham pasāretvā dve gāthā abhāsi –

**845.** “Gaṇhāhetam mahānāgam, āharetam maṇim mama;  
Indagopakavaṇṇābho, yassa lohitako siro.

**846.** “Kappāsapicurāsīva, eso kāyo padissati;  
Vammikaggagato seti, tam tvam gaṇhāhi brāhmaṇā”ti.

Tattha **indagopakavaṇṇābhoti** indagopakavaṇṇo viya ābhāsati. **Kappāsapicurāsīvāti** suvihitassa kappāsapicuno rāsi viya.

Atha mahāsatto akkhīni ummīletvā nesādabrāhmaṇam disvā “ayam uposathassa me antarāyam kareyyāti imam nāgabhanam netvā mahāsampattiyā patiṭṭhāpesim. Mayā diyamānam maṇim gaṇhitum na icchi. Idāni pana ahituṇḍikam gahetvā āgacchati. Sacāham imassa mittadubbhino kujjheyyam, sīlam me khaṇḍam bhavissati. Mayā kho pana paṭhamāññeva caturaṅgasamannāgato uposatho adhiṭṭhito, so yathādhiṭṭhitova hotu, alampāyano maṃ chindatu vā pacatu vā, sūlena vā vijjhātu, nevassa kujjhissāmī”ti cintetvā “sace kho panāham ime olokessāmi, bhasmā bhavyeyum. Maṃ pothentepi na kujjhissāmi na olokessāmī”ti akkhīni nimīletvā adhiṭṭhānapāramim purecārikam katvā bhogantare sīsam pakkhipitvā niccalova hutvā nipajji. Nesādabrāhmaṇopi “bho alampāyana, imam nāgam gaṇhāhi, dehi me maṇi”nti āha. Alampāyano nāgam disvā tuṭṭho maṇim kismiñci agaṇetvā “gaṇha, brāhmaṇā”ti tassa hatthe khipi. So tassa hatthato gaḷitvā pathaviyam pati. Patitamattova pathavim pavisitvā nāgabhanameva gato.

Brāhmaṇo maṇiratanato bhūridattena saddhiṃ mittabhāvato puttato tīhi parihāyi. So “nippaccayo jātomhi, puttassa me vacanam na kata”nti paridevanto geham agamāsi. Alampāyanopi dibbosadhehi attano sarīram makkhetvā thokam khādītva attano kāyam paripphosetvā dibbamantam jappanto bodhisattam upasankamitvā naṅguṭṭhe gahetvā ākaḍḍhitvā sīsam daḷham gaṇhanto mukhamassa vivarītva osadham khādītva mukhe kheḷam opī. Sucijātiko nāgarājā sīlabhedabhayena akujjhītva akkhīnipi na ummīlesi. Atha nam osadhamantam katvā naṅguṭṭhe gahetvā heṭṭhāsīsam katvā sañcāletvā gahitabhojanam chaḍḍāpetvā bhūmiyam dīghato nipajjāpetvā masūrakam maddanto viya pādehi madditvā aṭṭhīni cuṇṇiyamānāni viya ahesum. Puna naṅguṭṭhe gahetvā dussam pothento viya pothesi. Mahāsatto evarūpam dukkham anubhavantopi neva kujjhi. Tamattham pakāsento sathā āha –

**847.** “Athosadhehi dibbehi, jappam mantapadāni ca;  
Evam tam asakkhi satthum, katvā parittamattano”ti.

Tattha **asakkhīti** sakkhi. **Satthunti** gaṇhitum.

Iti so mahāsattam dubbalam katvā vallīhi peḷam sajjetvā mahāsattam tattha pakkhipi, sarīrassa mahantatāya tattha na pavisati. Atha nam paṇhiyā koṭṭento pavesetvā peḷam ādāya ekam gāmam gantvā gāmamajjhe otāretvā “nāgassa naccam daṭṭhukāmā āgacchantū”ti saddamakāsi. Sakalagāma vāsino



sannipatiṃsu. Tasmim̄ khaṇe alampāyano “nikkhama mahānāgā”ti āha. Mahāsatto cintesi “ajja mayā parisam̄ tosentena kīlītuṃ vaṭṭati. Evaṃ alampāyano bahum̄ dhanam̄ labhitvā tuṭṭho maṃ vissajjessati. Yaṃ yaṃ esa maṃ kāreti, taṃ taṃ karissāmi”ti. Atha naṃ so peḷato nīharitvā “mahā hohi”ti āha. So mahā ahosi, “khuddako, vaṭṭo, vammīto, ekappaṇo, dvippaṇo, tipphaṇo, catupphaṇo, pañca, cha, satta, aṭṭha, nava, dasa vīsati, tiṃsati, cattālīsa, paṇṇāsapphaṇo, satappaṇo, ucco, nīco, dissamānakāyo, adissamānakāyo, dissamānaupadḍhakāyo, nīlo, pīto, lohito, odāto, mañjaṭṭhiko hohi, aggijālam̄ vissajjehi, udakam̄, dhūmam̄ vissajjehi”ti. Mahāsatto imesupi ākāresu vuttavutte attabhāve nimminivā naccam̄ dassesi. Taṃ disvā koci assūni sandhāretuṃ nāsakkhi.

Manussā bahūni hiraññasuvaṇṇavattthālaṅkāradīni adamsu. Iti tasmim̄ gāme sahasamattam̄ labhi. So kiñcāpi mahāsattam̄ gaṇhanto “sahassam̄ labhitvā taṃ vissajjessāmi”ti āha, taṃ pana dhanam̄ labhitvā “gāmakepi tāva mayā ettakam̄ dhanam̄ laddham̄, nagare kira bahum̄ labhissāmi”ti dhanalobhena taṃ na muñci. So tasmim̄ gāme kuṭumbam̄ saṇṭhapetvā ratanamayaṃ peḷam̄ kāretvā tattha mahāsattam̄ pakkhipitvā sukhayānakam̄ āruya mahantena parivārena nikkhamitvā taṃ gāmanigamādisu kīlāpento anupubbena bārānasim̄ pāpuṇi. Nāgarājassa pana madhulāje deti, maṇḍūke māretvā deti, so gocaram̄ na gaṇhāti avissajjanabhayena. Gocaram̄ aggaṇhantampi puna naṃ cattāro dvāragāme ādim̄ katvā tattha tattha māsamattam̄ kīlāpesi. Pannarasauposathadivase pana “ajja tumhākam̄ santike kīlāpessāmi”ti rañño ārocāpesi. Rājā nagare bherim̄ carāpetvā mahājanam̄ sannipātāpesi. Rājāṅgaṇe mañcātimañcam̄ bandhiṃsu.

Kīlanakhaṇḍam̄ niṭṭhitam̄.

### Nagarapavesanakaṇḍam̄

Alampāyanena pana bodhisattassa gahitadivaseyeva mahāsattassa mātā supinante addasa kālena rattakkhinā purisena asinā dakkhiṇabāhum̄ chinditvā lohiteṇa paggharanteṇa nīyamānam̄. Sā bhītatasiṭā utṭhāya dakkhiṇabāhum̄ parāmasitvā supinabhāvam̄ jāni. Athassā etadahosi “mayā kakkhaḷo pāpasupino diṭṭho, catunnam̄ vā me puttānam̄ dhataratṭhassa rañño vā mama vā paripanthena bhavitabba”nti. Apica kho pana mahāsattameva ārabba atirekataram̄ cintesi. Kim̄kāraṇā? Sesā attano nāgabhave vasanti, itaro pana sīlajjhāsayaṭṭā manussalokam̄ gantvā uposathakammam̄ karoti. Tasmā “kacci nu kho me puttam̄ ahitūṇḍiko vā supaṇṇo vā gaṇheyyā”ti tasseva atirekataram̄ cintesi. Tato aḍḍhamāse atikkante “mama putto aḍḍhamāsātikkamena maṃ vinā vattitūṃ na sakkoti, addhāssa kiñci bhayaṃ uppannam̄ bhavissati”ti domanassappattā ahosi. Māsātikkamena panassā sokena assūnam̄ apaggharaṇakālo nāma nāhosi, hadayaṃ sussi, akkhīni upacciṃsu. Sā “idāni āgamissati, idāni āgamissati”ti tassāgamanamaggameva oloketi nisīdi. Athassā jetṭhaputto sudassano māsaccayena mahatiyā parisāya saddhim̄ mātāpitūnam̄ dassanattāya āgato, parisam̄ bahi ṭhapetvā pāsadam̄ āruya mātaram̄ vanditvā ekamantam̄ aṭṭhāsi. Sā bhūridattam̄ anusocantī tena saddhim̄ na kiñci sallapi. So cintesi “mayham̄ mātā mayi pubbe āgate tussati, paṭisanthāram̄ karoti, ajja pana domanassappattā, kim̄ nu kho kāraṇa”nti? Atha naṃ pucchanto āha –

848. “Mamam̄ disvāna āyantam̄, sabbakāmasamiddhinam̄;  
Indriyāni ahaṭṭhāni, sāvam̄ jātam̄ mukham̄ tava.

849. “Paddham̄ yathā hatthagatam̄, pañinā parimadditam̄;  
Sāvam̄ jātam̄ mukham̄ tuyham̄, mamam̄ disvāna edisa”nti.

Tattha **ahaṭṭhānī**ti na vipasannāni. **Sāvanti** kañcanādāsavaṇṇam̄ te mukham̄ pītakāḷakam̄ jātam̄. **Hatthagatanti** hatthena chinditam̄. **Edisanti** evarūpaṃ mahantena sirisobhaggena tumhākam̄ dassanattāya āgatam̄ maṃ disvā.

Sā evam̄ vuttepi neva kathesi. Sudassano cintesi “kim̄ nu kho kenaci kuddhā vā paribaddhā vā

bhaveyyā’’ti. Atha naṃ pucchanto itaraṃ gāthamāha –

**850.** ‘‘Kacci nu te nābhisasi, kacci te atthi vedanā;  
Yena sāvaṃ mukhaṃ tuyhaṃ, mamaṃ disvāna āgata’’nti.

Tattha **kacci nu te nābhisasīti** kacci nu taṃ koci na abhisasi akkosena vā paribhāsāya vā vihiṃsīti pucchati. **Tuyhanti** tava pubbe mamaṃ disvā āgataṃ edisaṃ mukhaṃ na hoti. Yena pana kāraṇena ajja tava mukhaṃ sāvaṃ jātaṃ, taṃ me ācikkhāti pucchati.

Athassa sā ācikkhantī āha –

**851.** ‘‘Supinaṃ tāta addakkhiṃ, ito māsaṃ adhogataṃ;  
‘Dakkhiṇaṃ viya me bāhuṃ, chetvā ruhiramakkhitaṃ;  
Puriso ādāya pakkāmi, mama rodantiyā sati’.

**852.** ‘‘Yatohaṃ supinamaddakkhiṃ, sudassana vijānahi;  
Tato divā vā rattim vā, sukhaṃ me nopalabbhatī’’ti.

Tattha **ito māsaṃ adhogatanti** ito heṭṭhā māsātikantaṃ. Ajja me diṭṭhasupinassa māso hotīti dasseti. **Purisoti** eko kāḷo rattakkhi puriso. **Rodantiyā satīti** rodamānāya satiyā. **Sukhaṃ me nopalabbhatīti** mama sukhaṃ nāma na vijjati.

Evañca pana vatvā ‘‘tāta, piyaputtako me tava kaniṭṭho na dissati, bhayenassa uppannena bhavitabba’’nti paridevantī āha –

**853.** ‘‘Yaṃ pubbe parivāriṃsu, kaññā ruciraviggahā;  
Hemajālappaṭicchannā, bhūridatto na dissati.

**854.** ‘‘Yaṃ pubbe parivāriṃsu, nettiṃsavaradhārino;  
Kaṇikārāva samphullā, bhūridatto na dissati.

**855.** ‘‘Handa dāni gamissāma, bhūridattanivesanaṃ;  
Dhammaṭṭhaṃ sīlasampannaṃ, passāma tava bhātara’’nti.

Tattha **samphullāti** suvaṇṇavatthālānkāradhāritāya samphullā kaṇikārā viya. **Handāti** vavassagatthe nipāto, ehi, tāta, bhūridattassa nivesanaṃ gacchāmāti vadati.

Evañca pana vatvā tassa ceva attano ca parisāya saddhiṃ tattha agamāsi. Bhūridattassa bhariyāyo pana taṃ vammikamatthake adisvā ‘‘mātu nivesane vasissati’’ti abyāvaṭā ahesuṃ. Tā ‘‘sassu kira no puttaṃ apassantī āgacchatī’’ti sutvā paccuggamaṃ katvā ‘‘ayye, puttassa te adissamānassa ajja māso atīto’’ti mahāparidevaṃ paridevamānā tassā pādāmūle patiṃsu. Tamatthaṃ pakāsento satthā āha –

**856.** ‘‘Tañca disvāna āyantim, bhūridattassa mātaraṃ;  
Bāhā paggayha pakkandum, bhūridattassa nāriyo.

**857.** ‘‘Puttaṃ teyye na jānāma, ito māsaṃ adhogataṃ;  
Mataṃ vā yadi vā jīvaṃ, bhūridattaṃ yasassina’’nti.

Tattha ‘‘**puttaṃ teyye**’’ti ayaṃ tāsāṃ paridevanakathā.

Bhūridattassa mātā suṇhāhi saddhiṃ antaravīthiyaṃ paridevitvā tā ādāya tassa pāsādaṃ āruya

puttassa sayanañca āsanañca oloketvā paridevamānā āha –

**858.** “Sakuṇī hataputtāva, suññaṃ disvā kulāvakaṃ;  
Ciraṃ dukkhena jhāyissaṃ, bhūridattaṃ apassatī.

**859.** “Kurarī hatachāpāva, suññaṃ disvā kulāvakaṃ;  
Ciraṃ dukkhena jhāyissaṃ, bhūridattaṃ apassatī.

**860.** “Sā nūna cakkavākīva, pallalasmimā anodake;  
Ciraṃ dukkhena jhāyissaṃ, bhūridattaṃ apassatī.

**861.** “Kammārānaṃ yathā ukkā, anto jhāyati no bahi;  
Evaṃ jhāyāmi sokena, bhūridattaṃ apassatī’ ti.

Tattha **apassatī**ti apassantī. **Hatachāpāvā**ti hatapotakāva.

Evaṃ bhūridattamātari vilapamānāya bhūridattanivesanaṃ aṇṇavakucchi viya ekasaddaṃ ahoṣi. Ekopi sakabhāvena saṅghātuṃ nāsakki. Sakalanivesanaṃ yugandharavātappahaṭaṃ viya sālavanaṃ ahoṣi. Tamatthaṃ pakāsentō satthā āha –

**862.** “Sālāva sampamathitā, mālutena pamadditā;  
Senti puttā ca dārā ca, bhūridattanivesane’ ti.

Ariṭṭho ca subhogo ca ubhopi bhātaro mātāpitūnaṃ upaṭṭhānaṃ gacchantā taṃ saddaṃ sutvā bhūridattanivesanaṃ pavisitvā mātaraṃ assāsayiṃsu. Tamatthaṃ pakāsentō satthā āha –

**863.** “Idaṃ sutvāna nigghosaṃ, bhūridattanivesane;  
Ariṭṭho ca subhogo ca, padhāviṃsu anantarā.

**864.** “Amma assāsa mā soci, evaṃdhammā hi pāṇino;  
Cavanti upapajjanti, esāssa pariṇāmitā’ ti.

Tattha **esāssa pariṇāmitā**ti eṣā cutūpapatti assa lokassa pariṇāmitā, evaṃhi so loko pariṇāmeti. Etehi dvīhi aṅgehi mutto nāma natthīti vadanti.

Samuddajā āha –

**865.** “Ahampi tāta jānāmi, evaṃdhammā hi pāṇino;  
Sokena ca paretasmi, bhūridattaṃ apassatī.

**866.** “Ajja ce me imaṃ rattiṃ, sudassana vijānahi;  
Bhūridattaṃ apassantī, maññe hissāmi jīvita’ nti.

Tattha **ajja ce meti** tāta sudassana, sace ajja imaṃ rattiṃ bhūridatto mama dassanaṃ nāgamissati, athāhaṃ taṃ apassantī jīvitaṃ jahissāmīti maññāmi.

Puttā āhaṃsu –

**867.** “Amma assāsa mā soci, ānāyissāma bhātaraṃ;  
Disodisaṃ gamissāma, bhātupariyesanaṃ caraṃ.

**868.** “Pabbate giriduggesu, gāmesu nigamesu ca;  
Orena sattarattassa, bhātaraṃ passa āgata”nti.

Tattha **caranti** amma, mayam tayopi janā bhātupariyesanam carantā disodisam gamissāmāti nam assāsesum.

Tato sudassano cintesi “sace tayopi ekaṃ disam gamissāma, papañco bhavissati, tīhi tīṇi thānāni gantum vaṭṭati – ekena devalokaṃ, ekena himavantam, ekena manussalokaṃ. Sace kho pana kāṇāriṭṭho manussalokaṃ gamissati, yattheva bhūridattam passati. Tam gāmaṃ vā nigamaṃ vā jhāpetvā essati, esa kakkhaḷo pharusō, na sakkā etaṃ tattha pesetu”nti. Cintetvā ca pana “tāta ariṭṭha, tvam devalokaṃ gaccha, sace devatāhi dhammam sotukāmāhi bhūridatto devalokaṃ nīto, tato nam ānehi”ti ariṭṭham devalokaṃ pahīni. Subhogaṃ pana “tāta, tvam himavantam gantvā pañcasu mahānadīsu bhūridattam upadhāretvā ehi”ti himavantam pahīni. Sayam pana manussalokaṃ gantukāmo cintesi – “sacāham māṇavakavaṇṇena gamissāmi, manussā neva me piyāyissanti, mayā tāpasavesena gantum vaṭṭati, manussānañhi pabbajitā piyā manāpā”ti. So tāpasavesam gahetvā mātaram vanditvā nikkhami.

Bodhisattassa pana ajamukhī nāma vemātikabhaginī atthi. Tassā bodhisatte adhimatto sineho. Sā sudassanam gacchantam disvā āha – “bhātika, ativiya kilamāmi, ahampi tayā saddhim gamissāmi”ti. “Amma, na sakkā tayā gantum, aham pabbajitavasena gacchāmi”ti. “Aham pana khuddakamaṇḍūkī hutvā tava jaṅantare nipajjitvā gamissāmi”ti. “Tena hi ehi”ti. Sā maṇḍūkapotikā hutvā tassa jaṅantare nipajji. Sudassano “mūlato paṭṭhāya vicinanto gamissāmi”ti bodhisattassa bhariyāyo tassa uposathakaraṇapaṭṭhānam pucchitvā paṭhamam tattha gantvā alampāyanena mahāsattassa gahitapaṭṭhāne lohitañca vallīhi katapeḷapaṭṭhānañca disvā “bhūridatto ahituṇḍikena gahito”ti nātva samuppannasoko assupuṇṇehi netthehi alampāyanassa gatamaggeneva paṭhamam kilāpitagāmaṃ gantvā manasse pucchi “evarūpo nāma nāgo kenacīdha ahituṇḍikena kilāpito”ti? “Āma, alampāyanena ito māsamatthake kilāpito”ti. “Kiñci dhanam tena laddha”nti? “Āma, idheva tena sahasamattam laddha”nti. “Idāni so kuhiṃ gato”ti? “Asukagāmaṃ nāmā”ti. So tato paṭṭhāya pucchanto anupubbena rājadvāram agamāsi.

Tasmiṃ khaṇe alampāyano sunhāto suvilitto maṭṭhasāṭakaṃ nivāsetvā ratanapeḷam gāhāpetvā rājadvārameva gato. Mahājano sannipati, rañño āsanam paññattam. So antonivesane thitova “aham āgacchāmi, nāgarājānam kilāpetū”ti pesesi. Alampāyano cittattharaṇe ratanapeḷam thāpetvā vivarivā “ehi mahānāgā”ti saññamadāsi. Tasmiṃ samaye sudassanopi parisantare thāto. Atha mahāsatto sīsam nīharivā sabbāvantam parisam olokesi. Nāgā hi dvīhi kāraṇehi parisam oloketi supaṇṇaparipantham vā nātaka vā dassanathāya. Te supaṇṇam disvā bhītā na naccanti, nātaka vā disvā lajjamānā na naccanti. Mahāsatto pana olokeno parisantare bhātaram addasa. So akkhipūrāni assūni gahetvā peḷato nikkhamitvā bhātārābhimukho pāyāsi. Mahājano tam āgacchantam disvā bhīto paṭikkami, eko sudassanova aṭṭhāsi. So gantvā tassa pādapiṭṭhiyam sīsam thāpetvā rodi, sudassanopi paridevi. Mahāsatto roditvā nivattitvā peḷameva pāvisi. Alampāyanopi “iminā nāgena tāpaso ḍaṭṭho bhavissati, assāsessāmi na”nti upasaṅkamitvā āha –

**869.** “Hatthā pamutto urago, pāde te nipatī bhusam;  
Kacci nu tam ḍamsī tāta, mā bhāyi sukhito bhavā”ti.

Tattha **mā bhāyīti** tāta tāpasa, aham alampāyano nāma, mā bhāyi, tava paṭijagganam nāma mama bhāroti.

Sudassano tena saddhim kathetukamyatāya gāthamāha –

**870.** “Neva mayham ayam nāgo, alam dukkhāya kāyaci;  
Yāvatatthi ahiggāho, mayā bhiyyo na vijjatī”ti.

Tattha **kāyacīti** kassaci appamattakassapi dukkhassa uppādane ayam mama asamatto. Mayā hi sadiso ahituṅḍiko nāma natthīti.

Alampāyano “asuko nāmeso”ti ajānanto kujjhitvā āha –

**871.** “Ko nu brāhmaṇavaṇṇena, ditto parisamāgato;  
Avhāyantu suyuddhena, suṇantu parisā mamā”ti.

Tattha **dittoti** gabbito bālo andhañāṇo. **Avhāyantūti** avhāyanto, ayameva vā pāṭho. Idam vuttam hoti – ayam ko bālo ummattako viya maṃ suyuddhena avhāyanto attanā saddhiṃ samam karonto parisamāgato, parisā mama vacanam suṇantu, mayham doso natthi, mā kho me kujjhitthāti.

Atha nam sudassano gāthāya ajjhabhāsi –

**872.** “Tvam maṃ nāgena ālampa, aham maṇḍūkachāpiyā;  
Hotu no abbhutaṃ tattha, ā sahassehi pañcahi”ti.

Tattha **nāgenāti** tvam nāgena mayā saddhiṃ yujjha, aham maṇḍūkachāpiyā tayā saddhiṃ yujjhissāmi. **Ā sahassehi pañcahīti** tasmim no yuddhe yāva pañcahi sahassehi abbhutaṃ hotūti.

Alampāyano āha –

**873.** “Ahañhi vasumā aḍḍho, tvam daliddosi māṇava;  
Ko nu te pāṭibhogatthi, upajūtañca kiṃ siyā.

**874.** “Upajūtañca me assa, pāṭibhogo ca tādiso;  
Hotu no abbhutaṃ tattha, ā sahassehi pañcahi”ti.

Tattha **ko nu teti** tava pabbajitassa ko nu pāṭibhogo atthi. **Upajūtañcāti** imasmim vā jūte upanikkhepabhūtaṃ kiṃ nāma tava dhanam siyā, dassahi meti vadati. **Upajūtañca meti** mayham pana dātābham upanikkhepadhanam vā ṭhapetabbapāṭibhogo vā tādiso atthi, tasmā no tattha yāva pañcahi sahassehi abbhutaṃ hotūti.

Sudassano tassa katham sutvā “pañcahi no sahassehi abbhutaṃ hotū”ti abhīto rājanivesanam āruyha mātularaṅṅo santike ṭhito gāthamāha –

**875.** “Suṇohi me mahārāja, vacanam bhaddamatthu te;  
Pañcannam me sahasānam, pāṭibhogo hi kittimā”ti.

Tattha **kittimāti** guṇakittisampanna vividhaguṇācārakittisampanna.

Rājā “ayam tāpaso maṃ atibahum dhanam yācati, kiṃ nu kho”ti cintetvā gāthamāha –

**876.** “Pettikaṃ vā iṇam hoti, yaṃ vā hoti sayamkataṃ;  
Kiṃ tvam evam bahum mayham, dhanam yācasi brāhmaṇā”ti.

Tattha **pettikaṃ vāti** pitarā vā gahetvā khāditaṃ, attanā vā kataṃ iṇam nāma hoti, kiṃ mama pitarā tava hatthato gahitaṃ atthi, udāhu mayā, kiṃkāraṇā maṃ evam bahum dhanam yācasīti?

Evam vutte sudassano dve gāthā abhāsi –

877. “Alampāyano hi nāgena, mamaṃ abhijigīsati;  
Ahaṃ maṇḍūkachāpiyā, ḍaṃsayissāmi brāhmaṇaṃ.

878. “Taṃ tvaṃ daṭṭhuṃ mahārāja, ajja raṭṭhābhivaḍḍhana;  
Khattasaṅghaparibyūḷho, niyyāhi ahidassana’nti.

Tattha **abhijigīsati**ti yuddhe jinituṃ icchati. Tattha sace so jīyissati, mayhaṃ pañcasahassāni dassati. Sacāhaṃ jīyissāmi, ahamassa dassāmi, tasmā taṃ bahuṃ dhaṇaṃ yācāmi. **Tanti** tasmā tvaṃ mahārāja, ajja ahidassanaṃ daṭṭhuṃ niyyāhīti.

Rājā “tena hi gacchāmā’nti tāpasena saddhiṃyeva nikkhami. Taṃ disvā alampāyano “ayaṃ tāpaso gantvā rājānaṃ gahetvā āgato, rājakulūpako bhavissati’nti bhīto taṃ anuvattanto gāthamāha –

879. “Neva taṃ atimaññāmi, sippavādena māṇava;  
Atimattosi sippena, uragaṃ nāpacāyāsī’nti.

Tattha **sippavādenā**ti māṇava, ahaṃ attano sippena taṃ nātimaññāmi, tvaṃ pana sippena atimatto imaṃ uragaṃ na pūjesi, nāgassa apacītiṃ na karosīti.

Tato sudassano dve gāthā abhāsi –

880. “Ahampi nātimaññāmi, sippavādena brāhmaṇa;  
Avisena ca nāgena, bhusaṃ vañcayase janaṃ.

881. “Evañcetaṃ jano jaññā, yathā jānāmi taṃ ahaṃ;  
Na tvaṃ labhasi ālampa, bhusamuṭṭhiṃ kuto dhana’nti.

Athassa alampāyano kujjhitvā āha –

882. “Kharājino jaṭi dummī, ditto parisamāgato;  
Yo tvaṃ evaṃ gataṃ nāgaṃ, ‘aviso’ atimaññāti.

883. “Āsajja kho naṃ jaññāsī, puṇṇaṃ uggassa tejaso;  
Maññe taṃ bhasmarāsīṃva, khippamesa karissati’nti.

Tattha **dummī**ti anaññtinayano. **Aviso atimaññāsī**ti nibbisoti avajānāsī. **Āsajjāti** upagantvā. **Jaññāsī**ti jāneyyāsī.

Atha tena saddhiṃ keḷiṃ karonto sudassano gāthamāha –

884. “Siyā viṣaṃ siluttassa, deḍḍubhassa silābhuno;  
Neva lohitasāsassa, viṣaṃ nāgassa vijjati’nti.

Tattha **siluttassāti** gharasappassa. **Deḍḍubhassāti** udakasappassa. **Silābhunoti** nīlavaṇṇasappassa. Iti nibbise sappe dassetvā etesaṃ viṣaṃ siyā, neva lohitasāsassa sappassāti āha.

Atha naṃ alampāyano dvīhi gāthāhi ajjhabhāsi –

885. “Sutametaṃ arahataṃ, saññatānaṃ tapassinaṃ;  
Idha dānāni datvāna, saggāṃ gacchanti dāyakā;  
Jivanto dehi dānāni, yadi te atthi dātave.

**886.** “Ayaṃ nāgo mahiddhiko, tejassī duratikkamo;  
Tena taṃ ḍaṃsayissāmi, so taṃ bhasmaṃ karissatī”ti.

Tattha **dātave**ti yadi te kiñci dātabbaṃ atthi, taṃ dehīti.

**887.** “Mayāpetam sutam samma, saññatānam tapassinam;  
Idha dānāni datvāna, saggaṃ gacchanti dāyakā;  
Tvameva dehi jīvanto, yadi te atthi dātave.

**888.** “Ayaṃ ajamukhī nāma, puṇṇā uggassa tejaso;  
Tāya taṃ ḍaṃsayissāmi, sā taṃ bhasmaṃ karissati.

**889.** “Yā dhītā dhataratthassa, vemātā bhaginī mama;  
Sā taṃ ḍaṃsatvajamukhī, puṇṇā uggassa tejaso”ti. –

Imā gāthā sudassanassa vacanam. Tattha **puṇṇā uggassa tejasoti** uggena visena puṇṇā.

Evañca pana vatvā “amma ajamukhi, jaṅantarato me nikkhamitvā pāṇimhi patiṭṭhahā”ti mahājanassa majjheyeva bhaginim pakkosivā hattham pasāresi. Sā tassa saddam sutvā jaṅantare nisinnāva tikkhattum maṇḍūkavassitam vassitvā nikkhamitvā aṃsakūṭe nisīditvā uppatitvā tassa hatthatale tīṇi visabindūni pātetvā puna tassa jaṅantameva pāvīsi. Sudassano visam gahetvā ṭhitova “nassissatāyam janapado, nassissatāyam janapado”ti tikkhattum mahāsaddam abhāsi. Tassa so saddo dvādasayojanikam bārāṇasim chādetvā aṭṭhāsi. Atha rājā taṃ saddam sutvā “kimattham janapado nassissati”ti pucchi. “Mahārāja, imassa visassa nisiñcanaṭṭhānam na passāmī”ti. “Tāta, mahantā ayam pathavī, pathaviyam nisiñcā”ti. Atha nam “na sakkā pathaviyam siñcituṃ, mahārājā”ti paṭikkhipanto gāthamāha –

**890.** “Chamāyam ce nisiñcissam, brahmadatta vijānahi;  
Tiṇalatāni osadhyo, ussusseyyum asaṃsaya”nti.

Tattha **tiṇalatānī**ti pathavinissitāni tiṇāni ca latā ca sabbosadhiyo ca ussusseyyum, tasmā na sakkā pathaviyam nisiñcītunti.

Tena hi nam, tāta, uddham ākāsam khipāti. Tatrāpi na sakkāti dassento gāthamāha –

**891.** “Uddham ce pātayissāmi, brahmadatta vijānahi;  
Sattavassāniyam devo, na vasse na himam pate”ti.

Tattha **na himam pateti** sattavassāni himabindumattampi na patissati.

Tena hi nam tāta udake siñcāti. Tatrāpi na sakkāti dassetuṃ gāthamāha –

**892.** “Udake ce nisiñcissam, brahmadatta vijānahi;  
Yāvāntodakajā pāṇā, mareyyum macchakacchapā”ti.

Atha nam rājā āha – “tāta, mayam na kiñci jānāma, yathā amhākam rattham na nassati, taṃ upāyam tvameva jānāhī”ti. “Tena hi, mahārāja, imasmim ṭhāne paṭipāṭiyā tayo āvāṭe khaṇāpethā”ti. Rājā khaṇāpesi. Sudassano paṭhamam āvāṭam nānābheshajjānam pūrāpesi, dutiyam gomayassa, tatiyam dibbosadhānaññeva. Tato paṭhame āvāṭe visabindūni pātesi. Taṅkhaṇaṅñeva dhūmayitvā jālā uṭṭhahi. Sā gantvā gomaye āvāṭam gaṇhi. Tatopi jālā uṭṭhāya itaram dibbosadhassa puṇṇam gahetvā osadhāni jhāpetvā nibbāyi. Alampāyano tassa āvāṭassa avidūre aṭṭhāsi. Atha nam visausumā pahari, sarīracchavi

uppāṭetvā gatā, setakuṭṭhi ahoṣi. So bhayatajjito “nāgarājānaṃ vissajjemī”ti tikkhattuṃ vācaṃ nicchāresi. Taṃ sutvā bodhisatto ratanapeḷāya nikkhamitvā sabbālaṅkārappaṭimaṇḍitaṃ attabhāvaṃ māpetvā devarājālaṅkāya ṭhito. Sudassanopi ajamukhīpi tatheva aṭṭhaṃsu. Tato sudassano rājānaṃ āha – “jānāsi no, mahārāja, kassete puttā”ti? “Na jānāmi”ti. “Tumhe tāva na jānāsi, kāsirañño pana dhītāya samuddajāya dhataratṭhassa dinnabhāvaṃ jānāsi”ti? “Āma, jānāmi, mayhaṃ sā kaniṭṭhabhaginī”ti. “Mayaṃ tassā puttā, tvaṃ no mātulo”ti.

Taṃ sutvā rājā kampamāno te āliṅgitvā sīse cumbitvā roditvā pāsādaṃ āropetvā mahantaṃ sakkāraṃ kāretvā bhūridattena paṭisanthāraṃ karonto pucchi “tāta, taṃ evarūpaṃ uggatejaṃ kathaṃ alampāyano gaṇhī”ti? So sabbaṃ vitthārena kathetvā rājānaṃ ovaḍanto “mahārāja, rañña nāma iminā niyāmena rajjaṃ kāretuṃ vaṭṭatī”ti mātulassa dhammaṃ desesi. Atha naṃ sudassano āha – “mātula, mama mātā bhūridattaṃ apassantī kilamati, na sakkā amhehi papañcaṃ kātu”nti. “Sādhu, tāta, tumhe tāva gacchatha. Ahaṃ pana mama bhaginiṃ daṭṭhukāmomhi, kathaṃ passissāmi”ti. “Mātula, kahaṃ pana no ayyako kāsirājā”ti? “Tāta, mama bhaginiyā vinā vasituṃ asakkonto rajjaṃ pahāya pabbajitvā asuke vanasaṇḍe nāma vasatī”ti. “Mātula, mama mātā tumhe ceva ayyakañca daṭṭhukāmā, tumhe asukadivase mama ayyakassa santikaṃ gacchatha, mayaṃ mātaraṃ ādāya ayyakassa assamapadaṃ āgacchissāma. Tattha naṃ tumhepi passissathā”ti. Iti te mātulassa divasaṃ vavatthapetvā rājanivesanaṃ otariṃsu. Rājā bhāgineyye uyyojetvā roditvā nivatti. Tepi pathaviyaṃ nimujjitvā nāgabhavanaṃ gatā.

Nagarapavesanakhaṇḍaṃ niṭṭhitaṃ.

### Mahāsattassa pariyesanakhaṇḍaṃ

Mahāsatte sampatte sakalanāgabhavanaṃ ekaparidevasaddaṃ ahoṣi. Sopi māsaṃ peḷāya vasitattā kilanto gilānaseyyaṃ sayi. Tassa santikaṃ āgacchantānaṃ nāgānaṃ pamāṇaṃ natthi. So tehi saddhiṃ kathento kilamati. Kāṇāriṭṭho devalokaṃ gantvā mahāsattaṃ adisvā paṭhamamevāgato. Atha naṃ “esa caṇḍo pharuso, sakkhissati nāgapaṇisaṃ vāretu”nti mahāsattassa nisinnaṭṭhāne dovārikaṃ kariṃsu. Subhogopi sakalahimavantaṃ vicaritvā tato mahāsamuddaṅca sesanadiyo ca upadhāretvā yamunaṃ upadhārento āgacchati. Nesādabrāhmaṇopi alampāyanaṃ kuṭṭhiṃ disvā cintesi “ayaṃ bhūridattaṃ kilametvā kuṭṭhi jāto, ahaṃ pana taṃ mayhaṃ tāva bahūpakāraṃ maṇilobhena alampāyanassa dassesiṃ, taṃ pāpaṃ mama āgamissatī. Yāva taṃ na āgacchati, tāvadeva yamunaṃ gantvā payāgatitthe pāpavāhanaṃ karissāmi”ti. So tattha gantvā “mayā bhūridatte mittadubbhikammaṃ kataṃ, taṃ pāpaṃ pavāhessāmi”ti vatvā udakorohanakammaṃ karoti. Tasmīṃ khaṇe subhogo taṃ ṭhānaṃ patto. Tassa taṃ vacanaṃ sutvā “iminā kira pāpakena tāva mahantassa yasassa dāyako mama bhātā maṇiratanassa kāraṇā alampāyanassa dassito, nāssa jīvitāṃ dassāmi”ti naṅguṭṭhena tassa pādesu veṭhetvā ākaḍḍhitvā udake osidāpetvā nirassāsakāle thokaṃ sithilaṃ akāsi. So sīsaṃ ukkhipi. Atha naṃ punākaḍḍhitvā osidāpesi. Evaṃ bahū vāre tena kilamiyamāno nesādabrāhmaṇo sīsaṃ ukkhipitvā gāthamāha –

**893.** “Lokyaṃ sajantaṃ udakaṃ, payāgasmīṃ patiṭṭhitaṃ;  
Ko maṃ ajjhoḥarī bhūto, ogāḷhaṃ yamunaṃ nadi”nti.

Tattha **lokyaṃ** evaṃ pāpavāhanasamatthanti lokasammataṃ. **Sajantaṃ** evarūpaṃ udakaṃ abhisiṅcantaṃ. **Payāgasminti** payāgatitthe.

Atha naṃ subhogo gāthāya ajjhabhāsi –

**894.** “Yadesa lokādhipatī yasassī, bārāṇasiṃ pakriya samantato;  
Tassāha putto uragūsabhaṃ, subhogoti maṃ brāhmaṇa vedayantī”ti.

Tattha **yadesāti** yo eso. **Pakriya samantatoti** paccatthikānaṃ duppaharaṇasamatthatāya



parisamantato pakiriya sabbaṃ parikkhipitvā upari phaṇena chādesi.

Atha naṃ brāhmaṇo “ayaṃ bhūridattabhātā, na me jīvitam dassati, yaṃnūnāhaṃ etassa ceva mātipitūnañcassa vaṇṇakittanena muducittataṃ katvā attano jīvitam yāceyya”nti cintetvā gāthamāha –

895. “Sace hi putto uragūsabhassa, kāsissa rañño amarādhipassa;  
Mahesakkho aññataro pitā te, maccesu mātā pana te atulyā;  
Na tādiso arahati brāhmaṇassa, dāsampi ohāritum mahānubhāvo”ti.

Tattha **kāsissāti** aparena nāmena evaṃnāmakassa. “Kāsikarañño”tipi paṭhantiyeva. Kāsirājadhītāya gahitattā kāsirajjampi tasseva santakam katvā vaṇṇeti. **Amarādhipassāti** dīghāyukatāya amarasañkhātānaṃ nāgānaṃ adhipassa. **Mahesakkhoti** mahānubhāvo. **Aññataroti** mahesakkhānaṃ aññataro. **Dāsampīti** tādiso hi mahānubhāvo ānubhāvarahitaṃ brāhmaṇassa dāsampi udake oharitum nārahati, pageva mahānubhāvaṃ brāhmaṇanti.

Atha naṃ subhogo “are duṭṭhabrāhmaṇa, tvaṃ maṃ vañcetvā ‘muñcissāmi’ti maññasi, na te jīvitam dassāmi”ti tena katakammaṃ pakāsento āha –

896. “Rukkham nissāya vijjhittho, eṇeyyaṃ pātumāgataṃ;  
So viddho dūramacari, saravegena sīghavā.
897. “Taṃ tvaṃ patitamaddakkhi, araññasmiṃ brahāvane;  
Sa maṃsakājamādāya, sāyaṃ nigrodhupāgami.
898. “Sukasālikasaṅghuṭṭhaṃ, piṅgalaṃ santhatāyutaṃ;  
Kokilābhirudaṃ rammaṃ, dhuvaṃ haritasaddalaṃ.
899. “Tattha te so pāturahu, iddhiyā yasasā jalaṃ;  
Mahānubhāvo bhātā me, kaññāhi parivārīto.
900. “So tena pariciṅṇo tvaṃ, sabbakāmehi tappito;  
Aduṭṭhassa tuvaṃ dubbhi, taṃ te veraṃ idhāgataṃ.
901. “Khippaṃ gīvaṃ pasārehi, na te dassāmi jīvitam;  
Bhātu parisaraṃ veraṃ, chedayissāmi te sira”nti.

Tattha **sāyaṃ nigrodhupāgamīti** vikāle nigrodhaṃ upagato asi. **Piṅgalanti** pakkānaṃ vaṇṇena piṅgalaṃ. **Santhatāyutanti** pārohaparikiṅṇaṃ. **Kokilābhirudanti** kokilāhi abhirudaṃ. **Dhuvam haritasaddalanti** udakabhūmiyaṃ jātattā niccaṃ haritasaddalaṃ bhūmibhāgaṃ. **Pāturahūti** tasmim te nigrodhe ṭhitassa so mama bhātā pākaṭo ahoṣi. **Iddhiyāti** puññatejena. **So tenāti** so tuvaṃ tena attano nāgabavanaṃ netvā pariciṅṇo. **Parisaranti** tayā mama bhātu kataṃ veraṃ pāpakammaṃ parisaranto anussaranto. **Chedayissāmi te siranti** tava sīsaṃ chindissāmi.

Atha brāhmaṇo “na mesa jīvitam dassati, yaṃ kiñci pana vatvā mokkhatthāya vāyamitum vaṭṭati”ti cintetvā gāthamāha –

902. “Ajhāyako yācayogī, āhutaggi ca brāhmaṇo;  
Etehi tīhi ṭhānehi, avajjho hoti brāhmaṇo”ti.

Tattha **etehīti** etehi ajhāyakatādīhi tīhi kāraṇehi brāhmaṇo avajjho, na labbhā brāhmaṇaṃ vadhitum, kiṃ tvaṃ vadesi, yo hi brāhmaṇaṃ vadheti, so niraye nibbattatīti.

Taṃ sutvā subhogo saṃsayapakkhando hutvā “imaṃ nāgabhavanaṃ netvā bhātaro paṭipucchitvā jānissāmi”ti cintetvā dve gāthā abhāsi –

**903.** “Yaṃ puraṃ dhataratthassa, ogāḷhaṃ yamaṃ nadiṃ;  
Jotate sabbasovaṇṇaṃ, girimāhacca yāmaṃ.

**904.** “Tattha te purisabyagghā, sodariyā mama bhātaro;  
Yathā te tattha vakkhanti, tathā hessasi brāhmaṇā”ti.

Tattha **puranti** nāgapuraṃ. **Ogāḷhanti** anupaviṭṭhaṃ. **Girimāhacca yāmunanti** yamaṇāto avidūre thitaṃ himavantaṃ āhacca jotati. **Tattha teti** tasmiṃ nagare te mama bhātaro vasanti, tattha nīte tayi yathā te vakkhanti, tathā bhavissasi. Sace hi saccaṃ kathesi, jīvitaṃ te atthi. No ce, tattheva sīsaṃ chindissāmīti.

Iti naṃ vatvā subhogo gīvāyaṃ gahetvā khipanto akkosanto paribhāsanto mahāsattassa pāsādadvāraṃ agamāsi.

Mahāsattassa pariyesanayakaṇḍaṃ niṭṭhitaṃ.

### Micchākathā

Atha naṃ dovāriko hutvā nisinno kāṇāriṭṭho tathā kilametvā ānīyamānaṃ dīsvā paṭimaggam gantvā “subhoga, mā viheṭṭhayi, brāhmaṇā nāma mahābrahmuno puttā. Sace hi mahābrahmā jānissati, ‘mama puttaṃ viheṭṭenti’ti kujjhivā amhākaṃ sakalaṃ nāgabhavanaṃ vināsesati. Lokasmiṃhi brāhmaṇā nāma seṭṭhā mahānubhāvā, tvaṃ tesam ānubhavaṃ na jānāsi, ahaṃ pana jānāmi”ti āha. Kāṇāriṭṭho kira atītānantarabhava yaññakārabrahmaṇo ahosi, tasmā evamāha. Vatvā ca pana anubhūtapubbavasena yajanasīlo hutvā subhogañca nāgaparisañca āmantetvā “etha, bho, yaññakāraṇaṃ vo guṇe vaṇṇessāmi”ti vatvā yaññavaṇṇanaṃ ārabhanto āha –

**905.** “Anittarā ittarasampayuttā, yaññā ca vedā ca subhoga loke;  
Tadaggarayhañhi vinindamāno, jahāti vittañca satañca dhamma”nti.

Tattha **anittarāti** subhoga imasmiṃ loke yaññā ca vedā ca anittarā na lāmakā mahānubhāvā, te ittarehi brāhmaṇehi sampayuttā, tasmā brāhmaṇāpi anittarāva jātā. **Tadaggarayhanti** tasmā agārayhaṃ brāhmaṇaṃ vinindamāno dhanañca paṇḍitānaṃ dhammañca jahāti. Idaṃ kira so “iminā bhūridatte mittadubbhikammaṃ katanti vattuṃ nāgaparisā mā labhantū”ti avoca.

Atha naṃ kāṇāriṭṭho “subhoga jānāsi pana ayaṃ loko kena nimmito”ti vatvā “na jānāmi”ti vutte “brāhmaṇaṃ pitāmahena mahābrahmunā nimmito”ti dassetuṃ itaraṃ gāthamāha –

**906.** “Ajjenamariyā pathaviṃ janindā, vessā kaṣiṃ pāricariyañca suddā;  
Upāgu paccekaṃ yathāpadesaṃ, katāhu ete vasināti āhū”ti.

Tattha **upāgūti** upagatā. Brahmā kira brāhmaṇādayo cattāro vaṇṇe nimminivā ariye tāva brāhmaṇe āha – “tumhe ajjenameva upagacchatha, mā aññaṃ kiñci karitthā”ti, janinde āha “tumhe pathaviṃyeva vijinatha”, vesse āha – “tumhe kaṣiṃyeva upetha”, sudde āha “tumhe tiṇṇaṃ vaṇṇaṃ pāricariyaṃyeva upethā”ti. Tato paṭṭhāya ariyā ajjenam, janindā pathaviṃ, vessā kaṣiṃ, suddā pāricariyaṃ upāgatāti vadanti. **Paccekaṃ yathāpadesanti** upagacchantā ca pāṭiyekkaṃ attano kulapadesānurūpena brahmunā vuttaniyāmeneva upagatā. **Katāhu ete vasināti āhūti** evaṃ kira ete vasinā mahābrahmunā katā ahesunti kathenti.

Evam mahāguṇā ete brāhmaṇā nāma. Yo hi etesu cittaṃ pasādetvā dānaṃ deti, tassa aññattha paṭisandhi natthi, devalokameva gacchatīti vatvā āha –

**907.** “Dhātā vidhātā varuṇo kuvero, somo yamo candimā vāyu sūriyo;  
Etepi yaññaṃ puthuso yajitvā, ajjhāyakānaṃ atho sabbakāme.

**908.** “Vikāsītā cāpasatāni pañca, yo ajjuno balavā bhīmaseno;  
Sahassabāhu asamo pathabyā, sopi tadā ādahi jātaveda”nti.

Tattha **etepīti** ete dhātādayo devarājāno. **Puthusoti** anekappakāraṃ yaññaṃ yajitvā. **Atho sabbakāmeti** atha ajjhāyakānaṃ brāhmaṇānaṃ sabbakāme datvā etāni ṭhānāni pattāti dasseti. **Vikāsītāti** ākaḍḍhitā. **Cāpasatāni pañcāti** na dhanupañcasatāni, pañcacāpasatappamaṇaṃ pana mahādhanuṃ sayameva ākaḍḍhati. **Bhīmasenoti** bhayānakaseno. **Sahassabāhūti** na tassa bāhūnaṃ sahassaṃ, pañcannaṃ pana dhanuggahasatānaṃ bāhusahassena ākaḍḍhitabbassa dhanuno ākaḍḍhanenevaṃ vuttaṃ. **Ādahi jātavedanti** sopi rājā tasmim kāle brāhmaṇe sabbakāmehi santappetvā aggim ādahi patitthāpetvā paricari, teneva kāraṇena devaloke nibbatto. Tasmā brāhmaṇā nāma imasmim loke jeṭṭhakāti āha.

So uttaripi brāhmaṇe vaṇṇento gāthamāha –

**909.** “Yo brāhmaṇe bhojayi dīgharattaṃ, annena pānena yathānubhāvaṃ;  
Pasannacitto anumodamāno, subhoga devaññataro ahoṣī”ti.

Tattha **yoti** yo so porāṇako bārāṇasirājāti dasseti. **Yathānubhāvanti** yathābalaṃ yaṃ tassa atthi, taṃ sabbam paricajitvā bhojesi. **Devaññataroti** so aññataro mahesakkhadevarājā ahoṣi. Evam brāhmaṇā nāma aggadakkhiṇeyyāti dasseti.

Athassa aparampi kāraṇaṃ āharitvā dassento gāthamāha –

**910.** “Mahāsaṇaṃ devamanomavaṇṇaṃ, yo sappinā asakkhi bhojetumaggim;  
Sa yaññatantaṃ varato yajitvā, dibbaṃ gatim mucalindajjhagacchī”ti.

Tattha **mahāsananti** mahābhakkhaṃ. **Bhojetunti** santappetuṃ. **Yaññatantanti** yaññavidhānaṃ. **Varatoti** varassa aggidevassa yajitvā. **Mucalindajjhagacchīti** mucalindo adhigatoti.

Eko kira pubbe bārāṇasiyaṃ mucalindo nāma rājā brāhmaṇe pakkosāpetvā saggamaggaṃ pucchi. Atha naṃ te “brāhmaṇānañca brāhmaṇadevatāya ca sakkāraṃ karohī”ti vatvā “kā brāhmaṇadevatā”ti vutte “aggidevoti taṃ navanītasappinā santappehī”ti āhaṃsu. So tathā akāsi. Tamatthaṃ pakāsento esa imaṃ gāthamāha.

Aparampi kāraṇaṃ dassento gāthamāha –

**911.** “Mahānubhāvo vassasahassajīvī, yo pabbajī dassaneyyo uḷāro;  
Hitvā apariyanta raṭṭhaṃ sasenaṃ, rājā dudīpopi jagāma sagga”nti.

Tattha **pabbajīti** pañcavassasatāni rajjaṃ kārento brāhmaṇānaṃ sakkāraṃ katvā apariyantaṃ raṭṭhaṃ sasenaṃ hitvā pabbaji. **Dudīpopīti** so dudīpo nāma rājā brāhmaṇe pūjetvāva saggam gatoti vadati. “Dujīpo”tipi pāṭho.

Aparānipissa udāharaṇāni dassento āha –

**912.** “Yo sāgarantaṃ sāgaro vijitvā, yūpaṃ subhaṃ soṇṇamayaṃ uḷāraṃ;  
Ussesi vessānaramādahāno, subhoga devaññataro ahoṣi.

**913.** “Yassānubhāvena subhoga gaṅgā, pavattatha dadhisanninnaṃ samuddaṃ;  
Sa lomapādo paricariya maggiṃ, aṅgo sahasakkhapurajjhagacchī”ti.

Tattha **sāgarantanti** sāgarapariyantaṃ pathaviṃ. **Ussesīti** brāhmaṇe saggamaggaṃ pucchitvā “sovaṇṇayūpaṃ ussāpehī”ti vutto pasughātanatthāya ussāpesi. **Vessānaramādahānoti** vessānaraṃ aggiṃ ādahanto. “Vesānari”ntipi pāṭho. **Devaññataroti** subhoga, so hi rājā aggiṃ juhivā aññataro mahesakkhadevo ahoṣīti vadati. **Yassānubhāvenāti** bho subhoga, gaṅgā ca mahāsamuddo ca kena katoti jānāsīti. Na jānāmīti. Kiṃ tvam jānissasi, brāhmaṇeyeva pothetuṃ jānāsīti. Atītasmiñhi aṅgo nāma lomapādo bārāṇasirājā brāhmaṇe saggamaggaṃ pucchitvā tehi “bho, mahārāja, himavantaṃ pavisitvā brāhmaṇānaṃ sakkāraṃ katvā aggiṃ paricarāhi”ti vutte aparimāṇā gāviyo ca mahimsiyo ca ādāya himavantaṃ pavisitvā tathā akāsi. “Brāhmaṇehi bhuttātirittaṃ khīradadhiṃ kiṃ kātappa”nti ca vutte “chaḍḍethā”ti āha. Tattha thokassa khīrassa chaḍḍitaṭṭhāne kunnadiyo ahesuṃ, bahukassa chaḍḍitaṭṭhāne gaṅgā pavattatha. Taṃ pana khīraṃ yattha dadhi hutvā sannisinnaṃ ṭhitam, taṃ samuddaṃ nāma jātaṃ. Iti so evarūpaṃ sakkāraṃ katvā brāhmaṇehi vuttavidhānena aggiṃ paricariya sahasakkhassa puraṃ ajjhagacchi.

Itissa idaṃ atītaṃ āharitvā imaṃ gāthamāha –

**914.** “Mahiddhiko devavaro yasassī, senāpati tidive vāsavassa;  
So somayāgena malaṃ vihantvā, subhoga devaññataro ahoṣī”ti.

Tattha **so somayāgena malaṃ vihantvāti** bho subhoga, yo idāni sakkassa senāpati mahāyaso devaputto, sopi pubbe eko bārāṇasirājā brāhmaṇe saggamaggaṃ pucchitvā tehi “sodayāgena attano malaṃ pavāhetvā devalokaṃ gacchāhi”ti vutte brāhmaṇānaṃ mahantaṃ sakkāraṃ katvā tehi vuttavidhānena somayāgaṃ katvā tena attano malaṃ vihantvā devaññataro jātoti imamatthaṃ pakāsento evamāha.

Aparānipissa udāharaṇāni dassento āha –

**915.** “Akārayi lokamimaṃ parañca, bhāgīrathim himavantañca gijjhaṃ;  
Yo iddhimā devavaro yasassī, sopi tadā ādahi jātavedaṃ.

**916.** “Mālāgiri himavā yo ca gijjho, sudassano nisabho kuveru;  
Ete ca aññe ca nagā mahantā, cityā katā yaññakarehi mähū”ti.

Tattha **sopi tadā ādahi jātavedanti** bhātika subhoga, yena mahābrahmunā ayañca loko paro ca loko bhāgīrathigaṅgā ca himavantaṃ pabbato ca gijjhapabbato ca kato, sopi yadā brahmupapattito pubbe māṇavako ahoṣi, tadā aggimeva ādahi, aggiṃ juhivā mahābrahmā hutvā idaṃ sabbamakāsi. Evamaṃ mahiddhikā brāhmaṇāti dasseti.

**Cityā katāti** pubbe kireko bārāṇasirājā brāhmaṇe saggamaggaṃ pucchitvā “brāhmaṇānaṃ sakkāraṃ karohi”ti vutte tesam mahādānaṃ paṭṭhapetvā “mayhaṃ dāne kiṃ natthī”ti pucchitvā “sabbam, deva, atthi, brāhmaṇānaṃ pana āsanāni nappahontī”ti vutte iṭṭhakāhi cināpetvā āsanāni kāresi. Tadā cityā āsanapīṭhikā brāhmaṇānaṃ ānubhāvena vaḍḍhitvā mālāgiriādayo pabbatā jātā. Evamete yaññakārehi brāhmaṇehi katāti kathentīti.

Atha naṃ puna āha “bhātika, jānāsi panāyaṃ samuddo kena kāraṇena apeyyo loṇodako jāto”ti? “Na jānāmi, ariṭṭhā”ti. Atha naṃ “tvam brāhmaṇeyeva vihimṣituṃ jānāsi, suṇohī”ti vatvā gāthamāha

917. “Ajjhāyakaṃ mantaguṇūpapannaṃ, tapassinaṃ ‘yācayogo’tidhāhu;  
Tīre samuddassudakaṃ sajanaṃ, taṃ sāgarojjhohari tenāpeyyo”’ti.

Tattha ‘yācayogotidhāhūti taṃ brāhmaṇaṃ yācayogoti idha loke āhu. **Udakaṃ sajanaṃ** so kirekadivasam pāpapavāhanakammaṃ karonto tīre tathā samuddato udakaṃ gahetvā attano upari sīse sajanaṃ abbhukirati. Atha naṃ evaṃ karontaṃ vaḍḍhitvā sāgaro ajjhohari. Taṃ kāraṇaṃ mahābrahmā ñatvā “iminā kira me putto hato”’ti kujjhivā “samuddo apeyyo loṇodako bhavatū”’ti vatvā abhisapi, tena kāraṇena apeyyo jāto. Evarūpā ete brāhmaṇā nāma mahānubhāvāti.

Punapi āha –

918. “Āyāgavatthūni puthū pathabyā, saṃvijjanti brāhmaṇā vāsavassa;  
Purimaṃ disaṃ pacchimaṃ dakkhiṇuttaraṃ, saṃvijjamānā janayanti veda”’nti.

Tattha **vāsavassāti** pubbe brāhmaṇānaṃ dānaṃ datvā vāsavattaṃ pattassa vāsavassa. **Āyāgavatthūnīti** puññakkhettabhūtā aggadakkhiṇeyyā pathabyā puthū brāhmaṇā saṃvijjanti. **Purimaṃ disanti** te idānipi catūsu disāsu saṃvijjamānā tassa vāsavassa mahantaṃ vedaṃ janayanti, pītisomanassaṃ āvahanti.

Evaṃ ariṭṭho cuddasahi gāthāhi brāhmaṇe ca yaññe ca vede ca vaṇṇesi.

Micchākathā niṭṭhitā.

Tassa taṃ kathaṃ sutvā mahāsattassa gilānupaṭṭhānaṃ āgatā bahū nāgā “ayaṃ bhūtameva katheti”’ti micchāgāhaṃ gaṇhanākārappattā jātā. Mahāsatto gilānaseyyāya nipannova taṃ sabbaṃ assosi. Nāgāpissa ārocesuṃ. Tato mahāsatto cintesi “ariṭṭho micchāmaggaṃ vaṇṇeti, vādamassa bhinditvā pariṣaṃ sammādiṭṭhikaṃ karissāmī”’ti. So utṭhāya nhatvā sabbālaṅkārappaṭimaṇḍito dhammāsane nisīditvā sabbaṃ nāgapaṛisaṃ sannipātāpetvā ariṭṭhaṃ pakkosāpetvā “ariṭṭha, tvaṃ abhūtaṃ vatvā vede ca yaññe ca brāhmaṇe ca vaṇṇesi, brāhmaṇānañhi vedavidhānena yaññayajanaṃ nāma anariyasammataṃ na saggāvahaṃ, tava vāde abhūtaṃ passāhī”’ti vatvā yaññabhedavādaṃ nāma ārabhanto āha –

919. “Kalī hi dhīrāna kaṭaṃ magānaṃ, bhavanti vedajjhagātānariṭṭha;  
Marīcidhammaṃ asamekkhitattā, māyāguṇā nātivahanti paññaṃ.

920. “Vedā na tāṇāya bhavanti dassa, mittadduno bhūnahuno narassa;  
Na tāyate pariciṇṇo ca aggi, dosantaraṃ maccamanariyakammaṃ.

921. “Sabbāñca maccā sadhanaṃ sabhogaṃ, ādīpitaṃ dāru tiṇena missaṃ;  
Dahaṃ na tappe asamatthatejo, ko taṃ subhikkhaṃ dvirasaññaṃ kayirā.

922. “Yathāpi khīraṃ vipariṇāmadhammaṃ, dadhi bhavitvā navanītampi hoti;  
Evampi aggi vipariṇāmadhammo, tejo samorohatī yogayutto.

923. “Na dissatī aggi manuppaviṭṭho, sukkhesu kaṭṭhesu navesu cāpi;  
Nāmatthamāno araṇīnarena, nākammunā jāyati jātavedo.

924. “Sace hi aggi antarato vaseyya, sukkhesu kaṭṭhesu navesu cāpi;  
Sabbāni susseyyu vanāni loke, sukkhāni kaṭṭhāni ca pajjaleyyaṃ.

925. “Karoti ce dārutiṇena puññaṃ, bhojaṃ naro dhūmasikhiṃ patāpavaṃ;  
Aṅgārikā loṇakarā ca sūdā, sarīradāhāpi kareyyu puññaṃ.
926. “Atha ce hi ete na karonti puññaṃ, ajjhenamaggiṃ idha tappayitvā;  
Na koci lokasmiṃ karoti puññaṃ, bhojaṃ naro dhūmasikhiṃ patāpavaṃ.
927. “Kathañhi lokāpacito samāno, amanuññagandhaṃ bahūnaṃ akantaṃ;  
Yadeva maccā parivajjayanti, tadappasatthaṃ dvirasaññu bhujje.
928. “Sikhimpi devesu vadanti heke, āpaṃ milakkhū pana devamāhu;  
Sabbeva ete vitathaṃ bhaṇanti, aggī na devaññataro na cāpo.
929. “Anindriyabaddhamasaññakāyaṃ, vessānaraṃ kammakaraṃ pajānaṃ;  
Paricariya maggiṃ sugatiṃ kathaṃ vaje, pāpāni kammāni pakubbamāno.
930. “Sabbābhībhū tāhudha jīvikatthā, aggissa brahmā paricārikoti;  
Sabbānubhāvī ca vasī kimatthaṃ, animmito nimmitaṃ vanditassa.
931. “Hassaṃ anijjhānakkhamaṃ atacchaṃ, sakkārahetu pakiriṃsu pubbe;  
Te lābhasakkāre apātubhonte, sandhāpitā jantubhi santidhammaṃ.
932. “Ajjenamariyā pathaviṃ janindā, vessā kasim pāricariyañca suddā;  
Upāgu paccakaṃ yathāpadesaṃ, katāhu ete vasināti āhu.
933. “Etañca saccaṃ vacanaṃ bhavēyya, yathā idama bhāsitaṃ brāhmaṇehi;  
Nākhattiyo jātu labhetha rajjaṃ, nābrāhmaṇo mantapadāni sikkhe;  
Nāññatra vessehi kasim kareyya, suddo na mucce parapesanāya.
934. “Yasmā ca etaṃ vacanaṃ abhūtaṃ, musāvime odariyā bhaṇanti;  
Tadappapaññā abhisaddahanti, passanti taṃ paṇḍitā attanāva.
935. “Khatyā hi vessānaṃ baliṃ haranti, ādāya satthāni caranti brāhmaṇā;  
Taṃ tādisaṃ saṅkhubhitaṃ pabhinnaṃ, kasmā brahmā nuju karoti lokaṃ.
936. “Sace hi so issaro sabbaloke, brahmā bahūbhūtapatī pajānaṃ;  
Kiṃ sabbalokaṃ vidahī alakkhiṃ, kiṃ sabbalokaṃ na sukhiṃ akāsi.
937. “Sace hi so issaro sabbaloke, brahmā bahūbhūtapatī pajānaṃ;  
Māyā musāvajjamadena cāpi, lokaṃ adhammena kimatthamakāri.
938. “Sace hi so issaro sabbaloke, brahmā bahūbhūtapatī pajānaṃ;  
Adhammiko bhūtapatī ariṭṭha, dhamme sati yo vidahī adhammaṃ.
939. “Kīṭā paṭaṅgā uragā ca bhekā, gantvā kimī sujjhati makkhikā ca;  
Etepi dhammā anariyarūpā, kambojakānaṃ vitathā bahūna’nti.

Tattha **vedajjhagatānariṭṭhā**ti ariṭṭha, imāni vedādhigamanāni nāma dhīrānaṃ parājayasāṅkhāto kaliggāho, magānaṃ bālānaṃ jayasāṅkhāto kaṭaggāho. **Marīcidhammanti** idañhi vedattayaṃ marīcidhammaṃ. Tayidaṃ asamekkhitattā yuttāyuttaṃ ajānantā bālā udakasaññāya magā marīciṃ viya bhūtasāññāya anavajjasāññāya attano vināsaṃ upagacchanti. **Paññanti** evarūpā pana māyākoṭṭhāsā paññaṃ ñāṇasampannaṃ purisaṃ nātivahanti na vañcenti. **Bhavanti dassāti da-**kāro byañjanasandhimattaṃ, assa **bhūnahuno** vuḍḍhighātakassa mittadubbhino narassa vedā na tāṇatthāya

bhavanti, patitthā hotum na sakkontīti attho. **Pariciṇṇo ca aggīti** aggi ca pariciṇṇo tividhena duccharitadosena sadosacittam pāpakamma purisaṃ na tāyati na rakkhati.

**Sabbañca maccāti** sacepi hi maccā yattakaṃ loke dāru atthi, taṃ sabbaṃ sadhanaṃ sabhogam attano dhanena ca bhogehi ca saddhiṃ tiṇena missaṃ katvā ādīpeyyum. Evaṃ sabbampi taṃ tehi ādīpitaṃ dahanto ayam asamatthatejo asadisatejo tava aggi na tappeyya. Evaṃ atappaṇīyaṃ, bhātika, dvirasaññu dvīhi jivhāhi rasajānanasamattho ko taṃ sappiādīhi subhikkhaṃ suhītaṃ kayirā, ko sakkuṇeyya kātum. Evaṃ atittaṃ panetaṃ mahagghasaṃ santappetvā ko nāma devalokaṃ gamissati, passa yāvañcetaṃ dukkathitanti. **Yogayuttoti** araṇimathanayogena yutto hutvā taṃ paccayaṃ labhitvāva aggi samorohati nibbattati. Evaṃ paravāyāmena uppajjamānaṃ acetanaṃ taṃ tvam “devo”ti vadesi. Idampi abhūtaṃ katesīti.

**Aggi manuppaviṭṭhoti** aggi anupaviṭṭho. **Nāmatthamānoti** nāpi araṇihatthena narena amatthiyamāno nibbattati. **Nākammunā jāyati jātavedoti** ekassa kiriyam vinā attano dhammatāya eva na jāyati. **Susseyyunti** anto agginā sosiyamānāni vanāni sukkheyyum, allāneva na siyum. **Bhojanti** bhojento. **Dhūmasikhim patāpavanti** dhūmasikhāya yuttaṃ patāpavantaṃ. **Aṅgārikāti** aṅgārakammakarā. **Loṇakarāti** loṇodakaṃ pacitvā loṇakārakā. **Sūdāti** bhattakārakā. **Sarīradāhāti** matasarīrajhāpakā. **Puññanti** etepi sabbe puññaṃ kareyyum.

**Ajjhenamagginti** ajjhenaaggim. **Na kocīti** mantajjhāyakā brāhmaṇāpi hontu, koci naro dhūmasikhim patāpavantaṃ aggim bhojento tappayitvāpi puññaṃ na karoti nāma. **Lokāpacito samānoti** tava devolokassa apacito pūjito samāno. **Yadevāti** yaṃ ahikuṇapādim paṭikulaṃ jeguccham maccā dūrato parivajjenti. **Tadappasatthanti** taṃ appasattham, samma, dvirasaññu kathaṃ kena kāraṇena paribhuñjeyya. **Devesūti** eke manussā sikhimpi devesu aññataraṃ devaṃ vadanti. **Milakkhū panāti** aññāṇā pana milakkhū udakaṃ “devo”ti vadanti. **Asaññakāyanti** anindriyabaddham acittakāyañca samānaṃ etaṃ acetanaṃ pajānaṃ pacanādikammakaraṃ vessānaṃ aggim paricaritvā pāpāni kammāni karonto loko kathaṃ sugatiṃ gamissati. Idaṃ te ativiya dukkathitaṃ.

**Sabbābhi bhūtāhudha jīvikatthāti** ime brāhmaṇā attano jīvikattham mahābrahmā sabbābhibhūti āhaṃsu, sabbo loko teneva nimmitoti vadanti. Puna aggissa brahmā paricārakotipi vadanti. Sopi kira aggim juhateva. **Sabbānubhāvī ca vasīti** so pana yadi sabbānubhāvī ca vasī ca, atha kimattham sayam animmito hutvā attanāva nimmitam vanditā bhavēyya. Idampi te **dukkathitameva**. **Hassanti** ariṭṭha brāhmaṇānaṃ vacanaṃ nāma hasitabbayuttakaṃ paṇḍitānaṃ na nijjhānakkhamaṃ. **Pakiriṃsūti** ime brāhmaṇā evarūpaṃ musāvādaṃ attano sakkārahetu pubbe patthariṃsu. **Sandhāpitā jantubhi santidhammanti** te ettakena lābhasakkāre apātubhūte jantūhi saddhiṃ yojetvā pānavadhapaṭisaṃyuttaṃ attano laddhidhammasaṅkhātaṃ santidhammaṃ sandhāpitā, yaññasuttaṃ nāma ganthayimṣūti attho.

**Etañca saccanti** yadetaṃ tayā “ajjhenaṃariyā”tiādi vuttaṃ, etañca saccam bhavēyya. **Nākhattiyoti** evaṃ sante akhattiyo rajjam nāma na labheyya, abrahmaṇopi mantapadāni na sikkheyya. **Musāvīmeti** musāva ime. **Odariyāti** udaranissitajīvikā, udarapūraṇahetu vā. **Tadappapaññāti** taṃ tesam vacanaṃ appapaññā. **Attanāvāti** paṇḍitā pana tesam vacanaṃ “sadosa”nti attanāva passanti. **Tādisanti** tathārūpaṃ. **Saṅkhubhitanti** saṅkhubhitvā brahmunā ṭhapitamariyādaṃ bhinditvā ṭhitaṃ saṅkhubhitaṃ vibhindaṃ lokaṃ so tavabrahmā kasmā ujum na karoti. **Alakkhinti** kiṃkāraṇā sabbaloke dukkhaṃ vidahi. **Sukhinti** kiṃ nu ekantasukhimeva sabbalokaṃ na akāsi, lokavināsako coro maññe tava brahmāti. **Māyāti** māyāya. **Adhammena kimatthamakārīti** iminā māyādinā adhammena kiṃkāraṇā lokaṃ anattakiriyāyaṃ saṃyojesīti attho. **Ariṭṭhāti** ariṭṭha, tava bhūtapati adhammiko, yo dasavidhe kusaladhamme satī dhammameva avidahitvā adhammaṃ vidahi. **Kīṭāti**tiādi upayogathe paccattaṃ. Ete kīṭādayo pāṇe hantvā macco sujhatīti etepi kambojaraṭṭhavāsīnaṃ bahūnaṃ anariyānaṃ dhammā, te pana vitathā, adhammāva dhammāti vuttā. Tehipi tava brahmunāva nimmitēhi bhavitabbanti.

Idāni tesam vitathabhāvaṃ dassento āha –

940. “Sace hi so sujjhati yo hanāti, hatopi so saggamupeti t̄hānaṃ;  
Bhovādi bhovādina mārayeyyūṃ, ye cāpi tesāṃ abhisaddaheyyūṃ.
941. “Neva migā na pasū nopi gāvo, āyācanti attavadhāya keci;  
Vipphandamāne idha jīvikatthā, yaññesu pāṇe pasumārabhanti.
942. “Yūpussane pasubandhe ca bālā, cittehi vaṇṇehi mukhaṃ nayanti;  
Ayaṃ te yūpo kāmadoho parattha, bhavissati sassato samparāye.
943. “Sace ca yūpe maṇisaṅkhamuttaṃ, dhaññaṃ dhanaṃ rajataṃ jātarūpaṃ;  
Sukkhesu kaṭṭhesu navesu cāpi, sace duhe tidive sabbakāme;  
Tevijjasāṅghāva puthū vajeyyūṃ, abrāhmaṇaṃ kañci na yājayeyyūṃ.
944. “Kuto ca yūpe maṇisaṅkhamuttaṃ, dhaññaṃ dhanaṃ rajataṃ jātarūpaṃ;  
Sukkhesu kaṭṭhesu navesu cāpi, kuto duhe tidive sabbakāme.
945. “Saṭṭhā ca luddā ca paluddhabālā, cittehi vaṇṇehi mukhaṃ nayanti;  
Ādāya aggim̄ mama dehi vittaṃ, tato sukhī hohisi sabbakāme.
946. “Tamaggihuttaṃ saraṇaṃ pavissa, cittehi vaṇṇehi mukhaṃ nayanti;  
Oropayitvā kesamassaṃ nakhañca, vedehi vittaṃ atigāḷhayanti.
947. “Kākā ulūkaṃva raho labhitvā, ekaṃ samānaṃ bahukā samecca;  
Annāni bhutvā kuhakā kuhitvā, muṇḍaṃ karitvā yaññapathossajanti.
948. “Evañhi so vañcito brāhmaṇehi, eko samāno bahukā samecca;  
Te yogayogena vilumpamānā, diṭṭhaṃ adiṭṭhena dhanaṃ haranti.
949. “Akāsiyā rājūhivānusiṭṭhā, tadassa ādāya dhanaṃ haranti;  
Te tādisā corasamā asantā, vajjhā na haññanti ariṭṭha loke.
950. “Indassa bāhārasi dakkhiṇāti, yaññesu chindanti palāsayaṭṭhiṃ;  
Taṃ cepi saccaṃ maghavā chinnabāhu, kenassa indo asure jināti.
951. “Tañceva tucchaṃ maghavā samaṅgī, hantā avajjho paramo sa devo;  
Mantā ime brāhmaṇā tuccharūpā, sandiṭṭhikā vañcanā esa loke.
952. “Mālāgiri himavā yo ca gijjho, sudassano nisabho kuveru;  
Ete ca aññe ca nagā mahantā, cityā katā yaññakarehi māhu.
953. “Yathāpakārāni hi iṭṭhakāni, cityā katā yaññakarehi māhu;  
Na pabbatā honti tathāpakārā, aññā disā acalā tiṭṭhaselā.
954. “Na iṭṭhakā honti silā cirena, na tattha sañjāyati ayo na lohaṃ;  
Yaññañca etaṃ parivaṇṇayantā, cityā katā yaññakarehi māhu.
955. “Ajjhāyakaṃ mantaguṇūpapannaṃ, tapassinaṃ ‘yācayogo’tidhāhu;  
Tīre samuddassudakaṃ sajantaṃ, taṃ sāgarajjhohari tenāpeyyo.
956. “Parosahassampi samantavede, mantūpapanne nadiyo vahanti;  
Na tena byāpannarasūdakā na, kasmā samuddo atulo apeyyo.



957. “Ye keci kūpā idha jīvaloke, loṇūdakā kūpakhaṇehi khātā;  
Na brāhmaṇajjhoharaṇena tesu, āpo apeyyo dvirasaññu māhu.
958. “Pure puratthā kā kassa bhariyā, mano manussaṃ ajanesi pubbe;  
Tenāpi dhammena na koci hīno, evampi vossaggavibhaṅgamāhu.
959. “Caṇḍālaputtopi adhicca vede, bhāseyya mante kusalo matīmā;  
Na tassa muddhāpi phaleyya sattadhā, mantā ime attavadhāya katā.
960. “Vācākatā giddhikatā gahītā, dummocayā kabyapathānupannā;  
Bālāna cittaṃ visame nivīṭṭhaṃ, tadappapaññā abhisaddahanti.
961. “Sīhassa byagghassa ca dīpino ca, na vijjatī porisiyaṃ balena;  
Manussabhāvo ca gavaṃva pekkho, jātī hi tesam asamā samānā.
962. “Sace ca rājā pathaviṃ vijitvā, sajīvavā assavapārisajjo;  
Sayameva so sattusaṅghaṃ vijeyya, tassappajā niccasukhī bhaveyya.
963. “Khattiyamantā ca tayo ca vedā, atthēna ete samakā bhavanti;  
Tesaṅca atthaṃ avinicchinitvā, na bujjhatī oghapathaṃva channaṃ.
964. “Khattiyamantā ca tayo ca vedā, atthēna ete samakā bhavanti;  
Lābho alābho ayaso yaso ca, sabbeva tesam catunnaṅca dhammā.
965. “Yathāpi ibbhā dhanadhaññahetu, kammāni karonti puthū pathabyā;  
Tevijjasaṅghā ca tatheva ajja, kammāni karonti puthū pathabyā.
966. “Ibbhehi ye te samakā bhavanti, niccussukā kāmagaṇesu yuttā;  
Kammāni karonti puthū pathabyā, tadappapaññā dvirasaññurā te’’ti.

Tattha **bhovādīti** brāhmaṇā. **Bhovādina mārayeyyunti** brāhmaṇameva māreyyūṃ. **Ye cāpīti** yepi brāhmaṇānaṃ taṃ vacanaṃ saddaheyyūṃ, te attano upaṭṭhākeyeva ca brāhmaṇe ca māreyyūṃ. Brāhmaṇā pana brāhmaṇe ca upaṭṭhāke ca amāretvā nānappakāre tiracchāneyeva mārenti. Iti tesam vacanaṃ micchā. **Kecīti** yaññesu no māretha, mayaṃ saggam gamissāmāti āyācantā keci natthi. **Pāṇe pasumārabbhantīti** migādayo pāṇe ca pasū ca vipphandamāne jīvatthāya mārenti. **Mukhaṃ nayantīti** etesu yūpassanesu pasubandhesu imasmiṃ te yūpe sabbaṃ maṇisaṅkhamuttaṃ dhaññaṃ dhanam rajataṃ jātarūpaṃ sannihitaṃ, ayaṃ te yūpo parattha paraloke kāmadoho bhavissati, sassatabhāvaṃ āvahissatīti citrehi kāraṇehi mukhaṃ pasādentī, taṃ taṃ vatvā micchāgāhaṃ gāhentīti attho.

**Sace cāti** sace ca yūpe vā sesakaṭṭhesu vā etaṃ maṇiādikaṃ bhaveyya, tidive vā sabbakāmaduho assa, tevijjasaṅghāva puthū hutvā yaññaṃ yajeyyūṃ bahudhanatāya ceva saggakāmatāya ca, aññaṃ abrahmaṇaṃ na yajeyyūṃ. Yasmā pana attano dhanam paccāsīsantā aññaṃpi yajāpentī, tasmā abhūtavādinoti veditabbā. **Kuto cāti** etasmiṅca yūpe vā sesakaṭṭhesu vā kuto etaṃ maṇiādikaṃ avijjamānameva, kuto tidive sabbakāme duhissati. Sabbathāpi abhūtameva tesam vacanaṃ.

**Saṭhā ca luddā ca paluddhabālāti** ariṭṭha, ime brāhmaṇā nāma kerāṭikā ceva nikkaruṇā ca, te bālā lokam palobhetvā upalobhetvā citrehi kāraṇehi mukhaṃ pasādentī. Sabbakāmeti aggiṃ ādāya tvaṅca jūha, amhākaṅca vittaṃ dehi, tato sabbakāme labhitvā sukhī hohisi.

**Tamaggihuttaṃ saraṇaṃ pavissāti** taṃ rājānaṃ vā rājamahāmatam vā ādāya aggijuhanaṭṭhānaṃ gehaṃ pavisitvā. **Oropayitvāti** citrāni kāraṇāni vadantā kesamassuṃ nakhe ca oropayitvā.

**Atigāḷhayantī** vuttatāya tayo vede nissāya “idaṃ dātabbaṃ, idaṃ kattabba”nti vadantā vedehi tassa santakaṃ vittaṃ atigāḷhayanti vināsenti viddhaṃsenti.

**Annāni bhutvā kuhakā kuhitvā**ti te kuhakā nānappakāraṃ kuhakakammaṃ katvā **samecca** samāgantvā yaññaṃ vaṇṇetvā vañcetvā tassa santakaṃ nānaggarasabhojanaṃ bhuñjitvā atha naṃ muṇḍakaṃ katvā yaññapathe ossajanti, taṃ gahetvā bahiyaññāvāṭaṃ gacchantīti attho.

**Yogayogenā**ti te brāhmaṇā taṃ ekaṃ bahukā samecca tena tena yogena tāya tāya yuttiyā vilumpamānā diṭṭhaṃ paccakkhaṃ tassa dhaṇaṃ adiṭṭhena devalokena adiṭṭhaṃ devalokaṃ vaṇṇetvā āharaṇaṭṭhānaṃ katvā haranti. **Akāsiyā rājūhivānusiṭṭhā**ti “idañcidañca balim gāṇhathā”ti rājūhi anusiṭṭhā akāsiyasāṅkhātā rājapurisā viya. **Tadassā**ti taṃ assa dhaṇaṃ ādāya haranti. **Corasamā**ti abhūtabaliggāhakā sandhicchedakacorasadisā asappurisā. **Vajjhā**ti vadhārahā evarūpā pāpadhammā udāni loke na haññanti.

**Bāhārasī**ti bāhā asi. Idaṃ vuttaṃ hoti – idampi ariṭṭha, brāhmaṇānaṃ musāvādaṃ passa. Te kira yaññesu mahatiṃ palāsayaṭṭhiṃ “indassa bāhā asi dakkhiṇā”ti vatvā chindanti. Tañce etesaṃ vacanaṃ saccāṃ, atha chinnabāhu samāno kenassa bāhubalena indo asure jinātīti. **Samaṅgī**ti bāhusamaṅgī acchinnabāhu arogoyeva. **Hantā**ti asurānaṃ hantā. **Paramoti** uttamo puññiddhiyā samannāgato aññesaṃ avajjho. **Brāhmaṇā**ti brāhmaṇānaṃ. **Tuccharūpā**ti tucchasabhāvā nipphalā. **Vañcanā**ti ye ca te brāhmaṇānaṃ mantā nāma, eṣā loke sandiṭṭhikā vañcanā.

**Yathāpakārānī**ti yādisāni iṭṭhakāni gahetvā yaññakarehi cityā katāti vadanti. **Titṭhaselā**ti pabbatā hi acalā tiṭṭhā na upacitā ekagghanā silāmayā ca. Iṭṭhakāni calāni na ekagghanāni na silāmayāni. **Parivaṇṇayantī**ti etaṃ yaññaṃ vaṇṇentā brāhmaṇā.

**Samantavedeti** paripuṇṇavede brāhmaṇe. **Vahantī**ti sotesupi āvaṭṭesupi patite vahanti, nimujjāpetvā jīvitakkhayaṃ pāpenti. **Na tena byāpannarasūdakā nā**ti ettha eko **na-kāro** pucchantaṭṭho hoti. Nanu tena byāpannarasūdakā nadiyoti taṃ pucchantaṭṭho evamāha. **Kasmā**ti kena kāraṇena tāva mahāsamuddova apeyyo kato, kiṃ mahābrahmā yamunādīsu nadīsu udakaṃ apeyyaṃ kātuṃ na sakkoti, samuddeyeva sakkoti. **Dvirasaññu māhū**ti dvirasaññu ahu, jātoti attho.

**Pure puratthā**ti ito pure pubbe puratthā paṭhamakappikakāle. **Kā kassa bhariyā**ti kā kassa bhariyā nāma. Tadā hi itthilingameva natthi, pacchā methunadhamavasena mātāpitaro nāma jātā. **Mano manussanti** tadā hi manoyeva manussaṃ janesi, manomayāva sattā nibbattiṃsūti attho. **Tenāpi dhammenā**ti tenāpi kāraṇena tena sabhāvena na koci jātiyā hīno. Na hi tadā khattiyādibhedo atthi, tasmā yaṃ brāhmaṇā vadanti “brāhmaṇāva jātiyā seṭṭhā, itare hīnā”ti, taṃ micchā. **Evampī**ti evaṃ vattamāne loke porāṇakavattaṃ jahitvā pacchā attanā sammannitvā katānaṃ vasena khattiyādayo cattāro koṭṭhāsā jātā, evampi **vossaggavibhaṅgamāhu**, attanā katehi kammavossaggehi tesāṃ sattānaṃ ekacce khattiyā jātā, ekacce brāhmaṇādayoti imaṃ vibhāgaṃ kathenti, tasmā “brāhmaṇāva seṭṭhā”ti vacanaṃ micchā.

**Sattadhā**ti yadi mahābrahmunā brāhmaṇānaññeva tayo vedā dinnā, na aññesaṃ, caṇḍālassa mante bhāsantassa muddhā sattadhā phaleyya, na ca phalati, tasmā imehi brāhmaṇehi attavadhāya mantā katā, attanoyeva nesaṃ musāvāditaṃ pakāsentaṃ guṇavadhaṃ karonti. **Vācākatā**ti ete mantā nāma musāvādena cintetvā katā. **Giddhikatā gahītā**ti lābhagiddhikatāya brāhmaṇehi gahitā. **Dummocayā**ti macchena gilitalaliso viya dummocayā. **Kabyapathānupannā**ti kabyākārabrahmaṇānaṃ vacanapathaṃ anupannā anugatā. Te hi yathā icchanti, tathā musā vatvā bandhanti. **Bālānanti** tesañhi bālānaṃ cittaṃ visame nivīṭṭhaṃ, taṃ aññe appapaññāva abhisaddahanti.

**Porisiyambalenā**ti porisiyasāṅkhātena balena. Idaṃ vuttaṃ hoti – yaṃ etesaṃ sīhādīnaṃ purisathāmasāṅkhātāṃ porisiyabalaṃ, tena balena samannāgato brāhmaṇo nāma natthi, sabbe imehi

tiracchānehipi hīnāyevāti. **Manussabhāvo ca gavaṃva pekkhoti** apica yo etesaṃ manussabhāvo, so gunnaṃ viya pekkhitabbo. Kimkāraṇā? Jāti hi tesāṃ asamā samānā. Tesāñhi brāhmaṇānaṃ duppaññatāya gohi saddhiṃ samānajātiyeva asamā. Aññaṃeva hi gunnaṃ saṅghānaṃ, aññaṃ tesanti. Etena brāhmaṇe tiracchānesu sīhādīhi samepi akatvā gorūpasameva karoti.

**Sace ca rājāti** arittha, yadi mahābrahmunā dinnabhāvena khattiyova pathaviṃ vijitvā. **Sajjivavāti** sahajivīhi amaccehi samannāgato. **Assavapārisajjoti** attano ovādarkaraparīsāvacarova siyā, athassa parisāya yujjhitvā rajjaṃ kātappaṃ nāma na bhavēyya. Sayameva so ekakova sattusaṅghaṃ vijeyya, evaṃ satī yuddhe dukkhābhāvena tassa pajā nīccasukhī bhavēyya, etaṅca natthi. Tasmā tesāṃ vacanaṃ micchā.

**Khattiyamantāti** rājasatthaṅca tayo ca vedā attano āṇāya ruciyā ‘‘idameva kattabba’’nti pavattattā atthēna ete samakā bhavanti. **Avinicchinivāti** tesāṃ khattiyamantānaṃ khattiyopi vedānaṃ brāhmaṇopi atthaṃ avinicchinivā āṇavaseneva uggaṇhanto taṃ atthaṃ udakoghena channaṃaggaṃ viya na bujjhati.

**Atthēna eteti** vañcanatthēna ete samakā bhavanti. Kimkāraṇā? Brāhmaṇāva seṭṭhā, aññe vaṇṇā hīnāti vadanti. Ye ca te lābhādayo lokadhammā, sabbeva tesāṃ catunnaṃpi vaṇṇānaṃ dhammā. Ekasattopi etehi muttako nāma natthi. Iti brāhmaṇā lokadhammehi aparimuttāva samānā ‘‘seṭṭhā maya’’nti musā kathenti.

**Ibbhāti** gahapatikā. **Tevijjasāṅghā cāti** brāhmaṇāpi tatheva puthūni kasigorakkhādīni kammāni karonti. **Niccussukāti** nīccaṃ ussukkaṇṇatā chandaṇṇatā. **Tadappapañña dvirasañña teti** tasmā bhātika, dvirasañña nippañña brāhmaṇā, āra te dhammato. Porāṇakā hi brāhmaṇadhammā etarāhi sunakhesu sandissantīti.

Evaṃ mahāsatto tassa vādaṃ bhinditvā attano vādaṃ patiṭṭhāpesi. Tassa dhammakathaṃ sutvā sabbā nāgaparīsā somanassajātā ahesuṃ. Mahāsatto nesādabrāhmaṇaṃ nāgabhavanā nīharāpesi, paribhāsamattampissa nākāsī. Sāgarabrahmadattopi ṭhapitadivasāṃ anatikkamitvā caturāṅginīyā senāya saha pitu vasanaṭṭhānaṃ agamāsī. Mahāsattopi ‘‘mātulaṅca ayyakaṅca passissāmi’’ti bheriṃ carāpetvā mahantēna sirisobhaggena yamunāto uttaritvā tameva assamapadaṃ ārabha pāyāsī. Avasesā bhātaro cassa mātāpitaro ca pacchato pāyimsu. Tasmīṃ khaṇe sāgarabrahmadatto mahāsattaṃ mahatiyā parisāya āgacchantaṃ asaṅjanitvā pitaraṃ pucchanto āha –

967. ‘‘Kassa bherī mudingā ca, saṅkhā paṇavadindimā;  
Purato paṭipannāni, hāsayaṅtā rathesabhaṃ.

968. ‘‘Kassa kañcanapaṭṭena, puthunā vijjuvaṇṇinā;  
Yuvā kalāpasannaddho, ko eti siriyā jalaṃ.

969. ‘‘Ukkāmukhapahaṭṭhaṃva, khadirāṅgārasannibhaṃ;  
Mukhaṅca rucirā bhāti, ko eti siriyā jalaṃ.

970. ‘‘Kassa jambonadaṃ chattaṃ, sasalākaṃ manoramaṃ;  
Ādiccamaṃsāvaraṇaṃ, ko eti siriyā jalaṃ.

971. ‘‘Kassa aṅgaṃ pariggayha, vālabījanimuttamaṃ;  
Ubhato varapuññaṃ, muddhani uparūpari.

972. ‘‘Kassa pekhūṇahatthāni, citrāni ca mudūni ca;  
Kañcanamaṇḍaṇḍāni, caranti dubhato mukhaṃ.

973. “Khadiraṅgāraṇṇābhā, ukkā mukhapahaṃsitā;  
Kassete kuṇḍalā vaggū, sobhanti dubhato mukhaṃ.
974. “Kassa vātena chupitā, niddhantā mudukāḷakā;  
Sobhayanti nalāṭantaṃ, nabhā vijjurivuggatā.
975. “Kassa etāni akkhīni, āyatāni puthūni ca;  
Ko sobhati visālakkho, kassetam uṇṇajam mukhaṃ.
976. “Kassete lapanajātā, suddhā saṅkhavarūpamā;  
Bhāsamanassa sobhanti, dantā kuppilasādisā.
977. “Kassa lākhārasasamā, hatthapādā sukhedhitā;  
Ko so bimboṭṭhasampanno, divā sūriyova bhāsati.
978. “Himaccaye himavati, mahāsālova pupphito;  
Ko so odātapāvāro, jayam indova sobhati.
979. “Suvaṇṇapīlakākiṇṇam, maṇidaṇḍavicittakam;  
Ko so parisamogayha, īsam khaggam pamuṇcati.
980. “Suvaṇṇavikatā cittā, sukatā cittasibbanā;  
Ko so omuṇcate pādā, namo katvā mahesino”’ti.

Tattha **paṭipannānī** kassetāni tūriyāni purato paṭipannāni. **Hāsayantā**ti etaṃ rājānaṃ hāsayantā. **Kassa kañcanapaṭṭenā**ti kassa nalāṭante bandhena uṇḥisapaṭṭena vijjuyā meghamukhaṃ viya mukhaṃ pajjotati puccati. **Yuvā kalāpasannaddhoti** taruṇo sannaddhakalāpo. **Ukkā mukhapahaṭṭhamvā**ti kammāruddhane pahaṭṭhasuvaṇṇam viya. **Khadiraṅgārasannibhanti** ādittakhadiraṅgārasannibham. **Jambonadanti** rattasuvaṇṇamayam. **Aṅgam pariggayhā**ti cāmarigāhakena aṅgena pariggahitā hutvā. **Vālabījanimuttamanti** uttamaṃ vālabījanim. **Pekhuṇahatthānī**ti morapiṇchahatthakāni. **Citrānī**ti sattaratanacitrāni. **Kañcanamaṇidaṇḍānī**ti tapanīyasuvaṇṇena ca maṇiḥi ca khaṇitadaṇḍāni. **Dubhato mukhanti** mukhassa ubhayapassesu caranti.

**Vātena chupitā**ti vātapahaṭṭā. **Niddhantā**ti siniddhaantā. **Nalāṭantanti** kassete evarūpā kesā nalāṭantaṃ upasobhenti. **Nabhā vijjurivuggatā**ti nabhato uggatā vijju viya. **Uṇṇajanti** kañcanādāso viya paripuṇṇam. **Lapanajātā**ti mukhajātā. **Kuppilasādisā**ti mandālakamakulasādisā. **Sukhedhitā**ti sukhaparihaṭṭā. **Jayam indovā**ti jayam patto indo viya. **Suvaṇṇapīlakākiṇṇanti** suvaṇṇapīlakāhi ākiṇṇam. **Maṇidaṇḍavicittakanti** maṇiḥi tharumhi vicittakam. **Suvaṇṇavikatā**ti suvaṇṇakhacitā. **Cittā**ti sattaratanavicittā. **Sukatā**ti suṭṭhu niṭṭhitā. **Cittasibbanā**ti citrasibbiniyo. **Ko so omuṇcate pādā**ti ko esa pādato evarūpā pādūkā omuṇcatīti.

Evam puttena sāgarabrahmadattena puṭṭho iddhimā abhiññālābhī tāpaso “tāta, ete dhataratṭharañño puttā tava bhāgineyyanāgā”’ti ācikkhanto gāthamāha –

981. “Dhataratṭhā hi te nāgā, iddhimanto yasassino;  
Samuddajāya uppannā, nāgā ete mahiddhikā”’ti.

Evam tesam kathentānaññeva nāgāparisā patvā tāpasassa pāde vanditvā ekamantaṃ nisīdimsu. Samuddajāpi pitaram vanditvā roditvā nāgāparisāya saddhim nāgabhavanameva gatā. Sāgarabrahmadattopi tattheva katipāham vasitvā bārāṇasimeva gato. Samuddajā nāgabhavaneyeva kālamakāsi. Bodhisatto yāvajīvam silam rakkhitvā uposathakammaṃ katvā āyupariyosāne saddhim

parisāya saggapuram pūresi.

Satthā imaṃ dhammadesanaṃ āharitvā “evaṃ upāsakā porāṇakapaṇḍitā anuppannepi buddhe evarūpaṃ nāma sampattiṃ pahāya uposathakammaṃ karimsuyeṃvā”ti vatvā jātakam samodhānesi. Desanāpariyosāne upāsakā sotāpattiphale patiṭṭhahimsu. Tada mātipitaro mahārājakulāni ahesuṃ, nesādabrāhmaṇo devadatto, somadatto ānando, ajamukhī uppalavaṇṇā, sudassano sārīputto, subhogo moggallāno, kāṇārīṭṭho sunakkhatto, bhūridatto pana ahameva sammāsambuddho ahosinti.

Bhūridattajātakavaṇṇanā chaṭṭhāniṭṭhitā.

[544] 7. Candakumārājātakavaṇṇanā

**Rājāsi luddakammoti** idaṃ satthā gijjhakūṭe viharanto devadattaṃ ārabba kathesi. Tassa vatthu saṅghabhedakakkhandhake āgatameva. Taṃ tassa pabbajitakālato paṭṭhāya yāva bimbisārarañño maraṇā tatthāgatanayeneva veditabbaṃ. Taṃ pana mārāpetvā devadatto ajātasattum upasaṅkamitvā “mahārāja, tava manoratho matthakam patto, mama manoratho tāva na pāpuṇātī”ti āha. “Ko pana te, bhante, manoratho”ti? “Nanu dasabalaṃ māretvā buddho bhavissāmī”ti. “Amhehettha kiṃ kātabba”nti? “Mahārāja, dhanuggahe sannipātāpetum vaṭṭatī”ti. “Sādhu, bhante”ti rājā akkhaṇavedhīnaṃ dhanuggahānaṃ pañcasatāni sannipātāpetvā tato ekatiṃsa jane uccinitvā therassa santikam pāhesi. So tesam jeṭṭhakam āmantetvā “āvuso samaṇo gotamo gijjhakūṭe viharati, asukasmim nāma divāṭṭhāne caṅkamati. Tvaṃ tattha gantvā taṃ visapītena sallena vijjhivā jīvitakkhayaṃ pāpetvā asukena nāma maggena ehi”ti vatvā pesetvā tasmim magge dve dhanuggaheṭṭhapesi “tumahākam ṭhitamaggena eko puriso āgamissati, taṃ tumhe jīvitā voropetvā asukena nāma maggena ethā”ti, tasmim magge cattāro purise ṭhapesi “tumahākam ṭhitamaggena dve purisā āgamissanti, tumhe te jīvitā voropetvā asukena nāma maggena ethā”ti, tasmim magge aṭṭha jane ṭhapesi “tumahākam ṭhitamaggena cattāro puriso āgamissanti, tumhe te jīvitā voropetvā asukena nāma maggena ethā”ti, tasmim magge soḷasa purise ṭhapesi “tumahākam ṭhitamaggena aṭṭha purisā āgamissanti, tumhe te jīvitā voropetvā asukena nāma maggena ethā”ti.

Kasmā panesa evamakāsīti? Attano kammaṃ paṭicchādanatthaṃ. Atha so jeṭṭhakadhanuggaho vāmato khaggaṃ laggetvā piṭṭhiyā tuṇīraṃ bandhitvā meṇḍasiṅgamahādhanuṃ gahetvā tathāgatassa santikam gantvā “vijjhissāmi na”nti saññāya dhanuṃ āropetvā saraṃ sannayhitvā ākaḍḍhitvā vissajjetum nāsakkhi. So saraṃ oropetumpi asakkonto phāsukā bhijjantiyo viya mukhato kheḷena paggharantena kilantarūpo ahoṣi, sakalasarīraṃ thaddhaṃ jātaṃ, yantena pīḷitākārappattaṃ viya ahoṣi. So maraṇabhayatajjito aṭṭhāsi. Atha naṃ satthā disvā madhurassaraṃ nicchāretvā etadavoca “mā bhāyi bho, purisa, ito ehi”ti. So tasmim khaṇe āvudhāni chaḍḍetvā bhagavato pādesu sirasā nipatitvā “accayo maṃ, bhante, accagamā yathābālaṃ yathāmūlhaṃ yathāakusalaṃ, svāhaṃ tumhākam guṇe ajānanto andhabālassa devadattassa vacanena tumhe jīvitā voropetum āgatomhi, khamatha me, bhante”ti khamāpetvā ekamante nisīdi. Atha naṃ satthā dhammaṃ desento saccāni pakāsetvā sotāpattiphale patiṭṭhāpetvā “āvuso, devadattena ācikkhitamaggaṃ appaṭipajjitvā aññena maggena yāhi”ti uyyojesi. Uyyojetvā ca pana caṅkamā oruyha aññatarasmim rukkhamūle nisīdi.

Atha tasmim dhanuggahe anāgacchante itare dve janā “kiṃ nu kho so cirāyatī”ti paṭimaggena gacchantā dasabalaṃ disvā upasaṅkamitvā vanditvā ekamantaṃ nisīdimsu. Satthā tesampi dhammaṃ desetvā saccāni pakāsetvā sotāpattiphale patiṭṭhāpetvā “āvuso, devadattena kathitamaggaṃ appaṭipajjitvā iminā maggena gacchathā”ti uyyojesi. Iminā upāyena itaresupi āgantvā nisinnesu sotāpattiphale patiṭṭhāpetvā aññena maggena uyyojesi. Atha so paṭhamamāgato jeṭṭhakadhanuggaho devadattaṃ upasaṅkamitvā “bhante, devadatta ahaṃ sammāsambuddhaṃ jīvitā voropetum nāsakkhim, mahiddhiko so bhagavā mahānubhāvo”ti ārocesi. Te sabbepi “sammāsambuddhaṃ nissāya amhehi jīvitaṃ laddha”nti satthu santike pabbajitvā arahattaṃ pāpuṇimsu. Ayaṃ pavatti bhikkhusaṅge pākāṭā ahoṣi. Bhikkhū dhammasabhāyaṃ kathaṃ samuṭṭhāpesuṃ “āvuso devadatto kira ekasmim tathāgate veracittena bahū jane jīvitā voropetum vāyāmakāsī, te sabbepi satthāraṃ nissāya jīvitaṃ labhimsū”ti.

Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepe devadatto maṃ ekakaṃ nissāya mayi veracittena bahū jane jīvītā voropetuṃ vāyāmaṃ akāsiyevā”ti vatvā tehi yācito atītaṃ āhari.

Atīte ayaṃ bārāṇasī pupphavatī nāma ahoṣi. Tattha vasavattirañño putto ekarājā nāma rajjaṃ kāresi, tassa putto candakumāro nāma oparajjaṃ kāresi. Khaṇḍahālo nāma brāhmaṇo purohito ahoṣi. So rañño atthañca dhammañca anusāsi. Taṃ kira rājā “paṇḍito”ti vinicchaye nisīdāpesi. So lañjavittako hutvā lañjaṃ gahetvā asāmike sāmike karoti, sāmike ca asāmike. Athekadivasam eko aḍḍaparājito puriso vinicchayaṭṭhānā upakkosento nikkhamitvā rājupaṭṭhānaṃ āgacchantaṃ candakumāraṃ disvā dhāvitvā tassa pādesu nipatitvā rodi. So “kiṃ, bho purisa, rodasī”ti āha. “Sāmi, khaṇḍahālo vinicchaye vilopaṃ khādāti, ahaṃ tena lañjaṃ gahetvā parājayaṃ pāpito”ti. Candakumāro “mā bhāyī”ti taṃ assāsetvā vinicchayaṃ netvā sāmikameva sāmikaṃ, asāmikameva asāmikaṃ akāsi. Mahājano mahāsaddena sādhuḥkāramadāsi. Rājā taṃ sutvā “kiṃsaddo eso”ti pucchi. “Candakumārena kira aḍḍo suvinicchito, tattheso sādhuḥkārasaddo”ti. Taṃ sutvā rājā tussī. Kumāro āgantvā taṃ vanditvā ekamantaṃ nisīdi. Atha naṃ rājā “tāta, eko kira te aḍḍo vinicchito”ti āha. “Āma, devā”ti. “Tena hi, tāta, ito paṭṭhāya tvameva vinicchayaṃ paṭṭhapehī”ti vinicchayaṃ kumārassa adāsi.

Tato paṭṭhāya khaṇḍahālassa āyo pacchijji. So tato paṭṭhāya kumāre āghātaṃ bandhitvā okāsaṃ gavesanto antarāpekkho vicari. So pana rājā mandapañño. So ekadivasam rattibhāge supitvā paccūsasamaye supinante alaṅkatadvārakoṭṭhakaṃ, sattaratanamayapākāraṃ, saṭṭhiyojanikasuvanṇamayavālukamahāvīthiṃ, yojanasahassubbedhavejayantapāsādapaṭimaṇḍitaṃ nandanavanādivanarāmaṇeyyakānandāpokkharāṇīdipokkharāṇirāmaṇeyyakasamannāgataṃ ākiṇṇadevagaṇaṃ tāvatimsabhavanaṃ disvā pabujjhītvā tattha gantukāmo cintesi – “sve ācariyakhaṇḍahālāssāgamanavelāya devalokagāmimaggam pucchitvā tena desitamaggena devalokam gamissāmi”ti khaṇḍahālopi pātova nhatvā bhuñjitvā rājupaṭṭhānaṃ āgantvā rājanivesanaṃ pavisitvā rañño sukhasēyyaṃ pucchi. Athassa rājā āsanaṃ dāpetvā pañhaṃ pucchi. Tamatthaṃ pakāsento satthā āha –

**982.** “Rājāsi luddakammo, ekarājā pupphavatīyā;  
So pucchi brahmabandhuṃ, khaṇḍahālaṃ purohitaṃ mūlhaṃ.

**983.** “Saggāna maggamācikkha, tvamsi brāhmaṇa dhammavinayakusalo;  
Yathā ito vajanti sugatiṃ, narā puññāni katvānā”ti.

Tattha **rājāsīti** rājā āsi. **Luddakammoti** kakkhaḷapharusakammo. **Saggāna magganti** saggānaṃ gamanamaggaṃ. **Dhammavinayakusaloti** sucaritadhamme ca ācāravinaye ca kusalo. **Yathāti** yathā narā puññāni katvā ito sugatiṃ gacchanti, taṃ me sugatimaggam ācikkhāhīti pucchi.

Imaṃ pana pañhaṃ sabbaññubuddhaṃ vā tassa sāvake vā tesam alābhena bodhisattaṃ vā pucchituṃ vaṭṭati. Rājā pana yathā nāma sattāhaṃ maggamūlho puriso aññaṃ māsamattaṃ maggamūlhaṃ maggaṃ puccheyya, evaṃ khaṇḍahālaṃ pucchi. So cintesi “ayaṃ me paccāmittassa piṭṭhidassanakālo, idāni candakumāraṃ jīvitaḥkayaṃ pāpetvā mama manorathaṃ pūressāmi”ti. Atha rājānaṃ āmantetvā tatiyaṃ gāthamāha –

**984.** “Atidānaṃ daditvāna, avajjhe deva ghātetvā;  
Evaṃ vajanti sugatiṃ, narā puññāni katvānā”ti.

Tassattho – mahārāja saggam gacchantā nāma atidānaṃ dadanti, avajjhe ghātentī. Sacepi saggam gantukāmosi, tvampi tatheva karohīti.

Atha naṃ rājā pañhassa atthaṃ pucchi –

**985.** “Kiṃ pana taṃ atidānaṃ, ke ca avajjhā imasmi lokasmiṃ;  
Etañca kho no akkhāhi, yajissāmi dadāmi dānānī”’ti.

Sopissa byākāsi –

**986.** “Puttehi deva yajitabbaṃ, mahesīhi negamehi ca;  
Usabhehi ājāniyehi catūhi, sabbacatukkena deva yajitabba”’nti.

Rañño pañhaṃ byākaronto ca devalokamaggaṃ puṭṭho nirayamaggaṃ byākāsi.

Tattha **puttehīti** attanā jātehi piyaputtehi ceva piyadhītāhi ca. **Mahesīhīti** piyabhariyāhi. **Negamehīti** seṭṭhīhi. **Usabhehīti** sabbasetehi usabharājūhi. **Ājāniyehīti** maṅgalaassehi. **Catūhīti** etehi sabbeheva aññehi ca hatthiādīhi catūhi catūhīti evaṃ sabbacatukkena, deva, yajitabbaṃ. Etesañhi khaggena sīsaṃ chinditvā suvaṇṇapātiyā galalohitaṃ gahetvā āvāṭe pakkhipitvā yaññassa yajanakarājāno sarīrena saha devalokaṃ gacchanti. Mahārāja, samaṇabrāhmaṇakapaṇaddhikavanibbakayācakānaṃ ghāsacchādanādisampadānaṃ dānameva pavattati. Ime pana puttadhītādayo māretvā tesam galalohitena yaññassa yajanaṃ atidānaṃ nāmāti rājānaṃ saññāpesi.

Iti so “sace candakumāraṃ ekaññeva gaṇhissāmi, veracittena karaṇaṃ maññissantī”’ti taṃ mahājanassa antare pakkhipi. Idaṃ pana tesam kathentānaṃ kathaṃ sutvā sabbe antepurajanā bhītatasitā saṃviggamānahadaya ekappahārenea mahāraṃ raviṃsu. Tamatthaṃ pakāsento satthā āha –

**987.** “Taṃ sutvā antepure, kumārā mahesiyo ca haññantu;  
Eko ahosi nigghoso, bhikkhā accuggato saddo”’ti.

Tattha **tanti** “kumārā ca mahesiyo ca haññantū”’ti taṃ saddaṃ sutvā **ekoti** sakalarājanivesane ekova nigghoso ahosi. **Bhismāti** bhayānako. **Accuggatoti** atiuggato ahosi, sakalarājakulaṃ yugantavātappahaṭaṃ viya sālavanaṃ ahosi.

Brāhmaṇo rājānaṃ āha – “kiṃ pana, mahārāja, yaññaṃ yajituṃ sakkosi, na sakkosī”’ti? “Kiṃ kathesi, ācariya, yaññaṃ yajitvā devalokaṃ gamissāmī”’ti. “Mahārāja, bhīrukā dubbalajjhāsaya yaññaṃ yajituṃ samatthā nāma na honti, tumhe idha sabbe sannipātetha, ahaṃ yaññāvāṭe kammaṃ karissāmī”’ti attano pahonakaṃ balakāyaṃ gahetvā nagarā nikkhamma yaññāvāṭaṃ samatalaṃ kāretvā vatiyā parikkhipi. Kasmā? Dhammiko hi samaṇo vā brāhmaṇo vā āgantvā nivāreyyāti yaññāvāṭe vatiyā parikkhepanaṃ nāma cārittanti katvā porāṇakabrāhmaṇehi ṭhapitaṃ. Rājāpi purise pakkosāpetvā “tātā, ahaṃ attano puttadhītaro ca bhariyāyo ca māretvā yaññaṃ yajitvā devalokaṃ gamissāmi, gacchatha nesaṃ ācikkhitvā sabbe idhānethā”’ti puttānaṃ tāva ānayanatthāya āha –

**988.** “Gacchatha vadetha kumāre, candaṃ sūriyañca bhaddasenañca;  
Sūrañca vāmagottañca, pacurā kira hotha yaññatthāyā”’ti.

Tattha **gacchatha vadetha kumāreti** candakumāro ca sūriyakumāro cāti dve gotamideviyā aggamahesiyā puttā, bhaddaseno ca sūro ca vāmagotto ca tesam vemātikabhātaro. **Pacurā kira hothāti** ekasmiṃ ṭhāne rāsī hothāti ācikkhatthāti attho.

Te paṭhamaṃ candakumārassa santikaṃ gantvā āhaṃsu “kumāra, tumhe kira māretvā tumhākaṃ pitā devalokaṃ gantukāmo, tumhākaṃ gaṇhanatthāya amhe pesesi”’ti. “Kassa vacanena maṃ gaṇhāpesi”’ti? “Khaṇḍahālassa, devā”’ti. “Kiṃ so maññeva gaṇhāpeti, udāhu aññepi”’ti. “Rājaputta, aññepi gaṇhāpeti, sabbacatukkaṃ kira yaññaṃ yajitukāmo”’ti. So cintesi “tassa aññehi saddhiṃ veraṃ natthi, vinicchaye vilopaṃ kātuṃ na labhāmī”’ti pana mayi ekasmiṃ veracittena bahū mārāpeti, pitaraṃ

datṭhum labhantassa sabbesaṃ tesaṃ mocāpanaṃ nāma mama bhāro’’ti. Atha ne rājapurise āha ‘‘tena hi me pitu vacanaṃ karoṭhā’’ti. Te taṃ netvā rājaṅgaṇe ekamante ṭhapetvā itarepi tayo āmantetvā tasseva santike katvā rañño ārocayimsu ‘‘ānītā te, deva, puttā’’ti. So tesaṃ vacanaṃ sutvā ‘‘tātā, idāni me dhītarō ānetvā tesaññeva bhātikānaṃ santike karoṭhā’’ti catasso dhītarō āharāpetuṃ itaraṃ gāthamāha –

**989.** ‘‘Kumāriyopi vadetha, upasenaṃ kokilañca muditañca;  
Nandañcāpi kumāriṃ, pacurā kira hotha yaññatthāyā’’ti.

Te ‘‘evaṃ karissāmā’’ti tāsaṃ santikaṃ gantvā tā rodamaṇā paridevamāṇā ānetvā bhātikānaññeva santike kariṃsu. Tato rājā attano bhariyānaṃ gahaṇatthāya itaraṃ gāthamāha –

**990.** ‘‘Vijayampi mayhaṃ mahesiṃ, erāvatiṃ kesiniṃsunandañca;  
Lakkhaṇavarūpapannā, pacurā kira hotha yaññatthāyā’’ti.

Tattha **lakkhaṇavarūpapannā**ti uttamehi catusaṭṭhiyā itthilakkhaṇehi upapannā etāpi vadethāti attho.

Te tāpi paridevamāṇā ānetvā kumārānaṃ santike kariṃsu. Atha rājā cattāro seṭṭhino gahaṇatthāya āṇāpento itaraṃ gāthamāha –

**991.** ‘‘Gahapatayo ca vadetha, puṇṇamukhaṃ bhaddiyaṃ siṅgalañca;  
Vaḍḍhañcāpi gahapatiṃ, pacurā kira hotha yaññatthāyā’’ti.

Rājapurisā gantvā tepi ānayaṃsu. Rañño puttadāre gayhamāne sakalanagaraṃ na kiñci avoca. Seṭṭhikulāni pana mahāsambandhāni, tasmā tesaṃ gahitakāle sakalanagaraṃ saṅkhubhitvā ‘‘rañño seṭṭhino māretvā yaññaṃ yajituṃ na dassāmā’’ti seṭṭhino parivāretvāva tesaṃ ñātivaggena saddhiṃ rājakulaṃ agami. Atha te seṭṭhino ñātigaṇaparivutā rājānaṃ vanditvā attano jīvitaṃ yāciṃsu. Tamatthaṃ pakāsento satthā āha –

**992.** ‘‘Te tattha gahapatayo, avocisuṃ samāgatā puttadāraparikiṇṇā;  
Sabbeva sikhino deva karohi, atha vā no dāse sāvehī’’ti.

Tattha **sabbeva sikhinoti** sabbe amhe matthake cūlaṃ bandhitvā attano ceṭake karohi, mayaṃ te ceṭakakiccaṃ karissāma. **Atha vā no dāse sāvehī**ti atha vā no asaddahanto sabbaseniyo sannipātetvā rāsimaṃjhe amhe dāse sāvehi, mayaṃ te dāsattaṃ paṭissuṇissāmāti.

Te evaṃ yācantāpi jīvitaṃ laddhuṃ nāsakkhiṃsu. Rājapurisā sese paṭikkamāpetvā te gahetvā kumārānaññeva santike nisīdāpesuṃ. Tato pana rājā hatthiādīnaṃ gahaṇatthāya āṇāpento āha –

**993.** ‘‘Abhayaṅkarampi me hatthiṃ, nālāgiriṃ accuggataṃ varuṇadantaṃ;  
Ānetha kho ne khippaṃ, yaññatthāya bhavissanti.

**994.** ‘‘Assaratanampi kesiṃ, surāmukhaṃ puṇṇakaṃ vinatakañca;  
Ānetha kho ne khippaṃ, yaññatthāya bhavissanti.

**995.** ‘‘Usabhampi yūthapatiṃ anojaṃ, nisabhaṃ gavampatiṃ tepi mayhaṃ ānetha;  
Samūha karontu sabbaṃ, yajissāmi dadāmi dānāni.

**996.** ‘‘Sabbam paṭiyādettha, yaññaṃ pana uggatamhi sūriyamhi;  
Āṇāpetha ca kumāre, abhiraṃantu imaṃ rattim.



997. “Sabbam upaṭṭhapetha, yaññaṃ pana uggatamhi sūriyamhi;  
Vadetha dāni kumāre, ajja kho pacchimā rattī”ti.

Tattha **samūha karontu sabbanti** na kevalam ettakameva, avasesampi catuppadaḡaṇaṇiceva pakkhigaṇaṇca sabbam catukkam katvā rāsim karontu, sabbacatukkam yaññaṃ yajissāmi, yācakabrāhmaṇaṇaṇca dānaṃ dassāmīti. **Sabbam paṭiyādethā**ti evam mayā vuttam anavasesam upaṭṭhapetha. **Uggatamhī**ti aham pana yaññaṃ uggate sūriye sve pātova yajissāmi. **Sabbam upaṭṭhapethā**ti sesampi sabbam yaññaupakaraṇam upaṭṭhapethāti.

Raṇño pana mātāpitāro dharantiyeva. Athassa amaccā gantvā mātuyā ārocesum “ayye, putto vo puttadāram māretvā yaññaṃ yajitukāmo”ti. Sā “kiṃ kathetha, tātā”ti hatthena hadayaṃ paharivā rodamaṇā āgantvā “saccaṃ kira evarūpo te yaṇño bhavissati”ti pucchi. Tamattham pakāsento sathā āha –

998. “Tamtam mātā avaca, rodantī āgantvā vimānato;  
Yaṇño kira te putta, bhavissati catūhi puttehi”ti.

Tattha **tamtanti** tam etam rājānaṃ. **Vimānatoti** attano vasanaṭṭhānato.

Rājā āha –

999. “Sabbepi mayham puttā cattā, candasmiṃ haññaṃānasmim;  
Puttehi yaññaṃ yajitvāna, sugatiṃ saggam gamissāmi”ti.

Tattha **cattā**ti candakumāre haññaṃāneyeva sabbepi yaññaṭṭhāya mayā pariccattā.

Atha nam mātā āha –

1000. “Mā tam putta saddaheṣi, sugati kira hoti puttayaññaena;  
Nirayāneso maggo, neso maggo hi saggānaṃ.

1001. “Dānāni dehi koṇḡaṇña, ahiṃsā sabbabhūtabhabyānaṃ;  
Esa maggo sugatiyā, na ca maggo puttayaññaenā”ti.

Tattha **nirayānesoti** nirassādatthena nirayānaṃ catunnam apāyānaṃ esa maggo. **Koṇḡaṇṇā**ti rājānaṃ gottenālapati. **Bhūtabhabyānanti** bhūtānaṇca bhavitabbasattānaṇca. **Puttayaññaenā**ti evarūpena puttadhītarō māretvā yajakayaññaena saggamaggo nāma natthīti.

Rājā āha –

1002. “Ācariyānaṃ vacanā, ghātesam candaṇca sūriyaṇca;  
Puttehi yaññaṃ yajitvāna duccajehi, sugatiṃ saggam gamissāmi”ti.

Tattha **ācariyānaṃ vacananti** amma, nesā mama attano mati, ācārasikkhāpanakassa pana me khaṇḡahālācariyassa etam vacanaṃ, esā anusīṭṭhi. Tasmā aham ete ghātesam, duccajehi puttehi yaññaṃ yajitvā saggam gamissāmīti.

Athassa mātā attano vacanaṃ gāhāpetum asakkontī apagatā. Pitā tam pavattiṃ pucchi. Tamattham pakāsento sathā āha –

1003. “Tamtam pitāpi avaca, vasavattī orasam sakam puttam;

Yañño kira te putta, bhavissati catūhi puttehi’’ti.

Tattha **vasavattī** tassa nāmaṃ.

Rājā āha –

**1004:** ‘‘Sabbepi mayhaṃ puttā cattā, candasmiṃ haññaṃānasmim;  
Puttehi yaññaṃ yajitvāna, sugatiṃ saggaṃ gamissāmi’’ti.

Atha naṃ pitā āha –

**1005:** ‘‘Mā taṃ putta saddahesi, sugati kira hoti puttayaññaena;  
Nirayāneso maggo, neso maggo hi saggānaṃ.

**1006:** ‘‘Dānāni dehi koṇḍañña, ahimsā sabbabhūtabhabyānaṃ;  
Esa maggo sugatiyā, na ca maggo puttayaññaenā’’ti.

Rājā āha –

**1007:** ‘‘Ācariyānaṃ vacanā, ghātesaṃ candañca sūriyañca;  
Puttehi yaññaṃ yajitvāna duccajehi, sugatiṃ saggaṃ gamissāmi’’ti.

Atha naṃ pitā āha –

**1008:** ‘‘Dānāni dehi koṇḍañña, ahimsā sabbabhūtabhabyānaṃ;  
Puttaparivuto tuvaṃ, raṭṭhaṃ janapadañca pālehi’’ti.

Tattha **puttaparivutoti** puttehi parivuto. **Raṭṭhaṃ janapadañcāti** sakalakāsiraṭṭhañca tasseva taṃ taṃ koṭṭhāsabhūtaṃ janapadañca.

Sopi taṃ attano vacanaṃ gāhāpetuṃ nāsakkhi. Tato candakumāro cintesi ‘‘imassa ettakassa janassa dukkhaṃ maṃ ekaṃ nissāya uppannaṃ, mama pītaṃ yācitvā ettakaṃ janaṃ maraṇadukkhato mocessāmi’’ti. So pītaṃ saddhiṃ sallapanto āha –

**1009:** ‘‘Mā no deva avadhi, dāse no dehi khaṇḍahālassa;  
Api nigaḷabandhakāpi, hatthī asse ca pālema.

**1010:** ‘‘Mā no deva avadhi, dāse no dehi khaṇḍahālassa;  
Api nigaḷabandhakāpi, hatthichakaṇāni ujjhema.

**1011:** ‘‘Mā no deva avadhi, dāse no dehi khaṇḍahālassa;  
Api nigaḷabandhakāpi, assachakaṇāni ujjhema.

**1012:** ‘‘Mā no deva avadhi, dāse no dehi khaṇḍahālassa;  
Yassa honti tava kāmā, api raṭṭhā pabbajitā;  
Bhikkhācariyaṃ carissāma’’ti.

Tattha **api nigaḷabandhakāpī** api nāma mayaṃ mahānigaḷehi bandhakāpi hutvā. **Yassa honti tava kāmāti** sacepi khaṇḍahālassa dātukāmosi, tassa no dāse katvā dehi, karissāmassa dāsakammanti vadati. **Api raṭṭhāti** sace amhākaṃ koci doso atthi, raṭṭhā no pabbajehi. Api nāma raṭṭhā pabbajitāpi kapaṇā viya kapālaṃ gahetvā bhikkhācariyaṃ carissāma, mā no avadhi, dehi no jīvitanti vilapi.

Tassa taṃ nānappakāraṃ vilāpaṃ sutvā rājā hadayaphalitappatto viya assuṇṇehi nettehi rodamaṇo “na me koci putte māretuṃ lacchati, na mamattho devalokenā”ti sabbe te mocetuṃ āha –

**1013:**“Dukkhaṃ kho me janayatha, vilapantā jīvitassa kāmā hi;  
Muñcetha dāni kumāre, alampi me hotu puttayaññenā”ti.

Taṃ rañño kathaṃ sutvā rājaputte ādim katvā sabbaṃ taṃ pakkhipariyosānaṃ pānagaṇaṃ vissajjesuṃ. Khaṇḍahālopi yaññāvāṭe kammaṃ saṃvidahati. Atha naṃ eko puriso “are duṭṭha, khaṇḍahāla, raññā puttā vissajjitā, tvaṃ attano putte māretvā tesam galalohitena yaññaṃ yajassū”ti āha. So “kiṃ nāma raññā kata”nti kappuṭṭhānaggi viya avattharanto uṭṭhāya turito dhāvitvā āha –

**1014:**“Pubbeva khosi me vutto, dukkaraṃ durabhisambhavañcetaṃ;  
Atha no upakkhaṭassa yaññaṃ, kasmā karosi vikkhepaṃ.

**1015:**“Sabbe vajanti sugatiṃ, ye yajanti yepi yājenti;  
Ye cāpi anumodanti, yajantānaṃ edisaṃ mahāyañña”nti.

Tattha **pubbevāti** mayā tvaṃ pubbeva vutto “na tumhādisena bhīrukajātikena sakkā yaññaṃ yajituṃ, yaññayajanaṃ nāmetaṃ dukkaraṃ durabhisambhava”nti, atha no idāni upakkhaṭassa paṭiyattassa yaññaṃ vikkhepaṃ karosi. “Vikkhambha”ntipi pāṭho, paṭisedhanti attho. Mahārāja, kasmā evaṃ karosi. Yattakā hi yaññaṃ yajanti vā yājenti vā anumodanti vā, sabbe sugatimeva vajantīti dasseti.

So andhabālo rājā tassa kodhavasikassa kathaṃ gahetvā dhammasaññī hutvā puna putte gaṇhāpesi. Tato candakumāro pītaṃ anubodhayamaṇo āha –

**1016:**“Atha kissa jano pubbe, sothānaṃ brāhmaṇe avācesi;  
Atha no akāraṇasmā, yaññatthāya deva ghātesi.

**1017:**“Pubbeva no daharakāle, na hanesi na ghātesi;  
Daharamhā yobbanam pattā, adūsakā tāta haññāma.

**1018:**“Hatthigate assagate, sannaddhe passa no mahārāja;  
Yuddhe vā yujjhamāne vā, na hi mādisā sūrā honti yaññatthāya.

**1019:**“Paccante vāpi kupite, aṭavīsu vā mādisa niyojenti;  
Atha no akāraṇasmā, abhūmiyaṃ tāta haññāma.

**1020:**“Yāpi hi tā sakūṇiyo, vasanti tiṇagharāni katvāna;  
Tāsampi piyā puttā, atha no tvaṃ deva ghātesi.

**1021:**“Mā tassa saddahesi, na maṃ khaṇḍahālo ghāteyya;  
Mamañhi so ghātetvāna, anantarā tampi deva ghāteyya.

**1022:**“Gāmaṃ nīgamavaṃ dadanti, bhogampissa mahārāja;  
Athaggaṇḍikāpi, kule kule hete bhujjanti.

**1023:**“Tesampi tādisānaṃ, icchanti dubbhituṃ mahārāja;  
Yebhuyena ete, akataññuno brāhmaṇā deva.

**1024:**“Mā no deva avadhi, dāse no dehi khaṇḍahālassa;

Api nigaḷabandhakāpi, hatthī asse ca pālema.

**1025:** ‘Mā no deva avadhi, dāse no dehi khaṇḍahālassa;  
Api nigaḷabandhakāpi, hatthichakaṇāni ujjhema.

**1026:** ‘Mā no deva avadhi, dāse no dehi khaṇḍahālassa;  
Api nigaḷabandhakāpi, assachakaṇāni ujjhema.

**1027:** ‘Mā no deva avadhi, dāse no dehi khaṇḍahālassa;  
Yassa honti tava kāmā, api raṭṭhā pabbājita;  
Bhikkhācariyaṃ carissāmā’’ti.

Tattha **pubbeti** tāta, yadi ahaṃ māretabbo, atha kasmā amhākaṃ ñātijano pubbe mama jātakāle brāhmaṇe sotthānaṃ avāsesi. Tadā kira khaṇḍahālova mama lakkhaṇāni upadhāretvā ‘‘imassa kumārassa na koci antarāyo bhavissati, tumhākaṃ accayena rajjaṃ kāressatī’’ti āha. Iccassa purimena pacchimaṃ na sameti, musāvādī esa. Atha no etassa vacanaṃ gahetvā akāraṇasmā nikkāraṇāyeva yaññatthāya, deva, ghātesī. Mā amhe ghātesī. Ayañhi mayi ekasmiṃ verena mahājanaṃ māretukāmo, sādhukaṃ sallakkhehi narindāti. **Pubbeva noti** mahārāja, sacepi amhe māretukāmo, pubbeva no kasmā sayam vā na hanesi, aññehi vā na ghātāpesi. Idāni pana mayaṃ daharamhā taruṇā, paṭhamavaye ṭhitā puttadhītāhi vaḍḍhāma, evaṃbhūtā tava adūsakāva kiṃkāraṇā haññāmāti?

**Passa noti** amheva cattāro bhātike passa. **Yujjhamāneti** paccatthikānaṃ nagaraṃ parivāretvā ṭhitakāle amhādisē putte tehi saddhiṃ yujjhamāne passa. Aputtakā hi rājāno anāthā nāma honti. **Mādisāti** amhādisā sūrā balavanto na yaññatthāya māretabbā honti. **Niyojentīti** tesam paccāmittānaṃ gaṇhanatthāya payojenti. **Atha noti** atha amhe akāraṇasmā akāraṇena abhūmiyaṃ anokāseyeva kasmā, tāta, haññāmāti attho. **Mā tassa saddaheṣīti** mahārāja, na maṃ khaṇḍahālo ghātaye, mā tassa saddaheyyāsi. **Bhogampissāti** bhogampi assa brāhmaṇassa rājāno denti. **Athaggapiṇḍikāpīti** atha te aggodakaṃ aggapīṇḍaṃ labhantā aggapīṇḍikāpi honti. **Tesampīti** yesam kule bhuñjanti, tesampi evarūpānaṃ piṇḍadāyakānaṃ dubbhituṃ icchanti.

Rājā kumārassa vilāpaṃ sutvā –

**1028:** ‘Dukkhaṃ kho me janayatha, vilapantā jīvitassa kāmā hi;  
Muñcetha dāni kumāre, alampi me hotu puttayaññenā’’ti. –

Imaṃ gāthaṃ vatvā punapi mocesi. Khaṇḍahālo āgantvā punapi –

**1029:** ‘Pubbeva khosi me vutto, dukkaraṃ durabhisambhavañcetam;  
Atha no upakkhaṭassa yaññassa, kasmā karosi vikkhepaṃ.

**1030:** ‘Sabbe vajanti sugatiṃ, ye yajanti yepi yājenti;  
Ye cāpi anumodanti, yajantānaṃ edisaṃ mahāyañña’’nti. –

Evaṃ vatvā puna gaṇhāpesi. Athassa anunayanatthaṃ kumāro āha –

**1031:** ‘Yadi kira yajitvā puttehi, devalokaṃ ito cutā yanti;  
Brāhmaṇo tāva yajatu, pacchāpi yajasi tuvaṃ rāja.

**1032:** ‘Yadi kira yajitvā puttehi, devalokaṃ ito cutā yanti;  
Esveva khaṇḍahālo, yajataṃ sakehi puttehi.

**1033:** ‘Evaṃ jānanto khaṇḍahālo, kiṃ puttake na ghātesi;  
Sabbāñca ñātījanam, attānañca na ghātesi.

**1034:** ‘Sabbe vajanti nirayaṃ, ye vajanti yepi yājenti;  
Ye cāpi anumodanti, yajantānaṃ edisaṃ mahāyaññaṃ.

**1035:** ‘Sace hi so sujjhati yo hanāti, hatopi so saggamupeti tñānaṃ;  
Bhovādi bhovādina mārayeyyūṃ, ye cāpi tesaṃ abhisaddaheyyu’nti.

Tattha **brāhmaṇo tāvāti** paṭhamam tava khaṇḍahālo yajatu sakehi puttehi, atha tasmim evaṃ yajitvā devalokaṃ gate pacchā tvaṃ yajissasi. Deva, sādurasabhojanampi hi tvaṃ aññehi vīmaṃsāpetvā bhuñjasi, puttadāramāraṇaṃyeva kasmā avīmaṃsitvā karosīti dīpento evamāha. **Evaṃ jānantoti** ‘‘puttadhītarō māretvā devalokaṃ gacchati’’ti evaṃ jānanto kiṃkāraṇā attano putte ca ñātī ca attānañca na ghātesi. Sace hi paraṃ māretvā devalokaṃ gacchanti, attānaṃ māretvā brahmalokaṃ gantabbo bhavissati. Evaṃ yaññaguṇaṃ jānantena paraṃ amāretvā attāva māretabbo siyā. Ayaṃ pana tathā akatvā maṃ mārapeti. Imināpi kāraṇena jānāhi, mahārāja ‘‘yathā esa vinicchaye vilopaṃ kātuṃ alabhanto evaṃ karotī’’ti. **Edisanti** evarūpaṃ puttaghātayaññaṃ.

Kumāro ettakaṃ kathentopi pitaraṃ attano vacanaṃ gāhāpetuṃ asakkonto rājānaṃ parivāretvā tñitaṃ parisam ārabha āha –

**1036:** ‘Kathañca kira puttakāmāyo, gahapatayo gharaṇiyo ca;  
Nagaramhi na uparavanti rājānaṃ, mā ghātayi orasaṃ puttaṃ.

**1037:** ‘Kathañca kira puttakāmāyo, gahapatayo gharaṇiyo ca;  
Nagaramhi na uparavanti rājānaṃ, mā ghātayi atrajaṃ puttaṃ.

**1038:** ‘Rañño camhi atthakāmo, hito ca sabbajanapadassa;  
Na koci assa paṭighaṃ, mayā jānapado na pavedetī’’ti.

Tattha **puttakāmāyoti** gharaṇiyo sandhāya vuttaṃ. Gahapatayo pana puttakāmā nāma honti. **Na uparavantīti** na upakkosanti na vadanti. **Atrajanti** attato jātaṃ. Evaṃ vuttepi koci rañña saddhiṃ kathetuṃ samattho nāma nāhosi. **Na koci assa paṭighaṃ mayāti** iminā no lañjo vā gahito, issariyamadena vā idaṃ nāma dukkhaṃ katanti koci ekopi mayā saddhiṃ paṭighaṃ kattā nāma nāhosi. **Jānapado na pavedetīti** evaṃ rañño ca janapadassa ca atthakāmassa mama pitaraṃ ayaṃ jānapado ‘‘guṇasampanno te putto’’ti na pavedeti, na jānāpetīti attho.

Evaṃ vuttepi koci kiñci na kathesi. Tato candakumāro attano bhariyāyo taṃ yācanatthāya uyyojento āha –

**1039:** ‘Gacchatha vo gharaṇiyo, tātañca vadetha khaṇḍahālañca;  
Mā ghātetha kumāre, adūsake sīhasaṅkāse.

**1040:** ‘Gacchatha vo gharaṇiyo, tātañca vadetha khaṇḍahālañca;  
Mā ghātetha kumāre, apekkhite sabbalokassā’’ti.

Tā gantvā yāciṃsu. Tāpi rājā na olokesi. Tato kumāro anātho hutvā vilapanto –

**1041:** ‘Yaṃnūnāhaṃ jāyeyyaṃ, rathakārakulesu vā,  
Pukkusakulesu vā vessesu vā jāyeyyaṃ,  
Na hajja maṃ rāja yaññe ghāteyyā’’ti. –

Vatvā puna tā bhariyāyo uyyojento āha –

**1042:** ‘Sabbā sīmantiniyo gacchatha, ayyassa khaṇḍahālassa;  
Pādesu nipatatha, aparādhāhaṃ na passāmi.

**1043:** ‘Sabbā sīmantiniyo gacchatha, ayyassa khaṇḍahālassa;  
Pādesu nipatatha, kinte bhante mayamaṃ adūsemā’’ti.

Tattha **aparādhāhaṃ na passāmīti** ahaṃ ācariyakhaṇḍahāle attano aparādhamaṃ na passāmi. **Kinte bhanteti** ayya khaṇḍahāla, mayamaṃ tuyamaṃ kiṃ dūsayimhā, atha candakumārassa doso atthi, taṃ khamathāti vadethāti.

Atha candakumārassa kaniṭṭhabhaginī selakumārī nāma sokaṃ sandhāretuṃ asakkontī pitu pādamaṃle pativā paridevi. Tamatthamaṃ pakāsento satthā āha –

**1044:** ‘Kapaṇā vilapati selā, disvāna bhātare upanītatte;  
Yañño kira me ukkhipito, tātena saggakāmenā’’ti.

Tattha **upanītatteti** upanītasabhāve. **Ukkhipitoti** ukkhitto. **Saggakāmenoti** mama bhātaro māretvā saggamaṃ icchantena. Tāta, ime māretvā kiṃ saggena karissasīti vilapati.

Rājā tassāpi kathaṃ na gaṇhi. Tato candakumārassa putto vasulo nāma pitaraṃ dukkhitamaṃ disvā ‘‘ahamaṃ ayyakamaṃ yācitvā mama pitu jīvitamaṃ dāpessāmī’’ti rañño pādamaṃle paridevi. Tamatthamaṃ pakāsento satthā āha –

**1045:** ‘Āvatti parivatti ca, vasulo sammukhā rañño;  
Mā no pitaraṃ avadhī, daharamhāyobbanamaṃ pattā’’ti.

Tattha **daharamhāyobbanamaṃ pattāti** deva, mayamaṃ taruṇadārakā, na tāva yobbanappattā, amhesupī tāva anukampāya amhākaṃ pitaraṃ mā avadhīti.

Rājā tassa paridevītaṃ sutvā bhijjamānahadayo viya hutvā assupuṇṇehi nettehi kumāraṃ āliṅgitvā ‘‘tāta, assāsaṃ paṭilabha, vissajjemi te pitara’’nti vatvā gāthamāha –

**1046:** ‘Eso te vasula pitā, samehi pitarā saha;  
Dukkamaṃ kho me janayasi, vilapanto antepurasmīṃ;  
Muñcetha dāni kumāre, alampī me hotu puttayaññena’’ti.

Tattha **antepurasminti** rājanivesanassa antare.

Puna khaṇḍahālo āgantvā āha –

**1047:** ‘Pubbeva khosi me vutto, dukkaraṃ durabhisambhavañcetaṃ;  
Atha no upakkhaṭassa yaññassa, kasmā karosī vikkhepaṃ.

**1048:** ‘Sabbe vajanti sugatiṃ, ye yajanti yepi yājenti;  
Ye cāpi anumodanti, yajantānaṃ edisaṃ mahāyañña’’nti.

Rājā pana andhabālo puna tassa vacanena putte gaṇhāpesi. Tato khaṇḍahālo cintesi – ‘‘ayamaṃ rājā muducitto kālena gaṇhāpeti, kālena vissajjeti, punapi dārakānaṃ vacanena putte vissajjeyya, yaññāvāṭaṇṇeva namaṃ nemi’’ti. Athassa tattha gamanattāya gāthamāha –

**1049:** ‘Sabbaratanassa yañño upakkhaṭo, ekarāja tava paṭiyatto;  
Abhinikkhamassu deva, saggamṃ gato tvaṃ pamodissasī’ ti.

Tassattho – mahārāja, tava yañño sabbaratanehi upakkhaṭo paṭiyatto, idāni te abhinikkhamanakālo, tasmā abhinikkhama, yaññaṃ yajitvā saggamṃ gato pamodissasīti.

Tato bodhisattaṃ ādāya yaññāvāṭagamanakāle tassa orodhā ekatova nikkhamiṃsu. Tamatthamṃ pakāsento sathā āha –

**1050:** ‘Daharā sattasatā etā, candakumārassa bhariyāyo;  
Kese pakiritvāna, rodantiyo maggamanuyāyīṃsu.

**1051:** ‘Aparā pana sokena, nikkhantā nandane viya devā;  
Kese pakiritvāna, rodantiyo maggamanuyāyīsu’ nti.

Tattha **nandane viya devāti** nandanavane cavanadevaputtaṃ parivāretvā nikkhantadevatā viya gatā.

Ito paramṃ tāsamṃ vilāpagāthā honti –

**1052:** ‘Kāsikasucivatthadharā, kuṇḍalino agalucandanavilittā;  
Nīyanti candasūriyā, yaññatthāya ekarājassa.

**1053:** ‘Kāsikasucivatthadharā, kuṇḍalino agalucandanavilittā;  
Nīyanti candasūriyā, mātu katvā hadayasokaṃ.

**1054:** ‘Kāsikasucivatthadharā, kuṇḍalino agalucandanavilittā;  
Nīyanti candasūriyā, janassa katvā hadayasokaṃ.

**1055:** ‘Maṃsarasabhojanā nhāpakasunhāpitā, kuṇḍalino agalucandanavilittā;  
Nīyanti candasūriyā, yaññatthāya ekarājassa.

**1056:** ‘Maṃsarasabhojanā nhāpakasunhāpitā, kuṇḍalino agalucandanavilittā;  
Nīyanti candasūriyā, mātu katvā hadayasokaṃ.

**1057:** ‘Maṃsarasabhojanā nhāpakasunhāpitā, kuṇḍalino agalucandanavilittā;  
Nīyanti candasūriyā, janassa katvā hadayasokaṃ.

**1058:** ‘Yassu pubbe hatthivaradhuragate, hatthīhi anuvajanti;  
Tyajja candasūriyā, ubhova pattikā yanti.

**1059:** ‘Yassu pubbe assavaradhuragate, assehi anuvajanti;  
Tyajja candasūriyā, ubhova pattikā yanti.

**1060:** ‘Yassu pubbe rathavaradhuragate, rathehi anuvajanti;  
Tyajja candasūriyā, ubhova pattikā yanti.

**1061:** ‘Yehissu pubbe niyyaṃsu, tapanīyakappanehi turāṅgehi;  
Tyajja candasūriyā, ubhova pattikā yanti’ ti.

Tattha **kāsikasucivatthadharāti** kāsikāni sucivatthāni dhārayamānā. **Candasūriyāti** candakumāro

ca sūriyakumāro ca. **Nhāpakasunhāpitā**ti candanacuṇṇena ubbaṭṭetvā nhāpakehi kataparikkammatāya sunhāpitā. **Yassūti** ye assu. **Assūti** nipātamattaṃ, ye kumāreti attho. **Pubbeti** ito pubbe. **Hatthivaradhuragateti** hatthivarānaṃ dhuragate, alaṅkatahatthikkhandhavaragateti attho. **Assavaradhuragateti** assavarapiṭṭhigate. **Rathavaradhuragateti** rathavaramajjhagate. **Niyyamsūti** nikkhamiṃsu.

Evam tāsu paridevantīsuyeva bodhisattaṃ nagarā nīharimṃsu. Sakalanagaraṃ saṅkhubhitvā nikkhamituṃ ārabhi. Mahājane nikkhante dvārāni nappahonti. Brāhmaṇo atibahuṃ janaṃ disvā “ko jānāti, kiṃ bhavissatī” ti nagaradvārāni thakāpesi. Mahājano nikkhamituṃ alabhanto nagaradvārassa āsannaṭṭhāne uyyānaṃ atthi, tassa santike mahāviraṃ ravi. Tena ravena sakuṇasaṅgho saṅkhubhito ākāsaṃ pakkhandi. Mahājano taṃ taṃ sakuṇiṃ āmantetvā vilapanto āha –

**1062:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho catūhi puttehi.

**1063:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho catūhi kaññāhi.

**1064:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho catūhi mahesīti.

**1065:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho catūhi gahapatīhi.

**1066:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho catūhi hatthīhi.

**1067:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho catūhi assehi.

**1068:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho catūhi usabhehi.

**1069:**“Yadi sakuṇi maṃsamicchasi, ḍayassu pubbena pupphavatiyā;  
Yajattettha ekarājā, sammūḷho sabbacatukkenā” ti.

Tattha **maṃsamicchasī**ti ambho sakuṇi, sace maṃsaṃ icchasi, pupphavatiyā pubbena puratthimadisāyaṃ yaññāvāto atthi, tattha gaccha. **Yajattetthā**ti ettha khaṇḍahālassa vacanaṃ gahetvā sammūḷho ekarājā catūhi puttehi yaññaṃ yajati. Sesagāthāsupi eseva nayo.

Evam mahājano tasmim ṭhāne paridevitvā bodhisattassa vasanaṭṭhānaṃ gantvā pāsādaṃ padakkhiṇaṃ karonto antepure kūṭāgārauyyānādīni passanto gāthāhi paridevi –

**1070:**“Ayamassa pāsādo, idaṃ antepuraṃ suramaṇīyaṃ;  
Tedāni ayyaputtā, cattāro vadhāya ninnītā.

**1071:**“Idamassa kūṭāgāraṃ, sovaṇṇaṃ pupphamalyavikiṇṇaṃ;  
Tedāni ayyaputtā, cattāro vadhāya ninnītā.

**1072:**“Idamassa uyyānaṃ, supupphitaṃ sabbakālikaṃ rammaṃ;  
Tedāni ayyaputtā, cattāro vadhāya ninnītā.



**1073:** ‘Idamassa asokavanaṃ, supupphitaṃ sabbakālikaṃ rammaṃ;  
Tedāni ayyaputtā, cattāro vadhāya ninnītā.

**1074:** ‘Idamassa kaṇikāravanaṃ, supupphitaṃ sabbakālikaṃ rammaṃ;  
Tedāni ayyaputtā, cattāro vadhāya ninnītā.

**1075:** ‘Idamassa pāṭalivanaṃ, supupphitaṃ sabbakālikaṃ rammaṃ;  
Tedāni ayyaputtā, cattāro vadhāya ninnītā.

**1076:** ‘Idamassa ambavanaṃ, supupphitaṃ sabbakālikaṃ rammaṃ;  
Tedāni ayyaputtā, cattāro vadhāya ninnītā.

**1077:** ‘Ayamassa pokkharāṇī, sañchannā padumapuṇḍarīkehi;  
Nāvā ca sovaṇṇavikatā, pupphavalliyā cittā suramaṇīyā;  
Tedāni ayyaputtā, cattāro vadhāya ninnītā’ ti.

Tattha **tedānī**ti idāni te candakumārappamukhā amhākaṃ ayyaputtā evarūpaṃ pāsādaṃ chaḍḍetvā vadhāya nīyanti. **Sovaṇṇavikatā**ti suvaṇṇakhacitā.

Ettakesu ṭhānesu vilapantā puna hatthisālādīni upasaṅkamtivā āhaṃsu –

**1078:** ‘Idamassa hatthirataṇaṃ, erāvaṇo gajo balī dantī;  
Tedāni ayyaputtā, cattāro vadhāya ninnītā.

**1079:** ‘Idamassa assarataṇaṃ, ekakhuro asso;  
Tedāni ayyaputtā, cattāro vadhāya ninnītā.

**1080:** ‘Ayamassa assaratho, sāḷiyānigghoso subho ratanavicitto;  
Yathassu ayyaputtā, sobhiṃsu nandane viya devā;  
Tedāni ayyaputtā, cattāro vadhāya ninnītā.

**1081:** ‘Kathaṃ nāma sāmasamasundarehi, candanamudukagattehi;  
Rājā yajissate yaññaṃ, sammūḷho catūhi puttehi.

**1082:** ‘Kathaṃ nāma sāmasamasundarāhi, candanamudukagattāhi;  
Rājā yajissate yaññaṃ, sammūḷho catūhi kaññāhi.

**1083:** ‘Kathaṃ nāma sāmasamasundarāhi, candanamudukagattāhi;  
Rājā yajissate yaññaṃ, sammūḷho catūhi mahesīhi.

**1084:** ‘Kathaṃ nāma sāmasamasundarehi, candanamudukagattehi;  
Rājā yajissate yaññaṃ, sammūḷho catūhi gahapatīhi.

**1085:** ‘Yathā honti gāmanigamā, suññā amanussakā brahāraññā;  
Tathā hessati pupphavatiyā, yiṭṭhesu candasūriyesū’ ti.

Tattha **erāvaṇoti** tassa hatthino nāmaṃ. **Ekakhuroti** abhinnakhuro. **Sāḷiyānigghosoti** gamanakāle sāḷikānaṃ viya madhurena nigghosena samannāgato. **Kathaṃ nāmāti** kena nāma kāraṇena. **Sāmasamasundarehīti** suvaṇṇasāmehi ca aññaññaṃ jātiyā samehi ca niddosatāya sundarehi. **Candanamudukagattehīti** lohitacandalittagattehi. **Brahāraññāti** yathā te gāmanigamā suññā nimmanussā brahāraññā honti, tathā pupphavatiyāpi yaññe yiṭṭhesu rājaputtesu suññā araññasadisā

bhavissatīti.

Atha mahājano bahi nikkhamituṃ alabhanto antonagareyeva vicaranto paridevi. Bodhisattopi yaññāvāṭaṃ nīto. Athassa mātā gotamī nāma devī “puttānaṃ me jīvitaṃ dehi, devā”ti rañño pādamūle parivattitvā paridevamānā āha –

**1086:**“Ummattikā bhavissāmi, bhūnahatā paṃsunā ca parikiṇṇā;  
Sace candavaraṃ hanti, pāṇā me deva rujjhanti.

**1087:**“Ummattikā bhavissāmi, bhūnahatā paṃsunā ca parikiṇṇā;  
Sace sūriyavaraṃ hanti, pāṇā me deva rujjhanti”ti.

Tattha **bhūnahatā**ti hatavuḍḍhi. **Paṃsunā ca parikiṇṇā**ti paṃsuparikiṇṇasarīrā ummattikā hutvā vicarissāmi.

Sā evaṃ paridevantīpi rañño santikā kiñci kathaṃ alabhitvā “mama putto tumhākaṃ kujjhitvā gato bhavissati, kissa naṃ tumhe na nivattethā”ti kumārassa catasso bhariyāyo ālingitvā paridevantī āha –

**1088:**“Kinumā na ramāpeyyuṃ, aññamaññaṃ piyaṃvadā;  
Ghaṭṭikā uparikkhī ca, pokkharāṇī ca bhārikā;  
Candasūriyesu naccantiyo, samā tāsāṃ na vijjatī”ti.

Tattha **kinumā na ramāpeyyunti** kena kāraṇena imā ghaṭṭikātiādikā catasso aññamaññaṃ piyaṃvadā candasūriyakumārānaṃ santike naccantiyo mama putte na ramāpayiṃsu, ukkaṇṭhāpayiṃsu. Sakalajambudīpasmiñhi nacce vā gīte vā samā aññā kāci tāsāṃ na vijjatīti attho.

Iti sā suṇhāhi saddhiṃ paridevitvā aññaṃ gahetabbaggaṇaṃ apassantī khaṇḍahālaṃ akkosamānā aṭṭha gāthā abhāsi –

**1089:**“Imaṃ mayhaṃ hadayasokaṃ, paṭimuñcatu khaṇḍahāla tava mātā;  
Yo mayhaṃ hadayasoko, candamhi vadhāya ninnīte.

**1090:**“Imaṃ mayhaṃ hadayasokaṃ, paṭimuñcatu khaṇḍahāla tava mātā;  
Yo mayhaṃ hadayasoko, sūriyamhi vadhāya ninnīte.

**1091:**“Imaṃ mayhaṃ hadayasokaṃ, paṭimuñcatu khaṇḍahāla tava jāyā;  
Yo mayhaṃ hadayasoko, candamhi vadhāya ninnīte.

**1092:**“Imaṃ mayhaṃ hadayasokaṃ, paṭimuñcatu khaṇḍahāla tava jāyā;  
Yo mayhaṃ hadayasoko, sūriyamhi vadhāya ninnīte.

**1093:**“Mā ca putte mā ca paṭiṃ, addakkhi khaṇḍahāla tava mātā;  
Yo ghātesī kumāre, adūsake sīhasaṅkāse.

**1094:**“Mā ca putte mā ca paṭiṃ, addakkhi khaṇḍahāla tava mātā;  
Yo ghātesī kumāre, apekkhite sabbalokassa.

**1095:**“Mā ca putte mā ca paṭiṃ, addakkhi khaṇḍahāla tava jāyā;  
Yo ghātesī kumāre, adūsake sīhasaṅkāse.

**1096:**“Mā ca putte mā ca paṭiṃ, addakkhi khaṇḍahāla tava jāyā;

Yo ghātesī kumāre, apekkhite sabbalokassā’’ti.

Tattha **imaṃ mayhanti** mayhaṃ imaṃ hadayasokaṃ dukkhaṃ. **Paṭimuṇcatūti** pavisatu pāpuṇātu. **Yo ghātesīti** yo tvaṃ ghātesī. **Apekkhiteti** sabbalokena olokite dissamāne māresīti attho.

Bodhisatto yaññāvāṭepi pitaraṃ yācanto āha –

**1097:**‘Mā no deva avadhi, dāse no dehi khaṇḍahālassa;  
Api nigaḷabandhakāpi, hatthī asse ca pālema.

**1098:**‘Mā no deva avadhi, dāse no dehi khaṇḍahālassa;  
Api nigaḷabandhakāpi, hatthichakaṇāni ujjhema.

**1099:**‘Mā no deva avadhi, dāse no dehi khaṇḍahālassa;  
Api nigaḷabandhakāpi, assachakaṇāni ujjhema.

**1100:**‘Mā no deva avadhi, dāse no dehi khaṇḍahālassa;  
Yassa honti tava kāmā, api raṭṭhā pabbājītā;  
Bhikkhācariyaṃ carissāma.

**1101:**‘Dibbaṃ deva upayācanti, puttattikāpi daliddā;  
Paṭibhānānīpi hitvā, putte na labhanti ekaccā.

**1102:**‘Āsīsikāni karonti, puttā no jāyantu tato paputtā;  
Atha no akāraṇasmā, yaññatthāya deva ghātesī.

**1103:**‘Upayācitakena puttaṃ labhanti, mā tāta no aghātesī;  
Mā kicchāladdhakehi puttehi, yajittho imaṃ yaññaṃ.

**1104:**‘Upayācitakena puttaṃ labhanti, mā tāta no aghātesī;  
Mā kapaṇaladdhakehi puttehi, ammāya no vippavāsehi’’ti.

Tattha **dibbanti** deva, aputtikā daliddāpi nāriyo puttattikā hutvā bahuṃ paṇṇākāraṃ karitvā puttaṃ vā dhītaraṃ vā labhāmāti dibyaṃ upayācanti. **Paṭibhānānīpi hitvāti** dohaḷāni chaḍḍetvāpi, alabhitvāpīti attho. Idaṃ vuttaṃ hoti – mahārāja, nārīnañhi uppannaṃ dohaḷaṃ alabhitvā gabbho sussitvā nassati. Tattha ekaccā yācantāpi putte alabhamānā, kāci laddhampi dohaḷaṃ pahāya aparibhuñjitvā na labhanti, kāci dohaḷaṃ alabhamānā na labhanti. Mayhaṃ pana mātā uppannaṃ dohaḷaṃ labhitvā paribhuñjitvā uppannaṃ gabbhaṃ anāsetvā putte paṭilabhi. Evaṃ paṭiladdhe mā no avadhīti yācati.

**Āsīsikānīti** mahārāja, ime sattā āsīsaṃ karonti. Kinti? Puttā no jāyantūti. **Tato paputtāti** puttānampi no puttā jāyantūti. **Atha no akāraṇasmāti** atha tvaṃ amhe akāraṇena yaññatthāya ghātesī. **Upayācitenāti** devatānaṃ āyācanena. **Kapaṇaladdhakehīti** kapaṇā viya hutvā laddhakehi. **Puttehīti** amhehi saddhiṃ amhākaṃ ammāya mā vippavāsehi, mā no mātārā saddhiṃ vippavāsaṃ karīti vadati.

So evaṃ vadantopi pitu santikā kiñci kathaṃ alabhitvā mātu pādāmūle nipatitvā paridevamāno āha

**1105:**‘Bahudukkhā posiya candamaṃ, amma tuvaṃ jīyase puttaṃ;  
Vandāmi kho te pāde, labhataṃ tāto paralokaṃ.

**1106:** ‘Handa ca maṃ upagūha, pāde te amma vandituṃ dehi;  
Gacchāmi dāni pavāsaṃ, yaññatthāya ekarājassa.

**1107:** ‘Handa ca maṃ upagūha, pāde te amma vandituṃ dehi;  
Gacchāmi dāni pavāsaṃ, mātu katvā hadayasokaṃ.

**1108:** ‘Handa ca maṃ upagūha, pāde te amma vandituṃ dehi;  
Gacchāmi dāni pavāsaṃ, janassa katvā hadayasoka’’nti.

Tattha **bahudukkhā posiyāti** bahūhi dukkhehi posiya. **Candanti** maṃ candakumāraṃ evaṃ posetvā idāni, amma, tvaṃ jīyase puttaṃ. **Labhataṃ tāto paralokanti** pitā me bhogasampannaṃ paralokaṃ labhatu. **Upagūhāti** āliṅga parissaja. **Pavāsanti** puna anāgamanāya accantaṃ vippavāsaṃ gacchāmi.

Athassa mātā paridevantī catasso gāthā abhāsi –

**1109:** ‘Handa ca padumapattānaṃ, moḷiṃ bandhassu gotamiputta;  
Campakadalamissāyo, esā te porāṇikā pakati.

**1110:** ‘Handa ca vilepanaṃ te, pacchimakaṃ candanaṃ vilimpassu;  
Yehi ca suvilitto, sobhasi rājaparisāyaṃ.

**1111:** ‘Handa ca mudukāni vatthāni, pacchimakaṃ kāsikaṃ nivāsehi;  
Yehi ca sunivattho, sobhasi rājaparisāyaṃ.

**1112:** ‘Muttāmaṇikanakavibhūsitāni, gaṇhassu hatthābharaṇāni;  
Yehi ca hatthābharaṇehi, sobhasi rājaparisāya’’nti.

Tattha **padumapattānanti** padumapattaveṭhanaṃ nāmekakaṃ pasādhanāṃ, taṃ sandhāyevamāha. Tava vippakiṇṇaṃ moḷiṃ ukkhipitvā padumapattaveṭhanena yojetvā bandhāti attho. **Gotamiputtāti** candakumāraṃ ālapati. **Campakadalamissāyoti** abbhantarimehi campakadalehi missitā vaṇṇagandhasampannā nānāpupphamālā pilandhassu. **Esā teti** esā tava porāṇikā pakati, tameva gaṇhassu puttāti paridevati. **Yehi cāti** yehi lohita candanavilepanehi vilitto rājaparisāya sobhasi, tāni vilimpassūti attho. **Kāsikanti** satahassagghanakaṃ kāsikavatthaṃ. **Gaṇhassūti** pilandhassu.

Idānissa candā nāma aggamaheṣī tassa pādāmūle nipatitvā paridevamānā āha –

**1113:** ‘Na hi nūnāyaṃ raṭṭhapālo, bhūmipati janapadassa dāyādo;  
Lokissaro mahanto, putte snehaṃ janayati’’ti.

Taṃ sutvā rājā gāthamāha –

**1114:** ‘Mayhampi piyā puttā, attā ca piyo tumhe ca bhariyāyo;  
Saggañca patthayāno, tenāhaṃ ghātayissāmī’’ti.

Tassattho – kimkāraṇā puttasiṇhaṃ na janemi? Na kevalaṃ gotamiyā eva, atha kho mayhampi piyā puttā, tathā attā ca tumhe ca suṇhāyo bhariyāyo ca piyāyeva. Evaṃ santepi saggañca patthayāno ahaṃ saggāṃ patthento, tena kāraṇena ete ghātayissāmī, mā cintayittha, sabbepe te mayā saddhiṃ devalokaṃ ekato gamissantīti.

Candā āha –

1115: ‘Maṃ paṭhamañ ghātehi, mā me hadayaṃ dukkhaṃ phālesi;  
Alaṅkato sundarako, putto deva tava sukhumālo.

1116: ‘Handayya maṃ hanassu, paraloke candakena hessāmi;  
Puññaṃ karassu vipulaṃ, vicarāma ubhopi paraloke’’ti.

Tattha **paṭhamanti** deva, mama sāmikato paṭhamataraṃ maṃ ghātehi. **Dukkanti** candassa maraṇadukkhaṃ mama hadayaṃ mā phālesi. **Alaṅkatoti** ayaṃ mama ekova alaṃ pariyattoti evaṃ alaṅkato. Evarūpaṃ nāma puttaṃ mā ghātayi, mahārājāti dīpeti. **Handayyāti** handa, ayya, rājānaṃ ālapantī evamāha. **Paraloke candakenāti** candena saddhiṃ paraloke bhavissāmi. **Vicarāma ubhopi paraloketi** tayā ekato ghātītā ubhopi paraloke sukhaṃ anubhavatā vicarāma, mā no saggantarāyamakāsīti.

Rājā āha –

1117: ‘Mā tvaṃ cande rucci maraṇaṃ, bahukā tava devarā visālakkhi;  
Te taṃ ramayissanti, yiṭṭhasmiṃ gotamiputte’’ti.

Tattha **mā tvaṃ cande ruccīti** mā tvaṃ attano maraṇaṃ rocesi. ‘‘Mā ruddī’’tipi pāṭho, mā rodīti attho. **Devarāti** patibhātukā.

Tato paraṃ satthā –

1118: ‘Evaṃ vutte candā attānaṃ, hanti hatthatalakehī’’ti. – upaḍḍhagāthamāha;  
Tato paraṃ tassāyeva vilāpo hoti –

‘‘Alametta jīvitena, piṣṣāmi viṣaṃ marissāmi.

1119: ‘Na hi nūnimassa rañño, mittāmaccā ca vijjare suhadā;  
Ye na vadanti rājānaṃ, ‘mā ghātayi orase putte’.

1120: ‘Na hi nūnimassa rañño, ñātī mittā ca vijjare suhadā;  
Ye na vadanti rājānaṃ, ‘mā ghātayi atraje putte’.

1121: ‘Ime tepi mayhaṃ puttā, guṇino kāyūradhārino rāja;  
Tehipi yajassu yaññaṃ, atha muñcatu gotamiputte.

1122: ‘Bilasataṃ maṃ katvāna, yajassu sattadhā mahārāja;  
Mā jeṭṭhaputtamavadhi, adūsakaṃ sihasaṅkāsaṃ.

1123: ‘Bilasataṃ maṃ katvāna, yajassu sattadhā mahārāja;  
Mā jeṭṭhaputtamavadhi, apekkhitāṃ sabbalokassā’’ti.

Tattha **evanti** evaṃ andhabālena ekarājena vutte. **Hantīti** ‘‘kiṃ nāmetaṃ kathesī’’ti vatvā hatthatalehi attānaṃ hanti. **Piṣṣāmīti** pivissāmi. **Ime tepīti** vasulakumāraṃ ādiṃ katvā sesadārake hatthe gahetvā rañño pādamūle ṭhitā evamāha. **Guṇinoti** mālāguṇaābharāṇehi samannāgatā. **Kāyūradhārinoti** kāyūrapasādhānadhārā. **Bilasatanti** mahārāja, maṃ ghātetvā koṭṭhāsataṃ katvā sattadhā sattuṃ ṭhānesu yaññaṃ yajassu.

Iti sā rañño santike imāhi gāthāhi paridevitvā assāsaṃ alabhamānā bodhisattasseva santikaṃ gantvā paridevamānā aṭṭhāsī. Atha naṃ so āha – ‘‘cande, mayā jīvamānena tuyhaṃ tasmīṃ tasmīṃ vatthusmiṃ

subhaṇite sukathite uccāvacāni maṇimuttādīni bahūni ābharaṇāni dinnāni, ajja pana te idaṃ pacchimadānaṃ, sarīraruḷhaṃ ābharaṇaṃ dammi, gaṇhāhi na’nti. Imamatthaṃ pakāsento sathā āha –

**1124:** ‘Bahukā tava dinnābharaṇā, uccāvacā subhaṇitamhi;  
Muttāmaṇiveḷuriyā, etaṃ te pacchimakaṃ dāna’nti.

Candādevīpi taṃ sutvā tato parāhi navahi gāthāhi vilapi –

**1125:** ‘Yesaṃ pubbe khandhesu, phullā mālāguṇā vivattiṃsu;  
Tesajjapi sunisito, nettiṃso vivattissati khandhesu.

**1126:** ‘Yesaṃ pubbe khandhesu, cittā mālāguṇā vivattiṃsu;  
Tesajjapi sunisito, nettiṃso vivattissati khandhesu.

**1127:** ‘Aciraṃ vata nettiṃso, vivattissaki rājaputtānaṃ khandhesu;  
Atha mama hadayaṃ na phalati, tāva daḷhabandhaṅca me āsi.

**1128:** ‘Kāsikasucivatthadharā, kuṇḍalino agalucandanavilittā;  
Niyātha candasūriyā, yaññatthāya ekarājassa.

**1129:** ‘Kāsikasucivatthadharā, kuṇḍalino agalucandanavilittā;  
Niyātha candasūriyā, mātu katvā hadayasokaṃ.

**1130:** ‘Kāsikasucivatthadharā, kuṇḍalino agalucandanavilittā;  
Niyātha candasūriyā, janassa katvā hadayasokaṃ.

**1131:** ‘Maṃsarasabhojanā nhāpakasunhāpitā, kuṇḍalino agalucandanavilittā;  
Niyātha candasūriyā, yaññatthāya ekarājassa.

**1132:** ‘Maṃsarasabhojanā nhāpakasunhāpitā, kuṇḍalino agalucandanavilittā;  
Niyātha candasūriyā, mātu katvā hadayasokaṃ.

**1133:** ‘Maṃsarasabhojanā nhāpakasunhāpitā, kuṇḍalino agalucandanavilittā;  
Niyātha candasūriyā, janassa katvā hadayasoka’nti.

Tattha **mālāguṇā**ti pupphadāmāni. **Tesajjā**ti tesāṃ ajja. **Nettiṃsoti** asi. **Vivattissatī**ti patissati. **Aciraṃ vatā**ti acirena vata. **Na phalatī**ti na bhijjati. **Tāva daḷhabandhaṅca me āsī**ti ativiya thirabandhanaṃ me hadayaṃ bhavissatīti attho. **Niyāthā**ti gacchatha.

Evāṃ tassā paridevantiyāva yaññāvāṭe sabbakammaṃ niṭṭhāsi. Rājaputtaṃ netvā gīvaṃ onāmetvā nisīdāpesuṃ. Khaṇḍahālo suvaṇṇapātiṃ upanāmetvā khaggaṃ ādāya ‘‘tassa gīvaṃ chindissāmī’’ti atṭhāsi. Taṃ disvā candādevī ‘‘aññaṃ me paṭisaraṇaṃ natthi, attano saccabalena sāmikassa sotthiṃ karissāmī’’ti añjaliṃ paggayha parisāya antare vicarantī saccakiriyāṃ akāsi. Tamatthaṃ pakāsento sathā āha –

**1134:** ‘Sabbasmim upakkhaṭasmim, nisīdite candasmim yaññatthāya;  
Pañcālarājadhītā pañjalikā, sabbaparisāya samanupariyāyi.

**1135:** ‘Yena saccena khaṇḍahālo, pāpakammaṃ karoti dummedho;  
Etena saccavajjena, samaṅginī sāmikena homi.

**1136:** ‘Ye idhatthi amanussā, yāni ca yakkhabhūtabhabyāni;  
Karontu me veyyāvaṭikaṃ, samaṅginī sāmikena homi.

**1137:** ‘Yā devatā idhāgatā, yāni ca yakkhabhūtabhabyāni;  
Saraṇesiniṃ anāthaṃ tāyatha maṃ, yācāmaṃ pati māhaṃ ajeyya’’nti.

Tattha **upakkhaṭasminti** sabbasmiṃ yaññasambhāre sajjite paṭiyatte. **Samaṅginī**ti sampayuttā ekasaṃvāsā. **Ye idhatthī**ti ye idha atthi. **Yakkhabhūtabhabyānī**ti devasaṅkhātā yakkhā ca vaḍḍhitvā ṭhitasattasaṅkhātā bhūtā ca idāni vaḍḍhanakasattasaṅkhātāni bhabyāni ca. **Veyyāvaṭikanti** mayhaṃ veyyāvaccamaṃ karontu. **Tāyatha manti** rakkhatha maṃ. **Yācāmahanti** ahaṃ vo yācāmi. **Pati māhanti** patiṃ ahaṃ mā ajeyyaṃ.

Atha sakko devarājā tassā paridevasaddamaṃ sutvā taṃ pavattiṃ ñatvā jalitaṃ ayakūṭaṃ ādāya gantvā rājānaṃ tāsetvā sabbe vissajjāpesi. Tamatthaṃ pakāseto satthā āha –

**1138:** ‘Tamaṃ sutvā amanusso, ayokūṭaṃ paribbhametvāna;  
Bhayamassa janayanto, rājānaṃ idamavoca.

**1139:** ‘Bujjhassu kho rājakali, mā tāhaṃ matthakaṃ nitāḷesiṃ;  
Mā jeṭṭhaputtamavadhi, adūsakaṃ sihasaṅkāsaṃ.

**1140:** ‘Ko te diṭṭho rājakali, puttabhariyāyo haññamānāyo;  
Seṭṭhi ca gahapatayo, adūsakā saggakāmā hi.

**1141:** ‘Tamaṃ sutvā khaṇḍahālo, rājā ca abbhutamidamaṃ disvāna;  
Sabbesaṃ bandhanāni mocesaṃ, yathā taṃ anupaghātaṃ.

**1142:** ‘Sabbesu vippamuttesu, ye tattha samāgatā tadā āsuṃ;  
Sabbe ekekaḍḍukamadamsu, esa vadho khaṇḍahālassa’’ti.

Tattha **amanussoti** sakko devarājā. **Bujjhassūti** jānassu sallakkhehi. **Rājakalīti** rājakāḷakaṇṇi rājālāmaka. **Mā tāhanti** pāparāja, bujjha, mā te ahaṃ matthakaṃ nitāḷesiṃ. **Ko te diṭṭhoti** kuhiṃ tayā diṭṭhapubbo. **Saggakāmā hīti** ettha **hīti** nipātamattaṃ, saggakāmā saggamaṃ patthayamānāti attho. **Tamaṃ sutvāti**, bhikkhave, taṃ sakkassa vacanaṃ khaṇḍahālo sutvā. **Abbhutamidanti** rājā ca idamaṃ sakkassa dassanaṃ pubbe abhūtaṃ disvā. **Yathā tanti** yathā anupaghātaṃ paṇamaṃ mocenti, evameva mocesaṃ. **Ekekaḍḍukamadamsūti** bhikkhave, yattakā tasmim yaññāvāṭe samāgatā, sabbe ekakolāhalaṃ katvā khaṇḍahālassa ekekaḍḍupahāraṃ adamsu. **Esa vadhoti** esova khaṇḍahālassa vadho ahosi, tattheva naṃ jīvitakkhayaṃ pāpesunti attho.

Tamaṃ pana māretvā mahājano rājānaṃ māretuṃ ārabhi. Bodhisatto pitaraṃ parissajjivā māretuṃ na adāsi. Mahājano ‘‘jīvitaṃ etassa pāparañño dema, chattaṃ panassa nagare ca vāsaṃ na dassāma, caṇḍālaṃ katvā bahinagare vasāpessāma’’ti vatvā rājavesaṃ hāretvā kāsāvaṃ nivāsāpetvā haliddipilotikāya sīsaṃ veṭhetvā caṇḍālaṃ katvā caṇḍālavasaṇaṭṭhānaṃ taṃ pahiṇi. Ye panetaṃ pasughātayaññaṃ yajimsu ceva yajāpesuṇca anumodimsu ca, sabbe nirayaparāyaṇāva ahesuṃ. Tamatthaṃ pakāseto satthā āha –

**1143:** ‘Sabbe pavitṭhā nirayaṃ, yathā taṃ pāpakaṃ karitvāna;  
Na hi pāpakammaṃ katvā, labbhā sugatiṃ ito gantu’’nti.

Sopi kho mahājano dve kālakaṇṇiyo hāretvā tattheva abhisekasambhāre āharitvā candakumāraṃ abhisiṅci. Tamatthaṃ pakāseto satthā āha –

- 1144: ‘Sabbesu vippamuttesu, ye tattha samāgatā tadā āsum;  
Candaṃ abhisiñciṃsu, samāgatā rājaparisā ca.
- 1145: ‘Sabbesu vippamuttesu, ye tattha samāgatā tadā āsum;  
Candaṃ abhisiñciṃsu, samāgatā rājakaññāyo ca.
- 1146: ‘Sabbesu vippamuttesu, ye tattha samāgatā tadā āsum;  
Candaṃ abhisiñciṃsu, samāgatā devaparisā ca.
- 1147: ‘Sabbesu vippamuttesu, ye tattha samāgatā tadā āsum;  
Candaṃ abhisiñciṃsu, samāgatā devakaññāyo ca.
- 1148: ‘Sabbesu vippamuttesu, ye tattha samāgatā tadā āsum;  
Celukkhepamakarūṃ, samāgatā rājaparisā ca.
- 1149: ‘Sabbesu vippamuttesu, ye tattha samāgatā tadā āsum;  
Celukkhepamakarūṃ, samāgatā rājakaññāyo ca.
- 1150: ‘Sabbesu vippamuttesu, ye tattha samāgatā tadā āsum;  
Celukkhepamakarūṃ, samāgatā devaparisā ca.
- 1151: ‘Sabbesu vippamuttesu, ye tattha samāgatā tadā āsum;  
Celukkhepamakarūṃ, samāgatā devakaññāyo ca.
- 1152: ‘Sabbesu vippamuttesu, bahū ānanditā ahuṃ;  
Nandiṃ pavesi nagaraṃ, bandhanā makkho aghosittā’’ti.

Tattha **rājaparisā cāti** rājaparisāpi tīhi saṅkhehi abhisiñciṃsu. **Rājakaññāyo cāti** khattiyadhītaropi naṃ abhisiñciṃsu. **Devaparisā cāti** sakko devarājā vijayuttarasankham gahetvā devaparisāya saddhim abhisiñci. **Devakaññāyo cāti** sujāpi devadhītarāhi saddhim abhisiñci. **Celukkhepamakarunti** nānavaṇṇehi vatthehi dhaje ussāpetvā uttarisātakāni ākāse khipantā celukkhepaṃ karimṃsu. Rājaparisā ca itare tayo koṭṭhāsā cāti abhisekakārakā cattāropi koṭṭhāsā karimṃsueva. **Ānanditā ahunti** āmoditā ahesuṃ. **Nandiṃ pavesi nagaranti** candakumārassa chattaṃ ussāpetvā nagaraṃ pavittakāle nagare ānandabheri cari. ‘‘Kiṃ vatvā’’ti? Yathā ‘‘amhākaṃ candakumāro bandhanā mutto, evameva sabbe bandhanā muccantū’’ti. Tena vuttaṃ ‘‘bandhanā makkho aghosittā’’ti.

Bodhisatto pitu vattaṃ paṭṭhapesi. Antonagaraṃ pana pavisitūṃ na labhati. Paribbayaṃsa khīṇakāle bodhisatto uyyānakīlādīnaṃ atthāya gacchanta taṃ upasaṅkamitvā ‘‘patimhī’’ti na vandati, añjalimṃ pana katvā ‘‘ciraṃ jīva sāmī’’ti vadati. ‘‘Kenattho’’ti vutte ārocesi. Athassa paribbayaṃ dāpesi. So dhammena rajjaṃ kāretvā āyupariyosāne devalokaṃ pūrayamāno agamāsi.

Satthā imaṃ dhammadesanaṃ āharitvā ‘‘na, bhikkhave, idāneva, pubbepi devadatto maṃ ekaṃ nissāya bahū māretuṃ vāyāmakāsi’’ti vatvā jātaṃ samodhānesi. Tadā khaṇḍahālo devadatto ahoṣi, gotamīdevī mahāmāyā, candādevī rāhulamātā, vasulo rāhulo, selā uppalavaṇṇā, sūro vāmagotto kassapo, bhaddaseno moggallāno, sūriyakumāro sārīputto, candarājā pana ahameva sammāsambuddho ahoṣinti.

Candakumārājātakavaṇṇanā sattamā.

[545] 8. Mahānāradakassapajātakavaṇṇanā

**Ahu rājā videhānanti** idaṃ satthā laṭṭhivanuyyāne viharanto uruvelakassapadamaṃ ārabha kathesi. Yadā hi satthā pavattitavaradhammacakko uruvelakassapādayo jaṭile dametvā magadharājassa



paṭissavaṃ locetuṃ purāṇajaṭilasahassaparivuto laṭṭhivanuyyānaṃ agamāsi. Tadā dvādasanahutāya parisāya saddhiṃ āgantvā dasabalaṃ vanditvā nisinnassa magadharañño parisantare brāhmaṇagahapatikānaṃ vitakko uppajji “kiṃ nu kho uruvelakassapo mahāsamaṇe brahmacariyaṃ carati, udāhu mahāsamaṇo uruvelakassape”ti. Atha kho bhagavā tesam dvādasanahutānaṃ cetasā cetoparivitakkamaññāya “kassapassa mama santike pabbajitabhāvaṃ jānāpessāmī”ti imaṃ gāthamāha

“Kimeva disvā uruvelavāsi, pahāsi aggiṃ kisakovadāno;  
Pucchāmi taṃ kassapa etamatthaṃ, kathaṃ pahīnaṃ tava aggihutta”nti. (mahāva. 55);

Theropi bhagavato adhippāyaṃ viditvā –

“Rūpe ca sadde ca atho rase ca, kāmitthiyo cābhivadanti yaññā;  
Etaṃ malanti upadhīsu ñatvā, tasmā na yiṭṭhe na hute arañji”nti. (mahāva. 55); –

Imaṃ gāthaṃ vatvā attano sāvakabhāvaṃ pakāsanatthaṃ tathāgatassa pādapiṭṭhe sīsaṃ ṭhapetvā “satthā me, bhante, bhagavā, sāvakohamasmī”ti vatvā ekatālaṃ dvitālaṃ titālanti yāva sattatālapamānaṃ sattakkhattuṃ vehāsaṃ abbhuggantvā oruḃha tathāgataṃ vanditvā ekamantaṃ nisīdi. Taṃ pāṭihāriyaṃ disvā mahājano “aho mahānubhāvo buddho, evaṃ thāmagatadiṭṭhiko nāma attānaṃ ‘arahā’ti maññamāno uruvelakassapopi diṭṭhijālaṃ bhinditvā tathāgatena damito”ti satthu guṇakathaññeva kathesi. Taṃ sutvā satthā “anacchariyaṃ idāni sabbaññutappattena mayā imassa damanaṃ, svāhaṃ pubbe sarāgakālepi nārado nāma brahmā hutvā imassa diṭṭhijālaṃ bhinditvā imaṃ nibbisevanamakāsi”nti vatvā tāya parisāya yācito atītaṃ āhari.

Atīte videharaṭṭhe mithilāyaṃ aṅgati nāma rājā rajjaṃ kāresi dhammiko dhammarājā. Tassa ruḃā nāma dhītā ahosi abhirūpā dassaniyā pāsādikā kappasatasahassaṃ patthitapatthanā mahāpuññā aggamaheṣiyā kucchismiṃ nibbattā. Sesā panassa soḷasasahassā itthiyo vañjhā ahesuṃ. Tassa sā dhītā piyā ahosi manāpā. So tassā nānapupphapūre pañcaviṣatipupphasamugge anagghāni sukhumāni vatthāni ca “imehi attānaṃ alaṅkarotū”ti devasikaṃ paṇiṇi. Khādanīyabhojanīyassa pana pamānaṃ natthi. Anvaḍḍhamāsaṃ “dānaṃ detū”ti sahasaṃ sahasaṃ pesesi. Tassa kho pana vijayo ca sunāmo ca alāto cāti tayo amaccā ahesuṃ. So komudiyā cātumāsiniyā chaṇe pavattamāne devanagaraṃ viya nagare ca antepure ca alaṅkate sunhāto suvilitto sabbālaṅkārappaṭimaṅḍito bhuttasāyamāso vivaṭasīhapañjare mahātale amaccagaṇaparivuto visuddhaṃ gaganatalaṃ abhilaṅghamaṇaṃ candamaṅḍalaṃ disvā “ramaṇīyā vata bho dosinā ratti, kāya nu kho aḃja ratiyā abhirameyyāmā”ti amacce pucchi. Tamatthaṃ pakāseṇto satthā āha –

1153: ‘Ahu rājā videhānaṃ, aṅgati nāma khattiyo;  
Pahūtayoggo dhanimā, anantabalaporiso.

1154: ‘So ca pannarasim rattim, purimayāme anāgate;  
Cātumāsā komudiyā, amacce sannipātayi.

1155: ‘Paṇḍite sutasampanne, mhitapubbe vicakkhaṇe;  
Vijayañca sunāmañca, senāpatiṃ alātakaṃ.

1156: ‘Tamanupucchi vedeho, paccekaṃ brūtha saṃ rucim;  
Cātumāsā komudajja, juṇhaṃ byapahataṃ tamaṃ;  
Kāyajja ratiyā rattim, viharemu imaṃ utu”nti.

Tattha **pahūtayoggoti** bahukena hatthiyoggādinā samannāgato. **Anantabalaporisoti** anantabalakāyo. **Anāgateti** pariyoṣānaṃ appatte, anatikanteti attho. **Cātumāsāti** catunnaṃ

vassikamāsānaṃ pacchimadivasabhūtāya rattiyā. **Komudiyāti** phullakumudāya. **Mhitapubbeti** paṭhamaṃ sitaṃ katvā pacchā kathanasīle. **Tamanupucchīti** taṃ tesu amaccesu ekekaṃ amaccam anupucchī. **Paccekaṃ brūtha saṃ rucinti** sabbe pi tumhe attano attano ajjhāsayanurūpaṃ ruciṃ paccekaṃ mayhaṃ kathetha. **Komudajjāti** komudī ajja. **Juṇhanti** juṇhāya nissayabhūtaṃ candamaṇḍalaṃ abbhuggacchati. **Byapahataṃ tamanti** tena sabbaṃ andhakāraṃ vihatam. **Utunti** ajja rattiṃ imaṃ evarūpaṃ utuṃ kāyaratiyā vihareyyāmāti.

Iti rājā amacce pucchi. Tena te pucchitā attano attano ajjhāsayanurūpaṃ kathaṃ kathayimṣu. Tamatthaṃ pakāsento sathā āha –

**1157:** ‘Tato senāpati rañño, alāto etadabravi;  
‘Haṭṭhaṃ yoggaṃ balaṃ sabbaṃ, senaṃ sannāhayāmase.

**1158:** Niyyāma deva yuddhāya, anantabalaporisā;  
Ye te vasaṃ na āyanti, vasaṃ upanayāmase;  
Esā mayhaṃ sakā diṭṭhi, ajitaṃ ojināmase’.

**1159** Alātassa vaco sutvā, sunāmo etadabravi;  
‘Sabbe tuyhaṃ mahārāja, amittā vasamāgatā.

**1160:** Nikkhittasathā paccathā, nivātamanuvattare;  
Uttamo ussavo ajja, na yuddhaṃ mama rucati.

**1161:** Annapānañca khajjañca, khippaṃ abhiharantu te;  
Ramassu deva kāmehi, naccagīte suvādite’.

**1162** Sunāmassa vaco sutvā, vijayo etadabravi;  
‘Sabbe kāmā mahārāja, niccaṃ tava mupaṭṭhitā.

**1163:** Na hete dullabhā deva, tava kāmehi modituṃ;  
Sadāpi kāmā sulabhā, netam cittaṃ mama.

**1164:** Samaṇaṃ brāhmaṇaṃ vāpi, upāsema bahussutaṃ;  
Yo najja vinaye kaṅkhaṃ, atthadhammavidū ise’.

**1165** Vijayassa vaco sutvā, rājā aṅgati mabravi;  
‘Yathā vijayo bhaṇati, mayhampetaṃva rucati;

**1166:** Samaṇaṃ brāhmaṇaṃ vāpi, upāsema bahussutaṃ;  
Yo najja vinaye kaṅkhaṃ, atthadhammavidū ise.

**1167:** Sabbeva santā karoṭha matim, kaṃ upāsema paṇḍitaṃ;  
Yo najja vinaye kaṅkhaṃ, atthadhammavidū ise’.

**1168** Vedeḥassa vaco sutvā, alāto etadabravi;  
‘Atthāyaṃ migadāyasmim, acelo dhīrasammato.

**1169:** Guṇo kassapagottāyaṃ, suto citrakathī gaṇī;  
Taṃ deva payirupāsema, so no kaṅkhaṃ vinessati’.

**1170:** ‘Alātassa vaco sutvā, rājā codesi sārathim;  
Migadāyaṃ gamissāma, yuttaṃ yānaṃ idhā nayā’’ti.

Tattha **haṭṭhanti** tuṭṭhapahaṭṭham. **Ojināmaseti** yaṃ no ajiṭaṃ, taṃ jināma. Eso mama ajjhāsayoti. Rājā tassa kathaṃ neva paṭikkosi, nābhinandi. **Etadabravīti** rājānaṃ alātassa vacanaṃ anabhinandantaṃ appaṭikkosantaṃ disvā “nāyaṃ yuddhajjhāsayo, ahamassa cittaṃ gaṇhanto kāmaguṇābhiratiṃ vaṇṇayissāmī”ti cintetvā etaṃ “sabbe tuyha”ntiādivacanaṃ abravi.

**Vijayo etadabravīti** rājā sunāmassapi vacanaṃ nābhinandi, na paṭikkosi. Tato vijayo “ayaṃ rājā imesaṃ dvinnampi vacanaṃ sutvā tuṇhīyeva ṭhito, paṇḍitā nāma dhammassavanasonḍā honti, dhammassavanamassa vaṇṇayissāmī”ti cintetvā etaṃ “sabbe kāmā”ntiādivacanaṃ abravi. Tattha **tava mupaṭṭhitāti** tava upaṭṭhitā. **Moditunti** tava kāmehi modituṃ abhiraṃṇituṃ icchāya sati na hi ete kāmā dullabhā. **Netam cittamataṃ mamāti** etaṃ tava kāmehi abhiramaṇaṃ mama cittamataṃ na hoti, na me ettha cittaṃ pakkhandati. **Yo najjāti** yo no ajja. **Atthadhamma**vidūti pāliatthañceva pālidhammañca jānanto. **Iseti** isi esitagaṇo.

**Aṅgati mabravīti** aṅgati abravi. **Mayhampetaṃva rucattīti** mayhampi etaññeva rucatti. **Sabbeva santāti** sabbeva tumhe idha vijjamānā matiṃ karotha cintetha. **Alāto etadabravīti** rañño kathaṃ sutvā alāto “ayaṃ mama kulūpako guṇo nāma ājīvako rājuyyāne vasati, taṃ pasamsitvā rājakulūpakaṃ karissāmī”ti cintetvā etaṃ “atthāya”ntiādivacanaṃ abravi. Tattha **dhīrasammatoti** paṇḍitoti sammato. **Kassapagottāyanti** kassapagotto ayaṃ. **Sutoti** bahussuto. **Gaṇīti** gaṇasatthā. **Codesīti** āṇāpesi.

Rañño taṃ kathaṃ sutvā sārathino tathā kariṃsu. Tamatthaṃ pakāsento satthā āha –

1171: ‘Tassa yānaṃ ayojesuṃ, dantaṃ rūpiyapakkharaṃ;  
Sukkamaṭṭhaparivāraṃ, paṇḍaraṃ dosinā mukhaṃ.

1172: ‘Tatrāsuṃ kumudāyuttā, cattāro sindhavā hayā;  
Anilūpamasamuppātā, sudantā soṇṇamālino.

1173: ‘Setacchattaṃ setaratho, setassā setabījanī;  
Vedehe sahamaccehi, niyyaṃ candova sobhati.

1174: ‘Tamanuyāyīṃsu bahavo, indikhaggadharā balī;  
Assapiṭṭhigatā vīrā, narā naravarādhīpaṃ.

1175: ‘So muhuttaṃva yāyitvā, yānā oruyha khattiyo;  
Vedehe sahamaccehi, pattī guṇamupāgami.

1176: ‘Yepi tattha tadā āsuṃ, brāhmaṇibbhā samāgatā;  
Na te apanayī rājā, akataṃ bhūmimāgate’ ti.

Tattha **tassa yānanti** tassa rañño rathaṃ yojayīṃsu. **Dantanti** dantamayaṃ. **Rūpiyapakkharanti** rajatamayaupakkharaṃ. **Sukkamaṭṭhaparivāraṃ** parisuddhāpharusaparivāraṃ. **Dosinā mukhanti** vigatadosāya rattiyā mukhaṃ viya, candasadisanti attho. **Tatrāsunti** tatra ahesuṃ. **Kumudāti** kumudavaṇṇā. **Sindhavāti** sindhavajātikā. **Anilūpamasamuppātāti** vātasadisavegā. **Setacchattanti** tasmīṃ rathe samussāpitaṃ chattampi setaṃ ahosi. **Setarathoti** sopi ratho setoyeva. **Setassāti** assāpi setā. **Setabījanīti** bījanīpi setā. **Niyyanti** tena rathena niggacchanto amaccagaṇaparivuto vedeharājā cando viya sobhati.

**Naravarādhīpanti** naravarānaṃ adhipatiṃ rājādirājānaṃ. **So muhuttaṃva yāyitvāti** so rājā muhutteneva uyyānaṃ gantvā. **Pattī guṇamupāgamīti** pattikova guṇaṃ ājīvakaṃ upāgami. **Yepi tattha tadā āsunti** yepi tasmīṃ uyyāne tadā puretaraṃ gantvā taṃ ājīvakaṃ payirupāsamānā nisinnā ahesuṃ. **Na te apanayīti** amhākameva doso, ye mayaṃ pacchā agamimhā, tumhe mā cintayitthāti te brāhmaṇe ca

ibbhe ca rañño yeva atthāya akataṃ akatokāsaṃ bhūmiṃ samāgate na ussāraṇaṃ kāretvā apanayīti.

Tāya pana omisakaparīsāya parivutova ekamantaṃ nisīditvā paṭisanthāramakāsi. Tamatthaṃ pakāseṇto satthā āha –

**1177:** ‘Tato so mudukā bhisiyā, muducittakasanthate;  
Mudupaccatthate rājā, ekamantaṃ upāvisi.

**1178:** ‘Nisajja rājā sammodi, kathaṃ sāraṇiyaṃ tato;  
‘Kacci yāpaniyaṃ bhante, vātānamaviyaggatā.

**1179:** ‘Kacci akasirā vutti, labhasi piṇḍayāpanaṃ;  
Appābādho casi kacci, cakkhuṃ na parihāyati’.

**1180:** ‘Taṃ guṇo paṭisammodi, vedehaṃ vinaye rataṃ;  
‘Yāpaniyaṃ mahārāja, sabbametaṃ tadūbhayaṃ.

**1181:** ‘Kacci tuyhampi vedeha, paccantā na balīyare;  
Kacci arogaṃ yoggaṃ te, kacci vahati vāhanaṃ;  
Kacci te byādhayo natthi, sarīrassupatāpiyā’.

**1182:** ‘Paṭisammodito rājā, tato pucchi anantarā;  
Atthaṃ dhammañca ñāyañca, dhammakāmo rathesabho.

**1183:** ‘Kathaṃ dhammaṃ care macco, mātāpitūsu kassapa;  
Kathaṃ care ācariye, puttadāre kathaṃ care.

**1184:** ‘Kathaṃ careyya vuḍḍhesu, kathaṃ samaṇabrāhmaṇe;  
Kathañca balakāyasmīṃ, kathaṃ janapade care.

**1185:** ‘Kathaṃ dhammaṃ caritvāna, maccā gacchanti suggaṭṭiṃ;  
Kathañceke adhammaṭṭhā, patanti nirayaṃ atho’’ti.

Tattha **mudukā bhisiyā**ti mudukāya sukhasamphassāya bhisiyā. **Muducittakasanthateti** sukhasamphasse cittaṭṭharaṇe. **Mudupaccatthateti** mudunā paccattharaṇena paccatthate. **Sammodīti** ājīvakena saddhiṃ sammodanīyaṃ kathaṃ kathesi. **Tatoti** tato nisajjanato anantameva sāraṇiyaṃ kathaṃ kathesīti attho. Tattha **kacci yāpaniyanti** kacci te, bhante, sarīraṃ paccayehi yāpetuṃ sakkā. **Vātānamaviyaggatā**ti kacci te sarīre dhātuyo samappavattā, vātānaṃ byaggatā natthi, tattha tattha vaggavaggā hutvā vātā na bādhyantīti attho.

**Akasirā**ti niddukkā. **Vuttī**ti jīvitavutti. **Appābādhoti** iriyāpathabhañjakenābādhenā virahito. **Cakkhanti** kacci te cakkhuādīni indriyāni na parihāyantīti pucchati. **Paṭisammodīti** sammodanīyakathāya paṭikathesi. Tattha **sabbametaṃ** yaṃ tayā vuttaṃ vātānamaviyaggatādi, taṃ sabbam taṭheva. **Tadūbhayanti** yampi tayā ‘‘appābādho casi kacci, cakkhuṃ na parihāyati’’ti vuttaṃ, tampi ubhayaṃ taṭheva.

**Na balīyareti** nābhibhavanti na kuppanti. **Anantarā**ti paṭisanthārato anantarā pañhaṃ pucchi. Tattha **atthaṃ dhammañca ñāyañcā**ti pāliatthañca pāliñca kāraṇayuttiñca. So hi ‘‘kathaṃ dhammaṃ care’’ti pucchanto mātāpituādīsu paṭipattidīpakaṃ pāliñca pāliatthañca kāraṇayuttiñca me kathethāti imaṃ atthañca dhammañca ñāyañca pucchati. Tattha **kathañceke adhammaṭṭhā**ti ekacce adhamme ṭhitā kathaṃ nirayañceva atho sesaapāye ca patantīti

sabbaññubuddhapaccekabuddhabuddhasāvaka mahābodhisattesu purimassa purimassa alābhena pacchimaṃ pacchimaṃ pucchitabbakaṃ mahesakkhapañhaṃ rājā kiñci ajānantaṃ naggabhoggaṃ nissirikaṃ andhabālaṃ ajīvakaṃ pucchi.

Sopi evaṃ pucchito pucchānurūpaṃ byākaraṇaṃ adisvā carantaṃ goṇaṃ daṇḍena paharanto viya bhattapātiyaṃ kacavaraṃ khipanto viya ca “suṇa, mahārājā”ti okāsaṃ kāretvā attano micchāvādaṃ paṭṭhapesi. Tamatthaṃ pakāsento satthā āha –

**1186:**“Vedehassa vaco sutvā, kassapo etadabravi;  
‘Suṇohi me mahārāja, saccaṃ avitathaṃ padaṃ.

**1187:**Natthi dhammacaritassa, phalaṃ kalyāṇapāpakam;  
Natthi deva paro loko, ko tato hi idhāgato.

**1188:**Natthi deva pitaro vā, kuto mātā kuto pitā;  
Natthi ācariyo nāma, adantaṃ ko damessati.

**1189:**Samatulyāni bhūtāni, natthi jeṭṭhāpacāyikā;  
Natthi balaṃ vīriyaṃ vā, kuto uṭṭhānaporisaṃ;  
Niyatāni hi bhūtāni, yathā goṭaviso tathā.

**1190:**Laddheyyaṃ labhate macco, tattha dānaphalaṃ kuto;  
Natthi dānaphalaṃ deva, avaso devavīriyo.

**1191:**Bālehi dānaṃ paññattaṃ, paṇḍitehi paṭicchitaṃ;  
Avasā denti dhīraṇaṃ, bālā paṇḍitamānino””ti.

Tattha **idhāgatoti** tato paralokato idhāgato nāma natthi. **Natthi deva pitaro vāti** deva, ayyakapeyyakādayo vā natthi, tesu asantesu kuto mātā kuto pitā. **Yathā goṭaviso tathāti** goṭaviso vuccati pacchābandho, yathā nāvāya pacchābandho nāvameva anugacchati, tathā ime sattā niyatameva anugacchantīti vadati. **Avaso devavīriyoti** evaṃ dānaphale asati yo koci bālo dānaṃ deti, so avaso avīriyo na attano vasena balena deti, dānaphalaṃ pana atthīti saññāya aññesaṃ andhabālānaṃ saddahitvā detīti dīpeti. **Bālehi dānaṃ paññattanti** “dānaṃ dātabba”nti andhabālehi paññattaṃ anuññattaṃ, taṃ dānaṃ bālāyeva denti, paṇḍitā paṭiggaṇhanti.

Evaṃ dānassa nipphalataṃ vaṇṇetvā idāni pāpassa nipphalabhāvaṃ vaṇṇetum āha –

**1192:**“Sattime sassatā kāyā, acchejjā avikopino;  
Tejo pathavī āpo ca, vāyo sukhaṃ dukhañcime;  
Jīve ca sattime kāyā, yesaṃ chettā na vijjati.

**1193:**“Natthi hantā va chettā vā, haññe yevāpi koci naṃ;  
Antareneva kāyānaṃ, satthāni vītivattare.

**1194:**“Yo cāpi siramādāya, paresaṃ nisitāsina;  
Na so chindati te kāye, tattha pāpaphalaṃ kuto.

**1195:**“Cullāsītīmahākappe, sabbe sujjhanti saṃsaraṃ;  
Anāgate tamhi kāle, saññatopi na sujjhati.

**1196:**“Caritvāpi bahuṃ bhadraṃ, neva sujjhantināgate;

Pāpañcepi bahum katvā, taṃ khaṇaṃ nātivattare.

**1197:** ‘Anupubbena no suddhi, kappānaṃ cullasītiyā;  
Niyatiṃ nātivattāma, velantamiva sāgaro’’ti.

Tattha **kāyāti** samūhā. **Avikopinoti** vikopetuṃ na sakkā. **Jīveti** jīvo. ‘‘Jīvo’’tipi pāṭho, ayameva attho. **Sattime kāyāti** ime satta kāyā. **Haññe yevāpi koci nanti** yo haññeyya, sopi nattheva. **Vītivattareti** imesaṃ sattannaṃ kāyānaṃ antareyeva caranti, chindituṃ na sakkonti. **Siramādāyāti** paresaṃ sīsaṃ gahetvā. **Nisitāsināti** nisitena asinā chindati, **na so chindatīti** sopi te kāye na chindati, pathavī pathavimeva upeti, āpādayo āpādike, sukhadukkhajīvā ākāsaṃ pakkhandantīti dasseti.

**Samsaranti** mahārāja, ime sattā imaṃ pathaviṃ ekamaṃsakhalaṃ katvāpi ettake kappe saṃsarantā sujjhanti. Aññatra hi saṃsārā satte sodhetuṃ samattho nāma natthi, sabbe saṃsārenea sujjhanti. **Anāgate tamhi kāleti** yathāvutte pana etasmiṃ kāle anāgate appatte antarā saññatopi parisuddhasīlopi na sujjhanti. **Taṃ khaṇanti** taṃ vuttappakāraṃ kālaṃ. **Anupubbena no suddhīti** amhākaṃ vāde anupubbena suddhi, sabbesaṃ amhākaṃ anupubbena suddhi bhavissatīti attho. Iti so ucchedavādo attano thāmena sakavādaṃ nippadesato kathesīti.

**1198:** ‘Kassapassa vaco sutvā, alāto etadabravi;  
‘‘Yathā bhadanto bhaṇati, mayhampetaṃva rucati.

**1199:** Ahampi purimaṃ jātiṃ, sare saṃsaritattano;  
Piṅgalo nāmaṃ āsiṃ, luddo goghātako pure.

**1200:** Bārānasiyaṃ phītāyaṃ, bahum pāpaṃ mayā katam;  
Bahū mayā hatā pāṇā, mahimsā sūkarā ajā.

**1201:** Tato cuto idha jāto, iddhe senāpatīkule;  
Natthi nūna phalaṃ pāpaṃ, yohaṃ na nirayaṃ gato’’ti.

Tattha **alāto etadabravīti** so kira kassapadasabalassa cetiye anojapupphadāmena pūjaṃ katvā maraṇasamaye aññena kammaena yathānubhāvaṃ khitto saṃsāre saṃsaranto ekassa pāpakammaassa nissandena goghātakakule nibbattivā bahum pāpamakāsi. Athassa maraṇakāle bhasmapaṭicchanno viya aggi ettakaṃ kālaṃ ṭhitam taṃ puññakammaṃ okāsamakāsi. So tassānubhāvena idha nibbattivā taṃ vibhūtiṃ patto, jātiṃ saranto pana atītānantarato paraṃ parisarituṃ asakkonto ‘‘goghātakammaṃ katvā idha nibbattosmi’’ti saññāya tassa vādaṃ upatthambhento idaṃ ‘‘yathā bhadanto bhaṇatī’’tiādivacanaṃ abravi. Tattha **sare saṃsaritattanoti** attano saṃsaritaṃ sarāmi. **Senāpatīkuleti** senāpatīkulamhi.

**1202:** ‘Athettha bījako nāma, dāso āsi paṭaccarī;  
Upasathaṃ upavasanto, guṇasantikupāgami.

**1203:** ‘Kassapassa vaco sutvā, alātassa ca bhāsitaṃ;  
Passasanto muhuṃ uṇhaṃ, rudaṃ assūni vattayī’’ti.

Tattha **athetthāti** atha ettha etissaṃ mithilāyaṃ. **Paṭaccarīti** daliddo kapaṇo ahosi. **Guṇasantikupāgamīti** guṇassa santikaṃ kiñcideva kāraṇaṃ sossāmīti upagatoti veditabbo.

**1204:** ‘Tamanupucchi vedeho, ‘kimatthaṃ samma rodasi;  
Kiṃ te sutam vā diṭṭhaṃ vā, kiṃ maṃ vedesi vedana’’nti.

Tattha **kiṃ maṃ vedesi vedananti** kiṃ nāma tvaṃ kāyikaṃ vā cetasikaṃ vā vedanaṃ pattoyaṃ, evaṃ rodanto maṃ vedesi jānāpesi, uttānameva naṃ katvā mayhaṃ ācikkhāhīti.

**1205:** ‘Vedehassa vaco sutvā, bījako etadabravi;  
‘Natthi me vedanā dukkhā, mahārāja suṇohi me.

**1206:** ‘Ahampi purimaṃ jātiṃ, sarāmi sukhamattano;  
Sāketāhaṃ pure āsiṃ, bhāvaseṭṭhi guṇe rato.

**1207:** ‘Sammato brāhmaṇibbhānaṃ, saṃvibhāgarato suci;  
Na cāpi pāpakaṃ kammaṃ, sarāmi katamattano.

**1208:** ‘Tato cutāhaṃ vedeha, idha jāto duritthiyā;  
Gabbhamhi kumbhadāsiyā, yato jāto suduggato.

**1209:** ‘Evampi duggato santo, samacariyaṃ adhiṭṭhito;  
Upaḍḍhabhāgaṃ bhattassa, dadāmi yo me icchati.

**1210:** ‘Cātuddasiṃ pañcadasiṃ, sadā upavasāmaṃ;  
Na cāpi bhūte hiṃsāmi, theyyaṃ cāpi vivajjayiṃ.

**1211:** ‘Sabbameva hi nūnetam, suciṇṇam bhavati nipphalam;  
Nirattham maññidaṃ sīlam, alāto bhāsati yathā.

**1212:** ‘Kalimeva nūna gaṇhāmi, asippo dhuttako yathā;  
Kaṭam alāto gaṇhāti, kitavosikkhito yathā.

**1213:** ‘Dvāraṃ nappaṭipassāmi, yena gacchāmi suggatiṃ;  
Tasmā rāja parodāmi, sutvā kassapabhāsita’’nti.

Tattha **bhāvaseṭṭhī** evaṃnāmako asītikotiṅgavibhavo seṭṭhi. **Guṇe ratoti** guṇamhi rato. **Sammatotī** sambhāvito saṃvaṇṇito. **Sucīti** sucikammo. **Idha jāto duritthiyā**ti imasmiṃ mithilanagare daliddiyā kapaṇāya kumbhadāsiyā kucchimhi jātosmīti. So kira pubbe kassapabuddhakāle araṇṇe naṭṭhaṃ balibaddaṃ gavesamāno ekena maggamūlḥena bhikkhunā maggaṃ puṭṭho tuṇhī hutvā puna tena pucchito kujjhivā ‘‘samaṇa, dāsā nāma mukharā honti, dāsena tayā bhavitabbaṃ, atimukharosī’’ti āha. Taṃ kammaṃ tadā vipākaṃ adatvā bhasmacchanno viya pāvako ṭhitaṃ. Maraṇasamaye aññaṃ kammaṃ upaṭṭhāsi. So yathākammaṃ saṃsāre saṃsaranto ekassa kusalakammassa balena sākete vuttappakāro seṭṭhi hutvā dānādīni puññāni akāsi. Taṃ panassa kammaṃ pathaviyaṃ nihitanidhi viya ṭhitaṃ okāsaṃ labhitvā vipākaṃ dassati. Yaṃ pana tena taṃ bhikkhuṃ akkosantena katam pāpakammaṃ, tamassa tasmim attabhāve vipākaṃ adāsi. So ajānanto ‘‘itarassa kalyāṇakammassa balena kumbhadāsiyā kucchimhi nibbattosmī’’ti saññāya evamāha. **Yato jāto suduggatotī** sohaṃ jātakālato paṭṭhāya atiduggatotī dīpeti.

**Samacariyamadhiṭṭhitoti** samacariyāyameva patiṭṭhitomhi. **Nūnetanti** ekaṃsena etaṃ. **Maññidaṃ sīlanti** deva, idaṃ sīlam nāma niratthakaṃ maññe. **Alātotī** yathā ayaṃ alātasenāpati ‘‘mayā purimabhāve bahuṃ pāṇātipātakammaṃ katvā senāpatiṭṭhānaṃ laddha’’nti bhāsati, tena kāraṇenāhaṃ niratthakaṃ sīlanti maññāmi. **Kalimevāti** yathā asippo asikkhito akkhadhutto parājayaggāhaṃ gaṇhāti, tathā nūna gaṇhāmi, purimabhāve attano sāpateyyaṃ nāsetvā idāni dukkhaṃ anubhavāmi. **Kassapabhāsitanti** kassapagottassa acelakassa bhāsitaṃ sutvāti vadati.

**1214:** ‘Bījakassa vaco sutvā, rājā aṅgati mabravi;

‘Natthi dvāraṃ sugatiyā, niyatim kankha bījaka.

**1215:**‘Sukhaṃ vā yadi vā dukkhaṃ, niyatiyā kira labbhati;  
Saṃsārasuddhi sabbesaṃ, mā turittho anāgate.

**1216:**‘Ahampi pubbe kalyāṇo, brāhmaṇibbhesu byāvaṭo;  
Vohāramanusāsanto, ratihīno tadantarā’’ti.

Tattha **aṅgati mabravīti** paṭhamameva itaresaṃ dvinnam, pacchā bījakkassāti tiṇṇaṃ vacanaṃ sutvā dalhaṃ micchādiṭṭhiṃ gahetvā etaṃ ‘‘natthi dvāra’’ntiādivacanamabravi. **Niyatim kankhāti** samma bījaka, niyatimeva olokehi. Cullāsītimahākappappamaṇo kāloyeva hi satte sodheti, tvam atituritoti adhippāyenevamāha. **Anāgateti** tasmim kāle asampatte antarāva devalokaṃ gacchāmīti mā turittho. **Byāvaṭoti** brāhmaṇesu ca gahapatikesu ca tesameva kāyaveyyāvaccadānādikkammakaraṇena byāvaṭo ahoṣim. **Vohāranti** vinicchayaṭṭhāne nisīditvā rājakkiccam vohāraṃ anusāsantova. **Ratihīno tadantarāti** ettakaṃ kālaṃ kāmaguṇaratiyā parihīnoti.

Evañca pana vatvā ‘‘bhante kassapa, mayaṃ ettakaṃ kālaṃ pamajjimhā, idāni pana amhehi ācariyo laddho, ito paṭṭhāya kāmaratimeva anubhavissāma, tumhākaṃ santike ito uttari dhammassavanampi no papañco bhavissati, tiṭṭhatha tumhe, mayaṃ gamissāmā’’ti āpucchanto āha –

**1217:**‘Punapi bhante dakkhemu, saṅgati ce bhavissati’’ti.

Tattha **saṅgati ceti** ekasmim ṭhāne ce no samāgamo bhavissati, no ce, asati puññaphale kiṃ tayā diṭṭhenāti.

‘‘Idaṃ vatvāna vedeho, paccagā sanivesana’’nti;

Tattha **sanivesananti** bhikkhave, idaṃ vacanaṃ vedeharājā vatvā rathaṃ abhiruyha attano nivesanaṃ candakapāsādatalameva paṭigato.

Rājā paṭhamaṃ guṇasantikaṃ gantvā taṃ vanditvā pañhaṃ pucchi. Āgacchanto pana avanditvāva āgato. Guṇo attano aguṇatāya vandanampi nālattha, piṇḍādikaṃ sakkāraṃ kimeva lacchati. Rājāpi taṃ rattim vītināmetvā punadivase amacce sannipātetvā ‘‘kāmaguṇe me upaṭṭhāpetha, ahaṃ ito paṭṭhāya kāmaguṇasukhameva anubhavissāmi, na me aññāni kiccāni ārocetabbāni, vinicchayakkiccam asuko ca asuko ca karotū’’ti vatvā kāmaratimatto ahoṣi. Tamatthaṃ pakāsento satthā āha –

**1218:**‘Tato ratyā vivasāne, upaṭṭhānamhi aṅgati;  
Amacce sannipātetvā, idaṃ vacanamabravi.

**1219:**‘Candake me vimānasmiṃ, sadā kāme vidhentu me;  
Mā upagacchuṃ atthesu, guyhappakāsiyesu ca.

**1220:**‘Vijayo ca sunāmo ca, senāpati alātako;  
Ete atthe nisīdantu, vohārakusalā tayo’.

**1221:**‘Idaṃ vatvāna vedeho, kāmeva bahumaññatha;  
Na cāpi brāhmaṇibbhesu, atthe kismiñci byāvaṭo’’ti.

Tattha **upaṭṭhānamhīti** attano upaṭṭhānaṭṭhāne. **Candake meti** mama santake candakapāsāde. **Vidhentu meti** niccaṃ mayhaṃ kāme saṃvidahantu upaṭṭhapentu. **Guyhappakāsiyesūti** guyhesupi pakāsiyesupi atthesu uppannesu maṃ keci mā upagacchuṃ. **Attheti** atthakaraṇe vinicchayaṭṭhāne. **Nisīdantūti** mayā kattabbakiccassa karaṇatthaṃ sesamaccehi saddhiṃ nisīdantūti.



**1222:** ‘Tato dvesattarattassa, vedehassatrajā piyā;  
Rājadhītā rucā nāma, dhātimātaramabravi.

**1223:** ‘Alañkarotha maṃ khippaṃ, sakhiyo cālañkarontu me;  
Suve pannaraso dibyo, gacchaṃ issarasantike.

**1224:** ‘Tassā mālyaṃ abhiharim̐su, candanañca mahārahaṃ;  
Mañisañkhamuttāratanaṃ, nānāratte ca ambare.

**1225:** ‘Tañca soṇṇamaye pīthe, nisinnaṃ bahukitthiyo;  
Parikiriya asobhim̐su, rucam̐ ruciravaṇṇini’ nti.

Tattha **tatoti** tato rañño kāmapañke laggitadivasato paṭṭhāya. **Dvesattarattassā**ti cuddasame divase. **Dhātimātaramabravi**ti pitu santikaṃ gantukāmā hutvā dhātimātaramāha. Sā kira cātuddase cātuddase pañcasatakumārīkāhi parivutā dhātigaṇaṃ ādāya mahantena sirivilāsena attano sattabhūmikā rativaḍḍhanapāsādā oruyha pitu dassanattamaṃ candakapāsādaṃ gacchati. Atha naṃ pitā disvā tuṭṭhamānaso hutvā mahāsakkāraṃ kāretvā uyyojento ‘‘amma, dānaṃ dehī’’ti sahassaṃ datvā uyyojeti. Sā attano nivesanaṃ āgantvā punadivase uposathikā hutvā kapaṇaddhikavaṇibbakayācakānaṃ mahādānaṃ deti. Rañña kirassā eko janapadopi dinno. Tato āyena sabbakiccāni karoti. Tadā pana ‘‘rañña kira guṇaṃ ājīvakaṃ nissāya micchādassanaṃ gahita’’nti sakalanagare ekakolāhalaṃ ahosi. Taṃ pavattiṃ rucāya dhātiyo sutvā rājadhītāya ārocayim̐su ‘‘ayye, pitarā kira te ājīvakassa kathaṃ sutvā micchādassanaṃ gahitaṃ, so kira catūsu nagaradvāresu dānasālāyo viddhaṃsāpetvā parapariggahitā itthiyo ca kumārīkāyo ca pasayhakārena gaṇhituṃ āṇāpeti, rajjaṃ na vicāreti, kāmamattoyeva kira jāto’’ti. Sā taṃ kathaṃ sutvā anattamaṇā hutvā ‘‘kathañhi nāma me tāto apagatasukkadhammaṃ nillajjaṃ naggabhoggaṃ upasaṅkamitvā pañhaṃ pucchissati, nanu dhammikasamaṇabrāhmaṇe kammavādino upasaṅkamitvā pucchitabbo siyā, ṭhapetvā kho pana maṃ añño mayhaṃ pitarāṃ micchādassanā apanetvā sammādassane patiṭṭhāpetuṃ samattho nāma natthi. Ahañhi atītā satta, anāgatā sattāti cuddasa jātiyo anussarāmi, tasmā pubbe mayā kataṃ pāpakammaṃ kathetvā pāpakammaṃ phalaṃ dassentī mama pitarāṃ micchādassanā mocessāmi. Sace pana ajjeva gamissāmi, atha maṃ pitā ‘amma, tvaṃ pubbe aḍḍhamāse āgacchasi, ajja kasmā evaṃ lahu āgatāsī’’ti vakkhati. Tatra sace ahaṃ ‘tumhehi kira micchādassanaṃ gahita’’nti sutvā ‘āgatamhī’’ti vakkhāmi, na me vacanaṃ garuṃ katvā gaṇhissati, tasmā ajja āgantvā ito cuddasame divase kālapakkhēyeva kiñci ajānantī viya pubbe gamanākārenteva gantvā āgamanakāle dānavattatthāya sahassaṃ yācissāmi, tadā me pitā diṭṭhiyā gahitabhāvaṃ kathessati. Atha naṃ ahaṃ attano balena micchādiṭṭhiṃ chaḍḍāpessāmi’’ti cintesi. Tasmā cuddasame divase pitu santikaṃ gantukāmā hutvā evamāha.

Tattha **sakhiyo cāti** sahāyikāyopi me pañcasatā kumārīkāyo ekāyekaṃ asadisamaṃ katvā nānālañkārehi nānāvaṇṇehi pupphagandhavilepanehi alaṅkarontūti. **Dibyoti** dibbasadiso, devatāsannipātaṇḍitotipi dibbo. **Gacchanti** mama dānavattaṃ āharāpetuṃ videhissarassa pitu santikaṃ gamissāmīti. **Abhiharim̐sūti** soḷasahi gandhodakaghaṭṭehi nhāpetvā maṇḍanattāya abhiharim̐su. **Parikiriya**ti parivāretvā. **Asobhim̐sūti** sujaṃ parivāretvā ṭhitā devakañña viya taṃ divasaṃ ativiya asobhim̐sūti.

**1226:** ‘Sā ca sakhimajjhagatā, sabbābharaṇabhūsitā;  
Sateratā abbhamaṃ, candakaṃ pāvisī rucā.

**1227:** ‘Upasaṅkamitvā vedehaṃ, vanditvā vinaye rataṃ;  
Suvanṇakhacite pīthe, ekamantaṃ upāvisī’’ti.

Tattha **upāvisīti** pitu vasanaṭṭhānaṃ candakapāsādaṃ pāvisi. **Suvanṇakhacite**ti sattaratanakhacite suvaṇṇamaye pīthe.

1228: ‘Tañca disvāna vedeho, accharānaṃva saṅgamaṃ;  
Rucaṃ sakhimajjhagataṃ, idaṃ vacanamabravi.

1229: ‘‘Kacci ramasi pāsāde, antopokkharāṇiṃ pati;  
Kacci bahavidhaṃ khajjaṃ, sadā abhiharanti te.

1230: ‘Kacci bahavidhaṃ mālyaṃ, ocinitvā kumāriyo;  
Gharake karotha paccekāṃ, khiḍḍāratiratā muhuṃ.

1231: ‘Kena vā vikalaṃ tuyhaṃ, kiṃ khippaṃ āharanti te;  
Mano karassu kuḍḍamukhī, api candasamamhipī’’ti.

Tattha **saṅgamanti** accharānaṃ saṅgamaṃ viya samāgamaṃ disvā. **Pāsādeti** amma mayā tuyhaṃ vejayantasadiso rativaḍḍhanapāsādo kārito, kacci tattha ramasi. **Antopokkharāṇiṃ patīti** antovatthusmiññeva te mayā nandāpokkharāṇipāṭibhāgāpokkharāṇī kāritā, kacci taṃ pokkharāṇiṃ paṭicca udakakīlaṃ kīlanti ramasi. **Mālyanti** amma, ahaṃ tuyhaṃ devasikaṃ pañcavīsati pupphasamugge paññāmi, kacci tumhe sabbāpi kumārikāyo taṃ mālyaṃ ocinitvā ganthitvā abhiṇṇhaṃ khiḍḍāratiratā hutvā paccekāṃ gharake karotha, ‘‘idaṃ sundaraṃ, idaṃ sundarataṃ’’nti pāṭiyekkaṃ sārāmbhena vāyapupphagharakāni pupphagabbhe ca pupphāsanapupphasayanāni ca kacci karoṭhāti pucchati.

**Vikalanti** vekallaṃ. **Mano karassūti** cittaṃ uppādehi. **Kuḍḍamukhīti** sāsapakakkehi pasādītamukhatāya taṃ evamāha. Itthiyo hi mukhavaṇṇaṃ pasādentīyo duṭṭhalohitamukhadūsitapīlakāharaṇatthaṃ paṭhamaṃ sāsapakakkena mukhaṃ vilimpanti, tato lohitassa samakaraṇatthaṃ mattikākakkena, tato chavipasādanatthaṃ tilakakkena. **Candasamamhipīti** candato dullabhataro nāma natthi, tādisepi ruciṃ katvā mamācikkha, sampādessāmi teti.

1232: ‘Vedehassa vaco sutvā, rucā pitara mabravi;  
‘Sabbametaṃ mahārāja, labbhatissarasantike.

1233: ‘Suve pannaraso dibyo, sahasaṃ āharantu me;  
Yathādinnañca dassāmi, dānaṃ sabbavaṇṇīsvaha’’nti.

Tattha **sabbavaṇṇīsvahanti** sabbavaṇṇibbakesu ahaṃ dassāmi.

1234: ‘Rucāya vacanaṃ sutvā, rājā aṅgati mabravi;  
‘Bahuṃ vināsitaṃ vittaṃ, niratthaṃ aphalaṃ tayā.

1235: ‘Uposathe vasaṃ niccaṃ, annapānaṃ na bhuñjasi;  
Niyatetaṃ abhuttappaṃ, natthi puññaṃ abhuñjato’’ti.

Tattha **aṅgati mabravīti** bhikkhave, so aṅgati rājā pubbe ayācitopi ‘‘amma, dānaṃ dehī’’ti sahasaṃ datvā taṃ divasaṃ yācitopi micchādassanassa gahitattā adatvā idaṃ ‘‘bahuṃ vināsita’’nti ādivacanaṃ abravi. **Niyatetaṃ abhuttappaṃ** etaṃ niyativasena tayā abhuñjitappaṃ bhavissati, bhuñjantānampi abhuñjantānampi puññaṃ natthi. Sabbe hi cullāsītimahākappe atikkamitvāva sujjhanti.

1236: ‘Bijakopi hi sutvāna, tadā kassapabhāsitaṃ;  
‘Passasanto muhuṃ uṇhaṃ, rudaṃ assūni vattayī.

1237: ‘Yāva ruce jīvamānā, mā bhattamapanāmayi;

Natthi bhadde paro loko, kiṃ nirattham vihaññasī’’ti.

Tattha **bījakopī**ti bījakopi pubbe kalyāṇakammaṃ katvā tassa nissandena dāsikucchiyaṃ nibbattoti bījakavatthumpissā udāharaṇattham āhari. **Natthi bhaddeti** bhadde, guṇācariyo evamāha ‘‘natthi ayaṃ loko, natthi paro loko, natthi mātā, natthi pitā, natthi sattā opapātikā, natthi loke samaṇabrāhmaṇā sammaggaṭā sammāpaṭipannā’’ti. Paraloke hi sati idhalokopi nāma bhaveyya, soyeva ca natthi. Mātāpitūsu santesu puttadhītarō nāma bhaveyyūṃ, teyeva ca natthi. Dhamme sati dhammikasamaṇabrāhmaṇā bhaveyyūṃ, teyeva ca natthi. Kiṃ dānaṃ dentī sīlaṃ rakkhantī nirattham vihaññasīti.

**1238**:‘Vedehassa vaco sutvā, rucā ruciravaṇṇinī;  
Jānaṃ pubbāparaṃ dhammaṃ, pitaraṃ etadabravi.

**1239**:‘Sutameva pure āsi, sakkhi diṭṭhamidaṃ mayā;  
Bālūpasevī yo hoti, bālova samapajjatha.

**1240**:‘Mūlho hi mūlhamāgama, bhīyyo mohaṃ nigacchati;  
Patirūpaṃ alātena, bījakena ca muyhitu’’nti.

Tattha **pubbāparaṃ dhammanti** bhikkhave, pitu vacanaṃ sutvā rucā rājadhītā atīte sattajātivāsena pubbadhammaṃ, anāgate sattajātivāsena anāgatadhammaṃca jānantī pitaraṃ micchādiṭṭhito mocetukāmā etaṃ ‘‘sutamevā’’tiādimāha. Tattha **samapajjathā**ti yo puggalo bālūpasevī hoti, so bālova samapajjati etaṃ mayā pubbe sutameva, ajja pana paccakkhato diṭṭham. **Mūlhoti** maggamūlham āgama maggamūlho viya diṭṭhimūlham āgama diṭṭhimūlhopi uttari mohaṃ nigacchati, mūlhataro hoti. **Alātenā**ti deva, tumhehi jātigottakulapadesaissariyapuññaṃapaññaṃhīnena alātasenāpatinā accantahīnena duppaññaṃca bījakadāsena ca gāmadāraśasādisaṃ ahirikaṃ bālaṃ guṇaṃ ajīvakaṃ āgama muyhituṃ patirūpaṃ anucchavikaṃ. Kiṃ te na muyhissantīti?

Evaṃ te ubhopi garahitvā diṭṭhito mocetukāmatāya pitaraṃ vaṇṇentī āha –

**1241**:‘Tvañca devāsi sappañño, dhīro atthassa kovido;  
Kathaṃ bālebhi sadisaṃ, hīnadiṭṭhiṃ upāgami.

**1242**:‘Sacepi saṃsārapathena sujjhati, niratthiyā pabbajjā guṇassa;  
Kīṭova aggīṃ jalitaṃ apāpataṃ, upapajjati mohamūlho naggabhāvaṃ.

**1243**:‘Saṃsārasuddhīti pure nivīṭṭhā, kammaṃ vidūsentī bahū ajānaṃ;  
Pubbe kalī duggahitovanathā, dummocayā balisā ambujovā’’ti.

Tattha **sappaññoti** yasavayapuññatitthāvāsāyonisomanasikārasākacchāvasena laddhāya paññāya sappañño, teneva kāraṇena **dhīro**, dhīratāya atthānatthassa kāraṇākāraṇassa **kovido**. **Bālebhi sadisanti** yathā te bālā upagatā, tathā kathaṃ tvaṃ hīnadiṭṭhiṃ upagato. **Apāpatanti** api āpataṃ, patantoti attho. Idaṃ vuttaṃ hoti – tāta, saṃsārena suddhīti laddhiyā sati yathā paṭaṅgakīṭo rattibhāge jalitaṃ aggīṃ disvā tappaccayaṃ dukkhaṃ ajānitvā mohena tattha patanto mahādukkhaṃ apajjati, tathā guṇopi pañca kāmaguṇe pahāya mohamūlho nirassādaṃ naggabhāvaṃ upapajjati.

**Pure nivīṭṭhā**ti tāta, saṃsārena suddhīti kassaci vacanaṃ asutvā paṭhamameva nivīṭṭho natthi, sukatadukkaṭānaṃ kammānaṃ phalanti gahitattā bahū janā ajānantā kammaṃ vidūsentā kammaphalampi vidūsentiyeva, evaṃ tesam pubbe gahito kali parājayaḡāho duggahitova hotīti attho. **Dummocayā balisā ambujovā**ti te pana evaṃ ajānantā micchādassanena anattham gahetvā ṭhitā bālā yathā nāma balisaṃ gilivā ṭhito maccho balisā dummocayo hoti, evaṃ tamhā anathā dummocayā honti.

Uttaripi udāharaṇaṃ āharantī āha –

1244: ‘Upamaṃ te karissāmi, mahārāja tavatthiyā;  
Upamāya midhekacce, atthaṃ jānanti paṇḍitā.

1245: ‘Vāṇijānaṃ yathā nāvā, appamāṇabharā garu;  
Atibhāraṃ samādāya, aṇṇave avasīdati.

1246: ‘Evameva naro pāpaṃ, thokaṃ thokampi ācinaṃ;  
Atibhāraṃ samādāya, niraye avasīdati.

1247: ‘Na tāva bhāro paripūro, alātassa mahīpati;  
Ācināti ca taṃ pāpaṃ, yena gacchati duggatiṃ.

1248: ‘Pubbevassa kataṃ puññaṃ, alātassa mahīpati;  
Tasseva deva nissando, yañceso labhate sukhaṃ.

1249: ‘Khīyate cassa taṃ puññaṃ, tathā hi aguṇe rato;  
Ujumaggaṃ avahāya, kummaggamanudhāvati.

1250: ‘Tulā yathā paggaḥitā, ohite tulamaṇḍale;  
Unnameti tulāsīsaṃ, bhāre oropite sati.

1251: ‘Evameva naro puññaṃ, thokaṃ thokampi ācinaṃ;  
Saggātimāno dāsova, bījako sātave rato’’ti.

Tattha **nirayeti** aṭṭhavidhe mahāniraye, soḷasavidhe ussadaniraye, lokantaraniraye ca. **Bhāroti** tāta, na tāva alātassa akusalabhāro pūراتي. **Tassevāti** tassa pubbe katassa puññasseva nissando, yaṃ so alātasenāpati aḷḷa sukhaṃ labhati. Na hi tāta, etaṃ goghātakakammaṃ phalaṃ. Pāpakammaṃ hi nāma vipāko iṭṭho kanto bhavissatīti aṭṭhānametaṃ. **Aguṇe ratoti** tathāhesa idāni akusalakamme rato. **Ujumagganti** dasakusalakammamapathamaggaṃ. **Kummagganti** nirayagāmiakusalamaggaṃ.

**Ohite tulamaṇḍale**ti bhaṇḍapaṭicchanatthāya tulamaṇḍale laggetvā ṭhapite. **Unnametīti** uddhaṃ ukkhipati. **Ācinanti** thokaṃ thokampi puññaṃ ācinanto pāpabhāraṃ otāretvā naro kalyāṇakammaṃ sīsaṃ ukkhipitvā devalokaṃ gacchati. **Saggātimānoti** sagge atimāno saggasampāpake sātaphale kalyāṇakamme abhirato. ‘‘Saggādhimāno’’tipi pāṭho, saggam adhikāraṃ katvā ṭhitacittoti attho. **Sātave ratoti** esa bījakaḍāso sātave madhuravipāke kusalahammeyeva rato. So imassa pāpakammaṃ khīṇakāle, kalyāṇakammaṃ phalena devaloke nibbattissati.

Yañcesa idāni dāsattaṃ upagato, na taṃ kalyāṇakammaṃ phalena. Dāsattasamvattanikañhissa pubbe kataṃ pāpaṃ bhavissatīti niṭṭhamettha gantabbanti imamatthaṃ pakāsenti āha –

1252: ‘Yamajja bījako dāso, dukkhaṃ passati attani;  
Pubbevassa kataṃ pāpaṃ, tameso paṭisevati.

1253: ‘Khīyate cassa taṃ pāpaṃ, tathā hi vinaye rato;  
Kassapañca samāpajja, mā hevuppathamāgamā’’ti.

Tattha **mā hevuppathamāgamāti** tāta, tvaṃ imaṃ naggam kassapājīvakaṃ upagantvā mā heva nirayagāmiṃ uppathamā gamā, mā pāpamakāsīti pitaraṃ ovatati.

Idānissa pāpūpasevanāya dosaṃ kalyāṇamittūpasevanāya ca guṇaṃ dassentī āha –

**1254:** ‘Yaṃ yañhi rāja bhajati, santaṃ vā yadi vā asaṃ;  
Sīlavantaṃ visīlaṃ vā, vasaṃ tasseva gacchati.

**1255:** ‘Yādisaṃ kurute mittaṃ, yādisaṃ cūpasevati;  
Sopi tādisako hoti, sahavāso hi tādiso.

**1256:** ‘Sevamāno sevamānaṃ, samphuṭṭho samphusaṃ paraṃ;  
Saro diddho kalāpaṃva, alittamupalimpati;  
Upalepabhayā dhīro, neva pāpasakhā siyā.

**1257:** ‘Pūtimacchaṃ kusaggena, yo naro upanayhati;  
Kusāpi pūti vāyanti, evaṃ bālūpasevanā.

**1258:** ‘Tagarañca palāsena, yo naro upanayhati;  
Pattāpi surabhi vāyanti, evaṃ dhīrūpasevanā.

**1259:** ‘Tasmā pattapuṭasseva, ñatvā sampākamattano  
Asante nopaseveyya, sante seveyya paṇḍito;  
Asanto nirayaṃ nentī, santo pāpenti suggatī’ nti.

Tattha **santaṃ vāti** sappurisaṃ vā. **Yadi vā asanti** asappurisaṃ vā. **Saro diddho kalāpaṃvāti** mahārāja, yathā nāma halāhalavisalitto saro sarakalāpe khitto sabbāṃ taṃ visena alittampi sarakalāpaṃ limpati, visadiddhameva karoti, evameva pāpamitto pāpaṃ sevamāno attānaṃ sevamānaṃ paraṃ, tena samphuṭṭho taṃ samphusaṃ alittaṃ pāpena purisaṃ attanā ekajjhāsayaṃ karonto upalimpati. **Pūti vāyantīti** tassa te kusāpi duggandhā vāyanti. **Tagarañcāti** tagarañca aññañca gandhasampannaṃ gandhajātaṃ. **Evanti** evarūpā dhīrūpasevanā. Dhīro hi attānaṃ sevamānaṃ dhīrameva karoti.

**Tasmā pattapuṭassevāti** yasmā tagarādipaliveṭhamānāni paṇṇānipi sugandhāni honti, tasmā palāsapattapuṭasseva paṇḍitūpasevanena ahampi paṇḍito bhavissāmīti evaṃ. **Ñatvā sampākamattanoti** attano paripākaṃ paṇḍitabhāvaṃ parimāṇaṃ ñatvā asante pahāya paṇḍite sante seveyya. ‘**Nirayaṃ nentī**’ ti ettha devadattādīhi nirayaṃ, ‘**pāpenti suggatī**’ nti ettha sārīputtattherādīhi sugatiṃ nītānaṃ vasena udāharaṇāni āharitabbāni.

Evaṃ rājadhītā chahi gāthāhi pitu dhammaṃ kathetvā idāni atīte attanā anubhūtaṃ dukkhaṃ dassentī āha –

**1260:** ‘Ahampi jātiyo satta, sare saṃsaritattano;  
Anāgatāpi satteva, yā gamissaṃ ito cutā.

**1261:** ‘Yā me sā sattamī jāti, ahu pubbe janādhipa;  
Kammāraputto magadhesu, ahuṃ rājagahe pure.

**1262:** ‘Pāpaṃ sahāyamāgamma, bahuṃ pāpaṃ kataṃ mayā;  
Paradārassa heṭhento, carimhā amarā viya.

**1263:** ‘Taṃ kammaṃ nihitaṃ aṭṭhā, bhasmacchannova pāvako;  
Atha aññehi kammehi, ajāyim vamsabhūmiyaṃ.

**1264:** ‘Kosambiyaṃ seṭṭhikule, iddhe phīte mahaddhane;

Ekaputto mahārāja, niccaṃ sakkatapūjito.

**1265:** ‘Tattha mittaṃ aseviṣsaṃ, sahāyaṃ sātave rataṃ;  
Paṇḍitaṃ sutasampannaṃ, so maṃ atthe nivesayi.

**1266:** ‘Cātuddasiṃ pañcadasiṃ, bahuṃ rattiṃ upāvasiṃ;  
Taṃ kammaṃ nihitaṃ aṭṭhā, nidhīva udakantike.

**1267:** ‘Atha pāpāna kammānaṃ, yametaṃ magadhe kataṃ;  
Phalaṃ pariyāga maṃ pacchā, bhutvā duṭṭhaviṣaṃ yathā.

**1268:** ‘Tato cutāhaṃ vedeha, roruve niraye ciraṃ;  
Sakammunā apaccissaṃ, taṃ saraṃ na sukhaṃ labhe.

**1269:** ‘Bahuvassagaṇe tattha, khepayitvā bahuṃ dukhaṃ;  
Bhinnāgate ahuṃ rāja, chagalo uddhatapphalo’ ti.

Tattha **sattāti** mahārāja, idhalokaparalokā nāma sukatadukkaṭṭānaṃ phalaṃ nāma atthi. Na hi saṃsāro satte sodhetuṃ sakkoti, sakammunā eva sattā sujjhanti. Alātasenāpati ca bījakadāso ca ekameva jātiṃ anussaranti. Na kevalaṃ eteva jātiṃ saranti, ahampi atīte satta jātiyo attano saṃsaritaṃ sarāmi, anāgatepi ito gantabbā satteva jānāmi. **Yā me sāti** yā sā mama atīte sattamī jāti āsi. **Kammāraputtoti** tāya jātiyā ahaṃ magadhesu rājagahanagare suvaṇṇakāraputto ahoṣiṃ.

**Paradārassa heṭhentoti** paradāraṃ heṭhentā paresaṃ rakkhitagopite varabhaṇḍe aparajjhantā. **Aṭṭhāti** taṃ tadā mayā kataṃ pāpakammaṃ okāsaṃ alabhivā okāse sati vipākadāyakaṃ hutvā bhasmapaṭicchanno aggi viya nihitaṃ aṭṭhāsi. **Vaṃsabhūmiyanti** vaṃsaraṭṭhe. **Ekaputtoti** asītikoṭivibhave seṭṭhikule ahaṃ ekaputtakova ahoṣiṃ. **Sātave ratanti** kalyāṇakamme abhirataṃ. **So manti** so sahāyako maṃ atthe kusalakamme patiṭṭhāpesi.

**Taṃ kammanti** tampi me kataṃ kalyāṇakammaṃ tadā okāsaṃ alabhivā okāse sati vipākadāyakaṃ hutvā udakantike nidhi viya nihitaṃ aṭṭhāsi. **Yametanti** atha mama santakesu pāpakammesu yaṃ etaṃ mayā magadhesu paradārikakammaṃ kataṃ, tassa phalaṃ pacchā maṃ pariyāgaṃ upagatanti attho. Yathā kiṃ? **Bhutvā duṭṭhaviṣaṃ yathā**, yathā savisaṃ bhojanaṃ bhuñjitvā ṭhitassa taṃ duṭṭhaṃ kakkhaḷaṃ halāhalaṃ viṣaṃ kuppatti, tathā maṃ pariyāgatanti attho. **Tatoti** tato kosambiyaṃ seṭṭhikulato. **Taṃ saranti** taṃ tasmīṃ niraye anubhūtaḍḍakhaṃ sarantī cittasukhaṃ nāma na labhāmi, bhayameva me uppajjati. **Bhinnāgateti** bhinnāgate nāma raṭṭhe. **Uddhatapphaloti** uddhatabhō.

So pana chagalako balasampanno ahoṣi. Piṭṭhiyaṃ abhiruyhapi naṃ vāhayiṃsu, yānaḷepi vojayiṃsu. Imamatthaṃ pakāsentī āha –

**1270:** ‘Sātaputtā mayā vūḷhā, piṭṭhiyā ca rathena ca;  
Tassa kammaṃ nissando, paradāragamanassa me’ ti.

Tattha **sātaputtāti** amaccaputtā. **Tassa kammassāti** deva, roruve mahāniraye paccanaṃ chagalakakāle bījuppāṭanaṃ piṭṭhivāhanayānakayojanāni ca sabbopesa tassa nissando paradāragamanassa meti.

Tato pana cavitvā araṇṇe kapiyoniyaṃ paṭisandhiṃ gaṇhi. Atha naṃ jātadivase yūthapatino dassesuṃ. So ‘ānetha me, putta’ nti daḷhaṃ gahetvā tassa viravantassa dantehi phalāni uppāṭesi. Tamatthaṃ pakāsentī āha –

1271: ‘Tato cutāhaṃ vedeha, kapi āsiṃ brahāvane;  
 Niluñcitaphaloyeva, yūthapena pagabbhinā;  
 Tassa kamma nissando, paradāragamanassa me’’ti.

Tattha **niluñcitaphaloyevā**ti tatrapāhaṃ pagabbhena yūthapatinā luñcitvā uppāṭitaphaloyeva ahosinti attho.

Atha aparāpi jātiyo dassentī āha –

1272: ‘Tato cutāhaṃ vedeha, dassanesu pasū ahuṃ;  
 Niluñcito javo bhadro, yoggaṃ vūlhaṃ ciraṃ mayā;  
 Tassa kamma nissando, paradāragamanassa me.

1273: ‘Tato cutāhaṃ vedeha, vajjīsu kulamāgamā;  
 Nevitthī na pumā āsiṃ, manussatte sudullabhe;  
 Tassa kamma nissando, paradāragamanassa me.

1274: ‘Tato cutāhaṃ vedeha, ajāyiṃ nandane vane;  
 Bhavane tāvatimsāhaṃ, accharā kāmavaṇṇinī.

1275: ‘Vicitravatthābharaṇā, āmuttamaṇikuṇḍalā;  
 Kusalā naccagītassa, sakkassa paricārikā.

1276: ‘Tattha ṭhitāhaṃ vedeha, sarāmi jātiyo imā;  
 Anāgatāpi satteva, yā gamissaṃ ito cutā.

1277: ‘Pariyāgataṃ taṃ kusalaṃ, yaṃ me kosambiyaṃ kataṃ;  
 Deve ceva manusse ca, sandhāvissaṃ ito cutā.

1278: ‘Satta jacco mahārāja, niccaṃ sakkatapūjītā;  
 Thībhāvāpi na muccissaṃ, chaṭṭhā nigatiyo imā.

1279: ‘Sattamī ca gati deva, devaputto mahiddhiko;  
 Pumā devo bhavissāmi, devakāyasmimuttamo.

1280: ‘Ajjāpi santānamayaṃ, mālaṃ ganthenti nandane;  
 Devaputto javo nāma, yo me mālaṃ paṭicchati.

1281: ‘Muhutto viya so dībyo, idha vassāni soḷasa;  
 Rattindivo ca so dībyo, mānusiṃ saradosataṃ.

1282: ‘Iti kammāni anventi, asaṅkheyyāpi jātiyo;  
 Kalyāṇaṃ yadi vā pāpaṃ, na hi kammaṃ vinassatī’’ti.

Tattha **dassanesū**ti dassanaraṭṭhesu. **Pasū**ti goṇo ahoṣiṃ. **Niluñcitoti** vacchakāleyeva maṃ evaṃ manāpo bhavissatīti nibbījakamakamsu. Sohaṃ niluñcito uddhatabījo javo bhadro ahoṣiṃ. **Vajjīsu kulamāgamā**ti goyonito cavitvā vajjiraṭṭhe ekasmiṃ mahābhogakule nibbattinti dasseti. **Nevitthī na pumā**ti napuṃsakattaṃ sandhāya āha. **Bhavane tāvatimsāhanti** tāvatimsabhavane ahaṃ.

**Tattha ṭhitāhaṃ, vedeha, sarāmi jātiyo imā**ti sā kira tasmiṃ devaloke ṭhitā ‘‘ahaṃ evarūpaṃ devalokaṃ āgacchantī kuto nu kho āgatā’’ti oloketī vajjiraṭṭhe mahābhogakule napuṃsakattabhāvato

cavitvā tattha nibbattabhāvaṃ passi. Tato “kena nu kho kammaena evarūpe ramaṇīye t̄hāne nibbattāmhī”ti olokenṭī kosambiyāṃ seṭṭhikule nibbattitvā kataṃ dānādikusalaṃ disvā “etassa phalena nibbattāmhī”ti ñatvā “anantarāṭṭite napuṃsakattabhāve nibbattamānā kuto āgatāmhī”ti olokenṭī dassanaraṭṭhesu goyoniyāṃ mahādukkhassa anubhūtabhāvaṃ aññāsi. Tato anantaraṃ jātiṃ anussaramānā vānarayoniyāṃ uddhataphalabhāvaṃ addasa. Tato anantaraṃ anussarantī bhinnāgate chagalakayoniyāṃ uddhatabhāvaṃ anussari. Tato paraṃ anussaramānā roruve nibbattabhāvaṃ anussari.

Athassā niraye tiracchānayoniyaṅca anubhūtaṃ dukkhaṃ anussarantiyā bhayaṃ uppajji. Tato “kena nu kho kammaena evarūpaṃ dukkhaṃ anubhūtaṃ mayā”ti chaṭṭhaṃ jātiṃ olokenṭī t̄ya jātiyā kosambinagare kataṃ kalyāṇakammaṃ disvā sattamaṃ olokenṭī magadharat̄the pāpasahāyaṃ nissāya kataṃ paradārikakammaṃ disvā “etassa phalena me taṃ mahādukkhaṃ anubhūta”nti aññāsi. Atha “ito cavitvā anāgate kuhiṃ nibbattissāmī”ti olokenṭī “yāvatāyukaṃ t̄atvā puna sakkasseva paricārikā hutvā nibbattissāmī”ti aññāsi. Evaṃ punappunaṃ olokayamānā “tatiyepi attabhāve sakkasseva paricārikā hutvā nibbattissāmī, tathā catutthe, pañcame pana tasmīṃyeva devaloke javanadevaputtassa aggamaheṣī hutvā nibbattissāmī”ti ñatvā tato anantaraṃ olokenṭī “chaṭṭhe attabhāve ito tāvatīṃsabhavanato cavitvā aṅgataaññā aggamaheṣiyā kucchimhi nibbattissāmī, ‘rucā’ti me nāmaṃ bhavissatī”ti ñatvā “tato anantarā kuhiṃ nibbattissāmī”ti olokenṭī “sattamāya jātiyā tato cavitvā tāvatīṃsabhavane mahiddhiko devaputto hutvā nibbattissāmī, itthibhāvato muccissāmī”ti aññāsi. Tasmā –

“Tattha t̄hitāhaṃ vedeha, sarāmi satta jātiyo;  
Anāgatāpi satteva, yā gamissaṃ ito cutā”ti. – ādimāha;

Tattha **pariyāgatanti** pariyāyena attano vārena āgataṃ. **Satta jaccoti** vajjiraṭṭhe napuṃsakajātiyā saddhiṃ devaloke pañca, ayaṅca chaṭṭhāti satta jātiyoti vuccanti. Etā satta jātiyo niccaṃ sakkatapūjitā ahosinti dasseti. **Chaṭṭhā nigatiyoti** devaloke pana pañca, ayaṅca ekāti imā cha gatiyo itthibhāvāna muccissanti vadati. **Sattamī cāti** ito cavitvā anantaraṃ. **Santānamayanti** ekatovaṅtakādivasena katasantānaṃ. **Ganthentīti** yathā santānamayā hontī, evaṃ ajjapi mama paricārikā nandanavane mālaṃ ganthentiyeva. **Yo me mālaṃ paṭicchati** mahārāja, anantara-jātiyaṃ mama sāmiko javo nāma devaputto yo rukkhato patitapatitaṃ mālaṃ paṭicchati.

**Soḷasāti** mahārāja, mama jātiyā imāni soḷasa vassāni, ettako pana kālo devānaṃ eko muhutto, tena t̄a mama cutabhāvampi ajānantā mamatthāya mālaṃ ganthentiyeva. **Mānusinti** manussānaṃ vassagaṇanaṃ āgamma esa saradosataṃ vassasataṃ hoti, evaṃ dīghāyukā devā. Iminā pana kāraṇena paralokassa ca kalyāṇapāpakānaṅca kammānaṃ atthitaṃ jānāhi, devāti.

**Anventīti** yathā maṃ anubandhiṃsu, evaṃ anubandhanti. **Na hi kammaṃ vinassatīti** diṭṭhadhammavedanīyaṃ tasmīṃyeva attabhāve, upapajjavedanīyaṃ anantarabhāve vipākaṃ deti, aparāpariyavedanīyaṃ pana vipākaṃ adatvā na nassati. Taṃ sandhāya “na hi kammaṃ vinassatī”ti vatvā “deva, ahaṃ paradārikakammassa nissandena niraye ca tiracchānayoniyaṅca mahantaṃ dukkhaṃ anubhaviṃ. Sace pana tumhepi idāni guṇassa kathaṃ gahetvā evaṃ karissatha, mayā anubhūtasadisameva dukkhaṃ anubhavissatha, tasmā evaṃ mā karitthā”ti āha.

Athassa uttari dhammaṃ desentī āha –

**1283:**“Yo icche puriso hotuṃ, jātiṃ jātiṃ punappunaṃ;  
Paradāraṃ vivajjeyya, dhotapādova kaddamaṃ.

**1284:**“Yā icche puriso hotuṃ, jātiṃ jātiṃ punappunaṃ;  
Sāmikaṃ apacāyeyya, indaṃva paricārikā.



**1285:** ‘Yo icche dibyabhogañca, dibbamāyumuṃ yasaṃ sukhaṃ;  
Pāpāni parivajjetvā, tividhaṃ dhammamācare.

**1286:** ‘Kāyena vācā manasā, appamatto vicakkhaṇo;  
Attano hoti atthāya, itthī vā yadī vā pumā.

**1287:** ‘Ye kecime mānujā jīvaloke, yasassino sabbasamantabhogā;  
Asaṃsayamaṃ tehi pure suciṇṇamaṃ, kammassakāse puthu sabbasattā.

**1288:** ‘Inghānucintesi sayampi deva, kutonidānā te imā janinda;  
Yā te imā accharāsannikāsā, alaṅkatā kañcanajalachannā’ ti.

Tattha **hotunti** bhavituṃ. **Sabbasamantabhogā**ti paripuṇṇasabbabhogā. **Suciṇṇanti** suṭṭhu ciṇṇamaṃ kalyāṇakammaṃ kataṃ. **Kammassakāseti** kammassakā attanā katakammasseva vipākapaṭisaṃvedino. Na hi mātāpitūhi kataṃ kammaṃ puttadhītānaṃ vipākamaṃ deti, na tāhi puttadhītāhi kataṃ kammaṃ mātāpitūnaṃ vipākamaṃ deti. Sesehi kataṃ sesānaṃ kimeva dassati? **Inghā**ti codanathe nipāto. **Anucintesī**ti punappunaṃ cinteyyāsī. **Yā te imā**ti yā imā soḷasasahassā itthiyo taṃ upaṭṭhahanti, imā te kutonidānā, kiṃ nipajjitvā niddāyanta laddhā, udāhu panthadūsanasandhicchedādīni pāpāni katvā, adu kalyāṇakammaṃ nissāya laddhāti idaṃ tāva attanāpi cinteyyāsī, devāti.

Evamaṃ sā pitaraṃ anusāsī. Tamatthaṃ pakāsento satthā āha –

**1289:** ‘Icevaṃ pitaraṃ kaññā, rucā tosesi aṅgatiṃ;  
Mūḷhasa maggamācikkhi, dhammamakkhāsī subbatā’ ti.

Tattha **icevanti** bhikkhave, iti imehi evarūpehi madhurehi vacanehi rucākaññā pitaraṃ tosesi, mūḷhasa maggaṃ viya tassa sugatimaggaṃ ācikkhi, nānāyehi sucaritadhammaṃ akkhāsī. Dhammaṃ kathentiyeva sā subbatā sundaravatā attano atītajātiyopi kathesi.

Evamaṃ pubbaṅhato paṭṭhāya sabbarattiṃ pitu dhammaṃ desetvā ‘mā, deva, naggassa micchādīṭṭhikassa vacanaṃ gaṇhi, ‘atthi ayaṃ loko, atthi paraloko, atthi sukataḍukkaṭakammānaṃ phala’nti vadantassa mādisassa kalyāṇamittassa vacanaṃ gaṇha, mā atitthena pakkhandī’ ti āha. Evamaṃ santepi pitaraṃ micchādassanā mocetuṃ nāsakkhi. So hi kevalaṃ tassā madhuravacanaṃ sutvā tussi. Mātāpitāro hi piyaputtānaṃ vacanaṃ piyāyanti, na pana taṃ micchādassanaṃ vissajjesi. Nagarepi ‘rucā kira rājadhītā pitu dhammaṃ desetvā micchādassanaṃ vissajjāpesi’ ti ekakolāhalaṃ ahosi. ‘Paṇḍitā rājadhītā ajja pitaraṃ micchādassanā mocetvā nagaravāsīnaṃ sotthibhāvaṃ karissatī’ ti mahājano tussi. Sā pitaraṃ bodhetuṃ asakkontī vīriyaṃ avissajjetvāva ‘yena kenaci upāyena pitu sotthibhāvaṃ karissāmī’ ti sirasmīṃ añjaliṃ patiṭṭhapetvā dasadisā namassitvā ‘imasmiṃ loke lokasandhārakā dhammikasamaṇabrāhmaṇā nāma lokapāladevatā nāma mahābrahmāno nāma atthi, te idhāgantvā attano balena mama pitaraṃ micchādassanaṃ vissajjāpentu, etassa guṇe asatipi mama guṇena mama sīlena mama saccena idhāgantvā imaṃ micchādassanaṃ vissajjāpetvā sakalalokassa sotthiṃ karontū’ ti adhiṭṭhahitvā namassi.

Tadā bodhisatto nārado nāma mahābrahmā ahosi. Bodhisattā ca nāma attano mettābhāvanāya anuddayāya mahantabhāvena suppaṭipannaduppaṭipanne satte dassanattaṃ kālānukālaṃ lokamaṃ olokonti. So taṃ divasaṃ lokamaṃ olokonte taṃ rājadhītaraṃ pitu micchādīṭṭhimocanattaṃ lokasandhārakadevatāyo namassamānaṃ disvā, ‘ṭhapetvā maṃ añño etaṃ rājānaṃ micchādassanaṃ vissajjāpetuṃ samatto nāma natthi, ajja mayā rājadhītu saṅghaṃ, rañño ca saparijanassa sotthibhāvaṃ katvā āgantūṃ vaṭṭati, kena nu kho vesena gamissāmī’ ti cintetvā ‘manussānaṃ pabbajitā piyā ceva garuno ca ādeyyavacanaṃ ca, tasmā pabbajitavesena gamissāmī’ ti sannīṭṭhānaṃ katvā pāsādikamaṃ suvaṇṇavaṇṇamaṃ manussatthabhāvaṃ māpetvā manuññaṃ jaṭamaṇḍalaṃ bandhitvā jaṭantare

kañcanasūciṃ odahitvā anto rattapaṭaṃ upari rattavākacīraṃ nivāsetvā pārūpitvā suvaṇṇatārākhacitaṃ rajatamayāṃ ajinacammaṃ ekamse katvā muttāsikkāya pakkhittaṃ suvaṇṇamayāṃ bhikkhābhājanaṃ ādāya tīsu ṭhānesu onataṃ suvaṇṇakājaṃ khandhe katvā muttāsikkāya eva pavāḷakamaṇḍalaṃ ādāya iminā isivesena gaganatale cando viya virocamaṇo ākāse āgantvā alaṅkatacandakapāsādamahātalaṃ pavisitvā rañño purato ākāse aṭṭhāsi. Tamatthaṃ pakāseto satthā āha –

**1290:** ‘Athāgamā brahmalokā, nārado mānusiṃ pajam;  
Jambudīpaṃ avekkhanto, addā rājānamaṅgatiṃ.

**1291:** ‘Tato patiṭṭhā pāsāde, vedehassa puratthato;  
Tañca disvānānuppattaṃ, rucā isimavandathā’’ti.

Tattha **addā**ti brahmaloke ṭhitova jambudīpaṃ avekkhanto guṇājīvakassa santike gahitamicchādassanaṃ rājānaṃ aṅgatiṃ addasa, tasmā āgatoti attho. **Tato patiṭṭhā**ti tato so brahmā tassa rañño amaccagaṇaparivutassa nisinnassa purato tasmim pāsāde apade padaṃ dassento ākāse patiṭṭhahi. **Anuppattanti** āgataṃ. **Isinti** isivesena āgatattā satthā ‘‘isi’’nti āha. **Avandathā**ti ‘‘mamānuggahena mama pitari kāruṇṇaṃ katvā eko devarājā āgato bhavissati’’ti haṭṭhapahaṭṭhā vātābhihaṭṭha suvaṇṇakadalī viya onamitvā nārada brahmānaṃ avandi.

Rājāpi taṃ disvāva brahmatejena tajjito attano āsane saṅṭhātuṃ asakkonto āsanā oruyha bhūmiyaṃ ṭhatvā āgataṭṭhānañca nāmagottañca pucchi. Tamatthaṃ pakāseto satthā āha –

**1292:** ‘Athāsanamhā oruyha, rājā byathitamānaso;  
Nāradaṃ paripucchanto, idaṃ vacanamabravi.

**1293:** ‘Kuto nu āgacchasi devavaṇṇi, obhāsayaṃ sabbadisā candimāva;  
Akkhāhi me pucchito nāmagottaṃ, kathaṃ taṃ jānanti manussaloke’’ti.

Tattha **byathitamānasoti** bhītacitto. **Kuto nū**ti kacci nu kho vijjādharo bhaveyyāti maññaṃāno avanditvāva evaṃ pucchi.

Atha so ‘‘ayaṃ rājā ‘paraloko natthi’’ti maññati, paralokamevassa tāva ācikkhissāmi’’ti cintetvā gāthamāha –

**1294:** ‘Ahañhi devato idāni emi, obhāsayaṃ sabbadisā candimāva;  
Akkhāmi te pucchito nāmagottaṃ, jānanti maṃ nārado kassapo cā’’ti.

Tattha **devatoti** devalokato. **Nārado kassapo cā**ti maṃ nāmena nārado, gottena kassapoti jānanti.

Atha rājā ‘‘imaṃ pacchāpi paralokaṃ pucchissāmi, iddhiyā laddhakāraṇaṃ tāva pucchissāmi’’ti cintetvā gāthamāha –

**1295:** ‘Accherarūpaṃ tava yādisañca, vehāyasaṃ gacchasi tiṭṭhasi ca;  
Pucchāmi taṃ nārada etamatthaṃ, atha kena vaṇṇena tavāyamiddhi’’ti.

Tattha **yādisañcā**ti yādisañca tava saṅṭhānaṃ, yañca tvaṃ ākāse gacchasi tiṭṭhasi ca, idaṃ acchariyajātaṃ.

Nārado āha –

**1296:** ‘Saccañca dhammo ca damo ca cāgo, guṇā mamete pakatā purāṇā;  
Teheva dhammehi susevitehi, manojalo yena kāmaṃ gatasmī’ ti.

Tattha **saccanti** musāvādivirahitaṃ vacīsaccaṃ. **Dhammoti** tividhasucaritadhammo ceva kaṣiṇaparikkammajhānadhammo ca. **Damoti** indriyadamaṇaṃ. **Cāgoti** kilesapariccāgo ca deyyadhammapariccāgo ca. **Mamete guṇāti** mama ete guṇasampayuttā guṇasahagatā. **Pakatā purāṇāti** mayā purimabhava katāti dasseti. ‘**Teheva dhammehi susevitehi**’ ti te sabbe guṇe susevite paricārite dasseti. **Manojavoti** iddhiyā kāraṇena paṭiladdho. **Yena kāmaṃ gatasmīti** yena devaṭṭhāne ca manussaṭṭhāne ca gantuṃ icchanaṃ, tena gatasmīti attho.

Rājā evaṃ tasmim̐ kathentepi micchādassanassa gahitattā paralokaṃ asaddahanto ‘‘atthi nu kho puñṇavipāko’’ ti vatvā gāthamāha –

**1297:** ‘Accheramācikkhasi puñṇasiddhiṃ, sace hi etehi yathā vadesi;  
Pucchāmi taṃ nārada etamatthaṃ, puṭṭho ca me sādhu viyākarohī’ ti.

Tattha **puñṇasiddhinti** puñṇānaṃ siddhiṃ phaladāyakattaṃ ācikkhanto acchariyaṃ ācikkhasi.

Nārado āha –

**1298:** ‘Pucchassu maṃ rāja tavesa attho, yaṃ saṃsayamaṃ kuruse bhūmipāla;  
Ahaṃ taṃ nissamsayataṃ gamemi, nayehi ñāyehi ca hetubhī cā’ ti.

Tattha **tavesa atthoti** pucchitabbako nāma tava esa attho. **Yaṃ saṃsayanti** yaṃ kismiñcideva atthe saṃsayamaṃ karosi, taṃ maṃ puccha. **Nissamsayatanti** ahaṃ taṃ nissamsayabhāvaṃ gamemi. **Nayehīti** kāraṇavacanehi. **Ñāyehīti** ñāṇehi. **Hetubhīti** paccayehi, paṭiññāmatteveva avatvā ñāṇena paricchinditvā kāraṇavacaneha ca tesaṃ dhammānaṃ samuṭṭhāpakapaccayehi ca taṃ nissamsayamaṃ karissāmīti attho.

Rājā āha –

**1299:** ‘Pucchāmi taṃ nārada etamatthaṃ, puṭṭho ca me nārada mā musā bhaṇi;  
Atthi nu devā pitaro nu atthi, loko paro atthi jano yamāhū’ ti.

Tattha **jano yamāhūti** yaṃ jano evamāha – ‘‘atthi devā, atthi pitaro, atthi paro loko’’ ti, taṃ sabbaṃ atthi nu khoti pucchati.

Nārado āha –

**1300:** ‘Attheva devā pitaro ca atthi, loko paro atthi jano yamāhu;  
Kāmesu giddhā ca narā pamūḷhā, lokaṃ paraṃ na vidū mohayuttā’ ti.

Tattha **attheva devāti** mahārāja, devā ca pitaro ca atthi, yampi jano paralokamāha, sopi attheva. **Na vidūti** kāmagiddhā pana mohamūḷhā janā paralokaṃ na vidanti na jānantīti.

Taṃ sutvā rājā parihāsaṃ karonto evamāha –

**1301:** ‘Atthīti ce nārada saddahāsi, nivesanaṃ paraloke matānaṃ;  
Idheva me pañca satāni dehi, dassāmi te paraloke sahassa’ nti.

Tattha **nivesananti** nivāsaṭṭhānaṃ. **Pañca satānīti** pañca kahāpaṇasatāni.

Atha naṃ mahāsatto parisamajjheveva garahanto āha –

**1302:** ‘Dajjemu kho pañca satāni bhoto, jaññāmu ce sīlavantaṃ vadaññuṃ;  
Luddaṃ taṃ bhontaṃ niraye vasantaṃ, ko codaye paraloke sahassaṃ.

**1303:** ‘Idheva yo hoti adhammasīlo, pāpācāro alaso luddakammo;  
Na paṇḍitā tasmim̐ iṇaṃ dadanti, na hi āgamo hoti tathāvidhamhā.

**1304:** ‘Dakkaṇṇa posaṃ manujā viditvā, utṭhānakaṃ sīlavantaṃ vadaññuṃ;  
Sayameva bhogehi nimantayanti, kammaṃ karitvā puna māharesī’ ti.

Tattha **jaññāmu ceti** yadi mayaṃ bhavantaṃ ‘‘sīlavā esa vadaññū, dhammikasamaṇabrāhmaṇānaṃ imasmim̐ kāle iminā nāmatthoti jānitvā tassa tassa kiccassa kārako vadaññū’’ti jāneyyāma. Atha te vaḍḍhiyā pañca satāni dadeyyāma, tvaṃ pana luddo sāhasiko micchādassanaṃ gahetvā dānasālaṃ viddhamsetvā paradāresu aparajjhasi, ito cuto niraye uppajjissasi, evaṃ luddaṃ taṃ niraye vasantaṃ bhontaṃ tattha gantvā ko ‘‘sahassaṃ me dehi’’ti codessati. **Tathāvidhamhāti** tādisā purisā dinnassa iṇassa puna āgamo nāma na hoti. **Dakkhanti** dhanuppādanakusalāṃ. **Puna māharesīti** attano kammaṃ karitvā dhanaṃ uppādetvā puna amhākaṃ santakaṃ āhareyyāsi, mā nikkammo vasīti sayameva bhogehi nimantayanti.

Iti rājā tena niggayhamāno appaṭibhāno ahosi. Mahājano haṭṭhatuṭṭho hutvā ‘‘mahiddhiko devopi ajja rājānaṃ micchādassanaṃ vissajjāpessati’’ti sakalanagaraṃ ekakolāhalaṃ ahosi. Mahāsattassānubhāvena tadā sattayojanikāya mithilāya tassa dhammadesanaṃ assuṇanto nāma nāhosi. Atha mahāsatto ‘‘ayaṃ rājā ativiya daḷhaṃ micchādassanaṃ gaṇhi, nirayabhayena naṃ santajjetvā micchādīṭṭhiṃ vissajjāpetvā puna devalokena assāsessāmi’’ti cintetvā ‘‘mahārāja, sace dīṭṭhiṃ na vissajjessasi, evaṃ anantadukkhaṃ nirayaṃ gamissasi’’ti vatvā nirayakathaṃ paṭṭhapesi –

**1305:** ‘Ito cuto dakkhasi tattha rāja, kākolasāṅghehi vikassamānaṃ;  
Taṃ khajjamānaṃ niraye vasantaṃ, kākehi giṃjhehi ca senakehi;  
Sañchinnagattaṃ ruhiraṃ savantaṃ, ko codaye paraloke sahassa’’nti.

Tattha **kākolasāṅghehi**ti lohatuṇḍehi kākasāṅghehi. **Vikassamānanti** attānaṃ ākaḍḍhiyamānaṃ tattha niraye passissasi. **Tanti** taṃ bhavantaṃ.

Taṃ pana kākolanirayaṃ vaṇṇetvā ‘‘sacepi ettha na nibbattissasi, lokantaraniraye nibbattissasi’’ti vatvā taṃ nirayaṃ dassetuṃ gāthamāha –

**1306:** ‘Andhamtamaṃ tattha na candasūriyā, nirayo sadā tumulo ghorarūpo;  
Sā neva rattī na divā paññāyati, tathāvidhe ko vicare dhanatthiko’’ti.

Tattha **andhaṃ tamanti** mahārāja, yamhi lokantaraniraye micchādīṭṭhikā nibbattanti, tattha cakkhuvīññāṇassa uppattinivāraṇaṃ andhatamaṃ. **Sadā tumuloti** so nirayo niccaṃ bahalandhakāro. **Ghorarūpoti** bhīsanakajātiko. **Sā neva rattīti** yā idha ratti divā ca, sā neva tattha paññāyati. **Ko vicareti** ko uddhāraṃ sodhento vicarissati.

Tampissa lokantaranirayaṃ vitthārena vaṇṇetvā ‘‘mahārāja, micchādīṭṭhiṃ avissajjento na kevalaṃ etadeva, aññampi dukkhaṃ anubhavissasi’’ti dassento gāthamāha –

**1307:** ‘Sabalo ca sāmo ca duve suvānā, pavaddhakāyā balino mahantā;  
Khādanti dantehi ayomayehi, ito paṇunnaṃ paralokapatta’’nti.

Tattha **ito paṇunnanti** imamhā manussalokā cutaṃ. Parato nirayesupi eseva nayo. Tasmā sabbāni tāni nirayaṭṭhānāni nirayapālānaṃ upakkamehi saddhiṃ heṭṭhā vuttanayeneva vitthāretvā tāsāṃ tāsāṃ gāthānaṃ anuttānāni padāni vaṇṇetabbāni.

**1308:**“Taṃ khajjamānaṃ niraye vasantaṃ, luddehi vāḷehi aghammigeḥi ca;  
Sañchinnagattaṃ ruhiraṃ savantaṃ, ko codaye paraloke sahassa’’nti.

Tattha **luddehīti** dāruṇehi. **Vāḷehīti** duṭṭhehi. **Aghammigeḥīti** aghāvahehi migeḥi, dukkhāvahehi sunakhehīti attho.

**1309:**“Usūhi sattīhi ca sunisitāhi, hananti vijjhanti ca paccamittā;  
Kāḷūpakālā nirayamhi ghore, pubbe naraṃ dukkaṭakammakāri’’nti.

Tattha **hananti vijjhanti cāti** jalitāya ayapathaviyaṃ pātetvā sakalasarīraṃ chiddāvachiddaṃ karontā paharanti ceva vijjhanti ca. **Kāḷūpakālāti** evaṃnāmakā nirayapālā. **Nirayambhīti** tasmiṃ tesaññeva vasena kāḷūpakālasankhāte niraye. **Dukkaṭakammakārīti** micchādīṭṭhivasena dukkaṭānaṃ kammānaṃ kārakaṃ.

**1310:**“Taṃ haññamānaṃ niraye vajantaṃ, kucchismiṃ passasmiṃ vipphālitūdaraṃ;  
Sañchinnagattaṃ ruhiraṃ savantaṃ, ko codaye paraloke sahassa’’nti.

Tattha **tanti** taṃ bhavantaṃ tattha niraye tathā haññamānaṃ. **Vajantanti** ito cito ca dhāvantaṃ. **Kucchismīti** kucchiyañca passe ca haññamānaṃ vijjhiyamānanti attho.

**1311:**“Sattī usū tomarabhiṇḍivālā, vividhāvudhā vassanti tattha devā;  
Patanti aṅgāramivaccimanto, silāsanī vassati luddakammeti.

Tattha **aṅgāramivaccimantoti** jalitaaṅgārā viya accimantā āvudhavisēsā patanti. **Silāsanīti** jalitasilāsani. **Vassati luddakammeti** yathā nāma deve vassante asani patati, evameva ākāse samuṭṭhāya ciccīṭṭayamānaṃ jalitasilāvassaṃ tesāṃ luddakammānaṃ upari patati.

**1312:**“Uṇho ca vāto nirayamhi dussaho, na tamhi sukhaṃ labbhati ittarampi;  
Taṃ taṃ vidhāvantaṃ malenamāturaṃ, ko codaye paraloke sahassa’’nti.

Tattha **ittarampīti** parittakampi. **Vidhāvantanti** vividhā dhāvantaṃ.

**1313:**“Sandhāvamānampi rathesu yuttaṃ, sajotibhūtaṃ pathaviṃ kamantaṃ;  
Patodalatṭhīhi sucodayantaṃ, ko codaye paraloke sahassa’’nti.

Tattha **rathesu yuttanti** vārena vāraṃ tesu jalitaloharathesu yuttaṃ. **Kamantanti** akkamamānaṃ. **Sucodayantanti** suṭṭhu codayantaṃ.

**1314:**“Tamāruhantaṃ khurasañcītaṃ giriṃ, vibhiṃsanaṃ pajjalitaṃ bhayānakaṃ;  
Sañchinnagattaṃ ruhiraṃ savantaṃ, ko codaye paraloke sahassa’’nti.

Tattha **tamāruhantanti** taṃ bhavantaṃ jalitāvudhapahāre asahitvā jalitakhurehi sañcītaṃ jalitalohapabbataṃ āruhantaṃ.

**1315:**“Tamāruhantaṃ pabbatasannikāsaṃ, aṅgārarāsīṃ jalitaṃ bhayānakaṃ;  
Sudaḍḍhagattaṃ kapaṇaṃ rudantaṃ, ko codaye paraloke sahassa’’nti.

Tattha **sudaḍḍhagattanti** suṭṭhu daḍḍhasarīraṃ.

**1316:** ‘Abbhakūṭasamā uccā, kaṇṭakanicitā dumā;  
Ayomayehi tikkhehi, naralohitapāyibhī’ ti.

Tattha **kaṇṭakanicitāti** jalitakaṇṭakehi citā. ‘**Ayomayehī**’ ti idaṃ yehi kaṇṭakehi ācitā, te dassetuṃ vuttaṃ.

**1317:** ‘Tamāruhanti nāriyo, narā ca paradāragū;  
Coditā sattihatthehi, yamaniddesakāribhī’ ti.

Tattha **tamāruhanṭīti** taṃ evarūpaṃ simbalirukkhaṃ āruhanti. **Yamaniddesakāribhīti** yamassa vacanakarehi, nirayapālehīti attho.

**1318:** ‘Tamāruhantaṃ nirayaṃ, simbaḷiṃ ruhiramakkhitaṃ;  
Vidaḍḍhakāyaṃ vitacaṃ, āturaṃ gāḷhavedanaṃ.

**1319:** ‘Passasantaṃ muhuṃ uṇhaṃ, pubbakammāparādhikaṃ;  
Dumagge vitacaṃ gattaṃ, ko taṃ yāceyya taṃ dhana’ nti.

Tattha **vidaḍḍhakāyanti** vihiṃsitakāyaṃ. **Vitacanti** cammamaṃsānaṃ chiddāvachiddaṃ chinnaṭāya koviḷārapupphaṃ viya kiṃsukapupphaṃ viya ca.

**1320:** ‘Abbhakūṭasamā uccā, asipattācitā dumā;  
Ayomayehi tikkhehi, naralohitapāyibhī’ ti.

Tattha **asipattācitāti** asimayehi pattehi citā.

**1321:** ‘Tamāruhantaṃ asipattapādapaṃ, asīhi tikkhehi ca chijjamānaṃ;  
Sañchinnagattaṃ ruhiraṃ savantaṃ, ko codaye paraloke sahassa’ nti.

Tattha **tamāruhantanti** taṃ bhavantaṃ nirayapālānaṃ āvudhapahāre asahitvā āruhantaṃ.

**1322:** ‘Tato nikkhantaṃ taṃ, asipattācitā dumā;  
Sampatitaṃ vetaraṇiṃ, ko taṃ yāceyya taṃ dhana’ nti.

Tattha **sampatitanti** patitaṃ.

**1323:** ‘Kharā khārodikā tattā, duggā vetaraṇī nadī;  
Ayopokkharasañchannā, tikkhā pattehi sandati’.

Tattha **kharāti** pharusā. **Ayopokkharasañchannāti** ayomayehi tikhiṇapariyantehi pokkharapattehi sañchannā. **Pattehīti** tehi pattehi sā nadī tikkhā hutvā sandati.

**1324:** ‘Tattha sañchinnagattaṃ taṃ, vuyhantaṃ ruhiramakkhitaṃ;  
Vetaraṇiṃ anālambe, ko taṃ yāceyya taṃ dhana’ nti.

Tattha **vetaraṇiṇeti** vetaraṇiṇudake.

Imaṃ pana mahāsattassa nirayakathaṃ sutvā rājā saṃviggahadayo mahāsattaññeva tāṇagavesī hutvā āha –

1325: ‘Vedhāmi rukkho viya chijjamāno, disaṃ na jānāmi pamūḷhasañño;  
Bhayānutappāmi mahā ca me bhayā, sutvāna kathā tava bhāsītā ise.

1326: ‘Āditte vārimajjhaṃva, dīpaṃvoghe mahaṇṇave;  
Andhakāreva pajjoto, tvaṃ nosi saraṇaṃ ise.

1327: ‘Atthañca dhammaṃ anusāsa maṃ ise, atītamaddhā aparādhitaṃ mayā;  
Ācikkha me nārada suddhimaggaṃ, yathā ahaṃ no nirayaṃ pateyya’nti.

Tattha **bhayānutappāmī**ti attanā katassa pāpassa bhayena anutappāmi. **Mahā ca me bhayā**ti mahantañca me nirayabhayaṃ uppannaṃ. **Dīpaṃvogheti** dīpaṃva oghe. Idaṃ vuttaṃ hoti – āditte kāle vārimajjhaṃ viya bhinnanāvānaṃ oghe aṇṇave patiṭṭhaṃ alabhamānānaṃ dīpaṃ viya andhakāragatānaṃ pajjoto viya ca tvaṃ no ise saraṇaṃ bhava. **Atītamaddhā aparādhitaṃ mayā**ti ekaṃsena mayā atītaṃ kammaṃ aparādhitaṃ virādhitaṃ, kusalaṃ atikkamitvā akusalameva katanti.

Athassa mahāsatto visuddhimaggaṃ ācikkhituṃ sammāpaṭipanne porāṇakarājāno udāharaṇavasena dassento āha –

1328: ‘Yathā ahū dhataratṭho, vessāmitto aṭṭhako yāmataggi;  
Usindaro cāpi sivī ca rājā, paricārakā samaṇabrāhmaṇānaṃ.

1329: ‘Ete caññe ca rājāno, ye saggavisayaṃ gatā;  
Adhammaṃ parivajjetvā, dhammaṃ cara mahīpati.

1330: ‘Annahatthā ca te byamhe, ghosayantu pure tava;  
‘Ko chāto ko ca tasito, ko mālaṃ ko vilepanaṃ;  
Nānārattānaṃ vatthānaṃ, ko naggo paridahissati.

1331: ‘Ko panthe chattamāneti, pādukā ca mudū subhā’;  
Iti sāyañca pāto ca, ghosayantu pure tava.

1332: ‘Jiṇṇaṃ posaṃ gavāssañca, māssu yuñja yathā pure;  
Parihārañca dajjāsi, adhikārakato balī’ti.

Tattha **ete cāti** yathā ete ca dhataratṭho vessāmitto aṭṭhako yāmataggi usindaro sivīti cha rājāno aññe ca dhammaṃ caritvā saggavisayaṃ gatā, evaṃ tvampi adhammaṃ parivajjetvā dhammaṃ cara. **Ko chātoti** mahārāja, tava byamhe pure rājanivesane ceva nagare ca annahatthā purisā “ko chāto, ko tasito”ti tesam dātukāmatāya ghosentu. **Ko mālanti** ko mālaṃ icchati, ko vilepanaṃ icchati, nānārattānaṃ vatthānaṃ yaṃ yaṃ icchati, taṃ taṃ ko naggo paridahissatīti ghosentu. **Ko panthe chattamānetī**ti ko panthe chatthaṃ dhārayissati. **Pādukā cāti** upāhanā ca mudū subhā ko icchati.

**Jiṇṇaṃ posanti** yo te upaṭṭhākesu amacco vā añño vā pubbe katūpakāro jarājiṇṇakāle yathā porāṇakāle kammaṃ kātuṃ na sakkoti, yepi te gavāssādayo jiṇṇatāya kammaṃ kātuṃ na sakkonti, tesu ekampi pubbe viya kammesu mā yojayi. Jiṇṇakālasmiñhi te tāni kammāni kātuṃ na sakkonti.

**Parihārañcāti** idha parivāro “parihāro”ti vutto. Idaṃ vuttaṃ hoti – yo ca te balī hutvā adhikārakato pubbe katūpakāro hoti, tassa jarājiṇṇakāle yathāporāṇaparivāraṃ dadeyyāsi. Asappurisā hi attano upakāraṇaṃ upakāraṃ kātuṃ samatthakāleyeva sammānaṃ karonti, samatthakāle pana na oloketi. Sappurisā pana asamatthakālepi tesam tatheva sakkāraṃ karonti, tasmā tuvampi evaṃ kareyyāsīti.

Iti mahāsatto rañño dānakathañca sīlakathañca kathetvā idāni yasmā ayaṃ rājā attano attabhāve rathena upametvā vaṇṇiyamāne tussissati, tasmāssa sabbakāmaduharathopamāya dhammaṃ desento āha

- 
- 1333: ‘Kāyo te rathasaññāto, manosārathiko lahu;  
Avihimsāsāritakkho, saṃvibhāgapāṭicchado.
- 1334: ‘Pādasaññamanemiyo, hatthasaññamapakkharo;  
Kucchisaññamanabbhanto, vācāsaññamakūjano.
- 1335: ‘Saccavākyasamattaṅgo, apesuññasusaññato;  
Girāsakhilanelaṅgo, mitabhāṇisilesito.
- 1336: ‘Saddhālobhasusañkhāro, nivātañjalikubbaro;  
Athaddhatānatīsāko, sīlasaṃvaranandhano.
- 1337: ‘Akkodhanamanugghātī, dhammapaṇḍarachattako;  
Bāhusaccamapālambo, ṭhitacittamupādhiyo.
- 1338: ‘Kālaññūtācittasāro, vesārajjatidaṇḍako;  
Nivātavuttiyottako, anatināyugo lahu.
- 1339: ‘Alīnacittasanthāro, vuddhisevī rajohato;  
Satipatodo dhīrassa, dhīti yogo ca rasmiyo.
- 1340: ‘Mano dantaṃ pathaṃ neti, samadantehi vāhibhi;  
Icchā lobho ca kummaggo, ujumaggo ca saṃyamo.
- 1341: ‘Rūpe sadde rase gandhe, vāhanassa padhāvato;  
Paññā ākoṭanī rāja, tattha attāva sārathi.
- 1342: ‘Sace etena yānena, samacariyā dalhā dhiti;  
Sabbakāmaduho rāja, na jātu nīrayaṃ vaje”ti.

Tattha **rathasaññā**toti mahārāja, tava kāyo rathoti saññāto hotu. **Manosārathiko**ti manasañkhātena kusalacittena sārathinā samannāgato. **Lahūti** vigatathinamidhatāya sallahuko. **Avihimsāsāritakkhoti** avihimsāmayena sārithena suṭṭhu pariniṭṭhitena akkhena samannāgato. **Saṃvibhāgapāṭicchadoti** dānasamvibhāgamayena paṭicchadena samannāgato. **Pādasaññamanemiyo**ti pādasamamamāyā nemiya samannāgato. **Hatthasaññamapakkharo**ti hatthasamamamayena pakkharena samannāgato. **Kucchisaññamanabbhantoti** kucchisamamasāñkhātena mitabhojanamayena tēna abbhanto. “Abbhañjitabbo nābhi hotū”tipi pāṭho. **Vācāsaññamakūjanoti** vācāsamamamena akūjano.

**Saccavākyasamattaṅgoti** saccavākyena paripuṇṇaṅgo akhaṇḍarathaṅgo. **Apesuññasusaññatoti** apesuññaena suṭṭhu saññato samussito. **Girāsakhilanelaṅgoti** sakhilāya saṇhāvācāya niddosaṅgo maṭṭharathaṅgo. **Mitabhāṇisilesito** mitabhāṇasañkhātena silesena suṭṭhu sambandho. **Saddhālobhasusañkhāro**ti kammaphalasaddahanasaddhāmayena ca alobhamayena ca sundarena alaṅkārena samannāgato. **Nivātañjalikubbaroti** sīlavantānaṃ nivātamayena ceva añjalikammamayena ca kubbarena samannāgato. **Athaddhatānatīsākot**ti sakhilasammodabhāvasañkhātāya athaddhatāya anataiso, thokanataisoti attho. **Sīlasaṃvaranandhanoti** akhaṇḍapañcasīlacakkhundriyādisaṃvarasañkhātāya nandhanarajjuyā samannāgato.

**Akkodhanamanugghātī**ti akkodhanabhāvasañkhātena anugghātena samannāgato. **Dhammapaṇḍara-chattakoti** dasakusaladhammasañkhātena paṇḍaracchattena samannāgato.



**Bāhusaccamapālamboti** atthasannissitabahussutabhāvamayena apālambena samannāgato.

**Ṭhitacittamupādhiyoti** lokadhammehi avikampanabhāvena suṭṭhu

ṭhitaekaggabhāvappattacittasaṅkhātena upādhiṇā uttarattharaṇena vā rājāsanena samannāgato.

**Kālaññūtācittasāroti** “ayaṃ dānassa dinnakālo, ayaṃ sīlassa rakkhanakālo”ti evaṃ

kālaññūtāsaṅkhātena kālaṃ jānitvā katena cittena kusalasārena samannāgato. Idaṃ vuttaṃ hoti – yathā,

mahārāja, rathassa nāma āṇiṃ ādiṃ katvā dabbasambhārajātaṃ parisuddhaṃ sāramayaṅca icchitabbaṃ,

evaṅhi so ratho addhānakkhamo hoti, evaṃ tavapi kāyaratho kālaṃ jānitvā katena cittena parisuddhena

dānādikusalasārena samannāgato hotūti. **Vesārajjatidaṇḍakoti** parisamajjhe kathentassapi

visāradabhāvasaṅkhātena tidaṇḍena samannāgato. **Nivātavuttiyottakoti** ovāde pavattanasāṅkhātena

mudunā dhurayottena samannāgato. Mudunā hi dhurayottena baddharathaṃ sindhavā sukhaṃ vahanti,

evaṃ tava kāyarathopi paṇḍitānaṃ ovādappavattitāya ābaddho sukhaṃ yātūti attho. **Anatimānayugo**

**lahūti** anati mānasaṅkhātena lahukena yugena samannāgato.

**Alīnacittasanthāroti** yathā ratho nāma dantamayena ulārena santhārena sobhati, evaṃ tava

kāyarathopi dānādinā alīnaasaṅkuṭitacittasanthāro hotu. **Vuddhisevī rajohatoti** yathā ratho nāma

visamena rajuttānamaggena gacchanto rajokiṅṇo na sobhati, samena virajena maggena gacchanto

sobhati, evaṃ tava kāyarathopi paññāvuddhisevitāya samatalaṃ ujumaggaṃ paṭipajjitvā hatarajo hotu.

**Satipatodo dhīrassāti** paṇḍitassa tava tasmīṃ kāyathe supatīṭṭhitasatipatodo hotu. **Dhiti yogo ca**

**rasmīyoti** abbochinnavīriyasaṅkhātā dhiti ca hitappaṭipattiyāṃ yuñjanabhāvasaṅkhāto yogo ca tava

tasmīṃ kāyathe vaṭṭitā thirā rasmiyo hontu. **Mano dantaṃ pathaṃ neti, samadantehi vāhibhīti**

yathā ratho nāma visamadantehi sindhavehi uppathaṃ yāti, samadantehi samasikkhitehi yutto

ujupathameva anveti, evaṃ manopi dantaṃ nibbisevanaṃ kummaggaṃ pahāya ujumaggaṃ gaṇhāti.

Tasmā sudantaṃ ācārasampannaṃ cittaṃ tava kāyarathassa sindhavakiccaṃ sādhetu. **Ichālobho cāti**

appattesu vatthūsu icchā, pattesu lobhoti ayaṃ icchā ca lobho ca kummaggo nāma. Kuṭilo anujumaggo

apāyameva neti. Dasakusalakammampathavasena pana aṭṭhaṅgikamaggavasena vā pavatto sīlasaṃyamo

ujumaggo nāma. So tava kāyarathassa maggo hotu.

**Rūpeti** etesu manāpiyesu rūpādīsū kāmaguṇesu nimittaṃ gahetvā dhāvantaṃ tava kāyarathassa

uppathaṃ paṭipannassa rājarathassa sindhave ākoṭetvā nivāraṇapatodayaṭṭhi viya paññā ākoṭaṇī hotu. Sā

hi taṃ uppathagamanato nivāretvā ujum sucaritamaggaṃ āropessati. **Tattha attāva sārathīti** tasmīṃ

pana te kāyathe añño sārathi nāma natthi, tava attāva sārathi hotu. **Sace etena yānenāti** mahārāja,

yassetāṃ evarūpaṃ yānaṃ sace atthi, etena yānena. **Samacariyā dalhā dhīti** yassa samacariyā ca dhiti

ca dalhā hoti thirā, so etena yānena yasmā esa ratho sabbakāmaduho rāja, yathādhīpete sabbakāme deti,

tasmā na jātu nirayaṃ vaje, ekaṃsenetaṃ dhārehi, evarūpena yānena nirayaṃ na gacchasīti attho. Iti

kho, mahārāja, yaṃ maṃ avaca “ācikkha me, nārada, suddhimaggaṃ, yathā ahaṃ no niraye

pateyya”nti, ayaṃ te so mayā anekapariyāyena akkhātoti.

Evamassa dhammaṃ desetvā micchādīṭṭhiṃ jahāpetvā sīle paṭīṭṭhāpetvā “ito paṭṭhāya pāpamitte

pahāya kalyāṇamitte upasaṅkama, niccaṃ appamatto hohī”ti ovādaṃ datvā rājadhītu guṇaṃ vaṇṇetvā

rājaparisāya ca rājorodhānaṅca ovādaṃ datvā mahantenānubhāvena tesāṃ passantānaññeva

brahmalokaṃ gato.

Satthā imaṃ dhammadeśanaṃ āharitvā “na, bhikkhave, idāneva, pubbepi mayā dīṭṭhijālaṃ

bhinditvā uruvelakassapo damitoyevā”ti vatvā jātaṃ samodhānento imā gāthā abhāsi –

**1343:**“Alāto devadattosi, sunāmo āsi bhaddaji;

Vijayo sārīputtosi, moggallānosi bījako.

**1344:**“Sunakkhatto licchaviputto, guṇo āsi acelako;

Ānando sā rucā āsi, yā rājānaṃ pasādayi.

1345: ‘Uruvelakassapo rājā, pāpadit̥thi tadā ahu;  
Mahābrahmā bodhisatto, evaṃ dhāretha jātaka’nti.

Mahānāradakassapajātakavaṇṇanā aṭṭhamā.

[546] 9. Vidhurajātakavaṇṇanā

Catuposathakaṇḍam

**Paṇḍu kisiyāsi dubbalāti** idaṃ satthā jetavane viharanto attano paññāpāramiṃ ārabha katesi. Ekadivasañhi bhikkhū dhammasabhāyaṃ kathaṃ samuṭṭhāpesuṃ “āvuso, satthā mahāpañño puthupañño gambhīrapañño javanapañño hāsapañño tikkhapañño nibbedhikapañño parappavādamaddano, attano paññānubhāvena khattiyapaṇḍitādīhi abhisankhate sukhumapañhe bhinditvā te dametvā nibbisevane katvā tīsu saraṇesu ceva sīlesu ca patit̥thāpetvā amatagāmimaggam paṭipādesī’ti. Satthā āgantvā “kāya nuttha, bhikkhave, etarahi kathāya sannisinnā’”ti pucchitvā “imāya nāmā’”ti vutte “anacchariyaṃ, bhikkhave, yaṃ tathāgato paramābhīsambodhippatto parappavādam bhinditvā khattiyādayo dameyya. Purimabhavasmīñhi bodhiññāṇaṃ pariyesantopi tathāgato paññavā parappavādamaddanoyeva. Tathā hi ahaṃ vidhurakāle sat̥thiyojanubbedhe kāḷapabbatamuddhani puṇṇakaṃ nāma yakkhasenāpatiṃ attano ñāṇabaleneva dametvā nibbisevanaṃ katvā pañcasīlesu patit̥thāpento attano jīvitaṃ dāpesi’”nti vatvā tehi yācito atītaṃ āhari.

Atīte kururaṭṭhe indapatthanagare dhanañcayakorabyo nāma rājā rajjaṃ kāresi. Vidhuraṇḍito nāma amacco tassa atthadhammānusāsako ahoṣi. So madhurakatho mahādharmakathiko sakalajambudīpe rājāno hatthikantavīṇāsarena paluddhahatthino viya attano madhuradhammadesanāya palobhetvā tesam sakasakarajjāni gantuṃ adadamāno buddhalīlāya mahājanassa dhammaṃ desento mahantena yasena tasmim nagare paṭivasi.

Tadā hi bārānasiyampi gihisahāyakā cattāro brāhmaṇamahāsālā mahallakakāle kāmesu ādīnavaṃ divvā himavantaṃ pavisitvā isipabbajjaṃ pabbajitvā abhiññā ca samāpattiyo ca nibbattetvā vanamūlaphalāhārā tattheva ciraṃ vasitvā loṇambilasevanatthāya cārikaṃ caramānā aṅgaraṭṭhe kālacampānagaraṃ patvā rājuyyāne vasitvā punadivase bhikkhāya nagaraṃ pavisiṃsu. Tattha cattāro saḥāyakā kuṭumbikā tesam iriyāpathesu pasīditvā vanditvā bhikkhābhājanam gahetvā ekekaṃ attano nivesane nisīdāpetvā pañitena āhārena parivisitvā paṭiññam gāhāpetvā uyyāneyeva vāsāpesuṃ. Te cattāro tāpasā catunnaṃ kuṭumbikānaṃ gehesu nibaddham bhuñjitvā divāvihāratthāya eko tāpaso tāvatimsabhavanaṃ gacchati, eko nāgabavanaṃ, eko supaṇṇabhavanaṃ, eko korabyarañño migājīnauyyānaṃ gacchati. Tesu yo devalokaṃ gantvā divāvihāraṃ karoti, so sakkassa yasaṃ oloketvā attano upaṭṭhākassa tameva vaṇṇeti. Yo nāgabavanaṃ gantvā divāvihāraṃ karoti, so nāgarājassa sampattiṃ oloketvā attano upaṭṭhākassa tameva vaṇṇeti. Yo supaṇṇabhavanaṃ gantvā divāvihāraṃ karoti, so supaṇṇarājassa vibhūtiṃ oloketvā attano upaṭṭhākassa tameva vaṇṇeti. Yo dhanañcayakorabyarājassa uyyānaṃ gantvā divāvihāraṃ karoti, so dhanañcayakorabyarañño sirisobhagaṃ oloketvā attano upaṭṭhākassa tameva vaṇṇeti.

Te cattāropi janā taṃ tadeva ṭhānaṃ patthetvā dānādīni puññāni katvā āyupariyosāne eko sakko hutvā nibbatti, eko saputtadāro nāgabhavane nāgarājā hutvā nibbatti, eko supaṇṇabhavane simbalivimāne supaṇṇarājā hutvā nibbatti. Eko dhanañcayakorabyarañño aggamahesiyā kucchimhi nibbatti. Tepi tāpasā aparihīnājjhānā kālam katvā brahmaloke nibbattiṃsu. Korabyakumāro vuḍḍhimanvāya pitu accayena rajje patit̥thahitvā dhammena samena rajjaṃ kāresi. So pana jūtavittako ahoṣi. So vidhuraṇḍitassa ovāde ṭhatvā dānaṃ deti, sīlam rakkhati, uposathaṃ upavasati.

So ekadivasaṃ samādinuposatho “vivekamanubrūhissāmī’”ti uyyānaṃ gantvā manuññat̥thāne nisīditvā samaṇadhammaṃ akāsi. Sakkopi samādinuposatho “devaloke palibodho hoti’”ti manussaloke tameva uyyānaṃ āgantvā ekasmiṃ manuññat̥thāne nisīditvā samaṇadhammaṃ akāsi. Varuṇānāgarājāpi

samādinuuposatho “nāgabhavane palibodho hotī”ti tathevāgantvā ekasmiṃ manuññāṭṭhāne nisīditvā samaṇadhammaṃ akāsi. Supaṇṇarājāpi samādinuuposatho “supaṇṇabhavane palibodho hotī”ti tathevāgantvā ekasmiṃ manuññāṭṭhāne nisīditvā samaṇadhammaṃ akāsi. Tepi cattāro janā sāyanhasamaye sakaṭṭhānehi nikkhamitvā maṅgalapokkharāṇitīre samāgantvā aññamaññaṃ oloketvā pubbasinehavasena samaggā sammodamānā hutvā aññamaññaṃ mettacittaṃ upaṭṭhapetvā madhurapaṭisanthāraṃ karimṃsu. Tesu sakko maṅgalasilāpaṭṭe nisīdi, itarepi attano attano yuttāsanam ṇatvā nisīdimṃsu. Atha ne sakko āha “mayam cattāropi rājānova, amhesu pana kassa sīlam mahanta”nti? Atha nam varuṇanāgarājā āha “tumhākaṃ tiṇṇam janānam sīlato mayham sīlam mahanta”nti. “Kimettha kāraṇa”nti? “Ayaṃ supaṇṇarājā amhākaṃ jātānampi ajātānampi paccāmittova, aham evarūpaṃ amhākaṃ jīvitakkhayakaraṃ paccāmittaṃ disvāpi kodham na karomi, iminā kāraṇena mama sīlam mahanta”nti vatvā idaṃ dasakanipāte catuuposathajātake paṭhamam gāthamāha –

“Yo kopaneyye na karoti kopaṃ, na kujjhati sappuriso kadāci;  
Kuddhopi so nāvīkaroti kopaṃ, taṃ ve naraṃ samaṇamāhu loke”ti. (jā. 1.10.24);

Tattha **yoti** khattiyādīsu yo koci. **Kopaneyyeti** kujjhittabbayuttake puggale khantīvādītāpaso viya kopaṃ na karoti. **Kadācīti** yo kismiñci kāle na kujjhateva. **Kuddhopīti** sace pana so sappuriso kujjhati, atha kuddhopi taṃ kopaṃ nāvīkaroti cūḷabodhitāpaso viya. **Taṃ ve naranti** mahārājāno taṃ ve purisaṃ samitapāpatāya loke paṇḍitā “samaṇa”nti kathenti. Ime pana guṇā mayi santi, tasmā mameva sīlam mahantanti.

Taṃ sutvā supaṇṇarājā “ayaṃ nāgo mama aggabhakkho, yasmā panāham evarūpaṃ aggabhakkham disvāpi khudaṃ adhvāsetvā āhārahetu pāpaṃ na karomi, tasmā mameva sīlam mahanta”nti vatvā imaṃ gāthamāha –

“Īnūdarō yo sahate jighaccham, danto tapassī mitapānabhojano;  
Āhārahetu na karoti pāpaṃ, taṃ ve naraṃ samaṇamāhu loke”ti. (jā. 1.10.25);

Tattha **dantoti** indriyadamanena samannāgato. **Tapassīti** tapanissitako. **Āhārahetūti** atijighacchapiḷitopi yo pāpaṃ lāmakakammaṃ na karoti dhammasenāpatisāriputtatthero viya. Aham panajja āhārahetu pāpaṃ na karomi, tasmā mameva sīlam mahantanti.

Tato sakko devarājā “aham nānappakāraṃ sukhapadaṭṭhānam devalokasampattiṃ pahāya sīlarakkhaṇatthāya manussalokaṃ āgato, tasmā mameva sīlam mahanta”nti vatvā imaṃ gāthamāha –

“Khiḍḍam ratim vippajahitvāna sabbam, na cālikam bhāsati kiñci loke;  
Vibhūsaṭṭhānā virato methunasmā, taṃ ve naraṃ samaṇamāhu loke”ti. (jā. 1.10.26);

Tattha **khiḍḍanti** kāyikavācasikakhiḍḍam. **Ratinti** dibbakāmaguṇaratim. **Kiñcīti** appamattakampi. **Vibhūsaṭṭhānāti** maṃsavibhūsā chavivibhūsāti dve vibhūsā. Tattha ajjhoharaṇīyāhāro maṃsavibhūsā nāma, māḷāgandhādīni chavivibhūsā nāma, yena akusalacittena dhārīyati, taṃ tassa ṭhānam, tato virato methunasevanato ca yo paṭivirato. **Taṃ ve naraṃ samaṇamāhu loketi** aham ajja devaccharāyo pahāya idhāgantvā samaṇadhammaṃ karomi, tasmā mameva sīlam mahantanti. Evaṃ sakkopi attano sīlameva vaṇṇeti.

Taṃ sutvā dhanañcayarājā “aham ajja mahantaṃ pariggaham soḷasasahassanāṭakittipariṇaṇṇam antepuraṃ cajitvā uyyāne samaṇadhammaṃ karomi, tasmā mameva sīlam mahanta”nti vatvā imaṃ gāthamāha –

“Pariggaham lobhadhammañca sabbam, yo ve pariññāya pariccajeti;  
Dantaṃ ṭhitattaṃ amamaṃ nirāsam, taṃ ve naraṃ samaṇamāhu loke”ti. (jā. 1.10.27);

Tattha **pariggahanti** nānappakāraṃ vatthukāmaṃ. **Lobhadhammanti** tasmim̐ uppajjanatanāhaṃ. **Pariññāyāti** ñātapariññā, tīraṇapariññā, pahānapariññāti imāhi tīhi pariññāhi pariḷānitvā. Tattha khandhādīnaṃ dukkhādisabhāvajānaṃ ñātapariññā, tesu aḡuṇaṃ upadhāretvā tīraṇaṃ tīraṇapariññā, tesu dosaṃ disvā chandarāgassāpakaḍḍhanaṃ pahānapariññā. Yo imāhi tīhi pariññāhi jānitvā vatthukāmakilesakāme pariccajati, chaḍḍetvā gacchati. **Dantanti** nibbisevanaṃ. **Ṭhitattanti** micchāvitakkābhāvena ṭhitasabhāvaṃ. **Amamanti** ahanti mamāyanatanāhārahitaṃ. **Nirāsanti** puttadārādīsu nicchandarāgaṃ. **Taṃ ve naranti** taṃ evarūpaṃ puggalaṃ “samaṇa”nti vadanti.

Iti te sabbepi attano attano sīlameva mahantanti vaṇṇetvā sakkādayo dhanañcayaṃ pucchimsu “atthi pana, mahārāja, koci tumhākaṃ santike paṇḍito, yo no imaṃ kaṅkhaṃ vinodeyyā”ti. “Āma, mahārājāno mama atthadhammānusāsako mahāpañño asamadhuro vidhurapaṇḍito nāma atthi, so no imaṃ kaṅkhaṃ vinodessati, tassa santikaṃ gacchāmā”ti. Atha te sabbe “sādhū”ti sampāṭicchimsu. Atha sabbepi uyyānā nikkhamitvā dhammasabhaṃ gantvā pallaṅkaṃ alaṅkārapetvā bodhisattaṃ pallaṅkavaramajjhe nisīdāpetvā paṭisanthāraṃ katvā ekamantaṃ nisinnā “paṇḍita, amhākaṃ kaṅkhā uppannā, taṃ no vinodehī”ti vatvā imaṃ gāthamāhaṃsu –

“Pucchāma kattāraṇaṃ mapaññaṃ, kathāsu no viggaho atthi jāto;  
Chindajja kaṅkhaṃ vicikicchitāni, tadajja kaṅkhaṃ vitaremu sabbe”ti. (jā. 1.10.28);

Tattha **kattāranti** kattabbayuttakākāraṃ. **Viggaho atthi jātoti** eko sīlaviggaho sīlavivādo uppanno atthi. **Chindajjāti** amhākaṃ taṃ kaṅkhaṃ tāni ca vicikicchitāni vajirena sineruṃ paharanto viya ajja chinda. **Vitaremūti** vitareyyāma.

Paṇḍito tesam̐ kathaṃ sutvā “mahārājāno tumhākaṃ sīlaṃ nissāya uppannaṃ vivādakathaṃ sukathitadukkathitaṃ jānissāmī”ti vatvā imaṃ gāthamāha –

“Ye paṇḍitā atthadasā bhavanti, bhāsanti te yoniso tattha kāle;  
Kathaṃ nu kathānaṃ abhāsītānaṃ, atthaṃ nayeyyūṃ kusalā janindā”ti. (jā. 1.10.29);

Tattha **atthadasāti** atthadassanasamatthā. **Tattha kāleti** tasmim̐ viggāhe ārocite yuttappayuttakāle te paṇḍitā tamatthaṃ ācikkhantā yoniso bhāsanti. **Atthaṃ nayeyyūṃ kusalāti** kusalā chekāpi samānā abhāsītānaṃ kathānaṃ kathaṃ nu atthaṃ ñāṇena nayeyyūṃ upaparikkheyūṃ. **Janindāti** rājāno ālapati. Tasmā idaṃ tāva me vadetha.

“Kathaṃ have bhāsati nāgarājā, garuḷo pana venateyyo kimāha;  
Gandhabbarājā pana kim vadeti, kathaṃ pana kurūnaṃ rājasetṭho”ti. (jā. 1.10.30);

Tattha **gandhabbarājāti** sakkāṃ sandhāyāha.

Athassa te imaṃ gāthamāhaṃsu –

“Khantiṃ have bhāsati nāgarājā, appāhāraṃ garuḷo venateyyo;  
Gandhabbarājā rativippahānaṃ, akiñcanaṃ kurūnaṃ rājasetṭho”ti. (jā. 1.10.31);

Tassattho – paṇḍita, nāgarājā tāva kopaneyyepi puggale akuppanasaṅkhātāṃ adhivāsanakhantiṃ vaṇṇeti, garuḷo appāhāratāsaṅkhātāṃ āhārahetu pāpassa akaraṇaṃ, sakko pañcakāmaguṇaratīnaṃ vippahānaṃ, kururājā nippalibodhabhāvaṃ vaṇṇetīti.

Atha tesam̐ kathaṃ sutvā mahāsatto imaṃ gāthamāha –

“Sabbāni etāni subhāsītāni, na hettha dubbhāsitamatthi kiñci;  
Yasmiñca etāni patit̥hitāni, arāva nābhyā susamohitāni;  
Catubbi dhammehi samaṅgibhūtaṃ, taṃ ve naraṃ samaṇamaṃhu loke”ti. (jā. 1.10.32);

Tattha **etānī**ti etāni cattāripi guṇajātāni yasmim̐ puggale sakaṭaṇābhiyaṃ suṭṭhu samohitāni arā viya patit̥hitāni, catūhipetehi dhammehi samannāgataṃ puggalaṃ paṇḍitā “samaṇa”nti āhu loketi.

Evaṃ mahāsatto catunnampi sīlaṃ ekasamameva akāsi. Taṃ sutvā cattāropi rājāno tassa tuṭṭhā thutiṃ karontā imaṃ gāthamāḥṃsu –

“Tuvañhi seṭṭho tvamanuttarosi, tvam̐ dhammagū dhammavidū sumedho;  
Paññāya pañhaṃ samadhiggahetvā, acchecchi dhīro vicikicchitāni;  
Acchecchi kaṅkhaṃ vicikicchitāni, cundo yathā nāgadantaṃ kharenā”ti. (jā. 1.10.33).

Tattha **tvamanuttarosī**ti tvam̐ anuttaro asi, natthi tayā uttaritaro nāma. **Dhammagū**ti dhammassa gopako ceva dhammaññū ca. **Dhammavidū**ti pākaṭadhammo. **Sumedhoti** sundarapañño **paññāyā**ti attano paññāya amhākaṃ pañhaṃ suṭṭhu adhigaṇhitvā “idamettha kāraṇa”nti yathābhūtaṃ ñatvā. **Acchecchī**ti tvam̐ dhīro amhākaṃ vicikicchitāni chindi, evaṃ chindanto ca “chindajja kaṅkhaṃ vicikicchitāni”ti idaṃ amhākaṃ āyācanaṃ sampādentō acchecchi kaṅkhaṃ vicikicchitāni. **Cundo yathā nāgadantaṃ kharenā**ti yathā dantakāro kakacena hatthidantaṃ chindeyya, evaṃ chindīti attho.

Evaṃ te cattāropi rājāno tassa pañhabyākaraṇena tuṭṭhamānasā ahesuṃ. Atha naṃ sakko dibbadukūlena pūjesi, garuḷo suvaṇṇamālāya, varuṇo nāgarājā maṇinā, dhanañcayarājā gavassasahassādīhi pūjesi. Tenevāha –

“Nīluppalābhaṃ vimalaṃ anagghaṃ, vatthaṃ idaṃ dhūmasamānavañṇaṃ;  
Pañhassa veyyākaraṇena tuṭṭho, dadāmi te dhammapūjāya dhīra.

“Suvaṇṇamālaṃ satapattaphullitaṃ, sakesaraṃ ratnasahassamaṇḍitaṃ;  
Pañhassa veyyākaraṇena tuṭṭho, dadāmi te dhammapūjāya dhīra.

“Maṇiṃ anagghaṃ ruciraṃ pabhassaraṃ, kaṇṭhāvasattaṃ maṇibhūsitāṃ me;  
Pañhassa veyyākaraṇena tuṭṭho, dadāmi te dhammapūjāya dhīra.

“Gavaṃ sahassaṃ usabhañca nāgaṃ, ājaññāyutte ca rathe dasa ime;  
Pañhassa veyyākaraṇena tuṭṭho, dadāmi te gāmarāni soḷasa”ti. (jā. 1.10.34-37);

Evaṃ sakkādayo mahāsattaṃ pūjetvā sakaṭṭhānameva agamiṃsu.

Catuposathakaṇḍaṃ niṭṭhitaṃ.

Dohaḷakaṇḍaṃ

Tesu nāgarājassa bhariyā vimalādevī nāma. Sā tassa gīvāya piḷandhanamaṇiṃ apassantī pucchi “deva, kahaṃ pana te maṇī”ti? “Bhadde, candabrāhmaṇaputtassa vidhurapaṇḍitassa dhammakathaṃ sutvā pasannacitto ahaṃ tena maṇinā taṃ pūjesiṃ. Na kevalaṅca ahameva, sakkopi taṃ dibbadukūlena pūjesi, supaṇṇarājā suvaṇṇamālāya, dhanañcayarājā gavassasahassādīhi pūjesī”ti. “Dhammakathiko so, devā”ti. “Bhadde, kiṃ vadesi, jambudīpatale buddhuppādo viya pavattati, sakalajambudīpe ekasatarājāno tassa madhuradhammakathāya bajjhitvā hatthikantavīṇāsarena paluddhamattavāraṇā viya attano attano rajjāni gantuṃ na icchanti, evarūpo so madhuradhammakathiko”ti tassa guṇaṃ vaṇṇesi. Sā vidhurapaṇḍitassa guṇakathaṃ sutvā tassa dhammakathaṃ sotukāmā hutvā cintesi “sacāhaṃ

vakkhāmi ‘deva, tassa dhammakatham sasukāma, idha naṃ ānehī’ti, na metaṃ ānessati. Yamnūnāhaṃ ‘tassa me hadaye dohaḷo uppanno’ti gilānālayaṃ kareyya’nti. Sā tathā katvā siragabbhaṃ pavisitvā attano paricārikānaṃ saññaṃ datvā sirisayane nipajji. Nāgarājā upaṭṭhānavelāya taṃ apassanto ‘‘kahaṃ vimalā’’ti paricārikāyo pucchitvā ‘‘gilānā, devā’’ti vutte uṭṭhāyāsanā tassā santikaṃ gantvā sayanapasse nisīditvā sarīraṃ parimajjanto paṭhamāṃ gāthamāha –

**1346:** ‘Paṇḍu kisiyāsi dubbalā, vaṇṇarūpaṃ na tavedisaṃ pure;  
Vimale akkhāhi pucchitā, kīdisī tuyhaṃ sarīravedanā’’ti.

Tattha **paṇḍūti** paṇḍupalāsavaṇṇā. **Kisiyāti** kisā. **Dubbalāti** appathāmā. **Vaṇṇarūpaṃ na tavedisaṃ pureti** tava vaṇṇasaṅkhātāṃ rūpaṃ pure edisaṃ na hoti, niddosaṃ anavajjaṃ, taṃ idāni parivattitvā amanuññasabhāvaṃ jātāṃ. **Vimaleti** taṃ ālapati.

Athassa sā ācikkhantī dutiyaṃ gāthamāha –

**1347:** ‘Dhammo manujesu mātīnaṃ, dohaḷo nāma janinda vuccati;  
Dhammāhaṭaṃ nāgakuñjara, vidhurassa hadayābhipatthaye’’ti.

Tattha **dhammoti** sabhāvo. **Mātīnanti** itthīnaṃ. **Janindāti** nāgajanassa inda. **Dhammāhaṭaṃ nāgakuñjara, vidhurassa hadayābhipatthayeti** nāgasetṭha, ahaṃ dhammena samena asāhasikakammena āhaṭaṃ vidhurassa hadayaṃ abhipatthayāmi, taṃ me labhamānāya jīvitaṃ atthi, alabhamānāya idheva maraṇanti tassa paññaṃ sandhāyevamāha –

Taṃ sutvā nāgarājā tatiyaṃ gāthamāha –

**1348:** ‘Candaṃ kho tvaṃ dohaḷāyasi, sūriyaṃ vā atha vāpi mālutaṃ;  
Dullabhañhi vidhurassa dassanaṃ, ko vidhuramidha mānāyissatī’’ti.

Tattha **dullabhañhi vidhurassa dassananti** asamadhurassa vidhurassa dassanameva dullabhaṃ. Tassa hi sakalajambudīpe rājāno dhammikaṃ rakkhāvaraṇaguttiṃ paccupaṭṭhāpetvā vicaranti, passitumpi naṃ koci na labhati, taṃ ko idha ānāyissatīti vadati.

Sā tassa vacanaṃ sutvā ‘‘alabhamānāya me idheva maraṇa’’nti parivattitvā piṭṭhiṃ datvā sālākakaṇṇena mukhaṃ pidahitvā nipajji. Nāgarājā anattamano sirigabbhaṃ pavisitvā sayanapiṭṭhe nisino ‘‘vimalā vidhuraṇḍitassa hadayamaṃsaṃ āharāpetī’’ti saññī hutvā ‘‘paṇḍitassa hadayaṃ alabhantiyā vimalāya jīvitaṃ natthi, kathaṃ nu kho tassa hadayamaṃsaṃ labhissāmī’’ti cintesi. Athassa dhītā irandhatī nāma nāgakaññā sabbālaṅkārapaṭimaṇḍitā mahantena sirivilāsena pitu upaṭṭhānaṃ āgantvā pitaraṃ vanditvā ekamantaṃ ṭhitā, sā tassa indriyavikāraṃ disvā ‘‘tāta, ativiya domanassappattosi, kiṃ nu kho kāraṇa’’nti pucchantī imaṃ gāthamāha –

**1349:** ‘Kiṃ nu tāta tvaṃ pajjhāyasi, padumaṃ hatthagataṃva te mukhaṃ;  
Kiṃ nu dummanarūposi issara, mā tvaṃ soci amittatāpanā’’ti.

Tattha **pajjhāyasīti** punappunaṃ cintesi. **Hatthagatanti** hatthena parimadditaṃ padumaṃ viya te mukhaṃ jātāṃ. **Issarāti** pañcayojanasatikassa mandiraṇāgabhavanassa, sāmīti.

Dhītu vacanaṃ sutvā nāgarājā tamatthaṃ ārocento āha –

**1350:** ‘Mātā hi tava irandhati, vidhurassa hadayaṃ dhaniyati;  
Dullabhañhi vidhurassa dassanaṃ, ko vidhuramidha mānāyissatī’’ti.

Tattha **dhaniyatī** pattheti icchati.

Atha naṃ nāgarājā “amma, mama santike vidhuraṃ ānetuṃ samattho natthi, tvaṃ mātu jīvitam dehi, vidhuraṃ ānetuṃ samattham bhattāraṃ pariyesāhī”ti uyyojento upaḍḍhagāthamāha –

**1351:**“Tassa bhattupariyesanaṃ cara, yo vidhuramidha mānayissatī”ti.  
Tattha **carā**ti vicara.

Iti so kilesābhiratabhāvena dhītu ananucchavikaṃ kathaṃ kathesi. Tamattham pakāsentō satthā āha –

“Pituno ca sā sutvāna vākyam, rattim nikkhamma avassutim carī”ti.

Tattha **avassutinti** bhikkhave, sā nāgamāṇavikā pitu vacanaṃ sutvā pitaraṃ assāsetvā mātu santikaṃ gantvā tampi assāsetvā attano sirigabbhaṃ gantvā sabbālaṅkārehi attānaṃ alaṅkaritvā ekaṃ kusumbharattavattham nivāsetvā ekaṃ ekaṃse katvā tameva rattim udakaṃ dvidhā katvā nāgabhanato nikkhamma himavantappadese samuddatīre thitaṃ saṭṭhiyojanubbedham ekagghanaṃ kālapabbataṃ nāma añjanagiriṃ gantvā avassutim cari kilesaavassutim bhattupariyesanaṃ carīti attho.

Carantī ca yāni himavante vaṇṇagandhasampannāni pupphāni, tāni āharitvā sakalapabbataṃ maṇiagghiyaṃ viya alaṅkaritvā uparitale pupphasanthāraṃ katvā manoramenākārena naccitvā madhuragītaṃ gāyantī sattamaṃ gāthamāha –

**1352:**“Ke gandhabbe rakkhase ca nāge, ke kimpurise cāpi mānuse;  
Ke paṇḍite sabbakāmadade, dīgharattaṃ bhattā me bhavissatī”ti.

Tattha **ke gandhabbe rakkhase ca nāgeti** ko gandhabbo vā rakkhaso vā nāgo vā. **Ke paṇḍite sabbakāmadadeti** ko etesu gandhabbādīsu paṇḍito sabbakāmaṃ dātuṃ samattho, so vidhurassa hadayamaṃsadohaṇīniyā mama mātu manorathaṃ matthakaṃ pāpetvā mayhaṃ dīgharattaṃ bhattā bhavissatīti.

Tasmim khaṇe vessavaṇamahārājassa bhāgineyyo puṇṇako nāma yakkhasenāpati tigāvutappamānaṃ manomayasindhavaṃ abhiruyha kālapabbatamatthakena yakkhasamāgamaṃ gacchanta taṃ tāya gītasaddaṃ assosi. Anantare attabhāve anubhūtapubbāya itthiyā gītasaddo tassa chaviādīni chinditvā aṭṭhimiñjaṃ āhacca aṭṭhāsī. So tāya paṭibaddhacitto hutvā nivattitvā sindhavapiṭṭhe nisinnova “bhadde, ahaṃ mama paññāya dhammena samena vidhurassa hadayaṃ ānetuṃ samatthomhi, tvaṃ mā cintayī”ti taṃ assāsentō aṭṭhamam gāthamāha –

**1353:**“Assāsa hessāmi te pati, bhattā te hessāmi anindalocane;  
Paññā hi mamaṃ tathāvidhā, assāsa hessasi bhariyā mamā”ti.

Tattha **anindalocaneti** aninditabbalocane. **Tathāvidhā**ti vidhurassa hadayamaṃsaṃ āharaṇasamatthā.

Atha naṃ irandhatī “tena hi ehi, gacchāma me pitu santika”nti ānesi. Tamattham pakāsentō satthā āha –

**1354:**“Avacāsi puṇṇakaṃ irandhatī, pubbapathānugatena cetasā;  
Ehi gacchāma pitu mamantike, esova te etamattham pavakkhatī”ti.

Tattha **pubbapathānugatenā**ti anantare attabhāve bhūtapubbāsāmiṃke tasmim pubbapatheneva

anugatena. **Ehi gacchāmā**ti bhikkhave, so yakkhasenāpati evaṃ vatvā “imaṃ assapitṭhiṃ āropetvā nessesāmi”ti pabbatamatthakā otarivā tassā gahaṇatthaṃ hatthaṃ pasāresi. Sā attano hatthaṃ gaṇhituṃ adatvā tena pasāritahatthaṃ sayamaṃ gahetvā “sāmi, nāhaṃ anāthā, mayhaṃ pitā varuṇo nāma nāgarājā, mātā vimalā nāma devī, ehi mama pitu santikaṃ gacchāma, eso eva te yathā amhākaṃ maṅgalakiriyāya bhavitabbaṃ, evaṃ etamatthaṃ pavakkhatī”ti avacāsi.

Evaṃ vatvā sā yakkhaṃ gahetvā pitu santikaṃ agamāsi. Tamatthaṃ pakāseto sathā āha –

**1355:**“Alaṅkatā suvasanā, mālinī candanussadā;  
Yakkhaṃ hatthe gahetvāna, pitusantikupāgamī”ti.

Tattha **pitusantikupāgamī**ti attano pituno nāgarañño santikaṃ upāgami.

Puṇṇakopi yakkho paṭiharivā nāgarājassa santikaṃ gantvā irandhatim yācanto āha –

**1356:**“Nāgavara vaco suṇohi me, patirūpaṃ paṭipajja sunkiyaṃ;  
Patthemī ahaṃ irandhatim, tāya samaṅgiṃ karohi maṃ tuvaṃ.

**1357:**“Sataṃ hatthī sataṃ assā, sataṃ assatarīrathā;  
Sataṃ valabhiyo puṇṇā, nānāratnassa kevalā;  
Te nāga paṭipajjassu, dhītaraṃ dehirandhati”nti.

Tattha **sunkiyanti** attano kulapadesānurūpaṃ dhitu sunkaṃ dhanam paṭipajja gaṇha. **Samaṅgiṃ karohī**ti maṃ tāya saddhiṃ samaṅgibhūtaṃ karohi. **Valabhiyoti** bhaṇḍasakaṭṭhiyo. **Nānāratnassa kevalā**ti nānāratanassa sakalaparipuṇṇā.

Atha naṃ nāgarājā āha –

**1358:**“Yāva āmantaye ñātī, mitte ca suhadajjane;  
Anāmanta kataṃ kammaṃ, taṃ pacchā anutappatī”ti.

Tattha **yāva āmantaye ñātī**ti bho yakkhasenāpati, ahaṃ tuyhaṃ dhītaraṃ demi, no na demi, thokaṃ pana āgamehi, yāva ñātakepi jānāpemi. **Taṃ pacchā anutappatī**ti itthiyo hi gatagataṭṭhāne abhiraṃtipi anabhiraṃtipi, anabhiratikāle ñātakādayo amhehi saddhiṃ anāmantetvā kataṃ kammaṃ nāma evarūpaṃ hotīti ussukkaṃ na karonti, evaṃ taṃ kammaṃ pacchā anutāpaṃ āvahaṭīti.

Evaṃ vatvā so bhariyāya vasanaṭṭhānaṃ gantvā tāya saddhiṃ sallapi. Tamatthaṃ pakāseto sathā āha –

**1359:**“Tato so varuṇo nāgo, pavisitvā nivesanaṃ;  
Bhariyaṃ āmantayitvāna, idaṃ vacanamabravi.

**1360:**“Ayaṃ so puṇṇako yakkho, yācatī maṃ irandhatim;  
Bahunā vittalābhena, tassa dema piyaṃ mama”nti.

Tattha **pavisitvā**ti varuṇo puṇṇakaṃ tattheva ṭhapetvā sayamaṃ utṭhāya yatthassa bhariyā nipannā, taṃ nivesanaṃ pavisitvā. **Piyaṃ mamanti** mama piyaṃ dhītaraṃ tassa bahunā vittalābhena demāti pucchati.

Vimalā āha –



**1361:** ‘Na dhanena na vittena, labbhā amhaṃ irandhatī;  
Sace ca kho hadayaṃ paṇḍitassa, dhammena laddhā idha māhareyya;  
Etena vittena kumāri labbhā, nāññaṃ dhanam uttari patthayāmā’ ti.

Tattha **amhaṃ irandhatī**ti amhākaṃ dhītā irandhatī. **Etena vittena**ti etena tuṭṭhikāraṇena.

So tāya saddhiṃ mantetvā punadeva puṇṇakena saddhiṃ mantesi. Tamatthaṃ pakāsento satthā āha

**1362:** ‘Tato so varuṇo nāgo, nikkhamitvā nivesanā;  
Puṇṇakāmantayitvāna, idaṃ vacanamabravi.

**1363:** ‘Na dhanena na vittena, labbhā amhaṃ irandhatī;  
Sace tuvaṃ hadayaṃ paṇḍitassa, dhammena laddhā idha māharesi;  
Etena vittena kumāri labbhā, nāññaṃ dhanam uttari patthayāmā’ ti.

Tattha **puṇṇakāmantayitvānā**ti puṇṇakaṃ āmantayitvā.

Puṇṇako āha –

**1364:** ‘Yaṃ paṇḍitotyeke vadanti loke, tameva bālote punāhu aññe;  
Akkhāhi me vippavadanti ettha, kaṃ paṇḍitaṃ nāga tuvaṃ vadesī’ ti.

Tattha **yaṃ paṇḍitotyeketi** so kira ‘hadayaṃ paṇḍitassā’ ti sutvā cintesi ‘yaṃ eke paṇḍitoti vadanti, tameva aññe bālote kathenti. Kiñcāpi me irandhatiyā vidhuroti akkhātaṃ, tathāpi tathato jānituṃ pucchissāmi na’ nti. Tasmā evamāha.

Nāgarājā āha –

**1365:** ‘Korabyarājassa dhanañcayassa, yadi te suto vidhuro nāma kattā;  
Ānehi taṃ paṇḍitaṃ dhammaladdhā, irandhatī padacarā te hotū’ ti.

Tattha **dhammaladdhā**ti dhammena labhitvā. **Padacarā**ti pādapariṇāṇikā.

Taṃ sutvā puṇṇako somanassappatto sindhavaṃ nayanatthāya upaṭṭhākaṃ āṇāpesi. Tamatthaṃ pakāsento satthā āha –

**1366:** ‘Idaṃca sutvā varuṇassa vākyam, uṭṭhāya yakkho paramappatīto;  
Tattheva santo purisaṃ asaṃsi, ānehi ājaññaṃ midheva yutta’ nti.

Tattha **purisaṃ asaṃsī**ti attano upaṭṭhākaṃ āṇāpesi. **Ājaññaṃ**ti kāraṇākāraṇajānanakasindhavaṃ. **Yuttanti** kappitaṃ.

**1367:** ‘Jātarūpamayā kaṇṇā, kācamhicamayā khurā;  
Jambonadassa pākassa, suvaṇṇassa uracchado’ ti.

Tattha **jātarūpamayā kaṇṇā**ti tameva sindhavaṃ vaṇṇento āha. Tassa hi manomayassa sindhavassa jātarūpamayā kaṇṇā, kācamhicamayā khurā, tassa khurā rattamaṇimayāti attho. **Jambonadassa pākassā**ti jambonadassa pākassa rattasuvaṇṇassa uracchado.

So puriso tāvadeva taṃ sindhavaṃ ānesi. Puṇṇako taṃ abhiruyha ākāseṇa vessavaṇṇassa santikaṃ

gantvā nāgabhanam vaṇṇetvā taṃ pavattim ārocesi. Tassatthassa pakāsanattham idaṃ vuttam –

- 1368:** ‘Devavāhavaham yānam, assamāruyha puṇṇako;  
Alaṅkato kappitakesamassu, pakkāmi vehāyasamantalikkhe.
- 1369:** ‘So puṇṇako kāmarāgena giddho, irandhatim nāgakaññaṃ jigīsam;  
Gantvāna taṃ bhūtapatim yasassim, iccabravī vessavaṇaṃ kuveraṃ.
- 1370:** ‘Bhogavatī nāma mandire, vāsā hiraññavatīti vuccati;  
Nagare nimmitte kañcanamaye, maṇḍalassa uragassa niṭṭhitam.
- 1371:** ‘Aṭṭalakā oṭṭhagīviyo, lohitaṅkassa masāragallino;  
Pāsādettha silāmayā, sovaṇṇaratanehi chādītā.
- 1372:** ‘Ambā tilakā ca jambuyo, sattapaṇṇā mucalindaketakā;  
Piyaṅgu uddālakā sahā, uparibhaddakā sinduvārakā.
- 1373:** ‘Campeyyakā nāgamallikā, bhaginīmālā atha mettha koliyā;  
Ete dumā pariṇāmitā, sobhayanti uragassa mandiraṃ.
- 1374:** ‘Khajjurettha silāmayā, sovaṇṇadhuvapupphitā bahū;  
Yattha vasatopapātiko, nāgarājā varuṇo mahiddhiko.
- 1375:** ‘Tassa komārikā bhariyā, vimalā kañcanavelliviggahā;  
Kālā taruṇāva uggatā, pucimandatthanī cārudassanā.
- 1376:** ‘Lākhārasarattasucchavī, kaṇikārāva nivātapupphitā;  
Tidivokacarāva accharā, vijjuvabbhaghanā vinissaṭā.
- 1377:** ‘Sā dohaḷinī suvimhitā, vidhurassa hadayaṃ dhaniyati;  
Taṃ tesam demi issara, tena te denti irandhatim mama’nti.

Tattha **devavāhavaham yānanti** vahitabboti vāho, devasaṅkhātāṃ vāhaṃ vahatīti devavāhavaham. Yanti etenāti yānam. **Kappitakesamassūti** maṇḍanavasena suvaṇṇavhitakesamassu. Devānaṃ pana kesamassukaraṇakammaṃ nāma natthi, vicittakathikena pana kathitam. **Jigīsanti** patthayanto. **Vessavaṇanti** visāṇāya rājadhāniyā issararājānaṃ. **Kuveranti** evaṇṇāmakam. **Bhogavatī nāmāti** sampannabhogātāya evaṇṇaladdhanāmaṃ. **Mandireti** mandiraṃ, bhavananti attho. **Vāsā hiraññavatīti** nāgarājassa vasanaṭṭhānattā vāsātī ca, kañcanavatīyā suvaṇṇapākārena parikkhittatā hiraññavatīti ca vuccati. **Nagare nimmiteti** nagaraṃ nimmitam. **Kañcanamayeti** suvaṇṇamayaṃ. **Maṇḍalassāti** bhogamaṇḍalena samannāgatassa. **Niṭṭhitanti** karaṇapariniṭṭhitam. **Oṭṭhagīviyoti** oṭṭhagīvāsaṇṭhānena katā rattamaṇimasāragallamayā aṭṭalakā. **Pāsādetthāti** ettha nāgabhavane pāsādā. **Silāmayāti** maṇimayā. **Sovaṇṇaratanehīti** suvaṇṇasaṅkhātehi ratanehi, suvaṇṇiṭṭhakāhi chādītāti attho. **Sahāti** sahakārā. **Uparibhaddakāti** uddālakajātīkāyeva rukkhā. **Campeyyakā nāgamallikāti** campakā ca nāgā ca mallikā ca. **Bhaginīmālā atha mettha koliyāti** bhaginīmālā ceva atha ettha nāgabhavane koliyā nāma rukkhā ca. **Ete dumā pariṇāmitāti** ete pupphūpagaphalūpagarukkhā aññaṃaññaṃ saṅghaṭṭasākhātāya pariṇāmitā ākulasamākulā. **Khajjuretthāti** khajjurirukkhā ettha. **Silāmayāti** indanīlamaṇimayā. **Sovaṇṇadhuvapupphitāti** te pana suvaṇṇapupphehi niccapupphitā. **Yattha vasatopapātikoti** yattha nāgabhavane opapātiko nāgarājā vasati. **Kañcanavelliviggahāti** suvaṇṇarāsissirikasarīrā. **Kālā taruṇāva uggatāti** vilāsuyuttatāya mandavāteritā kālavallipallavā viya uggatā. **Pucimandatthanīti** nimbaphalasaṇṭhānacūcukā. **Lākhārasarattasucchavīti** hatthapādatalachaviṃ sandhāya vuttam. **Tidivokacarāti** tidasabhavanacarā. **Vijjuvabbhaghanāti**

abbhaghanavalāhakantarato nissaṭṭā vijjulatā viya. **Taṃ tesam demīti** taṃ tassa hadayaṃ ahaṃ tesam demi, evaṃ jānassu. **Issarāti** mātulaṃ ālapati.

Iti so vessavaṇena ananuññāto gantuṃ avisahitvā taṃ anujānāpetuṃ etā ettakā gāthā kathesi. Vessavaṇo pana tassa kathaṃ na suṇāti. Kimkāraṇā? Dvinnaṃ devaputtānaṃ vimānaaḍḍaṃ paricchindatīti. Puṇṇako attano vacanassa assutabhāvaṃ ñatvā jinakadevaputtassa santike aṭṭhāsi. Vessavaṇo aḍḍaṃ vinicchinitvā parājitaṃ anuṭṭhāpetvā itaraṃ “gaccha tvam, tava vimāne vasāhī”ti āha. Puṇṇako “gaccha tva”nti vuttakkhaṇeyeva “mayhaṃ mātulena mama pesitabhāvaṃ jānāthā”ti katipayadevaputte sakkhiṃ katvā heṭṭhā vuttanayeneva sindhavaṃ āharāpetvā abhiruyha pakkāmi. Tamatthaṃ pakāsento satthā āha –

**1378:**“So puṇṇako bhūtapatiṃ yasassiṃ, āmantaya vessavaṇaṃ kuveraṃ;  
Tattheva santo purisaṃ asaṃsi, ānehi ājaññamidheva yuttaṃ.

**1379:**“Jātarūpamayā kaṇṇā, kācamhicamayā khurā;  
Jambonadassa pākassa, suvaṇṇassa uracchado.

**1380:**“Devavāhavaṃ yānaṃ, assamāruyha puṇṇako;  
Alaṅkato kappitakesamassu, pakkāmi vehāyasamantalikkhe”ti.

Tattha **āmantayāti** āmantayitvā.

So ākāseṇa gacchantoyeva cintesi “vidhuraṇaḍḍito mahāparivāro, na sakkā taṃ gaṇhituṃ, dhanañcayakorabyo pana jūtavittako, taṃ jūtena jinitvā vidhuraṃ gaṇhissāmi, ghare panassa bahūni ratanāni, appagghena lakkhena jūtaṃ na kīḷissati, mahaggharataṇaṃ harituṃ vaṭṭati, aññaṃ ratanaṃ rājā na gaṇhissati, rājagahassa sāmantaṃ vepullapabbatabbhantare cakkavattirañño paribhogamaṇirataṇaṃ atthi mahānubhāvaṃ, taṃ gahetvā tena rājānaṃ palobhetvā jinissāmi”ti. So tathā akāsi. Tamatthaṃ pakāsento satthā āha –

**1381:**“So aggamā rājagahaṃ surammaṃ, aṅgassa rañño nagaraṃ durāyutaṃ;  
Pahūtabhakkhaṃ bahuannaṇaṃ, masakkasāraṃ viya vāsavassa.

**1382:**“Mayūraḥcāgaṇasampaghuṭṭhaṃ, dijābhighuṭṭhaṃ dijasaṅghasevitaṃ;  
Nānāsakuntābhirudaṃ suvaṅgaṇaṃ, pupphābhikiṇṇaṃ himavaṃva pabbataṃ.

**1383:**“So puṇṇako vepulamābhirūhi, siluccayaṃ kimpurisānuciṇṇaṃ;  
Anvesamāno maṇirataṇaṃ ulāraṃ, tamaddasā pabbatakūṭamajjhe”ti.

Tattha **aṅgassa raññoti** tadā aṅgassa raññoṇa magadharajjaṃ ahosi. Tena vuttaṃ – “aṅgassa rañño nagara”nti. **Durāyutanti** paccatthikehi durāyuttaṃ. **Masakkasāraṃ viya vāsavassāti** masakkasārasaṅkhāte sinerupabbatamatthake māpitattā “masakkasāra”nti laddhanāmaṃ vāsavassa bhavaṇaṃ viya. **Dijābhighuṭṭhanti** aññehi ca pakkhīhi abhisaṅghuṭṭhaṃ ninnāditāṃ. **Nānāsakuntābhirudanti** madhurassarena gāyantehi viya nānāvidhehi sakuṇehi abhirudaṃ, abhigītanti attho. **Suvaṅgaṇanti** sundaraaṅgaṇaṃ manuññatalaṃ. **Himavaṃva pabbatanti** himavantapabbataṃ viya. **Vepulamābhirūhīti** bhikkhave, so puṇṇako evarūpaṃ vepullapabbataṃ abhiruhi. **Pabbatakūṭamajjheti** pabbatakūṭaantare taṃ maṇiṃ addasa.

**1384:**“Disvā maṇiṃ pabhassaraṃ jātimaṇaṃ, manoharaṃ maṇirataṇaṃ ulāraṃ;  
Daddallamānaṃ yasasā yasassiṃ, obhāsati vijjurivantalikkhe.

**1385:**“Tamaggahī veḷuriyaṃ mahagghaṃ, manoharaṃ nāma mahānubhāvaṃ;

Ājaññamāruyha manomavaṇṇo, pakkāmi vehāyasamantalikkhe’’ti.

Tattha **manoharanti** manasābhipatthitassa dhanassa āharaṇasamatthaṃ. **Daddallamānanti** ujjalamānaṃ. **Yasasāti** parivāramaṇigaṇena. **Obhāsati** taṃ maṇirataṇaṃ ākāse vijjuriva obhāsati. **Tamaggahīti** taṃ maṇirataṇaṃ aggahesi. Taṃ pana maṇirataṇaṃ kumbhiro nāma yakkho kumbhaṇḍasahassaparivāro rakkhati. So pana tena kujjhitvā olokitamatteneva bhītatasito palāyitvā cakkavāḷapabbataṃ patvā kampamāno olokeno aṭṭhāsī. Iti taṃ palāpetvā puṇṇako maṇirataṇaṃ aggahesi. **Manoharaṃ nāmāti** manasā cintitaṃ dhaṇaṃ āharitaṃ sakkotīti evaṃladdhaṇāmaṃ.

Iti so taṃ gahetvā ākāseṇa gacchantaṃ taṃ nagaraṃ patto. Tamatthaṃ pakāsento satthā āha –

**1386:** ‘So aggamā nagaramindapatthaṃ, oruyhupāgacchi sabhaṃ kurūnaṃ;  
Samāgate ekasataṃ samagge, avhettha yakkho avikampamāno.

**1387:** ‘Ko nīdha raññaṃ varamābhijeti, kamābhijeyyāma varaddhanaṇa;  
Kamanuttaraṃ ratanavaraṃ jināma, ko vāpi no jeti varaddhanenā’’ti.

Tattha **oruyhupāgacchi sabhaṃ kurūnanti** bhikkhave, so puṇṇako assapiṭṭhito oruyha assaṃ adissamānarūpaṃ ṭhapetvā māṇavakavaṇṇena kurūnaṃ sabhaṃ upagato. **Ekasatanti** ekasatarājāno achambhīto hutvā ‘‘ko nīdhā’’tiādīni vadanta jūtena avhettha. **Ko nīdhāti** ko nu imasmiṃ rājasamāgame. **Raññanti** rājūnaṃ antare. **Varamābhijetīti** amhākaṃ santakaṃ seṭṭharataṇaṃ abhijeti, ‘‘ahaṃ jināmi’’ti vattaṃ ussahati. **Kamābhijeyyāmāti** kaṃ vā mayā jineyyāma. **Varaddhanenāti** uttamadhanena. **Kamanuttaranti** jinanta ca kataraṃ rājānaṃ anuttaraṃ ratanavaraṃ jināma. **Ko vāpi no jetīti** atha vā ko nāma rājā amhe varaddhanaṇa jeti. Iti so catūhi padehi korabyameva ghaṭṭeti.

Atha rājā ‘‘mayā ito pubbe evaṃ sūro hutvā kathento nāma na diṭṭhapubbo, ko nu kho eso’’ti cintetvā pucchanta gāthamāha –

**1388:** ‘Kuhim nu raṭṭhe tava jātibhūmi, na korabyasseva vaco tavedaṃ;  
Abhītosī no vaṇṇanibhāya sabbe, akkhāhi me nāmañca bandhave cā’’ti.

Tattha **na korabyassevāti** kururaṭṭhavāsikasaveva tava vacanaṃ na hoti.

Taṃ sutvā itaro ‘‘ayaṃ rājā mama nāmaṃ pucchati, puṇṇako ca nāma dāso hoti. Sacāhaṃ ‘puṇṇakosmi’’ti vakkhāmi, ‘esa dāso, tasmā maṃ pagabbhatāya evaṃ vadetī’’ti avamaññissati, anantarāṭṭe attabhāve nāmamassa kathessāmi’’ti cintetvā gāthamāha –

**1389:** ‘Kaccāyano māṇavakosmi rāja, anūnanāmo iti mavhayanti;  
Aṅgesu me ñātayo bandhavā ca, akkhena devasmi idhānupatto’’ti.

Tattha **anūnanāmoti** na ūnanāmo. Iminā attano puṇṇakanāmameva paṭicchanaṃ katvā katheti. **Iti mavhayantīti** iti maṃ avhayanti pakkosanti. **Aṅgesūti** aṅgaraṭṭhe kālacampānagare vasanti. **Akkhena devasmīti** deva, jūtakaṭṭanathena idha anuppattosmi.

Atha rājā ‘‘māṇava, tvaṃ jūtena jito kiṃ dassasi, kiṃ te atthī’’ti pucchanta gāthamāha –

**1390:** ‘Kiṃ māṇavassa ratanāni atthi, ye taṃ jinanta hare akkhadhutto;  
Bahūni rañño ratanāni atthi, te tvaṃ daliddo kathamavhayesī’’ti.

Tassattho – kittakāni bhoto māṇavassa ratanāni atthi, ye taṃ jinanta akkhadhutto ‘‘āharā’’ti vatvā hareyya. Rañño pana nivesane bahūni ratanāni atthi, te rājāno evaṃ bahudhane tvaṃ daliddo samāno

kathaṃ jūtena avhayasīti.

Tato puṇṇako gāthamāha –

**1391:** ‘Manoharo nāma maṇī mamāyaṃ, manoharaṃ maṇirataṇaṃ uḷāraṃ;  
Imaṅca ājaññaṃamittatāpanaṃ, etaṃ me jinitvā hare akkhadhutto’ ti.

Pāḷipotthakesu pana ‘maṇi mama vijjati lohitaṅko’ ti likhitaṃ. So pana maṇi veḷuriyo, tasmā idameva sameti.

Tattha **ājaññaṃ**anti imaṃ ājānīyassaṅca maṇiñcāti etaṃ me ubhayaṃ hareyya akkhadhuttoti assaṃ dassetvā evamāha.

Taṃ sutvā rājā gāthamāha –

**1392:** ‘Eko maṇī māṇava kiṃ karissati, ājānīyeko pana kiṃ karissati;  
Bahūni rañño maṇiratanāni atthi, ājānīyā vātajavā anappakā’ ti.

Dohaḷakaṇḍaṃ niṭṭhitaṃ.

Maṇikaṇḍaṃ

So rañño kathaṃ sutvā ‘mahārāja, kiṃ nāma etaṃ vadetha, eko asso assasahassaṃ lakkhaṃ hoti, eko maṇi maṇisahassaṃ lakkhaṃ hoti. Na hi sabbe assā ekasadisā, imassa tāva javaṃ passathā’ ti vatvā assaṃ abhiruhitvā pākāramatthakena pesesi. Sattayojanikaṃ nagaraṃ assehi gīvāya gīvaṃ paharantehi parikkhittaṃ viya ahoṣi. Athānukkamena assopi na paññāyī, yakkhopi na paññāyī, udare baddharattapaṭova paññāyī. So assato oruyha ‘diṭṭho, mahārāja, assassa vego’ ti vatvā ‘āma, diṭṭho’ ti vutte ‘idāni puna passa, mahārāja’ ti vatvā assaṃ antonagare uyyāne pokkharāṇiyā udakapiṭṭhe pesesi, khuraggāni atementova pakkhandi. Atha naṃ padumapattesu vicarāpetvā pāṇiṃ paharitvā hatthaṃ pasāresi, asso āgantvā pāṇitale patiṭṭhāsi. Tato ‘vaṭṭate evarūpaṃ assarataṇaṃ narindā’ ti vatvā ‘vaṭṭati’ ti vutte ‘mahārāja, assarataṇaṃ tāva tiṭṭhatu, maṇiratanassa mahānubhāvaṃ passā’ ti vatvā tassānubhāvaṃ pakāsento āha –

**1393:** ‘Idaṅca me maṇirataṇaṃ, passa tvaṃ dvipaduttama;  
Itthīnaṃ viggahā cettha, purisānaṅca viggahā.

**1394:** ‘Migānaṃ viggahā cettha, sakuṇānaṅca viggahā;  
Nāgarājā supaṇṇā ca, maṇimhi passa nimmita’ nti.

Tattha **itthīnaṃ**anti etasmiṅhi maṇiratane alaṅkatapaṭiyattā anekā itthiviggahā purisaviggahā nānappakārā migapakkhisāṅghā senaṅgādīni ca paññāyanti, tāni dassento evamāha. **Nimmitaṃ**anti idaṃ evarūpaṃ accherakaṃ maṇimhi nimmitaṃ passa.

‘Aparampi passāhī’ ti vatvā gāthā āha –

**1395:** ‘Hatthānīkaṃ rathānīkaṃ, asse pattī ca vammīne;  
Caturāṅginimaṃ senaṃ, maṇimhi passa nimmitaṃ.

**1396:** ‘Hatthārohe anīkaṭṭhe, rathike pattikārike;  
Balaggāni viyūḷhāni, maṇimhi passa nimmita’ nti.

Tattha **balaggānī** balāneva. **Viyūḥhānī** byūhavasena ʔhitāni.

1397: ‘Puraṃ uddhāpasampannaṃ, bahupākāratoraṇaṃ;  
Siṅghātake subhūmiyo, maṇimhi passa nimmitaṃ.

1398: ‘Esikā parikhāyo ca, palikhaṃ aggaḷāni ca;  
Aṭṭālake ca dvāre ca, maṇimhi passa nimmita’nti.

Tattha **puranti** nagaraṃ. **Uddhāpasampananti** pākāravatthunā sampannaṃ.

**Bahupākāratoraṇanti** uccapākāratoraṇanagaradvārena sampannaṃ. **Siṅghātake** vīthicatukkāni.

**Subhūmiyoti** nagarūpacāre vicittā ramaṇīyabhūmiyo. **Esikā**ti nagaradvāresu utthāpīte esikatthambhe.

**Palikhanti** palighaṃ, ayameva vā pāṭho. **Aggaḷānī**ti nagaradvārakavāṇāni. **Dvāre cāti** gopurāni ca.

1399: ‘Passa toraṇamaggesu, nānādiḷḷagaṇā bahū;  
Haṃsā koṅcā mayūrā ca, cakkavākā ca kukkuhā.

1400: ‘Kuṇālakā bahū citrā, sikhaṇḍī jīvajīvākā;  
Nānādiḷḷagaṇākiṇṇaṃ, maṇimhi passa nimmita’nti.

Tattha **toraṇamaggesū**ti etasmiṃ nagare toraṇaggesu. **Kuṇālakā**ti kāḷakokilā. **Citrā**ti citrapattakokilā.

1401: ‘Passa nagaraṃ supākāraṃ, abbhutaṃ lomahaṃsanaṃ;  
Samussitadhajaṃ rammaṃ, soṇṇavālukasanthataṃ.

1402: ‘Passettha paṇṇasālāyo, vibhattā bhāgasō mitā;  
Nivesane nivese ca, sandhibyūhe pathaddhiyo’nti.

Tattha **supākāranti** kaṅcanapākāraparikkhittaṃ. **Paṇṇasālāyoti** nānābhaṇḍapuṇṇe āpaṇe. **Nivesane nivese cāti** gehāni ceva gehavatthūni ca. **Sandhibyūheti** gharasandhiyo ca anibbidharacchā ca. **Pathaddhiyoti** nibbidhavīthiyo.

1403: ‘Pānāgāre ca soṇḍe ca, sūnā odaniyā gharā;  
Vesī ca gaṇikāyo ca, maṇimhi passa nimmitaṃ.

1404: ‘Mālākāre ca rajake, gandhike atha dussike;  
Suvaṇṇakāre maṇikāre, maṇimhi passa nimmitaṃ.

1405: ‘Āḷārike ca sūde ca, naṭanāṭakagāyino;  
Pāṇissare kumbhathūnike, maṇimhi passa nimmita’nti.

Tattha **soṇḍe cāti** attano anurūpehi kaṅṭhakaṇṇapilandhanehi samannāgate āpānabhūmiṃ sajjetvā nisinne surāsoṇḍe ca. **Āḷāriketi** pūvapāke. **Sūdeti** bhattakārake. **Pāṇissareti** pāṇippahārena gāyante. **Kumbhathūniketi** ghaṭṭadaddarivādake.

1406: ‘Passa bherī mudingā ca, saṅkhā paṇavadindimā;  
Sabbāṅca tāḷavacaraṃ, maṇimhi passa nimmitaṃ.

1407: ‘Sammatālaṅca vīṇaṅca, naccagītaṃ suvāditaṃ;  
Tūriyatāḷitasanḷḷuṭṭhaṃ, maṇimhi passa nimmitaṃ.

**1408:** ‘Laṅghikā muṭṭhikā cettha, māyākārā ca sobhiyā;  
Vetālike ca jalle ca, maṇimhi passa nimmita’nti.

Tattha **sammataḷaṅcā**ti khadirādisammañceva kaṃsatāḷaṅca. **Tūriyatāḷitasāṅghuṭṭhanti** nānātūriyānaṃ tāḷitehi saṅghuṭṭhaṃ. **Muṭṭhikā**ti muṭṭhikamallā. **Sobhiyā**ti nagarasobhanā itthī ca sampannarūpā purisā ca. **Vetālike**ti vetālauṭṭhāpake. **Jalleti** massūni karonte nhāpīte.

**1409:** ‘Samajjā cettha vattanti, ākiṅṅā naranāribhi;  
Mañcātimañce bhūmiyo, maṇimhi passa nimmita’nti.

Tattha **mañcātimañceti** mañcānaṃ upari baddhamañce. **Bhūmiyoti** ramaṇīyā samajjabhūmiyo.

**1410:** ‘Passa malle samajjasmim, phoṭente diguṇaṃ bhujam;  
Nihate nihataṃe ca, maṇimhi passa nimmita’nti.

Tattha **samajjasminti** mallaraṅge. **Nihateti** nihanitvā jinitvā ṭhite. **Nihatamañeti** parājīte.

**1411:** ‘Passa pabbatapādesu, nānāmigagaṇā bahū;  
Sīhā byagghā varāhā ca, acchakokataracchayo.

**1412:** ‘Palāsādā gavajā ca, mahimsā rohitā rurū;  
Eṇeyyā ca varāhā ca, gaṇino nīkasūkarā.

**1413:** ‘Kadalimigā bahū citrā, biḷārā sasakaṇṭakā;  
Nānāmigagaṇākiṅṅaṃ, maṇimhi passa nimmita’nti.

Tattha **palāsādā**ti khaggamigā. ‘Palatā’tipi pāṭho. **Gavajā**ti gavayā. **Varāhā**ti ekā migajātikā. Tathā gaṇino ceva nīkasūkarā ca. **Bahū citrā**ti nānappakārā citrā migā. **Biḷārā**ti araṇṇābiḷārā. **Sasakaṇṭakā**ti sasā ca kaṇṭakā ca.

**1414:** ‘Najjāyo suppatitthāyo, soṇṇavālukasanthatā;  
Acchā savanti ambūni, macchagumbanisevitā.

**1415:** ‘Kumbhīlā makarā cettha, susumārā ca kacchapā;  
Pāṭhīnā pāvusā macchā, balajā muñcarohitā’nti.

Tattha **najjāyoti** nadiyo. **Soṇṇavālukasanthatā**ti suvaṇṇavālukāya santhatatalā. **Kumbhīlā**ti ime evarūpā jalacarā antonadiyaṃ vicaranti, tepi maṇimhi passāhīti.

**1416:** ‘Nānādi jagaṇākiṅṅā, nānādumagaṇāyutā;  
Veḷuriyakarodāyo, maṇimhi passa nimmita’nti.

Tattha **veḷuriyakarodāyoti** veḷuriyapāsāṇe paharivā saddaṃ karontiyo evarūpā najjāyoti.

**1417:** ‘Passettha pokkharāṇiyo, suvibhattā catuddisā;  
Nānādi jagaṇākiṅṅā, puthulomanisevitā.

**1418:** ‘Samantodakasampannaṃ, mahimā sāgarakuṇḍalaṃ;  
Upetaṃ vanarājehi, maṇimhi passa nimmita’nti.

Tattha **puthulomanisevitā**ti mahāmacchehi nisevitā. **Vanarājehī**ti vanarājīhi, ayameva vā pāṭho.

1419: ‘Purato videhe passa, goyāniye ca pacchato;  
Kuruyo jambudīpañca, mañimhi passa nimmitaṃ.

1420: ‘Passa candaṃ sūriyañca, obhāsante catuddisā;  
Sineruṃ anupariyante, mañimhi passa nimmitaṃ.

1421: ‘Sineruṃ himavantañca, sāgarañca mahītaṃ;  
Cattāro ca mahārāje, mañimhi passa nimmitaṃ.

1422: ‘Ārāme vanagumbe ca, pāṭiye ca siluccaye;  
Ramme kimpurisākiṇṇe, mañimhi passa nimmitaṃ.

1423: ‘Phārusakaṃ cittalataṃ, missakaṃ nandanaṃ vanam;  
Vejayantañca pāsādaṃ, mañimhi passa nimmitaṃ.

1424: ‘Sudhammaṃ tāvatiṃsañca, pārīchattañca pupphitaṃ;  
Erāvaṇaṃ nāgarājaṃ, mañimhi passa nimmitaṃ.

1425: ‘Passettha devakaññāyo, nabhā vijjurivuggatā;  
Nandane vicarantiyo, mañimhi passa nimmitaṃ.

1426: ‘Passettha devakaññāyo, devaputtapalobhinī;  
Devaputte ramamāne, mañimhi passa nimmita’nti.

Tattha **videheti** pubbavidehadīpaṃ. **Goyāniyeti** aparagoyānadīpaṃ. **Kuruyoti** uttarakuru ca dakkhiṇato jambudīpañca. **Anupariyanteti** ete candimasūriye sineruṃ anupariyāyante. **Pāṭiyeti** pattharivā ṭhapite viya piṭṭhipāsāṇe.

1427: ‘Parosahassapāsāde, veḷuriyaphalasanthate;  
Pajjalante ca vaṇṇena, mañimhi passa nimmitaṃ.

1428: ‘Tāvatiṃse ca yāme ca, tusite cāpi nimmite;  
Paranimmitavasavattino, mañimhi passa nimmitaṃ.

1429: ‘Passettha pokkharāṇiyo, vipasannodikā sucī;  
Mandālakehi sañchannā, padumuppalakehi cā’nti.

Tattha **parosahassanti** tāvatiṃsabhavane atirekasahassapāsāde.

1430: ‘Dasettha rājiyo setā, dasa nīlā manoramā;  
Cha piṅgalā pannarasa, haliddā ca catuddasa.

1431: ‘Vīsati tattha sovaṇṇā, vīsati rajatāmayā;  
Indagopakavaṇṇābhā, tāva dissanti tiṃsati.

1432: ‘Dasettha kāḷiyo chacca, mañjeṭṭhā pannavīsati;  
Missā bandhukapupphehi, nīluppalavicittikā.

1433: ‘Evaṃ sabbaṅgasampannaṃ, accimantaṃ pabhassaram;  
Odhisunkaṃ mahārāja, passa tvaṃ dvipaduttamā’nti.



Tattha **dasettha rājiyo setāti** etasmiṃ maṇikkhandhe dasa setarājiyo. **Cha piṅgalā pannarasāti** cha ca pannarasa cāti ekavīsati piṅgalarājiyo. **Haliddāti** haliddavaṇṇā catuddasa. **Tiṃsatīti** indagopakavaṇṇābhā tiṃsa rājiyo. **Dasa chaccāti** dasa ca cha ca soḷasa kālarājiyo. **Pannavīsati** pañcavīsati mañjeṭṭhavaṇṇā pabhassarā. **Missā bandhukapupphehīti** kālamañjeṭṭhavaṇṇarājiyo etehi missā vicittikā passa. Ettha hi kālarājiyo bandhujīvakaupphehi missā, mañjeṭṭharājiyo nīluppalehi vicittikā. **Odhisuṅkanti** suṅkakoṭṭhāsaṃ. Yo maṃ jūte jinissati, tassimaṃ suṅkakoṭṭhāsaṃ passāti vadati. Aṭṭhakathāyaṃ pana “hotu suṅkaṃ, mahārāja” tipi pāṭho. Tassattho – dvipaduttama passa tvaṃ imaṃ evarūpaṃ maṇikkhandhaṃ, idameva, mahārāja, suṅkaṃ hotu. Yo maṃ jūte jinissati, tassidaṃ bhavissati.

Maṇikaṇḍaṃ niṭṭhitaṃ.

Akkhakaṇḍaṃ

Evam vatvā puṇṇako “mahārāja, ahaṃ tāva jūte parājito imaṃ maṇiratanam dassāmi, tvaṃ pana kiṃ dassasi” ti āha. “Tāta, mama sarīraṇca deviṇca setacchattaṇca ṭhapetvā sesaṃ mama santakaṃ suṅkaṃ hotū” ti. “Tena hi, deva, mā cirāyi, ahaṃ dūrāgato, khippaṃ jūtamaṇḍalaṃ sajjāpehī” ti. Rājā amacce āṇāpesi. Te khippaṃ jūtamaṇḍalaṃ sajjetvā rañño varapotthakattharaṇaṃ santharivā sesarājūnañcāpi āsanāni paññāpetvā puṇṇakassapi patirūpaṃ āsanaṃ paññāpetvā rañño kālaṃ ārocayimsu. Tato puṇṇako rājānaṃ gāthāya ajjhabhāsi –

**1434:** ‘Upāgataṃ rāja mupehi lakkhaṃ, netādisaṃ maṇiratanam tavatthi;  
Dhammena jissāma asāhasena, jito ca no khippamavākarohī’ ti.

Tassattho – mahārāja, jūtasālāya kammaṃ upāgataṃ niṭṭhitaṃ, etādisaṃ maṇiratanam tava natthi, mā papañcaṃ karohi, upehi lakkhaṃ akkhehi kīḷanaṭṭhānaṃ upagaccha. Kīḷantā ca mayaṃ dhammena jissāma, dhammeneva no asāhasena jayo hotu. Sace pana tvaṃ jito bhavissasi, atha no khippamavākarohi, papañcaṃ akatvāva jito dhanam dadeyyāsīti vuttaṃ hoti.

Atha naṃ rājā “māṇava, tvaṃ maṃ ‘rājā’ ti mā bhāyi, dhammeneva no asāhasena jayaparājayo bhavissati” ti āha. Taṃ sutvā puṇṇako “amhākaṃ dhammeneva jayaparājayabhāvaṃ jānāthā” ti tepi rājāno sakkhiṃ karonto gāthamāha –

**1435:** ‘Pañcāla paccuggata sūrasena, macchā ca maddā saha kekakebhi;  
Passantu note asaṭhena yuddhaṃ, na no sabhāyaṃ na karonti kiñcī’ ti.

Tattha **paccuggatāti** uggatattā paññātattā pākaṭṭatā pañcālarājānamevālapati. **Macchā cāti** tvaṇca, samma maccharāja. **Maddāti** maddarāja. **Saha kekakebhīti** kekakebhinaṃmena janapadena saha vattamānakekakebhirāja, tvaṇca. Atha vā sahasaddaṃ “kekakebhī” ti padassa pacchato ṭhapetvā paccuggatasaddaṇca sūrasenavisesanaṃ katvā pañcālapaccuggatasūrasena macchā ca maddā ca kekakebhi saha sesarājāno cāti evamettha attho daṭṭhabbo. **Passantu noteti** amhākaṃ dvinnaṃ ete rājāno asaṭhena akkhayuddhaṃ passantu. **Na no sabhāyaṃ na karonti kiñcīti** ettha **noti** nipātamattaṃ, sabhāyaṃ kiñci sakkhiṃ na na karonti, khattiyepi brāhmaṇepi karontiyeva, tasmā sace kiñci akāraṇaṃ uppajjati, “na no sutam, na no diṭṭha” nti vattum na labhissatha, appamattā hothāti.

Evam yakkhasenāpati rājāno sakkhiṃ akāsi. Rājāpi ekasatarājaparivuto puṇṇakaṃ gahetvā jūtasālaṃ pāvīsi. Sabbepi patirūpāsanesu nisīdimsu, rajataphalake suvaṇṇapāsake ṭhapayimsu. Puṇṇako turitaturito āha “mahārāja, pāsakesu āyā nāma mālikaṃ sāvaṭṭaṃ bahulaṃ santibhadradāyo catuvīsati, tesu tumhe attano rucanakaṃ āyaṃ gaṇhathā” ti. Rājā “sādhū” ti bahulaṃ gaṇhi. Puṇṇako sāvaṭṭaṃ gaṇhi. Atha naṃ rājā āha “tena hi tāva māṇava, pāsake pātehī” ti. “Mahārāja, paṭhamaṃ mama vāro na pāpuṇāti, tumhe pātethā” ti vutte rājā “sādhū” ti sampaṭicchi. Tassa pana tatiye attabhāve

mātubhūtapubbā ārakkhadevatā, tassā ānubhāvena rājā jūte jināti. Sā tassa avidūre ʘhitā ahoṣi. Rājā devadhītaṃ anussarītvā jūtagītaṃ gāyanta imā gāthā āha –

“Sabbā nadī vaṅkagatī, sabbe kaṭṭhamayā vanā;  
Sabbitthiyo kare pāpaṃ, labhamāne nivātake. (jā. 2.21.308);

“Atha passatu maṃ amma, vijayaṃ me padissatu;  
Anukampāhi me amma, mahantaṃ jayamessatu.

“Devate tvajja rakkha devi, passa mā maṃ vibhāveyya;  
Anukampā patiṭṭhā ca, passa bhadrāni rakkhituṃ.

“Jambonadamayaṃ pāsaṃ, caturaṃsamatṭhaṅguli;  
Vibhāti parisamajjhe, sabbakāmadado bhava.

“Devate me jayaṃ dehi, passa maṃ appabhāgīnaṃ;  
Mātānukampako poso, sadā bhadrāni passati.

“Aṭṭhakaṃ mālikaṃ vuttaṃ, sāvaṭṭaṅga chakaṃ mataṃ;  
Catukkaṃ bahulaṃ ñeyyaṃ, dvibindusantibhadraṃ;  
Catuvīsati āyā ca, munindena pakāsītā”ti.

Rājā evaṃ jūtagītaṃ gāyītvā pāsake hatthena parivattētvā ākāse khiṭṭi. Puṇṇakassa ānubhāvena pāsakā rañño parājayāya bhassanti. Rājā jūtasippamhi atikusalatāya pāsake attano parājayāya bhassante ñatvā ākāseyeva saṅkaḍḍhanto gahetvā puna ākāse khiṭṭi. Dutiyampi attano parājayāya bhassante ñatvā tatheva aggahesi. Tato puṇṇako cintesi “ayaṃ rājā mādisena yakkhena saddhiṃ jūtaṃ kīlanto bhassamāne pāsake saṅkaḍḍhitvā gaṇhāti, kiṃ nu kho kāraṇa”nti. So olokento tassa ārakkhadevatāya ānubhāvaṃ ñatvā akkhīni ummīletvā kuddho viya naṃ olokesi. Sā bhītatasitā palāyītvā cakkavālapabbatamatthakaṃ patvā kampamānā oloketvā aṭṭhāsi. Rājā tatiyampi pāsake khiṭṭivā attano parājayāya bhassante ñatvāpi puṇṇakassānubhāvena hatthaṃ pasāretvā gaṇhituṃ nāsakkhi. Te rañño parājayāya patiṃsu. Athassa parājītabhāvaṃ ñatvā puṇṇako apphoṭetvā mahantena saddena “jītaṃ me”ti tikkhattuṃ sīhanādaṃ nadi. So saddo sakalajambudīpaṃ phari. Tamatthaṃ pakāsento satthā āha –

**1436:**“Te pāvisuṃ akkhamadena mattā, rājā kurūnaṃ puṇṇako cāpi yakkho;  
Rājā kalīṃ viccinamaggahesi, kaṭaṃ aggahī puṇṇako nāma yakkho.

**1437:**“Te tattha jūte ubhaye samāgate, raññaṃ sakāse sakhīnaṅga majjhe;  
Ajesi yakkho naravīraseṭṭhaṃ, tathappanādo tumulo babbhūvā”ti.

Tattha **pāvisunti** jūtasālaṃ pavisiṃsu. **Viccinanti** rājā catuvīsatiyā āyesu vicinanto kalīṃ parājayaggāhaṃ aggahesi. **Kaṭaṃ aggahīti** puṇṇako nāma yakkho jayaggāhaṃ gaṇhi. **Te tattha jūte ubhaye samāgateti** te tattha jūte samāgatā ubho jūtaṃ kīlīṃsūti attho. **Raññanti** atha tesāṃ ekasataraṅgūnaṃ sakāse avasesānaṅga sakhīnaṃ majjhe so yakkho naravīraseṭṭhaṃ rājānaṃ ajesi. **Tathappanādo tumulo babbhūvāti** tasmīṃ jūtamaṅḍale “rañño parājītabhāvaṃ jānātha, jītaṃ me, jītaṃ me”ti mahanto saddo ahoṣi.

Rājā parājīto anattamaṃ ahoṣi. Atha naṃ samassāsento puṇṇako gāthamāha –

**1438:**“Jayo mahārāja parājayo ca, āyūhataṃ aññatarassa hoti;  
Janinda jīnosi varaddhanaṃ, jīto ca me khippamavākarohī”ti.

Tattha **āyūhatanti** dvinnam vāyāmamānānam aññatarassa eva hoti, tasmā “parājītomhī”ti mā cintayi. **Jīnosīti** parihīnosi. **Varaddhanenāti** paramadhanena. **Khippamavākarohīti** khippam me jayam dhanam dehīti.

Atha nam rājā “gaṇha, tātā”ti vadanto gāthamāha –

**1439:**“Hatthī gavāssā maṇikuṇḍalā ca, yañcāpi mayham ratanam pathabyā;  
Gaṇhāhi kaccāna varam dhanānam, ādāya yenicchasi tena gacchā”ti.

Puṇṇako āha –

**1440:**“Hatthī gavāssā maṇikuṇḍalā ca, yañcāpi tuyham ratanam pathabyā;  
Tesaṃ varo vidhuro nāma kattā, so me jīto taṃ me avākarohī”ti.

Tattha **so me jīto taṃ meti** mayā hi tava vijite uttamaṃ ratanam jitaṃ, so ca sabbaratanānam varo vidhuro, tasmā, deva, so mayā jīto nāma hoti, taṃ me dehīti.

Rājā āha –

**1441:**“Attā ca me so saraṇam gatī ca, dīpo ca leṇo ca parāyaṇo ca;  
Asantuleyyo mama so dhanena, paṇena me sādiso esa kattā”ti.

Tattha **attā ca me soti** so mayham attā ca, mayā ca “attānam ṭhapetvā sesam dassāmī”ti vuttam, tasmā taṃ mā gaṇhi. Na kevalaṇca attāva, atha kho me so saraṇaṇca gati ca dīpo ca leṇo ca parāyaṇo ca. **Asantuleyyo mama so dhanenāti** sattavidhena ratanena saddhiṃ na tulettabboti.

Puṇṇako āha –

**1442:**“Ciraṃ vivādo mama tuyhañcassa, kāmaṇca pucchāma tameva gantvā;  
Esova no vivaratu etamattham, yaṃ vakkhatī hotu kathā ubhinna”nti.

Tattha **vivaratu etamatthanti** “so tava attā vā na vā”ti etamattham esova pakāsetu. **Hotu kathā ubhinnanti** yaṃ so vakkhati, sāyeva no ubhinnaṃ kathā hotu, taṃ pamāṇam hotūti attho.

Rājā āha –

**1443:**“Addhā hi saccam bhaṇasi, na ca māṇava sāhasam;  
Tameva gantvā pucchāma, tena tussāmubho janā”ti.

Tattha **na ca māṇava sāhasanti** mayham pasayha sāhasikavacanam na ca bhaṇasi.

Evam vatvā rājā ekasatarājāno puṇṇakaṇca gahetvā tuṭṭhamānaso vegena dhammasabham agamāsi. Paṇḍitopi āsanā oruyha rājānam vanditvā ekamantaṃ aṭṭhāsi. Atha puṇṇako mahāsattaṃ āmantetvā “paṇḍita, ‘tvaṃ dhamme ṭhito jīvitahetupi musāvādam na bhaṇasī’ti kittisaddo te sakalaloke phuṭo, aham pana te ajja dhamme ṭhitabhāvam jānissāmī”ti vatvā gāthamāha –

**1444:**“Saccam nu devā vidahū kurūnam, dhamme ṭhitaṃ vidhuraṃ nāmamaccaṃ;  
Dāsosi rañño uda vāsi ñāti, vidhuroti saṅkhā katamāsi loke”ti.

Tattha **saccam nu devā vidahū kurūnam, dhamme ṭhitaṃ vidhuraṃ nāmamaccaṃ** “kurūnam raṭṭhe vidhuro nāma amacco dhamme ṭhito jīvitahetupi musāvādam na bhaṇatī”ti evam devā vidahū

vidahanti kathenti pakāsenti, evaṃ vidahamānā te devā saccaṃ nu vidahanti, udāhu abhūtavādāyeveteti. **Vidhuroti saṅkhā katamāsi loketi** yā esā tava “vidhuro”ti loke saṅkhā paññatti, sā katamā āsi, tvaṃ pakāsehi, kiṃ nu rañño dāso nīcatarajātiko, udāhu samo vā uttaritaro vā ñātīti idaṃ tava me ācikkha, dāsosi rañño, uda vāsi ñātīti.

Atha mahāsatto “ayaṃ maṃ evaṃ pucchati, ahaṃ kho panetaṃ ‘rañño ñātī’tipi ‘rañño uttaritaro’tipi ‘rañño na kiñci homī’tipi saññāpetuṃ sakkomi, evaṃ santēpi imasmiṃ loke saccasamo avassayo nāma natthi, saccameva kathetuṃ vaṭṭatī”ti cintetvā “māṇava, nevāhaṃ rañño ñāti, na uttaritaro, catunnaṃ pana dāsānaṃ aññataro”ti dassetuṃ gāthādvayamāha –

**1445:** ‘Āmāyadāsāpi bhavanti heke, dhanena kītāpi bhavanti dāsā;  
Sayampi heke upayanti dāsā, bhayā paṇunnāpi bhavanti dāsā.

**1446:** ‘Ete narānaṃ caturōva dāsā, addhā hi yonito ahampi jāto;  
Bhavo ca rañño abhavo ca rañño, dāsāhaṃ devassa parampi gantvā;  
Dhammena maṃ māṇava tuyha dajjā”ti.

Tattha **āmāyadāsā**ti dāsiyā kucchimhi jātadāsā. **Sayampi heke upayanti dāsā**ti ye keci upaṭṭhākajātikā, sabbe te sayam dāsabhāvaṃ upagatā dāsā nāma. **Bhayā paṇunnā**ti rājabhayena vā corabhayena vā attano vasanaṭṭhānato paṇunnā karamarā hutvā paravisayaṃ gatāpi dāsāyeva nāma. **Addhā hi yonito ahampi jāto**ti māṇava, ekamseneva ahampi catūsu dāsayonīsu ekato sayam dāsayonito nibbattadāso. **Bhavo ca rañño abhavo ca rañño**ti rañño vuḍḍhi vā hotu avuḍḍhi vā, na sakkā mayā musā bhāsituṃ. **Parampī**ti dūraṃ gantvāpi ahaṃ devassa dāsoyeva. **Dajjā**ti maṃ rājā jayadhanena khaṇḍetvā tuyhaṃ dento dhammena sabhāvena dadeyyāti.

Taṃ sutvā puṇṇako haṭṭhatuṭṭho puna apphoṭetvā gāthamāha –

**1447:** ‘Ayaṃ dutīyo vijayo mamaṃjja, puṭṭho hi kattā vivarettha pañhaṃ;  
Adhammarūpo vata rājasetṭho, subhāsitaṃ nānujānāsi mayha”nti.

Tattha **rājasetṭho**ti ayaṃ rājasetṭho adhammarūpo vata. **Subhāsitaṃ**ti vidhurapaṇḍitena sukathitaṃ suvinicchitaṃ. **Nānujānāsi mayhanti**ti idānetaṃ vidhurapaṇḍitaṃ mayhaṃ kasmā nānujānāsi, kimatthaṃ na desīti vadati.

Taṃ sutvā rājā anattamano hutvā “paṇḍito mādisaṃ yasadāyakaṃ anoloketvā idāni diṭṭhaṃ māṇavakaṃ oloketi”ti mahāsattassa kujjhivā “māṇava, sace so dāso me bhavēyya, taṃ gahetvā gacchā”ti vatvā gāthamāha –

**1448:** ‘Evaṃ ce no so vivarettha pañhaṃ, dāsohamasmi na ca khosmi ñāti;  
Gaṇhāhi kaccāna varam dhanānaṃ, ādāya yenicchasi tena gacchā”ti.

Tattha **evaṃ ce no so vivarettha pañhanti** sace so amhākaṃ pañhaṃ “dāsohamasmi, na ca khosmi ñāti”ti evaṃ vivari ettha parisamaṇḍale, atha kiṃ acchasi, sakalaloke dhanānaṃ varam etaṃ gaṇha, gahetvā ca pana yena icchasi, tena gacchāti.

Akkhakaṇḍaṃ niṭṭhitaṃ.

Gharāvāsapañhā

Evañca pana vatvā rājā cintesi “paṇḍitaṃ gahetvā māṇavo yathārucci gamissati, tassa gatakālate paṭṭhāya mayhaṃ madhuradhammakathā dullabhā bhavissati, yaṃnūnāhaṃ imaṃ attano ṭhāne ṭhapetvā

alaṅkatadhammāsane nisīdapetvā gharāvāsapañhaṃ puccheyya’’nti. Atha naṃ rājā evamāha “paṇḍita, tumhākaṃ gatakāle mama madhuradhammakathā dullabhā bhavissati, alaṅkatadhammāsane nisīdapetvā attano ṭhāne ṭhatvā mayhaṃ gharāvāsapañhaṃ kathethā’’ti. So “sādhū’’ti sampatiḥchitvā alaṅkatadhammāsane nisīditvā rañña pañhaṃ puṭṭho vissajjesi. Tatrāyaṃ pañho –

**1449:** ‘Vidhura vasamānassa, gahaṭṭhassa sakaṃ gharaṃ;  
Khemā vutti kathaṃ assa, kathaṃ nu assa saṅgaho.

**1450:** ‘Abyābajjhaṃ kathaṃ assa, saccavādī ca māṇavo;  
Asmā lokā paraṃ lokam, kathaṃ pecca na socatī’’ti.

Tattha **khemā vutti kathaṃ assā**ti kathaṃ gharāvāsaṃ vasantassa gahaṭṭhassa khemā nibbhayā vutti bhaveyya. **Kathaṃ nu assa saṅgahoti** catubbidho saṅgahavatthusañkhāto saṅgaho tassa kathaṃ bhaveyya. **Abyābajjhanti** niddukhatā. **Saccavādī cāti** kathaṃ nu māṇavo saccavādī nāma bhaveyya. **Peccāti** paralokaṃ gantvā.

Taṃ sutvā paṇḍito rañño pañhaṃ kathesi. Tamatthaṃ pakāsento satthā āha –

**1451:** ‘Taṃ tattha gatimā dhitimā, matimā atthadassimā;  
Saṅkhātā sabbadhammānaṃ, vidhuro etadabravi.

**1452:** ‘Na sādharmaṇadārassa, na bhuñje sādumekako;  
Na seve lokāyatikaṃ, netam paññāya vaḍḍhanaṃ.

**1453:** ‘Sīlavā vattasampanno, appamatto vicakkhaṇo;  
Nivātavutti atthaddho, surato sakhilo mudu.

**1454:** ‘Saṅgahetā ca mittānaṃ, saṃvibhāgī vidhānavā;  
Tappeyya annapānena, sadā samaṇabrāhmaṇe.

**1455:** ‘Dhammakāmo sutādhāro, bhaveyya paripucchako;  
Sakkaccaṃ payirupāseyya, sīlavante bahussute.

**1456:** ‘Gharamāvasamānassa, gahaṭṭhassa sakaṃ gharaṃ;  
Khemā vutti siyā evaṃ, evaṃ nu assa saṅgaho.

**1457:** ‘Abyābajjhaṃ siyā evaṃ, saccavādī ca māṇavo;  
Asmā lokā paraṃ lokam, evaṃ pecca na socatī’’ti.

Tattha **taṃ tatthāti** bhikkhave, taṃ rājānaṃ tattha dhammasabhāyaṃ ñāṇagatiyā **gatimā**, abbochinnavīriyena **dhitimā**, bhūrisamāya vipulāya paññāya **matimā**, saṅhasukhumatthadassinā ñāṇena **atthadassimā**, paricchinditvā jānanañāṇasaṅkhātāya paññāya sabbadhammānaṃ **saṅkhātā**, vidhurapaṇḍito etaṃ “na sādharmaṇadārassa’’tiādivacanam abravi. Tattha yo paresaṃ dāresu aparajjhati, so sādharmaṇadāro nāma, tādiso na assa bhaveyya. **Na bhuñje sādumekakoti** sādurasam paṇītabhojanaṃ aññesaṃ adatvā ekakova na bhuñjeyya. **Lokāyatikanti** anathanissitaṃ saggamaggānaṃ adāyakaṃ aniyāyānikaṃ vitaṇḍasallāpaṃ lokāyatikavādaṃ na seveyya. **Netam paññāya vaḍḍhananti** na hi etaṃ lokāyatikaṃ paññāya vaḍḍhanaṃ. **Sīlavāti** akhaṇḍehi pañcahi sīlehi samannāgato. **Vattasampannoti** gharāvāsavattena vā rājavattena vā samannāgato. **Appamattoti** kusaladhammesu appamatto. **Nivātavuttīti** atimānaṃ akatvā nīcavutti ovādānusaṇipatiḥchako. **Atthaddhoti** thaddhammacchariyavirahito. **Suratoti** soraccena samannāgato. **Sakhiloti** pemaṇīyavacano. **Mudūti** kāyavācācittēhi aparuso.

**Saṅgahetā ca mittānanti** kalyāṇamittānaṃ saṅgahakaro. Dānādīsu yo yena saṅgahaṃ icchati, tassa teneva saṅgāhako. **Samvibhāgīti** dhammikasamaṇabrāhmaṇānañceva kapaṇaddhikavaṇibbakayācakādīnañca samvibhāgako. **Vidhānavāti** “imasmiṃ kāle kasituṃ vaṭṭati, imasmiṃ kāle vapituṃ vaṭṭati”ti evaṃ sabbakiccesu vidhānasampanno. **Tappeyyāti** gahitagahitabhājanāni pūretvā dadamāno tappeyya. **Dhammakāmoti** pavenidhammampi sucaritadhammampi kāmayamāno patthayamāno. **Sutādhāroti** sutassa ādhārabhūto. **Paripucchakoti** dhammikasamaṇabrāhmaṇe upasaṅkamtivā “kiṃ, bhante, kusala”ntiādivacanehi paripucchanasīlo. **Sakkaccanti** gāravena. **Evaṃ nu assa saṅgahoti** saṅgahopissa evaṃ kato nāma bhaveyya. **Saccavādīti** evaṃ paṭipanno yeva sabhāvavādī nāma siyā.

Evaṃ mahāsatto rañño gharāvāsapañhaṃ kathetvā pallankā oruyha rājānaṃ vandi. Rājāpissa mahāsakkāraṃ katvā ekasatarājūhi parivuto attano nivesanameva gato.

Gharāvāsapañhā niṭṭhitā.

Lakkhaṇakaṇḍaṃ

Mahāsatto pana paṭinivatto. Atha naṃ puṇṇako āha –

**1458:**“Ehi dāni gamissāma, dinno no issarena me;  
Mamevatthaṃ paṭipajja, esa dhammo sanantano”ti.

Tattha **dinno noti** ettha **noti** nipātamattaṃ, tvaṃ issarena mayhaṃ dinnoti attho. **Sanantanoti** mama atthaṃ paṭipajjantena hi tayā attano sāmikassa attho paṭipanno hoti. Yañcetaṃ sāmikassa atthakaraṇaṃ nāma, esa dhammo sanantano porāṇakapaṇḍitānaṃ sabhāvoti.

Vidhurapaṇḍito āha –

**1459:**“Jānāmi māṇava tayāhamasmi, dinnohamasmi tava issarena;  
Tīhañca taṃ vāsayemu agāre, yenaddhunā anusāsemu putte”ti.

Tattha **tayāhamasmīti** tayā laddhohamasmiṃ jānāmi, labhantena ca na aññathā laddho. **Dinnohamasmi tava issarenāti** mama issarena raññā ahaṃ tava dinno. **Tīhaṃ cāti** māṇava, ahaṃ tava bahūpakāro, rājānaṃ anoloketvā saccameva kathesiṃ, tenāhaṃ tayā laddho, tvaṃ me mahantaguṇabhāvaṃ jānāhi, mayaṃ tūṇipi divasāni attano agāre vāsemu, tasmā yenaddhunā yattakena kālena mayaṃ puttādāre anusāsemu, taṃ kālaṃ adhivāsehi.

Taṃ sutvā puṇṇako “saccaṃ paṇḍito āha, bahūpakāro esa mama, ‘sattāhampi aḍḍhamāsampi nisīdāhi”ti vutte adhivāsetabbamevā”ti cintetvā gāthamāha –

**1460:**“Taṃ me tathā hotu vasemu tīhaṃ, kurutaṃ bhavajja gharesu kiccaṃ;  
Anusāsataṃ puttadāre bhavajja, yathā tayī pecca sukhī bhaveyyā”ti.

Tattha **taṃ meti** yaṃ tvaṃ vadesi, sabbaṃ taṃ mama tathā hotu. **Bhavajjāti** bhavaṃ ajja paṭṭhāya tīhaṃ anusāsatu. **Tayī peccāti** yathā tayi gate pacchā tava puttadāro sukhī bhaveyya, evaṃ anusāsatu.

Evaṃ vatvā puṇṇako mahāsattena saddhiṃ yeva tassa nivesanaṃ pāvīsi. Tamatthaṃ pakāsento satthā āha –

**1461:**“Sādhūti vatvāna pahūtakāmo, pakkāmi yakkho vidhurena saddhiṃ;  
Taṃ kuñjarajāññahayānuciṇṇaṃ, pāvekkhi antepuramariyasetṭho”ti.

Tattha **pahūtakā**moti mahābhogo. **Kuñjarājaññahayānuciñṇanti** kuñjarehi ca ājaññahayehi ca anuciñṇaṃ paripuñṇaṃ. **Ariyasetṭhoti** ācāraariyesu uttamo puñṇako yakkho paṇḍitassa antepuraṃ pāvīsi.

Mahāsattassa pana tiñṇaṃ utūnaṃ atthāya tayo pāsādā ahesuṃ. Tesu eko koñco nāma, eko mayūro nāma, eko piyaketo nāma. Te sandhāya ayaṃ gāthā vuttā –

**1462:** ‘Koñcaṃ mayūrañca piyañca ketam, upāgamī tattha surammarūpaṃ;  
Pahūtabhakkhaṃ bahuannapānaṃ, masakkasāraṃ viya vāsavassā’ ti.

Tattha **tatthāti** tesu tīsu pāsādesu yattha tasmiṃ samaye attanā vasati, taṃ surammarūpaṃ pāsādaṃ puñṇakaṃ ādāya upāgamī.

So upagantvā ca pana alaṅkatapāsādassa sattamāya bhūmiyā sayanagabbhañceva mahātalañca sajjāpetvā sirisayanaṃ paññāpetvā sabbam annapānādividhiṃ upaṭṭhapetvā devakaññāyo viya pañcasatā itthiyo ‘‘imā te pādapariārikā hontu, anukkaṅṭhanto idha vasāhī’’ ti tassa niyyādetvā attano vasaṇaṭṭhānaṃ gato. Tassa gatakāle tā itthiyo nānātūriyāni gahetvā puñṇakassa paricariyāya naccādīni paṭṭhapesuṃ. Tamatthaṃ pakāsento satthā āha –

**1463:** ‘Tattha naccanti gāyanti, avhayanti varāvaram;  
Accharā viya devesu, nāriyo samalaṅkatā’ ti.

Tattha **avhayanti varāvaranti** varato varaṃ naccañca gītañca karontiyo pakkosanti.

**1464:** ‘Samaṅgikatvā pamadāhi yakkhaṃ, annena pānena ca dhammapālo;  
Atthatthamevānuvicintayanto, pāvekkhi bhariyāya tadā sakāse’’ ti.

Tattha **pamadāhīti** pamadāhi ceva annapānehi ca samaṅgikatvā. **Dhammapāloti** dhammassa pālako gopako. **Atthatthamevāti** atthabhūtameva atthaṃ. **Bhariyāyāti** sabbajetṭhikāya bhariyāya.

**1465:** ‘Taṃ candanagandharasānulittaṃ, suvaṇṇajambonadanikkhasādīsaṃ;  
Bhariyaṃvacā ‘ehi suṇohi bhoti, puttāni āmantaya tambanette’’ ti.

Tattha **bhariyaṃvacāti** jetṭhabhariyaṃ avaca. **Āmantayāti** pakkosa.

**1466:** ‘Sutvāna vākyam patino anujjā, suṇisaṃ vaca tambanakhim sunettaṃ;  
‘Āmantaya vammadharāni cete, puttāni indīvarapupphasāme’’ ti.

Tattha **anujjāti** evaṃnāmikā. **Suṇisaṃvacā tambanakhim sunettanti** sā tassa vacanaṃ sutvā assumukhī rodamañā ‘‘sayam gantvā putte pakkosituṃ ayuttaṃ, suṇisaṃ pesessāmī’’ ti tassā nivāsaṭṭhānaṃ gantvā tambanakhim sunettaṃ suṇisaṃ avaca. **Vammadharānīti** vammadhare sūre, samattheti attho, ābharaṇabhaṇḍameva vā idha ‘‘vamma’’nti adhippetam, tasmā ābharaṇadharetipi attho. **Ceteti** taṃ nāmenālapati, **puttānīti** mama putte ca dhītarō ca. **Indīvarapupphasāmeti** taṃ ālapati.

Sā ‘‘sādhū’’ti sampaṭicchitvā pāsādā oruyha anuvaritvā ‘‘pitā vo ovādaṃ dātukāmo pakkosati, idaṃ kira vo tassa pacchimadassana’’nti sabbamevassa suhadajanañca puttadhītarō ca sannipātesi. Dhammapālakumāro pana taṃ vacanaṃ sutvāva rodanto kaniṭṭhabhātikagaṇaparivuto pitu santikaṃ agamāsi. Paṇḍito te disvāva sakabhāvena saṅṭhātuṃ asakkonto assupuñṇehi nettehi ālīngitvā sīse cumbitvā jetṭhaputtaṃ muhuttaṃ hadaye nipajjāpetvā hadayā otāretvā sirigabbhato nikkhamma mahātale pallaṅkamajjhe nisīditvā puttasaḥassassa ovādaṃ adāsi. Tamatthaṃ pakāsento satthā āha –

1467: ‘Te āgate muddhani dhammapālo, cumbitvā putte avikampamāno;  
Āmantayitvāna avoca vākyam, dinnāham raññā idha mānavassa.

1468: ‘Tassajjaham attasukhī vidheyyo, ādāya yenicchati tena gacchati;  
Ahañca vo sāsītumāgatosmi, katham aham aparittāya gacche.

1469: ‘Sace vo rājā kururaṭṭhavāsī, janasandho puccheyya pahūtakāmo;  
Kimābhijānātha pure purāṇam, kiṃ vo pitā puratthā.

1470: ‘Samāsanā hotha mayāva sabbe, konīdha rañño abbhatiko manusso;  
Tamañjalim kariya vadetha evam, mā hevaṃ deva na hi esa dhammo;  
Viyaggharājassa nihīnajacco, samāsano deva katham bhaveyyā’ ti.

Tattha **dhammapāloti** mahāsatto. **Dinnāhanti** aham jayadhanena khaṇḍetvā raññā dinno. **Tassajjaham attasukhī vidheyoti** ajja paṭṭhāya tīhamattam aham iminā attano sukkena attasukhī, tato param pana tassa mānavassāham vidheyo homi. So hi ito catutthe divase ekamsena mam ādāya yatthicchati, tattha gacchati. **Aparittāyāti** tumhākam parittam akatvā katham gaccheyyanti anusāsītum āgatosmi. **Janasandhoti** mittabandhanena mittajanassa sandhānakaro. **Pure purāṇanti** ito pubbe tumhe kiṃ purāṇakāraṇam abhijānātha. **Anusāseti** anusāsi. Evaṃ tumhe raññā puṭṭhā ‘‘amhākam pitā imañcīmañca ovādam adāsī’’ ti katheyātha. **Samāsanā hothāti** sace vo rājā mayā dinnassa ovādassa kathitakāle ‘‘etha tumhe, ajja mayā saddhim samāsanā hotha, idha rājakule tumhehi añño ko nu rañño abbhatiko manusso’’ ti attano āsane nisīdāpeyya, atha tumhe añjalim katvā tam rājānam evam vadeyyātha ‘‘deva, evam mā avaca. Na hi amhākam esapaveṇidhammo. **Viyaggharājassa** kesarasīhassa nihīnajacco jarasiṅgālo, deva, katham samāsano bhaveyya. Yathā siṅgālo sīhassa samāsano na hoti, tatheva mayam tumhāka’’ ti.

Imam panassa katham sutvā puttadhītarō ca ñātisuhajjādayo ca dāsakammakaraporisā ca te sabbe sakabhāvena saṅghātum asakkontā mahāviraṇam viraviṇsu. Tesam mahāsatto saññāpesi.

Lakkhaṇakaṇḍam niṭṭhitam.

Rājavasatikaṇḍa

Atha ne paṇḍito puttadhītarō ca ñātayo ca upasaṅkamitvā tuṇhībhūte disvā ‘‘tātā, mā cintayittha, sabbe saṅkhārā aniccā, yaso nāma vipattipariyosāno, apica tumhākam rājavasatiṃ nāma yasapaṭilābhakāraṇam kathessāmi, tam ekaggacittā suṇāthā’’ ti buddhalīlāya rājavasatiṃ nāma paṭṭhapesi. Tamattham pakāsento sathā āha –

1471: ‘So ca putte amacce ca, ñātayo suhadajjane;  
Alīnamanasaṅkappo, vidhuro etadabravi.

1472: ‘Ethayyo rājavasatiṃ, nisīditvā suṇātha me;  
Yathā rājakulam patto, yasaṃ poso nigacchati’’ ti.

Tattha **suhadajjaneti** suhadayajane. **Ethayoti** etha, ayyo. Piyasamudācārena putte ālapati. **Rājavasatinti** mayā vuccamānam rājapāricariyam suṇātha. **Yathāti** yena kāraṇena rājakulam patto upasaṅkamanto rañño santike caranto poso yasaṃ nigacchati labhati, tam kāraṇam suṇāthāti attho.

1473: ‘Na hi rājakulam patto, aññāto labhate yasaṃ;  
Nāsūro nāpi dummedho, nappamatto kudācanam.



1474: ‘Yadāssa sīlaṃ paññañca, soceyyaṃ cādhigacchati;  
Atha vissasate tyamhi, guyhañcassa na rakkhati’ ti.

Tattha **aññātoti** apākaṭaḡuṇo aviditakammāvadāno. **Nāsūroti** na asūro bhīrukajātiko. **Yadāssa sīlanti** yadā assa sevakassa rājā sīlañca paññañca soceyyañca adhigacchati, ācārasampattiñca ñāṇabalañca sucibhāvañca jānāti. **Atha vissasate tyamhīti** atha rājā tamhi vissasate vissāsaṃ karoti, attano guyhañcassa na rakkhati na gūhati.

1475: ‘Tulā yathā paggahitā, samadaṇḍā sudhāritā;  
Ajjhīṭṭho na vikampeyya, sa rājavasatiṃ vase.

1476: ‘Tulā yathā paggahitā, samadaṇḍā sudhāritā;  
Sabbāni abhisambhonto, sa rājavasatiṃ vase’ ti.

Tattha **tulā yathāti** yathā eṣā vuttappakārā tulā na onamati na unnamati, evameva rājasevako kismiñcīdeva kamme raññā ‘idaṃ nāma karohī’ ti ajjhīṭṭho āṇatto chandādiagativasena na vikampeyya, sabbakiccesu paggahitatulā viya samo bhavēyya. **Sa rājavasatiṃ** so evarūpo sevako rājakule vāsaṃ vaseyya, rājānaṃ paricareyya, evaṃ paricaranto pana yasaṃ labheyyāti attho. **Sabbāni abhisambhontoti** sabbāni rājakiccāni karonto.

1477: ‘Divā vā yadi vā rattim, rājakiccesu paṇḍito;  
Ajjhīṭṭho na vikampeyya, sa rājavasatiṃ vase.

1478: ‘Divā vā yadi vā rattim, rājakiccesu paṇḍito;  
Sabbāni abhisambhonto, sa rājavasatiṃ vase.

1479: ‘Yo cassa sukato maggo, rañño suppaṭiyādito;  
Na tena vutto gacchēyya, sa rājavasatiṃ vase’ ti.

Tattha **na vikampeyyāti** avikampamāno tāni kiccāni kareyya. **Yo cassāti** yo ca rañño gamanamaggo sukato assa **suppaṭiyādito** sumaṇḍito, ‘iminā maggena gacchā’ ti vuttopi tena na gacchēyya.

1480: ‘Na rañño sadisaṃ bhuñje, kāmabhoge kudācanaṃ;  
Sabbattha pacchato gacche, sa rājavasatiṃ vase.

1481: ‘Na rañño sadisaṃ vatthaṃ, na mālaṃ na vilepanaṃ;  
Ākappaṃ sarakuttiṃ vā, na rañño sadisaṃācare;  
Aññaṃ kareyya ākappaṃ, sa rājavasatiṃ vase’ ti.

Tattha **na raññoti** rañño kāmabhogena samaṃ kāmabhogaṃ na bhuñjēyya. Tādisassa hi rājā kujjhāti. **Sabbatthāti** sabbesu rūpādīsu kāmaguṇesu rañño pacchatova gacchēyya, hīnataramēva seveyyāti attho. **Aññaṃ kareyyāti** rañño ākappato sarakuttito ca aññaṃ kareyya.

1482: ‘Kīḷe rājā amaccehi, bhariyāhi parivārito;  
Nāmacco rājabharyāsu, bhāvaṃ kubbetha paṇḍito.

1483: ‘Anuddhato acapalo, nipako saṃvutindriyo;  
Manopaṇidhisampanno, sa rājavasatiṃ vase’ ti.

Tattha **bhāvanti** vissāsavasena adhippāyaṃ. **Acapaloti** amaṇḍanasīlo. **Nipakoti** paripakkañāṇo.

**Samvutindriyoti** pihitachalindriyo rañño vā aṅgapaccaṅgāni orodhe vāssa na olokeyya.  
**Manopañdhisampannoti** acapalena suṭṭhu ṭhapitena cittena samannāgato.

1484: ‘Nāssa bhariyāhi kīḷeyya, na manteyya rahogato;  
Nāssa kosā dhanam gaṇhe, sa rājavasatiṃ vase.

1485: ‘Na niddam bahu maññeyya, na madāya suram pive;  
Nāssa dāye mige haññe, sa rājavasatiṃ vase.

1486: ‘Nāssa pīṭham na pallaṅkam, na koccham na nāvam ratham;  
Sammatomhīti ārūhe, sa rājavasatiṃ vase.

1487: ‘Nātidūre bhaje rañño, naccāsanne vicakkhaṇo;  
Sammukhañcassa tiṭṭheyya, sandissanto sabhattuno.

1488: ‘Na ve rājā sakhā hoti, na rājā hoti methuno;  
Khippam kujjhanti rājāno, sūkenakkhīva ghaṭṭitam.

1489: ‘Na pūjito maññamāno, medhāvī paṇḍito naro;  
Pharusam patimanteyya, rājānam parisamgata’nti.

Tattha **na manteyyāti** tassa rañño bhariyāhi saddhiṃ neva kīḷeyya, na raho manteyya. **Kosā dhananti** rañño kosā dhanam thenetvā na gaṇheyya. **Na madāyāti** tātā, rājasevako nāma madatthāya suram na piveyya. **Nāssa dāye mige**ti assa rañño dinnābhaye mige na haññeyya. **Kocchanti** bhaddapīṭham. **Sammatomhīti** aham sammato hutvā evam karomīti na āruheyya. **Sammukhañcassa tiṭṭheyyāti** assa rañño purato khuddakamahantakathāsavanatṭhāne tiṭṭheyya. **Sandissanto sabhattunoti** yo rājasevako tassa bhattuno dassanatṭhāne tiṭṭheyya. **Sūkenāti** akkhihi patitena vīhisūkādīnā ghaṭṭitam akkhi pakatisabhāvam jahantam yathā kujjhanti nāma, evam kujjhanti, na tesu vissāso kātabbo. **Pūjito maññamānoti** aham rājapūjītomhīti maññamāno. **Pharusam patimanteyyāti** yena so kujjhanti, tathārūpam na manteyya.

1490: ‘Laddhadvāro labhe dvāram, neva rājūsu vissase;  
Aggīva samyato tiṭṭhe, sa rājavasatiṃ vase.

1491: ‘Puttam vā bhātaram vā sam, sampaggañhāti khattiyo;  
Gāmehi nigamehi vā, raṭṭhehi janapadehi vā;  
Tuṇhībhūto upekkheyya, na bhaṇe chekapāpaka’nti.

Tattha **laddhadvāro labhe dvāranti** aham nippaṭihāro laddhadvāroti appaṭihāretvā na paviseyya, punapi dvāram labheyya, paṭihāretvāva paviseyyāti attho. **Samyatoti** appamatto hutvā. **Bhātaram vā santi** sakam bhātaram vā. **Sampaggañhātīti** ‘‘asukagāmaṃ vā asukanigamaṃ vā assa demā’’ti yadā sevakehi saddhiṃ katheti. **Na bhaṇe chekapāpakanti** tadā guṇam vā aguṇam vā na bhaṇeyya.

1492: ‘Hatthārohe anīkaṭṭhe, rathike pattikārake;  
Tesaṃ kammāvadānena, rājā vaḍḍheti vetanam;  
Na tesam antarā gacche, sa rājavasatiṃ vase.

1493: ‘Cāpovūndaro dhīro, vaṃsovāpi pakampaye;  
Paṭilomaṃ na vatteyya, sa rājavasatiṃ vase.

1494: ‘Cāpovūndaro assa, macchovassa ajivhavā;

Appāsī nipako sūro, sa rājavasatiṃ vase’’ti.

Tattha **na tesam antarā gaccheti** tesam lābhassa antarā na gacche, antarāyaṃ na kareyya. **Vamsovāpīti** yathā vamsagumbato uggatavaṃso vātena pahaṭakāle pakampati, evaṃ raññā kathitakāle pakampeyya. **Cāpovūnudaroti** yathā cāpo mahodaro na hoti, evaṃ mahodaro na siyā. **Ajivhavāti** yathā maccho ajivhatāya na katheti, tathā sevako mandakathatāya ajivhavā bhaveyya. **Appāsīti** bhojanamattaññū.

1495: ‘Na bālhaṃ itthiṃ gaccheyya, sampassaṃ tejasāṅkhayaṃ;  
Kāsaṃ sāsaṃ daraṃ bālyaṃ, khīṇamedho nigacchati.

1496: ‘Nātivelam pabhāseyya, na tuṅhī sabbadā siyā;  
Avikiṇṇaṃ mitaṃ vācaṃ, patte kāle udīraye.

1497: ‘Akkodhano asaṅghaṭṭo, sacco saṅho apesuṇo;  
Samphaṃ giraṃ na bhāseyya, sa rājavasatiṃ vase.

1498: ‘Mātāpettibharo assa, kule jeṭṭhāpacāyiko;  
Saṅho sakhilasambhāso, sa rājavasatiṃ vase’’ti.

Tattha **na bālhanti** punappunaṃ kilesavasena na gaccheyya. **Tejasāṅkhayanti** evaṃ gacchanto hi puriso tejasāṅkhayaṃ gacchatī pāpuṇāti, taṃ sampassanto bālhaṃ na gaccheyya. **Daranti** kāyadarathaṃ. **Bālyanti** dubbalabhāvaṃ. **Khīṇamedhoti** punappunaṃ kilesarativasena khīṇapañño puriso ete kāsādayo nigacchati. **Nātivelanti** tātā rājūnaṃ santike pamāṇātikantaṃ na bhāseyya. **Patte kāleti** attano vacanakāle sampatte. **Asaṅghaṭṭoti** paraṃ asaṅghaṭṭento. **Samphanti** niratthakaṃ. **Giranti** vacanaṃ.

1499: ‘Vinīto sippavā danto, katatto niyato mudu;  
Appamatto suci dakkho, sa rājavasatiṃ vase.

1500: ‘Nivātavutti vuddhesu, sappatisso sagāravo;  
Surato sukhasaṃvāso, sa rājavasatiṃ vase.

1501: ‘Ārakā parivajjeyya, sahituṃ pahitaṃ janaṃ;  
Bhattāraññevudikkheyya, na ca aññassa rājino’’ti.

Tattha **vinītoti** ācārasampanno. **Sippavāti** attano kule sikkhitabbasippena samannāgato. **Dantoti** chasu dvāresu nibbisevano. **Katattoti** sampāditatto. **Niyatoti** yasādīni nissāya acalabhāvo. **Mudūti** anatiṃānī. **Appamattoti** kattabbakiccesu pamādarahito. **Dakkhoti** upaṭṭhāne cheko. **Nivātavuttīti** nīcavutti. **Sukhasaṃvāsoti** garusaṃvāsasīlo. **Sahituṃ patitanti** pararājūhi sakarañño santikaṃ guyharakkhaṇavasena vā paṭicchannapākaṭakaraṇavasena vā pesitaṃ. Tathārūpena hi saddhiṃ kathentopi rañño sammukhāva katheyya. **Bhattāraññevudikkheyyāti** attano sāmikameva olokeyya. **Na ca aññassa rājino**ti aññassa rañño santako na bhaveyya.

1502: ‘Samaṇe brāhmaṇe cāpi, sīlavante bahussute;  
Sakkaccaṃ payirupāseyya, sa rājavasatiṃ vase.

1503: ‘Samaṇe brāhmaṇe cāpi, sīlavante bahussute;  
Sakkaccaṃ anuvāseyya, sa rājavasatiṃ vase.

1504: ‘Samaṇe brāhmaṇe cāpi, sīlavante bahussute;  
Tappeyya annapānena, sa rājavasatiṃ vase.

**1505:** ‘‘Samaṇe brāhmaṇe cāpi, sīlavante bahussute;  
Āsajja paññe sevetha, ākaṅkhaṃ vuddhimattano’’ti.

Tattha **sakkaccaṃ payirupāseyyāti** gāravena punappunaṃ upasaṅkameyya. **Anuvāseyyāti** uposathavāsaṃ vasanto anuvatteyya. **Tappeyyāti** yāvadatthaṃ dānena tappeyya. **Āsajjāti** upasaṅkamitvā. **Paññeti** paṇḍite, āsajjapaññe vā, asajjamānapaññeti attho.

**1506:** ‘‘Dinnapubbaṃ na hāpeyya, dānaṃ samaṇabrāhmaṇe;  
Na ca kiñci nivāreyya, dānakāle vaṇibbake.

**1507:** ‘‘Paññavā buddhisampanno, vidhānavidhikovidō;  
Kālaññū samayaññū ca, sa rājavasatiṃ vase.

**1508:** ‘‘Uṭṭhātā kammadheyyesu, appamatto vicakkhaṇo;  
Susamvihitakammanto, sa rājavasatiṃ vase’’ti.

Tattha **dinnapubbanti** pakatipaṭiyattaṃ dānavattaṃ. **Samaṇabrāhmaṇeti** samaṇe vā brāhmaṇe vā. **Vaṇibbake**ti dānakāle vaṇibbake āgate disvā kiñci na nivāreyya. **Paññavāti** vicāraṇapaññāya yutto. **Buddhisampannoti** avekallabuddhisampanno. **Vidhānavidhikovidoti** nānappakāresu dāsakammakaraporisādīnaṃ saṃvidahanakoṭṭhāsesu cheko. **Kālaññūti** ‘‘ayaṃ dānaṃ dātuṃ, ayaṃ sīlaṃ rakkhituṃ, ayaṃ uposathakammaṃ kātuṃ kālo’’ti jāneyya. **Samayaññūti** ‘‘ayaṃ kasanāsamayo, ayaṃ vapanāsamayo, ayaṃ vohārasamayo, ayaṃ upaṭṭhānasamayo’’ti jāneyya. **Kammadheyyesūti** attano kattabbakammesu.

**1509:** ‘‘Khalam sālam pasuṃ khettaṃ, gantā cassa abhikkhaṇaṃ;  
Mitaṃ dhaññaṃ nidhāpeyya, mitaṃva pācaye ghare.

**1510:** ‘‘Puttaṃ vā bhātaraṃ vā saṃ, sīlesu asamāhitaṃ;  
Anaṅgavā hi te bālā, yathā petā tatheva te;  
Coḷaṅca nesaṃ piṇḍaṅca, āsīnānaṃ padāpaye.

**1511:** ‘‘Dāse kammakare pesse, sīlesu susamāhite;  
Dakkhe uṭṭhānasampanne, ādhipaccamhi ṭhāpaye’’ti.

Tattha **pasuṃ khettaṃ**ti gokulañceva sassaṭṭhānaṅca. **Gantāti** gamanasīlo. **Mitanti** minitvā ettakanti ñatvā koṭṭhesu nidhāpeyya. **Ghareti** gharepi parijanaṃ gaṇetvā mitameva pacāpeyya. **Sīlesu asamāhitanti** evarūpaṃ dussīlaṃ anācāraṃ kismiñci ādhipaccaṭṭhāne na ṭhapeyyāti attho. **Anaṅgavā hi te bālāti** ‘‘aṅgamaṃ manussānaṃ, bhātā loke pavuccatī’’ti (jā. 1.4.58) kiñcāpi jeṭṭhakaniṭṭhabhātaro aṅgasamānatāya ‘‘aṅga’’nti vuttā, ime pana dussīlā, tasmā aṅgasamānā na honti. Yathā pana susāne chaḍḍitā petā matā, tatheva te. Tasmā tādisā ādhipaccaṭṭhāne na ṭhapetabbā. Kuṭumbaṅhi te vināsenti, vīnaṭṭhakuṭumbassa ca daliddassa rājavasati nāma na sampajjati. **Āsīnānanti** āgantvā nisinnānaṃ puttabhātānaṃ matasattānaṃ matakabhattaṃ viya dento ghāsacchādanamattameva padāpeyya. **Uṭṭhānasampanneti** uṭṭhānavīriyena samannāgate.

**1512:** ‘‘Sīlavā ca alolo ca, anurakkho ca rājino;  
Āvī raho hito tassa, sa rājavasatiṃ vase.

**1513:** ‘‘Chandaññū rājino cassa, cittaṭṭho assa rājino;  
Asaṅkusakavuttiṃssa, sa rājavasatiṃ vase.

**1514:** ‘‘Ucchādaye ca nhāpaye, dhove pāde adhosiraṃ;

Āhatopi na kuppeyya, sa rājavasatiṃ vase’’ti.

Tattha **aloloti** aluddho. **Cittatṭhoti** citte ṭhito, rājacittavasikoti attho. **Asañkusakavuttissāti** appaṭilomavutti assa. **Adhosiranti** pāde dhovantopi adhosiraṃ katvā heṭṭhāmukhova dhoveyya, na rañño mukhaṃ ullokeyyāti attho.

**1515:** ‘Kumbhampañjaliṃ kariyā, cāṭaṅcāpi padakkhiṇaṃ;  
Kimeva sabbakāmānaṃ, dātāraṃ dhīramuttamaṃ.

**1516:** ‘Yo deti sayanaṃ vatthaṃ, yānaṃ āvasathaṃ gharaṃ;  
Pajjunnoriva bhūtāni, bhogehi abhivassati.

**1517:** ‘Esayyo rājavasati, vattamāno yathā naro;  
Ārādhayati rājānaṃ, pūjaṃ labhati bhattusū’’ti.

Tattha **kumbhampañjaliṃ kariyā, cāṭaṅcāpi padakkhiṇanti** vuddhiṃ paccāsīsanto puriso udakapūritaṃ kumbhaṃ disvā tassa añjaliṃ kareyya, cāṭaṅca sakuṇaṃ padakkhiṇaṃ kareyya. Añjaliṃ vā padakkhiṇaṃ vā karontassa te kiñci dātuṃ na sakkonti. **Kimevāti** yo pana sabbakāmānaṃ dātā dhīro ca, taṃ rājānaṃ kiṃkāraṇā na namasseyya. Rājāyeva hi namassitabbo ca ārādhetaṃ ca. **Pajjunnorivāti** meggho viya. **Esayyo rājavasatīti** ayyo yā ayaṃ mayā kathitā, esā rājavasati nāma rājasevakānaṃ anusāsani. **Yathāti** yāya rājavasatiyā vattamāno naro rājānaṃ ārādheti, rājūnaṅca santikā pūjaṃ labhati, sā esāti.

Evamaṃ asamadhuro vidhuraṇḍito buddhalīlāya rājavasatiṃ kathesi;

Rājavasatikaṇḍaṃ niṭṭhitaṃ.

Antarapeyyālaṃ

Evamaṃ puttadārañātimittasuhajjādayo anusāsantasseva tassa tayo divasā jātā. So divasassa pāripūriṃ ñatvā pātova nhatvā nānaggarasabhojanaṃ bhuñjitvā ‘‘rājānaṃ apaloketvā māṇavena saddhiṃ gamissāmi’’ti ñātigaṇaparivuto rājanivesanaṃ gantvā rājānaṃ vanditvā ekamantaṃ ṭhito vattabbayuttakaṃ vacanaṃ avoca. Tamatthaṃ pakāsento satthā āha –

**1518:** ‘Evamaṃ samanūsāsivā, ñātisaṅghaṃ vicakkhaṇo;  
Parikiṇṇo suhadehi, rājānamupasaṅkamaṃ.

**1519:** ‘Vanditvā sirasā pāde, katvā ca naṃ padakkhiṇaṃ;  
Vidhuro avaca rājānaṃ, paggahetvāna añjaliṃ.

**1520:** ‘‘Ayaṃ maṃ māṇavo neti, kattukāmo yathāmati;  
Ñātīnatthaṃ pavakkhāmi, taṃ suṇohi arindamaṃ.

**1521:** ‘Putte ca me udikkhesi, yaṅca maññaṃ ghare dhanamaṃ;  
Yathā pecca na hāyetha, ñātisaṅgho mayī gate.

**1522:** ‘Yatheva khalatī bhūmyā, bhūmyāyeva patiṭṭhati;  
Evetamaṃ khalitaṃ mayhaṃ, etaṃ passāmi accaya’’nti.

Tattha **suhadehīti** suhadayehi ñātimitādīhi. **Yaṅca maññaṃ** yaṅca me aññaṃ tayā ceva aññehi ca rājūhi dinnamaṃ ghare aparimāṇamaṃ dhanamaṃ, taṃ sabbaṃ tvameva olokeyyāsi. **Peccāti** pacchākāle.

**Khalatīti** pakkhalati. **Evetanti** evaṃ etaṃ. Ahañhi bhūmiyaṃ khalitvā tattheva patiṭṭhitapuriso viya tumhesu khalitvā tumhesuyeva patiṭṭhahāmi. **Etaṃ passāmīti** yo esa “kiṃ te rājā hotī”ti māṇavena puṭṭhassa mama tumhe anoloketvā saccaṃ apekkhitvā “dāsohamasmī”ti vadantassa accayo, etaṃ accayaṃ passāmi, añño pana me doso natthi, taṃ me accayaṃ tumhe khamatha, etaṃ hadaye katvā pacchā mama puttadāresu mā aparajjhithhāti.

Taṃ sutvā rājā “paṇḍita, tava gamanaṃ mayhaṃ na rucati, māṇavaṃ upāyena pakkosāpetvā ghātetvā kilañjena paṭicchādetuṃ mayhaṃ rucati”ti dīpento gāthamāha –

**1523:**“Sakkā na gantuṃ iti mayha hoti, chetvā vadhitvā idha kātiyānaṃ;  
Idheva hohī iti mayha rucati, mā tvaṃ agā uttamabhūripañña”ti.

Tattha **chetvāti** idheva rājagehe taṃ pothetvā māretvā paṭicchādessāmīti.

Taṃ sutvā mahāsatto “deva, tumhākaṃ ajjhāsayo evarūpo hoti, so tumhesu ayutto”ti vatvā āha –

**1524:**“Mā hevadhammesu manaṃ paṇḍahi, atthe ca dhamme ca yutto bhavassu;  
Dhiratthu kammaṃ akusalaṃ anariyaṃ, yaṃ katvā pacchā nirayaṃ vajeyya.

**1525:**“Nevesa dhammo na puneta kiccaṃ, ayiro hi dāsassa janinda issaro;  
Ghātetuṃ jhāpetuṃ athopi hantuṃ, na ca mayha kodhatthi vajāmi cāha”nti.

Tattha **mā hevadhammesu manaṃ paṇḍahīti** adhammesu anatthesu ayuttesu tava cittaṃ mā heva paṇḍahīti attho. **Pacchāti** yaṃ kammaṃ katvāpi ajarāmaro na hoti, atha kho pacchā nirayameva upapajjeyya. **Dhiratthu kammanti** taṃ kammaṃ garahitaṃ atthu assa bhavessya. **Nevesāti** neva esa. **Ayiroti** sāmiko. **Ghātetunti** etāni ghātādāni kātuṃ ayiro dāsassa issaro, sabbānetāni kātuṃ labhati, mayhaṃ māṇave appamattakopi kodho natthi, dinnakālato paṭṭhāya tava cittaṃ sandhāretuṃ vaṭṭati, vajāmi ahaṃ narindāti āha –

Evaṃ vatvā mahāsatto rājānaṃ vanditvā rañño orodhe ca puttadāre ca rājaparisañca ovaditvā tesu sakabhāvena saṅghātuṃ asakkuṇitvā mahāviraṃ viravantesuyeva rājanivesanā nikkhami. Sakalanagaravāsini “paṇḍito kira māṇavena saddhiṃ gamissati, etha, passissāma na”nti mantayitvā rājāṅgaṇeyeva naṃ passimsu. Atha ne mahāsatto assāsetvā “tumhe mā cintayittha, sabbe saṅkhārā aniccā, sarīraṃ addhavaṃ, yaso nāma vipattipariyosāno, apica tumhe dānādīsu puññesu appamattā hothā”ti tesu ovādaṃ datvā nivattāpetvā attano gehābhimukho pāyāsi. Tasmīṃ khaṇe dhammapālakumāro bhātikagaṇaparivuto “pitu paccuggamaṃ karissāmi”ti nikkhanto nivesanadvāreyaṃ pitu sammukho ahoṣi. Mahāsatto taṃ disvā sakabhāvena saṅghātuṃ asakkonto upaguyha ure nipajjāpetvā nivesanaṃ pāvisi. Tamatthaṃ pakāsento satthā āha –

**1526:**“Jeṭṭhaputtaṃ upaguyha, vineyya hadaye daram;  
Assuṇṇehi nettehi, pāvisi so mahāghara”nti.

Ghare panassa sahasaputtā, sahasadhītarō, sahasabhariyāyo, ca sattavaṇṇadāsīsātāni ca santi, tehi ceva avasesadāsīdāsakammakarañātimittasuhajjādīhi ca sakalanivesanaṃ yugantavātābhīghātapatitehi sālehi sālavanaṃ viya niraṇṭaraṃ ahoṣi. Tamatthaṃ pakāsento satthā āha –

**1527:**“Sālāva sammapatitā, mālutena pamadditā;  
Senti puttā ca dārā ca, vidhurassa nivesane.

**1528:**“Itthisahassaṃ bhariyānaṃ, dāsīsattasātāni ca;  
Bāhā paggayha pakkanduṃ, vidhurassa nivesane.

1529: ‘Orodhā ca kumārā ca, vesiyānā ca brāhmaṇā;  
Bāhā paggayha pakkandum, vidhurassa nivesane.

1530: ‘Hatthārohā anīkaṭṭhā, rathikā pattikārakā;  
Bāhā paggayha pakkandum, vidhurassa nivesane.

1531: ‘Samāgatā jānapadā, negamā ca samāgatā;  
Bāhā paggayha pakkandum, vidhurassa nivesane.

1532: ‘Itthisahassam bhariyānam, dāsisattasātāni ca;  
Bāhā paggayha pakkantum, kasmā no vijahissasi.

1533: ‘Orodhā ca kumārā ca, vesiyānā ca brāhmaṇā;  
Bāhā paggayha pakkandum, kasmā no vijahissasi.

1534: ‘Hatthārohā anīkaṭṭhā, rathikā pattikārakā;  
Bāhā paggayha pakkandum, kasmā no vijahissasi.

1535: ‘Samāgatā jānapadā, negamā ca samāgatā;  
Bāhā paggayha pakkandum, kasmā no vijahissasī’’ti.

Tattha **sentīti** mahātale chinnapādā viya patitā āvattantā parivattantā sayanti. **Itthisahassam bhariyānanti** bhariyānameva itthīnam sahasam. **Kasmā no vijahissasīti** kena kāraṇena amhe vijahissasīti paridevimsu.

Mahāsatto sabbam taṃ mahājanam assāsetvā ghare avasesakiccāni katvā antojanañca bahijanañca ovaditvā ācikkhitabbayuttakam sabbam ācikkhitvā puṇṇakassa santikam gantvā attano niṭṭhitakiccataṃ ārocesi. Tamattham pakāsento satthā āha –

1536: ‘Katvā gharesu kiccāni, anusāsivā sakam janam;  
Mittāmacce ca bhacce ca, puttadāre ca bandhave.

1537: ‘Kammantam samvidhetvāna, ācikkhitvā ghare dhanam;  
Nidhiñca iṇadānañca, puṇṇakam etadabravi.

1538: ‘Avasī tuvam mayha tīham agāre, katāni kiccāni gharesu mayham;  
Anusāsitā puttadārā mayā ca, karoma kaccāna yathāmatim te’’ti.

Tattha **kammantam samvidhetvānāti** ‘‘evañca katum vaṭṭatī’’ti ghare kattabbayuttakam kammam samvidahitvā. **Nidhinti** nidahitvā ṭhapitadhanam. **Iṇadānanti** iṇavasena samyojitadhanam. **Yathāmatim teti** idāni tava ajjhāsayanurūpam karomāti vadati.

Puṇṇako āha –

1539: ‘Sace hi katte anusāsitā te, puttā ca dārā anujīvino ca;  
Handehi dānī taramānarūpo, dīgho hi addhāpi ayam puratthā.

1540: ‘Achambhitova gaṇhāhi, ājāneyyassa vāladhim;  
Idam pacchimakam tuyham, jīvalokassa dassana’’nti.

Tattha **katteti** somanassappatto yakkho mahāsattam ālapati. **Dīgho hi addhāpīti** gantabbamaggopi

dīgho. “**Achambhitovā**”ti idaṃ so heṭṭhāpāsādaṃ anotaritvā tatova gantukāmo hutvā avaca.

Atha naṃ mahāsatto āha –

**1541:**“Sohaṃ kissa nu bhāyissaṃ, yassa me natthi dukkaṭaṃ;  
Kāyena vācā manasā, yena gaccheyya duggati”’nti.

Tattha **sohaṃ kissa nu bhāyissanti** idaṃ mahāsatto “achambhitova gaṇhāhī”ti vuttattā evamāha.

Evam mahāsatto sīhanādaṃ naditvā achambhito kesarasīho viya nibbhayo hutvā “ayaṃ sātako mama aruciyā mā muccatū”ti adhiṭṭhānapāramiṃ purecārikaṃ katvā daḷhaṃ nivāsetvā assassa vāladhiṃ viyūhitvā ubhohi hatthehi daḷhaṃ vāladhiṃ gahetvā dvīhi pādehi assassa ūrūsu paliveṭhetvā “māṇava, gahito me vāladhi, yathārucci yāhī”ti āha. Tasmim̐ khaṇe puṇṇako manomayasindhavassa saññaṃ adāsi. So paṇḍitaṃ ādāya ākāse pakkhandi. Tamatthaṃ pakāsento satthā āha –

**1542:**“So assarājā vidhuraṃ vahanto, pakkāmi vehāyasamantalikkhe;  
Sākhāsu selesu asajjamāno, kāḷāgiriṃ khippamupāgamāsi”’ti.

Tattha **sākhāsu selesu asajjamānoti** puṇṇako kira cintesi “dūraṃ agantvāva imaṃ himavantappadese rukkhesu pabbatesu ca pothetvā māretvā hadayamaṃsaṃ ādāya kaḷevaram pabbatantare chaḍḍetvā nāgabhavanameva gamissāmī”’ti. So rukkhe ca pabbate ca apariharitvā tesam̐ majjheneva assaṃ pesesi. Mahāsattassānubhāvena rukkḥāpi pabbatāpi sarīrato ubhosu passesu ratanamattaṃ paṭikkamanti. So “mato vā, no vā”’ti parivattitvā mahāsattassa mukhaṃ olokento kañcanādāsamiva vipasannaṃ disvā “ayaṃ evaṃ na maratī”’ti punapi sakalahimavantappadese rukkhe ca pabbate ca tikkhattuṃ pothento pesesi. Evam pothentopi tatheva rukkḥapabbatā dūrameva paṭikkamantiyeva. Mahāsatto pana kilantakāyo ahosi. Atha puṇṇako “ayaṃ neva marati, idāni vātakkhandhe cuṇṇavicuṇṇaṃ karissāmī”’ti kodhābhībhūto sattamaṃ vātakkhandhaṃ pakkhandi. Bodhisattassānubhāvena vātakkhandho dvidhā hutvā bodhisattassa okāsaṃ akāsi. Tato verambhavātehi paharāpesi, verambhavātāpi satahassaasanisaddo viya hutvā bodhisattassa okāsaṃ adamsu. So puṇṇako tassa antarāyābhāvaṃ passanto taṃ ādāya kāḷapabbataṃ agamāsi. Tena vuttaṃ –

“So assarājā vidhuraṃ vahanto, pakkāmi vehāyasamantalikkhe;  
Sākhāsu selesu asajjamāno, kāḷāgiriṃ khippamupāgamāsi”’ti.

Tattha **asajjamānoti** alaggamāno appaṭihaññaṃ vidhurapaṇḍitaṃ vahanto kāḷapabbatamatthakaṃ upāgato.

Evam puṇṇakassa mahāsattaṃ gahetvā gatakāle paṇḍitassa puttadārādayo puṇṇakassa vasanaṭṭhānaṃ gantvā tattha mahāsattaṃ adisvā chinnapādā viya patitvā aparāparaṃ parivattamānā mahāsaddena parideviṃsu. Tamatthaṃ pakāsento satthā āha –

**1543:**“Itthisahassaṃ bhariyānaṃ, dāsisattasatāni ca;  
Bāhā paggayha pakkandūṃ, ‘yakkho brāhmaṇavaṇṇena;  
Vidhuraṃ ādāya gacchati”’.

“Orodhā ca kumārā ca, vesiyānā ca brāhmaṇā;  
Bāhā paggayha pakkandūṃ, ‘yakkho brāhmaṇavaṇṇena;  
Vidhuraṃ ādāya gacchati”’.

“Hatthārohā anīkaṭṭhā, rathikā pattikārakā;  
Bāhā paggayha pakkandūṃ, ‘yakkho brāhmaṇavaṇṇena;



Vidhuraṃ ādāya gacchati’.

**1544:** ‘Samāgatā jānapadā, negamā ca samāgatā;  
Bāhā paggayha pakkandum, ‘yakkho brāhmaṇavaṇṇena;  
Vidhuraṃ ādāya gacchati’.

**1545:** ‘Itthisahassaṃ bhariyānaṃ, dāsisattasatāni ca;  
Bāhā paggayha pakkandum, ‘paṇḍito so kuhiṃ gato’.

‘‘Orodhā ca kumārā ca, vesiyānā ca brāhmaṇā;  
Bāhā paggayha pakkandum, ‘paṇḍito so kuhiṃ gato’.

‘‘Hatthārohā anīkaṭṭhā, rathikā pattikārakā;  
Bāhā paggayha pakkandum, ‘paṇḍito so kuhiṃ gato’.

**1546:** Samāgatā jānapadā, negamā ca samāgatā;  
Bāhā paggayha pakkandum, ‘paṇḍito so kuhiṃ gato’’ti.

Evam pakkanditvā ca pana te sabbepi sakalanagaravāsīhi saddhiṃ roditvā rājadvāraṃ agamaṃsu. Rājā mahantaṃ paridevasaddaṃ sutvā sīhapañjaraṃ vivaritvā ‘‘tumhe kasmā paridevathā’’ti pucchi. Athassa te ‘‘deva, so kira māṇavo na brāhmaṇo, yakkho pana brāhmaṇavaṇṇena āgantvā paṇḍitaṃ ādāya gato, tena vinā amhākaṃ jīvitaṃ natthi. Sace so ito sattame divase nāgamissati, sakaṭasatehi sakaṭasahashehi ca dārūni saṅkaḍḍhitvā sabbe mayaṃ aggim ujjaletvā pavisissamā’’ti imamatthaṃ ārocentā imaṃ gāthamāhaṃsu –

**1547:** ‘Sace so sattarattena, nāgacchissati paṇḍito;  
Sabbe aggim pavekkhāma, natthattho jīvitena no’’ti.

Sammāsambuddhassa parinibbutakālepi ‘‘mayaṃ aggim pavisitvā marissamā’’ti vattāro nāma nāhesuṃ. Aho subhāsitaṃ mahāsatte nāgarehīti. Rājā tesam kathaṃ sutvā ‘‘tumhe mā cintayittha, mā socittha, mā paridevittha, madhurakatho paṇḍito māṇavaṃ dhammakathāya palobhetvā attano padesu pātetvā sakalanagaravāsīnaṃ assumukhaṃ hāsayingto na cirasseva āgamissati’’ti assāsento gāthamāha –

**1548:** ‘Paṇḍito ca viyatto ca, vibhāvī ca vicakkhaṇo;  
Khippaṃ mociya attānaṃ, mā bhāyitthāgamissati’’ti.

Tattha **viyatto**ti veyyattiyā vicāraṇapaññāya samannāgato. **Vibhāvī**ti atthānatthaṃ kāraṇākāraṇaṃ vibhāvetvā dassetvā kathetuṃ samattho. **Vicakkhaṇo**ti taṅkhaṇeyeva ṭhānuppattikāya kāraṇacintanapaññāya yutto. **Mā bhāyitthā**ti mā bhāyatha, attānaṃ mocetvā khippaṃ āgamissatīti assāseti.

Nāgarāpi ‘‘paṇḍito kira rañño kathetvā gato bhavissati’’ti assāsaṃ paṭilabhitvā attano gehāni pakkamiṃsu.

Antarapeyyālo niṭṭhito.

Sādhunaradhammaṇḍaṃ

Puṇṇakopi mahāsattaṃ kāḷāgirimatthake ṭhapetvā ‘‘imasmiṃ jīvamāne mayhaṃ vuḍḍhi nāma natthi, imaṃ māretvā hadayamaṃsaṃ gahetvā nāgabhavanaṃ gantvā vimalāya datvā irandhatim gahetvā devalokaṃ gamissāmi’’ti cintesi. Tamatthaṃ pakāsento satthā āha –

**1549:** ‘So tattha gantvāna vicintayanto, uccāvaca cetanakā bhavanti;  
Nayimassa jīvena mamatthi kiñci, hantvānimam hadayamānayaissa’ nti.

Tattha soti so puṇṇako. **Tattha gantvānāti** gantvā tattha kāḷāgirimatthake t̥hito. **Uccāvaca cetanakā bhavanti** ti khaṇe khaṇe uppajjamānā cetanā uccāpi avacāpi uppajjanti. T̥hānaṃ kho panetaṃ vijjati, yaṃ mametassa jīvitadānacetanāpi uppajjeyyāti. Imassa pana jīvitena tahiṃ nāgabhave mama appamattakampi kiñci kiccaṃ natthi, idhevimaṃ māretvā assa hadayaṃ ānayissāmīti sannit̥hānamakāsīti attho.

Tato puna cintesi ‘yaṃnūnāhaṃ imaṃ sahatthena amāretvā bheravarūpadassanena jīvitakkhayaṃ pāpeyya’ nti. So bheravayakkharūpaṃ nimminivā mahāsattaṃ tajjento āgantvā taṃ pātetvā dāthānaṃ antare katvā khāditukāmo viya ahosi, mahāsattassa lomahaṃsanamattampi nāhosi. Tato sīharūpena mattamahāhatthirūpena ca āgantvā dāthāhi ceva dantehi ca vijjhitukāmo viya ahosi. Tathāpi abhāyantassa ekadoṇikanāvappamānaṃ mahantaṃ sappavaṇṇaṃ nimminivā assasanto passasanto ‘susū’ ti saddaṃ karonto āgantvā mahāsattassa sakalasarīraṃ veṭhetvā matthake phaṇaṃ katvā at̥thāsi, tassa sārjjamattampi nāhosi. Atha ‘naṃ pabbatamatthake t̥hapetvā pātetvā cuṇṇavicuṇṇaṃ karissāmī’ ti mahāvātaṃ samuṭ̥thāpesi. So tassa kesaggamattampi cāletuṃ nāsakkhi. Atha naṃ tattheva pabbatamatthake t̥hapetvā hatthī viya khajjūrurukkaṃ pabbataṃ aparāparaṃ cālesi, tathāpi naṃ t̥hitat̥hānato kesaggamattampi cāletuṃ nāsakkhi.

Tato ‘saddasantāsenassa hadayaphālaṃ katvā māressāmī’ ti antopabbataṃ pavisitvā pathaviñca nabhañca ekaninnādaṃ karonto mahānādaṃ nadi, evampissa sārjjamattampi nāhosi. Jānāti hi mahāsatto ‘yakkhasīhahatthināgarājavesehi āgatopi mahāvātavuṭ̥thiṃ samuṭ̥thāpakopi pabbatacalanaṃ karontopi antopabbataṃ pavisitvā nādaṃ vissajjentopi māṇavoyeva, na añño’ ti. Tato puṇṇako cintesi ‘nāhaṃ imaṃ bāhirupakkamena māretuṃ sakkomi, sahattheneva naṃ māressāmī’ ti. Tato yakkho mahāsattaṃ pabbatamuddhani t̥hapetvā pabbatapādaṃ gantvā maṇikkhandhe paṇḍusuttaṃ pavesento viya pabbataṃ pavisitvā tāsento vagganto antopabbatena uggantvā mahāsattaṃ pāde dāhaṃ gahetvā parivattetvā adhosiraṃ katvā anālambe ākāse vissajjesi. Tena vuttaṃ –

**1550:** ‘So tattha gantvā pabbatantarasmim, anto pavisitvāna paduṭ̥thacitto;  
Asaṃvutasmim jagatippadese, adhosiraṃ dhārayi kātiyāno’ ti.

Tattha so **tattha gantvāti** so puṇṇako pabbatamatthakā pabbatapādaṃ gantvā tattha pabbatantare t̥hatvā tassa anto pavisitvā pabbatamatthake t̥hitassa heṭ̥thā paññāyamāno asaṃvute bhūmipadese dhāresīti. Na āditova dhāresi, tattha pana taṃ khipitvā pannarasayojanamattaṃ bhaṭ̥thakāle pabbatamuddhani t̥hitova hatthaṃ vaḍḍhetvā adhosiraṃ bhassantaṃ pādesu gahetvā adhosirameva ukkhipitvā mukhaṃ olokeno ‘na maratī’ ti nītvā dutiyampi khipitvā tiṃsayojanamattaṃ bhaṭ̥thakāle tatheva ukkhipitvā puna tassa mukhaṃ olokeno jīvantameva disvā cintesi ‘sace idāni saṭ̥thiyojanamattaṃ bhassitvā na marissati, pādesu naṃ gahetvā pabbatamuddhani pothetvā māressāmī’ ti atha naṃ tatiyampi khipitvā saṭ̥thiyojanamattaṃ bhaṭ̥thakāle hatthaṃ vaḍḍhetvā pādesu gahetvā ukkhipi. Tato mahāsatto cintesi ‘ayaṃ maṃ paṭhamam pannarasayojanaṭ̥thānaṃ khipi, dutiyampi tiṃsayojanaṃ, tatiyampi saṭ̥thiyojanaṃ, idāni puna maṃ na khipissati, ukkhipantoyeva pabbatamuddhani paharivā māressati, yāva maṃ ukkhipitvā pabbatamuddhani na potheti, tāva naṃ adhosiro hutvā olambantova māraṇakāraṇaṃ pucchissāmī’ ti. Evaṃ cintetvā ca pana so achambhito asantasanto tathā akāsi. Tena vuttaṃ ‘dhārayi kātiyāno’ ti, tikkhattuṃ khipitvā dhārayīti attho.

**1551:** ‘So lambamāno narake papāte, mahabbhaye lomahaṃse vidugge;  
Asantasanto kurūnaṃ kattuseṭ̥tho, iccabravi puṇṇakaṃ nāma yakkhaṃ.

**1552:** ‘Ariyāvakaśosi anariyarūpo, asaññato saññatasannikāso;  
Accāhitaṃ kammaṃ karosi ludraṃ, bhāve ca te kusalaṃ natthi kiñci.

**1553:** ‘Yaṃ maṃ papātasmim papātumicchasi, ko nu tavattho maraṇena mayhaṃ;  
Amānussasveva tavajja vaṇṇo, ācikkha me tvam katamāsi devatāti.

Tattha **so lambamānoti** so kurūnaṃ kattuseṭṭho tatiyavāre lambamāno. **Ariyāvakaṣoti** rūpena ariyasadiso devavaṇṇo hutvā carasi. **Asaññatoti** kāyādīhi asaññato dussīlo. **Accāhitanti** hitātikantaṃ, atiahitaṃ vā. **Bhāve ca teti** tava citte appamattakampi kusalaṃ natthi. **Amānussasveva tavajja vaṇṇoti** ajja tava idaṃ kāraṇaṃ amānussasveva. **Katamāsi devatāti** yakkhānaṃ antare katarayakkho nāma tvam.

Puṇṇako āha –

**1554:** ‘Yadi te suto puṇṇako nāma yakkho, rañño kuverassa hi so sajjibbo;  
Bhūmindharo varuṇo nāma nāgo, brahā sucī vaṇṇabalūpapanno.

**1555:** ‘Tassānujaṃ dhītaraṃ kāmayāmi, irandhatī nāma sā nāgakaññā;  
Tassā sumajjhāya piyāya hetu, patārayiṃ tuyha vadhāya dhīrā’ ti.

Tattha **sajjibboti** sajjīvo amacco. **Brahāti** ārohapariṇāhasampanno uṭṭhāpitakañcanarūpasadiso. **Vaṇṇabalūpapannoti** sarīravaṇṇena ca kāyabalena ca upagato. **Tassānujanti** tassa anujātaṃ dhītaraṃ. **Patārayinti** cittaṃ pavattesiṃ, sanniṭṭhānamakāsinti attho.

Taṃ sutvā mahāsatto ‘‘ayaṃ loko duggahitena nassati, nāgamāṇavikaṃ patthentassa mama maraṇena kiṃ payojanaṃ, tathato kāraṇaṃ jānissāmī’’ti cintetvā gāthamāha –

**1556:** ‘Mā heva tvam yakkha ahosi mūlho, natthā bahū duggahitena loke;  
Kiṃ te sumajjhāya piyāya kiccaṃ, maraṇena me iṅgha suṇomi sabba’’nti.

Taṃ sutvā tassa ācikkhanto puṇṇako āha –

**1557:** ‘Mahānubhāvassa mahoragassa, dhītukāmo ñātibhatohamasmi;  
Taṃ yācamānaṃ sasuro avoca, yathā mamaññiṃsu sukāmanītaṃ.

**1558:** ‘Dajjemu kho te sutanaṃ sunettaṃ, sucimhitaṃ candanalittagattaṃ;  
Sace tuvaṃ hadayaṃ paṇḍitassa, dhammena laddhā idha māharesi;  
Etena vittena kumāri labbhā, naññaṃ dhanam uttari patthayāma.

**1559:** ‘Evaṃ na mūlhosmi suṇohi katte, na cāpi me duggahitatti kiñci;  
Hadayena te dhammaladdhena nāgā, irandhatiṃ nāgakaññaṃ dadanti.

**1560:** ‘Tasmā ahaṃ tuyhaṃ vadhāya yutto, evaṃ mamattho maraṇena tuyhaṃ;  
Idheva taṃ narake pātayitvā, hantvāna taṃ hadayaṃ mānayaissa’’nti.

Tattha **dhītukāmoti** dhītaraṃ kāmemi patthemī, dhītu atthāya vicarāmi. **Ñātibhatohamasmīti** tasmā tassa ñātibhatako nāma ahaṃ amhi. **Tanti** taṃ nāgakaññaṃ. **Yācamānanti** yācantaṃ maṃ. **Yathā manti** yasmā maṃ. **Aññiṃsūti** jāniṃsu. **Sukāmanītanti** suṭṭhu esa kāmena nītoti sukāmanīto, taṃ sukāmanītaṃ. Tasmā sasuro ‘**dajjemu kho te**’’tiādimavoca. Tattha **dajjemūti** dadeyyāma. **Sutananti** sundarasarīraṃ. **Idha māharesi**ti idha nāgabhavane dhammena laddhā āhareyyāsīti.

Tassa taṃ kathaṃ sutvā mahāsatto cintesi ‘‘vimalāya mama hadayena kiccaṃ natthi, varuṇanāgarājena mama dhammakathaṃ sutvā maṇinā maṃ pūjetvā tattha gatena mama dhammakathikabhāvo vaṇṇito bhavissati, tato vimalāya mama dhammakathāya dohaḷo uppanno bhavissati, varuṇena duggahitaṃ gahetvā puṇṇako āṇatto bhavissati, svāyaṃ attanā duggahitena maṃ

māretuṃ evarūpaṃ dukkhaṃ pāpesi, mama paṇḍitabhāvo tñānuppattikāraṇacintanasamatthatā imasmiṃ maṃ mārente kiṃ karissati, handāhaṃ saññāpessāmi na’nti. Cintetvā ca pana “māṇava, sādhunaradhammaṃ nāma jānāmi, yāvāhaṃ na marāmi, tāva maṃ pabbatamuddhani nisīdāpetvā sādhunaradhammaṃ nāma suṇohi, pacchā yaṃ icchasi, taṃ kareyyāsī’”ti vatvā sādhunaradhammaṃ vaṇṇetvā attano jīvitāṃ āharāpento so adhosiro olambantova gāthamāha –

**1561:** ‘Khippaṃ mamaṃ uddhara kātiyāna, hadayena me yadi te atthi kiccaṃ;  
Ye kecime sādhunarassa dhammā, sabbeva te pātukaromi ajjā’”ti.

Taṃ sutvā puṇṇako “ayaṃ paṇḍitena devamanussānaṃ akathitapubbo dhammo bhavissati, khippameva naṃ uddharitvā sādhunaradhammaṃ suṇissāmi’”ti cintetvā mahāsattaṃ ukkhipitvā pabbatamuddhani nisīdāpesi. Tamatthaṃ pakāseto satthā āha –

**1562:** ‘So puṇṇako kurūnaṃ kattuseṭṭhaṃ, nagamuddhani khippaṃ patiṭṭhapetvā;  
Assatthamāsīnaṃ samekkhiyāna, paripucchi kattāramanomapaññaṃ.

**1563:** ‘Samuddhaṇo mesi tuvaṃ papātā, hadayena te ajja mamatthi kiccaṃ;  
Ye kecime sādhunarassa dhammā, sabbeva me pātukarohi ajjā’”ti.

Tattha **assatthamāsīnanti** laddhassāsaṃ hutvā nisinnaṃ. **Samekkhiyānāti** disvā. **Sādhunarassa dhammāti** narassa sādhudhammā, sundaradhammāti attho.

Taṃ sutvā mahāsatto āha –

**1564:** ‘Samuddhaṇo tyasmi ahaṃ papātā, hadayena me yadi te atthi kiccaṃ;  
Ye kecime sādhunarassa dhammā, sabbeva te pātukaromi ajjā’”ti.

Tattha **tyasmīti** tayā asmi.

Atha naṃ mahāsatto “kiliṭṭhagattomhi, nhāyāmi tāvā’”ti āha. Yakkhopi “sādhū’”ti nhānodakaṃ āharitvā nhātakāle mahāsattassa dibbadussagandhamālādīni datvā alaṅkatappaṭiyattakāle dibbabhojanaṃ adāsi. Atha mahāsatto bhuttabhojano kālāgirimatthakaṃ alaṅkārapetvā āsanaṃ paññāpetvā alaṅkatadhammāsane nisīditvā buddhalīlaya sādhunaradhammaṃ desento gāthamāha –

**1565:** ‘Yātānuyāyī ca bhavāhi māṇava, allañca pāṇiṃ parivajjayassu;  
Mā cassu mītesu kadāci dubbhī, mā ca vasaṃ asatīnaṃ nigacche’”ti.

Tattha **allañca pāṇiṃ parivajjayassūti** allaṃ tintaṃ pāṇiṃ mā dahi mā jhāpehi.

Yakkho saṃkhittena bhāsīte cattāro sādhunaradhamme bujjhituṃ asakkonto vitthārena pucchanto gāthamāha –

**1566:** ‘Kathaṃ nu yātaṃ anuyāyī hoti, allañca pāṇiṃ dahate kathaṃ so;  
Asatī ca kā ko pana mittadubbho, akkhāhi me pucchito etamattha’”nti.

Mahāsattopissa kathesi –

**1567:** ‘Asanthutaṃ nopi ca diṭṭhapubbaṃ, yo āsanenāpi nimantayeyya;  
Tasseva atthaṃ puriso kareyya, yātānuyāyīti tamāhu paṇḍitā.

**1568:** ‘Yassekarattampi ghare vaseyya, yatthannapānaṃ puriso labheyya;

Na tassa pāpaṃ manasāpi cintaye, adubbhapāṇiṃ dahate mittadubbho.

**1569:** ‘Yassa rukkhassa chāyāya, nisīdeyya sayeyya vā;  
Na tassa sākhaṃ bhañjeyya, mittadubbho hi pāpako.

**1570:** ‘Puṇṇampi cemaṃ pathaviṃ dhanena, dajjitthiyā puriso sammatāya;  
Laddhā khaṇaṃ atimaññeyya tampi, tāsamaṃ vasaṃ asatīnaṃ na gacche.

**1571:** ‘Evaṃ kho yātaṃ anuyāyi hoti,  
Allaṅca pāṇiṃ dahate punevaṃ;  
Asatī ca sā so pana mittadubbho,  
So dhammiko hohi jahassu adhamma’nti.

Tattha **asanthutanti** ekāhadvīhampi ekato avutthapubbaṃ. **Yo āsanenāpīti** yo evarūpaṃ puggalaṃ āsanamattenapi nimantayeyya, pageva annapānādīhi. **Tassevāti** tassa pubbakāriṣṣa atthaṃ puriso karoteva. **Yātānuyāyīti** pubbakāritāya yātassa puggalassa anuyāyī. Paṭhamaṃ karonto hi yāyī nāma, pacchā karonto anuyāyī nāmāti evaṃ paṇḍitā kathenti. Ayaṃ devarāja, paṭhama sādhunaradhammo. **Adubbhapāṇinti** adubbhakaṃ attano bhūñjanahatthameva dahanto hi mittadubbhī nāma hoti. Iti allahatthassa ajjhāpanaṃ nāma ayaṃ dutiyo sādhunaradhammo. **Na tassāti** tassa sākhaṃ vā pattaṃ vā na bhañjeyya. Kimkāraṇā? Mittadubbho hi pāpako. Iti paribhuttacchāyassa acetanassa rukkhassapi pāpaṃ karonto mittadubbhī nāma hoti, kimaṅgaṃ pana manussabhūtassāti. Evaṃ mittesu adubbhanaṃ nāma ayaṃ tatiyo sādhunaradhammo. **Dajjitthiyāti** dadeyya itthiyā. **Sammatāyāti** ‘‘ahameva tassā piyo, na añño, maññeva sā icchatī’’ti evaṃ suṭṭhu matāya. **Laddhā khaṇanti** aticārassa okāsaṃ labhitvā. **Asatīnanti** asaddhammasamannāgatānaṃ itthīnaṃ. Iti mātugāmaṃ nissāya pāpassa akaraṇaṃ nāma ayaṃ catuttho sādhunaradhammo. **So dhammiko hohīti** devarāja, so tvaṃ imehi catūhi sādhunaradhammehi yutto hohīti.

Evaṃ mahāsatto yakkhassa cattāro sādhunaradhamme buddhalīlāya kathesi.

Sādhunaradhammakaṇḍaṃ niṭṭhitaṃ.

Kālāgiriṅgaṇḍaṃ

Te dhamme suṇantoyeva puṇṇako sallakkhesi ‘‘catūsupi ṭhānesu paṇḍito attano jīvitameva yācati, ayaṃ kho mayhaṃ pubbe asanthutasseva sakkāramakāsi, ahamassa nivesane tīhaṃ mahantaṃ yasaṃ anubhavanto vasiṃ, ahañcīmaṃ pāpakammaṃ karonto mātugāmaṃ nissāya karomi, sabbathāpi ahameva mittadubbhī. Sace paṇḍitaṃ aparajjhāmi, na sādhunaradhamme vattissāmi nāma, tasmā kiṃ me nāgamāṇavikāya, indapatthanagaravāsīnaṃ assumukhāni hāsento imaṃ vegena tattha netvā dhammasabhāyaṃ otāressāmi’’ti cintetvā gāthamāha –

**1572:** ‘‘Avasiṃ ahaṃ tuyha tīhaṃ agāre, annena pānena upaṭṭhitosmi;  
Mitto mamāsī visajjāmahaṃ taṃ, kāmaṃ gharaṃ uttamapañña gaccha.

**1573** Api hāyatu nāgakulā attho, alampi me nāgakaññāya hotu;  
So tvaṃ sakeneva subhāsitena, muttosi me ajja vadhāya pañña’’ti.

Tattha **upaṭṭhitosmīti** tayā upaṭṭhitosmi. **Visajjāmahaṃ tanti** vissajjemi ahaṃ taṃ. **Kāmanti** ekaṃsena. **Vadhāyāti** vadhato. **Paññāti** paññavanta.

Atha naṃ mahāsatto ‘‘māṇava, tvaṃ tāva maṃ attano gharaṃ mā pesehi, nāgabhavanameva maṃ nehī’’ti vadanto gāthamāha –

**1574:** ‘Handa tuvaṃ yakkha mamampi nehi, sasuraṃ te atthaṃ mayi carassu;  
Mayañca nāgādhīpatiṃ vimānaṃ, dakkhemu nāgassa adīṭṭhapubba’nti.

Tattha **handā**ti vavassaggatthe nipāto. **Sasuraṃ te atthaṃ mayi carassū**ti tava sasurassa santakaṃ atthaṃ mayi cara mā nāsehi. **Nāgādhīpatiṃ vimānanti** ahampi nāgādhīpatiñca vimānañcassa adīṭṭhapubbaṃ passeyyaṃ.

Taṃ sutvā puṇṇako āha –

**1575:** ‘Yaṃ ve narassa ahitāya assa, na taṃ pañño arahati dassanāya;  
Atha kena vaṇṇena amittagāmaṃ, tuvamicchasi uttamapañña gantu’nti.

Tattha **amittagāma**nti amittassa vasanaṭṭhānaṃ, amittasamāgamanti attho.

Atha naṃ mahāsatto āha –

**1576:** ‘Addhā pajānāmi ahampi etaṃ, na taṃ pañño arahati dassanāya;  
Pāpañca me natthi kataṃ kuhiñci, tasmā na sañke maraṇāgamāyā’nti.

Tattha **maraṇāgamāyā**ti maraṇassa āgamāya.

Apica, devarāja, tādiso yakkho kakkhaḷo mayā dhammakathāya palobhetvā mudukato, idāneva maṃ ‘alaṃ me nāgamāṇavikāya, attano gharaṃ yāhī’nti vadesi, nāgarājassa mudukaraṇaṃ mama bhāro, nehiyeva maṃ tatthāti. Tassa taṃ vacanaṃ sutvā puṇṇako ‘sādhū’nti sampañcchitvā tuṭṭhacitto āha –

**1577:** ‘Handa ca ṭhānaṃ atulānubhāvaṃ, mayā saha dakkhasi ehi katte;  
Yatthacchati naccagītehi nāgo, rājā yathā vessavaṇo naḷiññaṃ.

**1578:** ‘Naṃ nāgakañña caritaṃ gaṇena, nikīlitaṃ niccamaho ca rattiṃ;  
Pahūtamāyaṃ bahupupphachannaṃ, obhāsati vijjurivantalikkhe.

**1579:** ‘Annena pānena upetarūpaṃ, naccehi gītehi ca vādītehi;  
Paripūraṃ kaññāhi alaṅkatāhi, upasobhati vatthapilandhanā’nti.

Tattha **handā cāti** nipātamattameva. **Ṭhānanti** nāgarājassa vasanaṭṭhānaṃ. **Naḷiññanti** naḷiniyaṃ nāma rājadhāniyaṃ. **Caritaṃ gaṇenāti** taṃ nāgakaññaṇaṃ gaṇena caritaṃ. **Nikīlīnti** niccaṃ aho ca rattiñca nāgakaññāhi kīlītānukīlitaṃ.

Evañca pana vatvā puṇṇako mahāsattaṃ assapiṭṭhaṃ āropetvā tattha nesi. Tamatthaṃ pakāsento sathā āha –

**1580:** ‘So puṇṇako kurūnaṃ kattusetṭhaṃ, nisīdayī pacchato āsanasmīṃ;  
Ādāya kattāramanomapaññaṃ, upānayī bhavanaṃ nāgarañño.

**1581:** ‘Patvāna ṭhānaṃ atulānubhāvaṃ, aṭṭhāsi kattā pacchato puṇṇakassa;  
Sāmaggipekhamāno nāgarājā, pubbeva jāmataramajjhabhāsathā’nti.

Tattha **so puṇṇakoti** bhikkhave, so evaṃ nāgabhavanaṃ vaṇṇetvā paṇḍitaṃ attano ājaññaṃ āropetvā nāgabhavanaṃ nesi. **Ṭhānanti** nāgarājassa vasanaṭṭhānaṃ. **Pacchato puṇṇakassāti** puṇṇakassa kira etadahosi ‘sace nāgarājā paṇḍitaṃ disvā muducitto bhavissati, iccetaṃ kusalaṃ. No ce,

tassa taṃ apassantasseva sindhavaṃ āropetvā ādāya gamissāmī’’ti. Atha naṃ pacchato t̥hapesi. Tena vuttaṃ ‘‘pacchato puṇṇakassā’’ti. **Sāmaggipekhamānoti** sāmaggiṃ apekkhamāno. ‘‘Sāmaṃ apekkhī’’tipi pāṭho, attano jāmātaraṃ passitvā paṭhamataraṃ sayameva ajjhabhāsathāti attho.

Nāgarājā āha –

**1582:** ‘‘Yannu tuvaṃ agamā maccalokaṃ, anvesamāno hadayaṃ paṇḍitassa;  
Kacci samiddhena idhānupatto, ādāya kattāramanomapāñña’’nti.

Tattha **kacci samiddhenāti** kacci te manorathena samiddhena nipphannena idhāgatosīti pucchati.

Puṇṇako āha –

**1583:** ‘‘Ayañhi so āgato yaṃ tvamicchasi, dhammena laddho mama dhammapālo;  
Taṃ passatha sammukhā bhāsamaṇaṃ, sukho have sappurisehi saṅgamo’’ti.

Tattha **yaṃ tvamicchasīti** yaṃ tvaṃ icchasi. ‘‘Yantu micchasi’’tipi pāṭho. **Sammukhā bhāsamaṇanti** taṃ lokasakkataṃ dhammapālaṃ idāni madhurena sarena dhammaṃ bhāsamaṇaṃ sammukhāva passatha, sappurisehi ekaṭṭhāne samāgamo hi nāma sukho hotīti.

Kālāgiriṇaṃ niṭṭhitam.

Tato nāgarājā mahāsattaṃ disvā gāthamāha –

**1584:** ‘‘Adiṭṭhapubbaṃ disvāna, macco maccubhayaṭṭito;  
Byamhito nābhivādesi, nayidaṃ paññavatāmivā’’ti.

Tattha **byamhitoti** bhīto. Idaṃ vuttaṃ hoti – paṇḍita, tvaṃ adiṭṭhapubbaṃ nāgabavanaṃ disvā maraṇabhayaena aṭṭito bhīto hutvā yaṃ maṃ nābhivādesi, idaṃ kāraṇaṃ paññavantānaṃ na hotīti.

Evam vanaṃ paccāsīantaṃ nāgarājānaṃ mahāsatto ‘‘na tvaṃ mayā vanditabbo’’ti avatvāva attano ñāṇavantaṭāya upāyakosallena ‘‘ahaṃ vajjhappattabhāvena naṃ taṃ vandāmi’’ti vadanto gāthādvayamāha –

**1585:** ‘‘Na camhi byamhito nāga, na ca maccubhayaṭṭito;  
Na vajjho abhivādeyya, vajjhaṃ vā nābhivādaye.

**1586:** ‘‘Kathaṃ no abhivādeyya, abhivādāpayetha ve;  
Yaṃ naro hantumiccheyya, taṃ kammaṃ nupapajjati’’ti.

Tassattho – nevāhaṃ, nāgarāja, adiṭṭhapubbaṃ nāgabavanaṃ disvā bhīto, na maraṇabhayaṭṭito. Mādisassa hi maraṇabhayaṃ nāma natthi, vajjho pana abhivādetuṃ, vajjhaṃ vā avajjhopi abhivādāpetuṃ na labhati. Yañhi naro hantumiccheyya, so taṃ kathaṃ nu abhivādeyya, kathaṃ vā tena attānaṃ abhivādāpayetha ve. Tassa hi taṃ kammaṃ na upapajjati. Tvañca kira maṃ mārapetuṃ imaṃ āṇāpesi, kathāhaṃ taṃ vandādhīti.

Taṃ sutvā nāgarājā mahāsattassa thutiṃ karonto dve gāthā abhāsi –

**1587:** ‘‘Evametam yathā brūsi, saccaṃ bhāsasi paṇḍita;  
Na vajjho abhivādeyya, vajjhaṃ vā nābhivādaye.

**1588** Kathaṃ no abhivādeyya, abhivādāpayetha ve;  
Yaṃ naro hantumiccheyya, taṃ kammaṃ nupapajjatī’nti.

Idāni mahāsatto nāgarājena saddhiṃ paṭisanthāraṃ karonto āha –

**1589:** ‘Asassataṃ sassataṃ nu tavayidaṃ, iddhī jutī balavīriyūpapatti;  
Pucchāmi taṃ nāgarājetamatthaṃ, kathaṃ nu te laddhamidaṃ vimānaṃ.

**1590:** ‘Adhiccaldhamṃ pariṇāmajaṃ te, sayamkataṃ udāhu devehi dinnam;  
Akkhāhi me nāgarājetamatthaṃ, yatheva te laddhamidaṃ vimāna’nti.

Tattha **tavayidanti** idaṃ tava yasajātaṃ, vimānaṃ vā asassataṃ sassatasadisam, “mā kho yasaṃ nissāya pāpamakāsī’nti iminā padena attano jīvitaṃ yācati. **Iddhīti** nāgaiddhi ca nāgajuti ca kāyabalañca cetasikavīriyañca nāgabhavane upapatti ca yañca te idaṃ vimānaṃ, pucchāmi taṃ nāgarāja, etamatthaṃ, kathaṃ nu te idaṃ sabbaṃ laddhanti. **Adhiccaldhanti** kiṃ nu tayā idaṃ vimānaṃ evaṃ sampannaṃ adhicca akāraṇena laddham, udāhu utupariṇāmajaṃ te idaṃ, udāhu sayam sahattheneva kataṃ, udāhu devehi te dinnam, yatheva te idaṃ laddham, etaṃ me atthaṃ akkhāhīti.

Taṃ sutvā nāgarājā āha –

**1591:** ‘Nādhiccaldhamṃ na pariṇāmajaṃ me, na sayamkataṃ nāpi devehi dinnam;  
Sakehi kammehi apāpakehi, puññehi me laddhamidaṃ vimāna’nti.

Tattha **apāpakehīti** alāmakehi.

Tato mahāsatto āha –

**1592:** ‘Kiṃ te vataṃ kiṃ pana brahmacariyaṃ, kissa suciṇṇassa ayaṃ vipāko;  
Iddhī jutī balavīriyūpapatti, idaṃca te nāga mahāvīmāna’nti.

Tattha **kiṃ te vatanti** nāgarāja, purimabhava tava kiṃ vataṃ ahosi, ko pana brahmacariyavāso, katarassa sucaritassevesa iddhīādiko vipākoti.

Taṃ sutvā nāgarājā āha –

**1593:** ‘Ahañca bhariyā ca manussaloke, saddhā ubho dānapatī ahumhā;  
Opānabhūtaṃ me gharaṃ tadāsi, santappitā samaṇabrāhmaṇā ca.

**1594:** ‘Mālañca gandhañca vilepanañca, padīpiyaṃ seyyamupassayañca;  
Acchādanaṃ sāyanamannapānaṃ, sakkacca dānāni adamha tattha.

**1595:** ‘Taṃ me vataṃ taṃ pana brahmacariyaṃ, tassa suciṇṇassa ayaṃ vipāko;  
Iddhī jutī balavīriyūpapatti, idaṃca me dhīra mahāvīmāna’nti.

Tattha **manussaloketi** aṅgaraṭṭhe kālacampānagare. **Taṃ me vatanti** taṃ sakkaccaṃ dinnadānameva mayhaṃ vattasamādānañca brahmacariyañca ahosi, tasseva sucaritassa ayaṃ iddhīādiko vipākoti.

Mahāsatto āha –

**1596:** ‘Evaṃ ce te laddhamidaṃ vimānaṃ, jānāsi puññānaṃ phalūpapattim;



Tasmā hi dhammaṃ cara appamatto, yathā vimānaṃ puna māvasesī’’ti.

Tattha **jānāsī**ti sace tayā dānānubhāvena taṃ laddhaṃ, evaṃ sante jānāsi nāma puññānaṃ phalañca puññaphalena nibbattaṃ upapattiñca. **Tasmā hī**ti yasmā puññehi tayā idaṃ laddhaṃ, tasmā. **Puna māvasesī**ti punapi yathā imaṃ nāgabhavanaṃ ajjhāvasasi, evaṃ dhammaṃ cara.

Taṃ sutvā nāgarājā āha –

**1597:**‘Nayidha santi samaṇabrāhmaṇā ca, yesannapānāni dademu katte;  
Akkhāhi me pucchito etamatthaṃ, yathā vimānaṃ puna māvasemā’’ti.

Mahāsatto āha –

**1598:**‘Bhogī hi te santi idhūpapannā, puttā ca dārā anujīvino ca;  
Tesu tuvaṃ vacasā kammunā ca, asampaduṭṭho ca bhavāhi niccaṃ.

**1599:**‘Evaṃ tuvaṃ nāga asampadosaṃ, anupālaya vacasā kammunā ca;  
Thatvā idha yāvātāyukaṃ vimāne, uddhaṃ ito gacchasi devaloka’’nti.

Tattha **bhogī**ti bhogino, nāgāti attho. **Tesū**ti tesu puttadārādīsu bhogīsu vācāya kammena ca niccaṃ asampaduṭṭho bhava. **Anupālayā**ti evaṃ puttādīsu ceva sesasattesu ca mettacittasañkhātaṃ asampadosaṃ anurakkha. **Uddhaṃ itoti** ito nāgabhavanato cuto uparidevalokaṃ gamissati. Mettacittañhi dānato atirekataraṃ puññanti.

Tato nāgarājā mahāsattassa dhammakathaṃ sutvā ‘‘na sakkā paṇḍitena bahi papañcaṃ kātuṃ, vimalāya dassetvā subhāsitaṃ sāvetvā dohaḷaṃ paṭippassambhetvā dhanañcayarājānaṃ hāsento paṇḍitaṃ pesetuṃ vaṭṭati’’ti cintetvā gāthamāha –

**1600:**‘Addhā hi so socati rājasetṭho, tayā vinā yassa tuvaṃ sajjibbo;  
Dukkhūpanītopi tayā samecca, vindeyya poso sukhamāturopī’’ti.

Tattha **sajjibboti** sajjīvo amacco. **Sameccā**ti tayā saha samāgantvā. **Āturopī**ti bāḷhagilānopi samāno.

Taṃ sutvā mahāsatto nāgarājassa thutiṃ karonto itaraṃ gāthamāha –

**1601:**‘Addhā sataṃ bhāsasi nāga dhammaṃ, anuttaraṃ atthapadaṃ suciññaṃ;  
Etādisiyāsu hi āpadāsu, paññāyate mādisānaṃ viseso’’ti.

Tattha **addhā satanti** ekaṃsena santānaṃ paṇḍitānaṃ dhammaṃ bhāsasi. **Atthapadanti** hitakoṭṭhāsaṃ. **Etādisiyāsū**ti evarūpāsu āpadāsu etādise bhaye upaṭṭhite mādisānaṃ paññavantānaṃ viseso paññāyati.

Taṃ sutvā nāgarājā atirekataraṃ tuṭṭho tameva pucchanto gāthamāha –

**1602:**‘Akkhāhi no tāyaṃ mudhā nu laddho, akkhehi no tāyaṃ ajesi jūte;  
Dhammena laddho iti tāyamāha, kathaṃ nu tvam hatthamimassa māgato’’ti.

Tattha **akkhāhi noti** ācikkha amhākaṃ. **Tāyanti** taṃ ayaṃ. **Mudhā nu laddhoti** kiṃ nu kho mudhā amūlakeneva labhi, udāhu jūte ajesi. **Iti tāyamāhāti** ayaṃ puñṇako ‘‘dhammena me paṇḍito laddho’’ti vadati. **Kathaṃ nu tvam hatthamimassa māgato**ti tvam kathaṃ imassa hatthaṃ āgatosi.

Mahāsatto āha –

**1603:** ‘Yo missaro tattha ahosi rājā, tamāyamakkhehi ajesi jūte;  
So maṃ jito rājā imassadāsi, dhammena laddhosmi asāhasenā’ ti.

Tattha **yo missaroti** yo maṃ issaro. **Imassadāsīti** imassa puṇṇakassa adāsi.

Taṃ sutvā nāgarājā tuṭṭho ahosi. Tamatthaṃ pakāsento sathā āha –

**1604:** ‘Mahorago attamano udaggo, sutvāna dhīrassa subhāsītāni;  
Hatthe gahetvāna anomapaññaṃ, pāvekkhi bhariyāya tadā sakāse.

**1605:** ‘Yena tvam vimale paṇḍu, yena bhattaṃ na rucati;  
Na ca metādiso vaṇṇo, ayameso tamonudo.

**1606:** ‘Yassa te hadayenattho, āgatāyaṃ pabhaṅkaro;  
Tassa vākyam nisāmehi, dullabhaṃ dassanaṃ punā’ ti.

Tattha **pāvekkhīti** paviṭṭho. **Yenāti** bhadde vimale, yena kāraṇena tvam paṇḍu ceva, na ca te bhattaṃ rucati. **Na ca metādiso vaṇṇoti** pathavitale vā devaloke vā na ca tādiso vaṇṇo aññaṃ kassaci atthi, yādiso etassa guṇavaṇṇo patthaṭṭho. **Ayameso tamonudoti** yaṃ nissāya tava dohaḷo uppanno, ayameva so sabbalokassa tamonudo. **Punāti** puna etassa dassanaṃ nāma dullabhanti vadati.

Vimalāpi taṃ disvā paṭisanthāraṃ akāsi. Tamatthaṃ pakāsento sathā āha –

**1607:** ‘Disvāna taṃ vimalā bhūripaṇñaṃ, dasaṅgulī añjalim paggahetvā;  
Haṭṭhena bhāvena patītarūpā, iccabravi kurūnaṃ kattuseṭṭha’ nti.

Tattha **haṭṭhena bhāvenāti** pahaṭṭhena cittaṇa. **Patītarūpāti** somanassajātā.

Ito paraṃ vimalāya ca mahāsattassa ca vacanappaṭivacanagāthā –

**1608:** ‘Adiṭṭhapubbaṃ disvāna, macco maccubhayatṭito;  
Byamhito nābhivādesi, nayidaṃ paññaṇavātamiva.

**1609:** ‘Na camhi byamhito nāgi, na ca maccubhayatṭito;  
Na vajjho abhivādeyya, vajjhaṃ vā nābhivādaye.

**1610:** ‘Kathaṃ no abhivādeyya, abhivādāpayetha ve;  
Yaṃ naro hantumiccheyya, taṃ kammaṃ nupapajjati.

**1611:** ‘Evametam yathā brūsi, saccaṃ bhāsasi paṇḍita;  
Na vajjho abhivādeyya, vajjhaṃ vā nābhivādaye.

**1612:** ‘Kathaṃ no abhivādeyya, abhivādāpayetha ve;  
Yaṃ naro hantumiccheyya, taṃ kammaṃ nupapajjati.

**1613:** ‘Asassataṃ sassataṃ nu tavayidaṃ, iddhī jutī balavīriyūpapatti;  
Pucchāmi taṃ nāgakaññetamatthaṃ, kathaṃ nu te laddhamidaṃ vimānaṃ.

**1614:** ‘Adhiccaladdhaṃ pariṇāmajam te, sayamkataṃ udāhu devehi dinnaṃ;

Akkhāhi me nāgakaññetamatthaṃ, yatheva te laddhamidaṃ vimānaṃ.

**1615:** ‘Nādhiccaladdhaṃ na pariṇāmajaṃ me, na sayamaṃkathaṃ nāpi devehi dinnamaṃ;  
Sakehi kammehi apāpakehi, puññehi me laddhamidaṃ vimānaṃ.

**1616:** ‘Kiṃ te vataṃ kiṃ pana brahmacariyaṃ, kissa suciṇṇassa ayaṃ vipāko;  
Iddhī jutī balavīriyūpapatti, idaṅca te nāgi mahāvimaṇaṃ.

**1617:** ‘Ahaṅca kho sāmiko cāpi mayhaṃ, saddhā ubho dānapatī ahumhā;  
Opānabhūtaṃ me gharaṃ tadāsi, santappitā samaṇabrāhmaṇā ca.

**1618:** ‘Mālaṅca gandhaṅca vilepanaṅca, padīpiyaṃ seyyamupassayaṅca;  
Acchādanaṃ sāyanamannapānaṃ, sakkacca dānāni adamha tattha.

**1619:** ‘Taṃ me vataṃ taṃ pana brahmacariyaṃ, tassa suciṇṇassa ayaṃ vipāko;  
Iddhī jutī balavīriyūpapatti, idaṅca me dhīra mahāvimaṇaṃ.

**1620:** ‘Evaṃ ce te laddhamidaṃ vimānaṃ, jānāsi puññānaṃ phalūpapattiṃ;  
Tasmā hi dhammaṃ cara appamattā, yathā vimānaṃ puna māvasesi.

**1621:** ‘Nayidha santi samaṇabrāhmaṇā ca, yesannapānāni dademu katte;  
Akkhāhi me pucchito etamatthaṃ, yathā vimānaṃ puna māvasema.

**1622:** ‘Bhogī hi te santi idhūpapannā, puttā ca dārā anujīvino ca;  
Tesu tuvaṃ vacasā kammunā ca, asampaduṭṭhā ca bhavāhi niccaṃ.

**1623:** ‘Evaṃ tuvaṃ nāgi asampadosaṃ, anupālaya vacasā kammunā ca;  
Ṭhatvā idha yāvatāyukaṃ vimāne, uddhaṃ ito gacchasi devalokaṃ.

**1624:** ‘Addhā hi so socati rājasetṭho, tayā vinā yassa tuvaṃ sajjibbo;  
Dukkūpanītopi tayā samecca, vindeyya poso sukhamāturopi.

**1625:** ‘Addhā sataṃ bhāsasi nāgi dhammaṃ, anuttaraṃ atthapadaṃ suciṇṇamaṃ;  
Etādisiyāsu hi āpadāsu, paññāyate mādisānaṃ viseso.

**1626:** ‘Akkhāhi no tāyaṃ mudhā nu laddho, akkhehi no tāyaṃ ajesi jūte;  
Dhammena laddho iti tāyamāha, kathaṃ nu tvaṃ hatthamimassa māgato.

**1627:** ‘Yo missaro tattha ahosi rājā, tamāyamakkhehi ajesi jūte;  
So maṃ jito rājā imassadāsi, dhammena laddhosmi asāhasenā’’ti.

Imāsaṃ gāthānaṃ attho heṭṭhā vuttanayeneva veditabbo.

Mahāsattassa vacanaṃ sutvā atirekataraṃ tuṭṭhā vimalā mahāsattaṃ gahetvā  
sahassagandhodakaghaṭehi nhāpetvā nhānakāle mahāsattassa dibbadussadibbagandhamālādīni datvā  
alaṅkatappaṭiyattakāle dibbabhojanaṃ bhojesi. Mahāsatto bhuttabhojano alaṅkatāsanamaṃ paññāpetvā  
alaṅkatadhammāsane nisīditvā buddhalīlaya dhammaṃ desesi. Tamatthaṃ pakāsento satthā āha –

**1628:** ‘Yatheva varuṇo nāgo, pañhaṃ pucchittha paṇḍitaṃ;  
Tatheva nāgakaññāpi, pañhaṃ pucchittha paṇḍitaṃ.

**1629:** ‘Yatheva varuṇaṃ nāgaṃ, dhīro tosesi pucchito;  
Tatheva nāgakaññaṃpi, dhīro tosesi pucchito.

**1630:** ‘Ubhopi te attamane viditvā, mahoragaṃ nāgakaññaṃca dhīro;  
Achambhī abhīto alomahaṭṭho, iccabravi varuṇaṃ nāgarājānaṃ.

**1631:** ‘Mā rodhayi nāga āyāhamasmi, yena tavattho idaṃ sarīraṃ;  
Hadayena maṃsena karohi kiccaṃ, sayaṃ karissāmi yathāmati te’’ti.

Tattha **achambhī**ti nikkampo. **Alomahaṭṭho**ti bhayena ahaṭṭhalomo. **Iccabravī**ti vīmaṃsanavasena iti abravi. **Mā rodhayī**ti ‘mittadubbhikammaṃ karomī’’ti mā bhāyi, ‘kathaṃ nu kho imaṃ idāni māressāmi’’ti vā mā cintayi. **Nāgā**ti varuṇaṃ ālapati. **Āyāhamasmī**ti āyo ahaṃ asmi, ayameva vā pāṭho. **Sayaṃ karissāmī**ti sace tvaṃ ‘imassa santike idāni dhammo me suto’’ti maṃ māretuṃ na visahasi, ahameva yathā tava ajjhāsayo, tathā sayaṃ karissāmīti.

Nāgarājā āha –

**1632:** ‘Pañña have hadayaṃ paṇḍitānaṃ, te tyamha paññāya mayaṃ sutuṭṭhā;  
Anūnanāmo labhatajja dāraṃ, ajjeva taṃ kuruyo pāpayātū’’ti.

Tattha **te tyamhā**ti te mayaṃ tava paññāya sutuṭṭhā. **Anūnanāmo**ti sampuñṇanāmo puñṇako yakkhasenāpati. **Labhatajja dāraṃ**ti labhatu ajja dāraṃ, dadāmi assa dhītaraṃ irandhatim. **Pāpayātū**ti ajjeva taṃ kururattṭhaṃ puñṇako pāpetu.

Evañca pana vatvā varuṇo nāgarājā irandhatim puñṇakassa adāsi. So taṃ labhitvā tuṭṭhacitto mahāsattena saddhim sallapi. Tamatthaṃ pakāsento sathā āha –

**1633:** ‘Sa puñṇako attamano udaggo, irandhatim nāgakaññaṃ labhitvā;  
Haṭṭhena bhāvena patītarūpo, iccabravi kurūnaṃ kattuseṭṭhaṃ.

**1634:** ‘Bhariyāya maṃ tvaṃ akari samaṅgiṃ, ahañca te vidhura karomi kiccaṃ;  
Idaṃca te maṇiratanāṃ dadāmi, ajjeva taṃ kuruyo pāpayāmī’’ti.

Tattha **maṇiratananti** paṇḍita, ahaṃ tava guṇesu pasanno arahāmi tava anucchavikaṃ kiccaṃ kātuṃ, tasmā imañca te cakkavattiparibhogaṃ maṇiratanāṃ demi, ajjeva taṃ indapatthaṃ pāpemīti.

Atha mahāsatto tassa thutiṃ karonto itaraṃ gāthamāha –

**1635:** ‘Ajeyyamesā tava hotu metti, bhariyāya kaccāna piyāya saddhim;  
Ānandi vitto sumano patīto, datvā maṇiṃ mañca nayindapattha’’nti.

Tattha **ajeyyamesāti** esā tava bhariyāya saddhim piyasaṃvāsametti ajeyyā hotu. ‘‘Ānandi vitto’’tiādīhi pītisamaṅgibhāvamevassa vadati. **Nayindapatthanti** naya indapatthaṃ.

Taṃ sutvā puñṇako tathā akāsi. Tena vuttaṃ –

**1636:** ‘Sa puñṇako kurūnaṃ kattuseṭṭhaṃ, nisīdayī purato āsanasmim;  
Ādāya kattāramanomaṇñaṃ, upānayī nagaraṃ indapatthaṃ.

**1637:** ‘Mano manussassa yathāpi gacche, tatopissa khippataraṃ ahosi;  
Sa puñṇako kurūnaṃ kattuseṭṭhaṃ, upānayī nagaraṃ indapatthaṃ.

**1638:** ‘Etindapattham nagaram padissati, rammāni ca ambavanāni bhāgaso;  
Ahañca bhariyāya samañgibhūto, tuvañca pattosi sakam niketa’nti.

Tattha **yathāpi gacchati** mano nāma kiñcāpi na gacchati, dūre ārammaṇam gaṇhanto pana gatoti vuccati, tasmā manassa ārammaṇaggahaṇatopi khippataram tassa manomayasindhavassa gamanam ahosīti evamettha attho daṭṭhabbo. **Etindapatthanti** assapiṭṭhe nisinnoyevassa dassento evamāha. **Sakam niketanti** tvañca attano nivesanam sampattoti āha.

Tasmiṃ pana divase paccūsakāle rājā supinam addasa. Evarūpo supino ahoṣi – rañño nivesanadvāre paññākkhandho sīlamayasākho pañcagorasaphalo alaṅkatahatthigavāssapaṭicchanno mahārukkho ṭhito. Mahājano tassa sakkāram katvā añjalim paggayha namassamāno aṭṭhāsi. Atheko kaṇhapuriso pharusō rattasāṭakanivattho rattapupphakaṇṇadharo āvudhahattho āgantvā mahājanassa paridevantasseva taṃ rukkham samūlam chinditvā ākaḍḍhanto ādāya gantvā puna taṃ āharitvā pakatiṭṭhāneyeva ṭhapetvā pakkāmīti. Rājā taṃ supinam pariggaṇhanto ‘‘mahārukkho viya na aṅño koci, vidhurapaṇḍito. Mahājanassa paridevantasseva taṃ samūlam chinditvā ādāya gatapuriso viya na aṅño koci, paṇḍitam gahetvā gatamāṇavo. Puna taṃ āharitvā pakatiṭṭhāneyeva ṭhapetvā gato viya so māṇavo puna taṃ paṇḍitam ānetvā dhammasabhāya dvāre ṭhapetvā pakkamissati. Addhā ajja mayam paṇḍitam passissāmā’’ti sannitṭhānam katvā somanassapatto sakalanagaram alaṅkārapetvā dhammasabham sajjāpetvā alaṅkataratanamaṇḍape dhammasanam paññāpetvā ekasatarājaamaccagaṇanagaravāsijānapadaparivuto ‘‘ajja tumhe paṇḍitam passissatha, mā socitthā’’ti mahājanam assāsetvā paṇḍitassa āgamanam olokento dhammasabhāyam nisīdi. Amaccādayopi nisīdimṣu. Tasmiṃ khaṇe puṇṇakopi paṇḍitam otāretvā dhammasabhāya dvāre parisamajjheyeva ṭhapetvā irandhatim ādāya devanagarameva gato. Tamattham pakāsento satthā āha –

**1639:** ‘Na puṇṇako kurūnam kattuseṭṭham, oropiya dhammasabhāya majjhe;  
Ājaññamāruyha anomavaṇṇo, pakkāmi vehāyasamantalikkhe.

**1640:** ‘Taṃ disvā rājā paramappatīto, utṭhāya bāhāhi palissajitvā;  
Avikampayam dhammasabhāya majjhe, nisīdayī pamukhamāsanasmī’’nti.

Tattha **anomavaṇṇoti** ahīnavaṇṇo uttamavaṇṇo. **Avikampayanti** bhikkhave, so rājā paṇḍitam palissajitvā mahājanamajjhe avikampanto anolīyantoyeva hatthe gahetvā attano abhimukham katvā alaṅkatadhammāsane nisīdāpesi.

Atha rājā tena saddhim sammoditvā madhurapaṭisanthāram karonto gāthamāha –

**1641:** ‘Tvam no vinetāsi rathamva naddham, nandanti taṃ kuruyo dassanena;  
Akkhāhi me pucchito etamattham, katham pamokkho ahu māṇavassā’’ti.

Tattha **naddhanti** yathā naddham ratham sārathi vineti, evam tvam amhākam kāraṇena nayena hitakiriyāsu vinetā. **Nandanti tanti** taṃ disvāva ime kururaṭṭhavāsino tava dassanena nandanti. **Māṇavassāti** māṇavassa santikā katham tava pamokkho ahoṣi? Yo vā taṃ muñcantassa māṇavassa pamokkho, so kena kāraṇena ahoṣīti attho.

Mahāsatto āha –

**1642:** ‘Yam māṇavotyābhivadī janinda, na so manusso naravīraseṭṭha;  
Yadi te suto puṇṇako nāma yakkho, rañño kuverassa hi so sajjibbo.

**1643:** ‘Bhūmindharo varuṇo nāma nāgo, brahā sucī vaṇṇabalūpapanno;  
Tassānujam dhītaram kāmayāno, irandhatī nāma sā nāgakaññā.

**1644:** ‘Tassā sumajjhāya piyāya hetu, patārayittha marañāya mayhaṃ;  
So ceva bhariyāya samaṅgibhūto, ahañca anuññāto maṇi ca laddho’ ti.

Tattha yaṃ mānavotyābhivadīti janinda yaṃ tvam “mānavo” ti abhivadasi. **Bhūmindharoti** bhūmindharanāgabhanavāsī. **Sā nāgakaññāti** yaṃ nāgakaññaṃ so patthayamāno mama marañāya patārayi cittaṃ pavattesi, sā nāgakaññā irandhatī nāma. **Piyāya hetūti** mahārāja, so hi nāgarājā catupposathikapañhavissajjane pasanno maṃ mañinā pūjetvā nāgabhanavaṃ gato vimalāya nāma deviyā taṃ maṇiṃ adisvā “deva, kuhiṃ maṇi” ti pucchito mama dhammakathikabhāvaṃ vaṇṇesi. Sā mayhaṃ dhammakathaṃ sotukāmā hutvā mama hadaye dohaḷaṃ uppādesi. Nāgarājā duggahitena pana dhītaṃ irandhatīṃ āha – “mātā, te vidhurassa hadayamaṃse dohaḷinī, tassa hadayamaṃsaṃ āharitūṃ samatthaṃ sāmikaṃ pariyesāhi” ti. Sā pariyesantī vessavaṇassa bhāgineyyaṃ puṇṇakaṃ nāma yakkhaṃ disvā taṃ attani paṭibaddhacittaṃ ñatvā pitu santikaṃ nesi. Atha maṃ so “vidhuraṇḍitassa hadayamaṃsaṃ āharitūṃ sakkonto irandhatīṃ labhissasi” ti āha. Puṇṇako vepullapabbatato cakkavattiparibhogaṃ maṇiratanam āharitvā tumhehi saddhiṃ jūtaṃ kīḷitvā maṃ jinitvā labhi. Ahañca mama nivesane tīhaṃ vasāpetvā mahantaṃ sakkāraṃ akāsiṃ. Sopi maṃ assavāladhiṃ gāhāpetvā himavante rukkhesu ca pabbatesu ca pothetvā māretuṃ asakkonto sattame vātakkhandhe verambhavātamukhe ca pakkhanditvā anupubbena saṭṭhiyojanubbedhe kāḷāgirimatthake ṭhapetvā sīhavesādivasena idañcidañca rūpaṃ katvāpi māretuṃ asakkonto mayā attano māraṇakāraṇaṃ puṭṭho ācikkhi. Athassāhaṃ sādhanaradhamme kathesiṃ. Taṃ sutvā pasannacitto maṃ idha ānetukāmo ahoṣi.

Athāhaṃ taṃ ādāya nāgabhanavaṃ gantvā nāgarañño ca vimalāya ca dhammaṃ desesiṃ. Tato nāgarājā ca vimalā ca sabbanāgaparisi ca pasīdimsu. Nāgarājā tattha mayā chāhaṃ vutthakāle irandhatīṃ puṇṇakassa adāsi. So taṃ labhitvā pasannacitto hutvā maṃ maṇiratanena pūjetvā nāgarājena āṇatto manomayasindhavaṃ āropetvā sayam majjhimāsane nisīditvā irandhatīṃ pacchimāsane nisīdāpetvā maṃ purimāsane nisīdāpetvā idhāgantvā parisamajjhe otāretvā irandhatīṃ ādāya attano nagameva gato. Evaṃ, mahārāja, so puṇṇako tassā sumajjhāya piyāya hetu patārayittha marañāya mayhaṃ. Athevaṃ maṃ nissāya so ceva bhariyāya samaṅgibhūto, mama dhammakathaṃ sutvā pasannena nāgarājena ahañca anuññāto, tassa puṇṇakassa santikā ayaṃ sabbakāmadado cakkavattiparibhogamaṇi ca laddho, gaṇhatha, deva, imaṃ maṇinti rañño ratanaṃ adāsi.

Tato rājā paccūsakāle attanā diṭṭhasupinaṃ nagaravāsīnaṃ kathetukāmo “bhonto, nagaravāsino ajja mayā diṭṭhasupinaṃ suṇāthā” ti vatvā āha –

**1645:** ‘Rukkho hi mayhaṃ padvāre sujāto, paññākkhandho sīlamayassa sākā;  
Atthe ca dhamme ca ṭhito nipāko, gavapphalo hatthigavāssachanno.

**1646:** ‘Naccagītātūriyābhinādite, ucchijja senaṃ puriso ahāsi;  
So no ayaṃ āgato sanniketaṃ, rukkhasimassāpacitīṃ karotha.

**1647:** ‘Ye keci vittā mama paccayena, sabbeva te pātukarontu ajja;  
Tibbāni katvāna upāyanāni, rukkhasimassāpacitīṃ karotha.

**1648:** ‘Ye keci baddhā mama atthi raṭṭhe, sabbeva te bandhanā mocayantu;  
Yathevaṃ bandhanasmā pamutto, evamete muñcare bandhanasmā.

**1649:** ‘Unnaṅgalā māsamimaṃ karontu, maṃsodanaṃ brāhmaṇā bhakkhayantu;  
Amajjapā majjarahā pivantu, puṇṇāhi thālāhi palissutāhi.

**1650:** ‘Mahāpathaṃ nicca samavhayantu, tibbāñca rakkhaṃ vidahantu raṭṭhe;  
Yathāññamaññaṃ na viheṭṭhayeyyūṃ, rukkhasimassāpacitīṃ karothā’ ti.

Tattha **sīlamayassa sākḥā**ti etassa rukkhassa sīlamayā sākḥā. **Atthe ca dhammecā**ti vaddhiyañca sabhāve ca. **Ṭhito nipākoti** so paññāmayarukkho patitṭhito. **Gavapphaloti** pañcavidhagorasaphalo. **Hatthigavāssachannoti** alaṅkatahatthigavāssehi sañchanno. **Naccagītātūriyābhināditeti** atha tassa rukkhassa pūjaṃ karontena mahājanena tasmim̃ rukkhe etehi naccādīhi abhinādite. **Ucchijja senaṃ puriso ahāsī**ti eko kaṇhapuriso āgantvā taṃ rukkhaṃ ucchijja parivāretvā ṭhitam̃ senaṃ palāpetvā ahāsi gahetvā gato. Puna so rukkho āgantvā amhākaṃ nivesanadvārayeva ṭhito. So no ayaṃ rukkhasadiso paṇḍito sanniketam̃ āgato. Idāni sabbeva tumhe rukkhassa imassa apacitim̃ karotha, mahāsakkāraṃ pavattetha.

**Mama paccayenā**ti ambho, amaccā ye keci maṃ nissāya laddhena yasena **vittā** tuṭṭhacittā, te sabbe attano vittaṃ pātukarontu. **Tibbānī**ti bahalāni mahantāni. **Upāyanānī**ti paṇṇākāre. **Ye kecī**ti antamaso kīḷanattḥāya baddhe migapakkhino upādāya. **Muñcareti** muñcantu. **Unnaṅgalā māsamimaṃ karontū**ti imaṃ māsam̃ kasananaṅgalāni ussāpetvā ekamante ṭhapetvā nagare bherim̃ carāpetvā sabbeva manussā mahāchaṇaṃ karontu. **Bhakkhayantū**ti bhuñjantu. **Amajjapā**ti ettha a-kāro nipātamattam̃, majjapā purisā majjarahā attano attano āpānattḥānesu nisinnā pivantūti attho. **Puṇṇāhi thālāhī**ti puṇṇehi thālehi. **Palissutāhī**ti atipuṇṇattā paggharamānehi. **Mahāpathaṃ nicca samavhayantū**ti antonagare alaṅkatamahāpathaṃ rājamaggaṃ nissāya ṭhitā vesiyā niccakālam̃ kilesavasena kilesatthikaṃ janam̃ avhayantūti attho. **Tibbanti gālhaṃ**. **Yathā**ti yathā rukkḥassa susaṃvihitattā unnaṅgalā hutvā rukkḥassimassa apacitim̃ karontā aññaamaññaṃ na vihetḥayeyyūṃ, evaṃ rakkhaṃ saṃvidahantūti attho.

Evaṃ raññā vutte –

**1651:** ‘Orodhā ca kumārā ca, vesiyānā ca brāhmaṇā;  
Bahum̃ annaṅca pānaṅca, paṇḍitassābhihārayum̃.

**1652:** ‘Hatthārohā anīkaṭṭhā, rathikā pattikārakā;  
Bahum̃ annaṅca pānaṅca, paṇḍitassābhihārayum̃.

**1653:** ‘Samāgatā jānapadā, negamā ca samāgatā;  
Bahum̃ annaṅca pānaṅca, paṇḍitassābhihārayum̃.

**1654:** ‘Bahujano pasannosi, disvā paṇḍitamāgate;  
Paṇḍitamhi anuppatte, celukkhepo pavattathā’ ti.

Tattha **abhihārayunti** evaṃ raññā āṇattā mahāchaṇaṃ paṭiyādetvā sabbe satte bandhanā mocetvā ete sabbe orodhādayo nānappakāraṃ paṇṇākāraṃ sajjitvā tena saddhim̃ annaṅca pānaṅca paṇḍitassa pesesum̃. **Paṇḍitamāgate**ti paṇḍite āgate taṃ paṇḍitam̃ disvā bahujano pasanno ahoṣi.

Chaṇo māsenā osānaṃ agamāsi. Tato mahāsatto buddhakiccaṃ sādḥento viya mahājanassa dhammaṃ desento rājānaṅca anusāsanto dānādīni puññāni katvā yāvatāyukaṃ ṭhatvā āyupariyosāne saggaparāyaṇo ahoṣi. Rājānaṃ ādim̃ katvā sabbe pi nagaravāsino paṇḍitassovāde ṭhatvā dānādīni puññāni katvā āyupariyosāne saggapuraṃ pūrayim̃su.

Sattḥā imaṃ dhammadesanaṃ āharitvā ‘‘na, bhikkhave, idāneva, pubbe pi tathāgato paññāsampanno upāyakusaloyevā’’ ti vatvā jātaṃ samodhānesi – ‘‘tadā paṇḍitassa mātāpitāro mahārājakulāni ahesum̃, jeṭṭhabhariyā rāhulamātā, jeṭṭhaputto rāhulo, vimalā uppalavaṇṇā, varuṇanāgarājā sārīputto, supaṇṇarājā moggallāno, sakko anuruddho, dhanañcayakorabyarājā ānando, puṇṇako channo, parisā buddhāparisā, vidhurapaṇḍito pana ahameva sammāsambuddho ahoṣi’’ nti.

Vidhura jātakavaṇṇanā navamā.

[547] 10. Vessantarajātakavaṇṇanā

## Dasavarakathāvaṇṇanā

**Phussatī varavaṇṇābhēti** idaṃ sathā kapilavatthum upanissāya nigrodhārāme viharanto pokkharavassaṃ ārabha kathesi. Yadā hi sathā pavattitavaradhammacakko anukkamena rājagahaṃ gantvā tattha hemantaṃ vītināmetvā udāyittherena maggadesakena vīsatisahassakhīṇāsavaparivuto paṭhamagamanena kapilavatthum agamāsi, tadā sakyarājāno “mayam amhākaṃ ñāṭisettham passissāmā”ti sannipatitvā bhagavato vasanaṭṭhānaṃ vīmaṃsamānā “nigrodhasakkassārāmo ramaṇīyo”ti sallakkhetvā tattha sabbaṃ paṭijjaggaṇavidhiṃ katvā gandhapupphādihattā paccuggamaṇaṃ karontā sabbālaṅkārappaṭimaṇḍite daharadahare nāgaradārake ca nāgaradārikāyo ca paṭhamaṃ paṇiṇṇesu, tato rājakumāre ca rājakumārikāyo ca. Tesam antarā sāmaṃ gandhapupphacuṇṇādīhi sathhāraṃ pūjetvā bhagavantaṃ gahetvā nigrodhārāmameva agamiṃsu. Tattha bhagavā vīsatisahassakhīṇāsavaparivuto paññattavarabuddhāsane nisīdi. Tadā hi sākiyā mānājātikā mānathaddhā. Te “ayaṃ siddhatthakumāro amhehi daharataro, amhākaṃ kaniṭṭho bhāgineyyo putto nattā”ti cintetvā daharadahare rājakumāre ca rājakumārikāyo ca āhaṃsu “tumhe bhagavantaṃ vandatha, mayam tumhākaṃ piṭṭhito nisīdissāmā”ti.

Tesu evaṃ avanditvā nisīnesu bhagavā tesam ajjhāsayaṃ oloketvā “na maṃ ñātayo vandanti, handa idāneva vandāpessāmī”ti abhiññāpādakaṃ catutthajjhānaṃ samāpajjitvā tato vuṭṭhāya ākāsaṃ abbhuggantvā tesam sīse pādapaṃsuṃ okiramāno viya kaṇḍambarukkhamūle yamakapāṭihāriyasadisam pāṭihāriyaṃ akāsi. Rājā suddhodano taṃ acchariyaṃ disvā āha “bhante, tumhākaṃ jātadivase kāḷadevalassa vandanattham upanītanaṃ vo pāde parivattitvā brāhmaṇassa matthake ṭhite disvā aham tumhākaṃ pāde vandim, ayaṃ me paṭhamavandanā. Punapi vappamaṅgaladivase jambucchāyāya sirisayane nisinnānaṃ vo jambucchāyāya aparivattanaṃ disvāpi aham tumhākaṃ pāde vandim, ayaṃ me dutiyavandanā. Idāni imaṃ adiṭṭhapubbaṃ pāṭihāriyaṃ disvāpi tumhākaṃ pāde vandāmi, ayaṃ me tatiyavandanā”ti. Rañña pana vandite avanditvā ṭhātuṃ samattho nāma ekasākiyopi nāhosi, sabbe vandimsuyeva.

Iti bhagavā ñātayo vandāpetvā ākāsatō otaritvā paññattavarabuddhāsane nisīdi. Nisīne ca bhagavati sikhāpato ñāṭisamāgame ahoṣi, sabbe ekaggacittā hutvā nisīdiṃsu. Tato mahāmegho uṭṭhahitvā pokkharavassaṃ vassi, tambavaṇṇaṃ udakaṃ heṭṭhā viravantaṃ gacchati. Ye temetukāmā, te tementi. Atemetukāmassa sarīre ekabindumattampi na patati. Taṃ disvā sabbe acchariyabbhutacittajātā ahesuṃ. “Aho acchariyaṃ aho abbhutaṃ aho buddhānaṃ mahānubhāvātā, yesaṃ ñāṭisamāgame evarūpaṃ pokkharavassaṃ vassi”ti bhikkhū kathaṃ samuṭṭhāpesuṃ. Taṃ sutvā sathā “na, bhikkhave, idāneva, pubbepi mama ñāṭisamāgame mahāmegho pokkharavassaṃ vassiyevā”ti vatvā tehi yācito atītaṃ āhari.

Atīte siviraṭṭhe jetuttaranagare sivimahārājā nāma rajjaṃ kārento sañjayaṃ nāma puttaṃ paṭilabhi. So tassa vayappattassa maddarājadhītaṃ phussatiṃ nāma rājakaññaṃ ānetvā rajjaṃ niyyādetvā phussatiṃ aggamaheṣiṃ akāsi. Tassā ayaṃ pubbayogo – ito ekanavutikappe vipassī nāma sathā loke udapādi. Tasmim bandhumatinagaraṃ nissāya kheme migadāye viharante eko rājā rañño bandhumassa anagghena candanasārena saddhim satasahassagghanaṃ suvaṇṇamālaṃ pesesi. Rañño pana dve dhītaro ahesuṃ. So taṃ paṇṇākāraṃ tāsam dātukāmo hutvā candanasāraṃ jeṭṭhikāya adāsi, suvaṇṇamālaṃ kaniṭṭhāya adāsi. Tā ubhopi “na mayam imaṃ attano sarīre piḷandhissāma, sathhārameva pūjessāmā”ti cintetvā rājānaṃ āhaṃsu “tāta, candanasārena ca suvaṇṇamālāya ca dasabalaṃ pūjessāmā”ti. Taṃ sutvā rājā “sādhū”ti sampaṭicchi. Jeṭṭhikā sukhumacandanacuṇṇaṃ kāretvā suvaṇṇasamuggaṃ pūretvā gaṇhāpesi. Kaniṭṭhabhaginī pana suvaṇṇamālaṃ uracchadamālaṃ kārapetvā suvaṇṇasamuggena gaṇhāpesi. Tā ubhopi migadāyavihāraṃ gantvā jeṭṭhikā candanacuṇṇena dasabalassa suvaṇṇavaṇṇaṃ sarīraṃ pūjetvā sesacuṇṇāni gandhakuṭiyam vikiritvā “bhante, anāgate tumhādisassa buddhassa mātā bhavēyya”nti patthanaṃ akāsi. Kaniṭṭhabhaginīpi tathāgatassa suvaṇṇavaṇṇaṃ sarīraṃ suvaṇṇamālāya katena uracchadena pūjetvā “bhante, yāva arahattappatti, tāva idaṃ pasādhanam mama sarīrā mā vigataṃ hotū”ti patthanaṃ akāsi. Sathhāpi tāsam anumodanaṃ akāsi.



Tā ubhopi yāvatāyukaṃ t̥atvā devaloke nibbattiṃsu. Tāsu jeṭṭhabhaginī devalokato manussalokaṃ, manussalokato devalokaṃ saṃsarantī ekanavutikappāvasāne amhākaṃ buddhuppādakāle buddhamātā mahāmāyādevī nāma ahosi. Kaniṭṭhabhaginīpi tatheva saṃsarantī kassapadasabalassa kāle kikkissa rañño dhītā hutvā nibbatti. Sā cittakammakatāya viya uracchadamālāya alaṅkatena urena jātatā uracchadā nāma kumārikā hutvā soḷasavassikakāle satthu bhattānumodanaṃ sutvā sotāpattiphale patiṭṭhāya aparabhāge bhattānumodanaṃ suṇanteneva pitarā sotāpattiphalaṃ pattadivaseyeva arahattaṃ patvā pabbajitvā parinibbāyi. Kikirājāpi aññā satta dhītaro labhi. Tāsaṃ nāmāni –

“Samaṇī samaṇaguttā ca, bhikkhunī bhikkhadāyikā;  
Dhammā ceva sudhammā ca, saṅghadāsī ca sattamī”’ti.

Tā imasmiṃ buddhuppāde –

“Khemā uppalavaṇṇā ca, paṭācārā ca gotamī;  
Dhammadinnā mahāmāyā, visākhā cāpi sattamī”’ti.

Tāsu phussatī sudhammā nāma hutvā dānādīni puññāni katvā vipassisammāsambuddhassa katāya candanacuṇṇapūjāya phalena rattacandanarasaparipphosita viya sarīrena jātatā phussatī nāma kumārikā hutvā devesu ca manussesu ca saṃsarantī aparabhāge sakkassa devarañño aggamaheṣī hutvā nibbatti. Athassā yāvatāyukaṃ t̥atvā pañcasu pubbanimittesu uppannesu sakko devarājā tassā parikkhīṇāyukataṃ ñatvā mahantena yasena taṃ ādāya nandanavanuyyānaṃ gantvā tattha taṃ alaṅkatasayanapiṭṭhe nisinnaṃ sayamaṃ sayanapasse nisīditvā etadavoca “bhadde phussati, te dasa vare dammi, te gaṇhassū”’ti vadanto imasmiṃ gāthāsahassapaṭimaṇḍite mahāvessantarajātaka paṭhamamaṃ gāthamāha –

1655: ‘Phussatī varavaṇṇābhe, varassu dasadhā vare;  
Pathabyā cārupbaṅgi, yaṃ tuyhaṃ manaso piya’nti.

Evamesā mahāvessantaradhammadesanā devaloke patiṭṭhāpitā nāma hoti.

Tattha **phussatī**ti taṃ nāmenālapati. **Varavaṇṇābheti** varāya vaṇṇābhāya samannāgate. **Dasadhāti** dasavidhe. **Pathabyāti** pathaviyaṃ gahetabbe katvā **varassu** gaṇhassūti vadati. **Cārupbaṅgīti** cārunā pubbaṅgena varalakkhaṇena samannāgate. **Yaṃ tuyhaṃ manaso piyanti** yaṃ yaṃ tava manasā piyaṃ, taṃ taṃ dasahi koṭṭhāsehi gaṇhāhīti vadati.

Sā attano cavanadhammataṃ ajānantī pamattā hutvā dutiyagāthamāha –

1656: ‘Devarāja namo tyatthu, kiṃ pāpaṃ pakataṃ mayā;  
Rammā cāvesī maṃ t̥hānā, vātova dharaṇīruha’nti.

Tattha **namo tyatthūti** namo te atthu. **Kiṃ pāpanti** kiṃ mayā tava santike pāpaṃ pakatanti pucchati. **Dharaṇīruhanti** rukkhamaṃ.

Athassā pamattabhāvaṃ ñatvā sakko dve gāthā abhāsi –

1657: ‘Na ceva te kataṃ pāpaṃ, na ca me tvamasi appiyā;  
Puññaṅca te parikkhīṇaṃ, yena tevaṃ vadāmaṃ.

1658: ‘Santike maraṇaṃ tuyhaṃ, vinābhāvo bhavissati;  
Paṭiggaṇhāhi me ete, vare dasa paveccchato’nti.

Tattha **yena tevanti** yena te evaṃ vadāmi. **Tuyhaṃ vinābhāvoti** tava amhehi saddhiṃ viyogo bhavissati. **Pavecchatoti** dadamānassa.

Sā sakkassa vacanaṃ sutvā nicchayena attano maraṇaṃ ñatvā varam gaṇhantī āha –

**1659:**“Varam ce me ado sakka, sabbabhūtānamissara;  
Sivirājassa bhaddante, tattha assaṃ nivesane.

**1660:**“Nīlanettā nīlabhamu, nīlakkhī ca yathā migī;  
Phussatī nāma nāmena, tatthapassaṃ purindana.

**1661:**“Puttaṃ labhetha varadaṃ, yācayogaṃ amacchariṃ;  
Pūjitaṃ paṭirājūhi, kittimantaṃ yasassinaṃ.

**1662:**“Gabbhaṃ me dhārayantiyā, majjhimaṅgaṃ anunnataṃ;  
Kucchi anunnato assa, cāpaṃva likhitaṃ samaṃ.

**1663:**“Thanā me nappapateyyuṃ, palitā na santu vāsava;  
Kāye rajo na limpetha, vajjhañcāpi pamocaye.

**1664:**“Mayūraakoñcābhirude, nārivaragaṇāyute;  
Khujjacelāpakākiṇṇe, sūtamāgadhavaṇṇite.

**1665:**“Citraggaḷerughusite, surāmaṃsapabodhane;  
Sivirājassa bhaddante, tatthassaṃ mahesī piyā”ti.

Tattha **sivirājassāti** sā sakalajambudīpatalaṃ oloketī attano anucchavikaṃ sivirañño nivesanaṃ disvā tattha aggamahesibhāvaṃ patthentī evamāha. **Yathā migī**ti ekavassikā hi migapotikā nīlanettā hoti, tenevamāha. **Tatthapassanti** tatthapi imināva nāmena assaṃ. **Labhethāti** labheyyaṃ. **Varadanti** alaṅkatasīsaakkhiyugalahadayamaṃsarudhirasetacchattaputtadāresu yācitayācitassa varabhaṇḍassa dāyakaṃ. **Kucchīti** “majjhimaṅga”nti vuttaṃ sarūpato dasseti. **Likhīti**ti yathā chekena dhanukārena sammā likhitaṃ dhanu anunnatamajjhaṃ tulāvaṭṭaṃ samaṃ hoti, evarūpe me kucchi bhaveyya.

**Nappapateyyunti** patitvā lambā na bhaveyyuṃ. **Palitā na santu vāsavāti** vāsava devaseṭṭha, palitānīpi me sirasmiṃ na santu mā paññāyimsu. “Palitāni siroruhā”tipi pāṭho. **Vajjhañcāpīti** kibbisakārakaṃ rājāparādhikaṃ vajjhappattacorāṃ attano balena mocetuṃ samatthā bhaveyyaṃ. Iminā attano issariyabhāvaṃ dīpeti. **Bhūtamāgadhavaṇṇitēti** bhojanakālādīsu thutivasena kālaṃ ārocentehi sūtehi ceva māgadhakehi ca vaṇṇite. **Citraggaḷerughusitēti** pañcaṅgikatūriyasaddasadiṣaṃ manoramaṃ ravaṃ ravantehi sattaratanavicittehi dvārakavāṭehi ugghosite. **Surāmaṃsapabodhaneti** “pivatha, khādathā”ti surāmaṃsehi pabodhiyamānajane evarūpe sivirājassa nivesane tassa aggamahesī bhaveyyanti ime dasa vare gaṇhi.

Tattha sivirājassa aggamahesibhāvo paṭhāmo varo, nīlanettatā dutiyo, nīlabhamukatā tatiyo, phussatīti nāmaṃ catuttho, puttapaṭilābho pañcāmo, anunnatakucchitā chaṭṭho, alambatthanatā sattāmo, apalītabhāvo aṭṭhāmo, sukhumacchavibhāvo navāmo, vajjhappamocanasamatthatā dasāmo varoti.

Sakko āha –

**1666:**“Ye te dasa varā dinnā, mayā sabbaṅgasobhane;  
Sivirājassa vijjite, sabbe te lacchāsī vare”ti.

Athassā sakko devarājā phussatiyā dasa vare adāsi, datvā ca pana “bhadde phussati, tava sabbe te samijjhantū”ti vatvā anumodī. Tamattham pakāseno satthā āha –

1667: “Idam vatvāna maghavā, devarājā sujampati;  
Phussatiyā varam datvā, anumodittha vāsavo”ti.

Tattha **anumoditthā**ti “sabbe te lacchasi vare”ti evam vare datvā pamuddito tuṭṭhamānaso ahoṣīti attho.

Dasavarakathā niṭṭhitā.

Himavantavaṇṇanā

Iti sā vare gahetvā tato cutā maddarañño aggamahesiyā kucchimhi nibbatti. Jāyamānā ca candanacunṇaparikiṇṇena viya sarīrena jātā. Tenassā nāmaggaṇadivase “phussatī”tveva nāmaṃ karimṣu. Sā mahantena parivārena vaḍḍhitvā soḷasavassakāle uttamarūpadharā ahoṣi. Atha naṃ sivimahārājā puttassa sañjayakumārassa atthāya ānetvā tassa chattam ussāpetvā soḷasannaṃ itthisahassānaṃ jeṭṭhikaṃ katvā aggamahesiṭṭhāne ṭhapesi. Tena vuttam –

“Tato cutā sā phussatī, chattiye upapajjatha;  
Jetuttaramhi nagare, sañjayena samāgamī”ti.

Sā sañjayassa piyā manāpā ahoṣi. Atha naṃ sakko āvajjamāno “mayā phussatiyā dinnavaresu nava varā samiddhā”ti disvā “eko pana puttavaro na tāva samijjhanti, tampissā samijjhāpessāmī”ti cintesi. Tadā mahāsatto tāvatimsadevaloke vasati, āyu cassa parikkhīṇaṃ ahoṣi. Tam ṇatvā sakko tassa santikaṃ gantvā “mārisa, tayā manussalokaṃ gantuṃ vaṭṭati, tattha sivirañño aggamahesiyā kucchimhi paṭisandhiṃ gaṇhituṃ vaṭṭati”ti vatvā tassa ceva aññesañca cavanadhammānaṃ satṭhisahassānaṃ devaputtānaṃ paṭiññaṃ gahetvā sakatṭhānameva gato. Mahāsattopi tato cavitvā tatthupapanno, sesadevaputtāpi satṭhisahassānaṃ amaccānaṃ gehesu nibbatiṃsu. Mahāsatte kucchigate phussatī dohaḷinī hutvā catūsu nagaradvāresu nagaramajjhe rājanivesanadvāre cāti chasu ṭhānesu cha dānasālāyo kārāpetvā devasikaṃ cha satasahassāni vissajjetvā mahādānaṃ dātukāmā ahoṣi.

Rājā tassā dohaḷam sutvā nemittake brāhmaṇe pakkosāpetvā pucchi. Nemittakā – “mahārāja, deviyā kucchimhi dānābhīrato satto uppanno, dānena tittim na gamissatī”ti vadiṃsu. Tam sutvā rājā tuṭṭhamānaso hutvā cha dānasālāyo kārāpetvā vuttappakāraṃ dānaṃ paṭṭhapesi. Bodhisattassa paṭisandhiggahaṇakālato paṭṭhāya rañño āyassa pamānaṃ nāma nāhoṣi. Tassa puññānubhāvena sakalajambudīparājāno paṇṇākāraṃ pahiṇiṃsu. Devī mahantena parivārena gabbhaṃ dhārentī dasamāse paripuṇṇe nagaraṃ datṭhukāmā hutvā rañño ārocesi. Rājā nagaraṃ devanagaraṃ viya alaṅkārāpetvā devim rathavaraṃ āropetvā nagaraṃ padakkhiṇaṃ kāresi. Tassā vessānaṃ vīthiyā vemajjhaṃ sampattakāle kammajavātā caliṃsu. Atha amaccā rañño ārocesuṃ. Tam sutvā vessavīthiyaṃyeva tassā sūtiḡharaṃ kārāpetvā vāsaṃ gaṇhāpesi. Sā tattha puttaṃ vijāyī. Tena vuttam –

“Dasa māse dhārayitvāna, karontī puraṃ padakkhiṇaṃ;  
Vessānaṃ vīthiyā majjhe, janesi phussatī mama”nti. (cariyā. 1.76);

Mahāsatto mātu kucchito nikkhantoyeva visado hutvā akkhīni ummīletvā nikkhami. Nikkhantoyeva ca mātu hattham pasāretvā “amma, dānaṃ dassāmi, atthi kiñci te dhana”nti āha. Athassa mātā “tāta, yathāajjhāsayena dānaṃ dehi”ti pasāritahatthe sahasatthavikaṃ ṭhapesi. Mahāsatto hi umaṅgajātake imasmim jātake pacchimattabhāveti tīsu ṭhānesu jātamatteyeva mātārā saddhim katesi. Athassa nāmaggaṇadivase vessavīthiyaṃ jātattā “vessantaro”ti nāmaṃ karimṣu.

Tena vuttam –

‘‘Na mayham mattikam nāmaṃ, napi pettikasambhavaṃ;  
Jātomhi vessavīthiyaṃ, tasmā vessantaro ahu’’nti. (cariyā. 1.77);

Jāta divaseyeva panassa ekā ākāsacārinī kareṇukā abhimaṅgalasammataṃ sabbasetam hatthipotakam ānetvā maṅgalaḥatthiṭṭhāne ṭhapetvā pakkāmi. Tassa mahāsattam paccayaṃ katvā uppannattā ‘‘paccayo’’tveva nāmaṃ kariṃsu. Taṃ divasameva amaccagehesu saṭṭhisahassakumārakā jāyṃsu. Rājā mahāsattassa atidīghādīdose vivajjetvā alambathaniyo madhurakhīrāyo catusaṭṭhi dhātiyo upaṭṭhāpesi. Tena saddhiṃ jātānañca saṭṭhidāraḥasahassānaṃ ekekā dhātiyo upaṭṭhāpesi. So saṭṭhisahashehi dārahehi saddhiṃ mahantena parivārena vaḍḍhati. Athassa rājā sataḥasahassagghanakam kumārapiḷandhanaṃ kārapesi. So catuppañcavassikakāle taṃ omuñcitvā dhātīnaṃ datvā puna tāhi dīyamānampi na gaṇhi. Tā rañño ārocayṃsu. Rājā taṃ sutvā ‘‘mama puttana dīnaṃ brahmadeyyameva hotū’’ti aparampi kāresi. Kumāro tampi adāsiyeva. Iti dāraḥakāleyeva dhātīnaṃ nava vāre piḷandhanaṃ adāsi.

Aṭṭhavassikakāle pana pāsādaragato sirisayanapiṭṭhe nisinnova cintesi ‘‘ahaṃ bāhirakadānameva demi, taṃ maṃ na paritoseṭi, ajjhattikadānaṃ dātukāmomhi, sace maṃ koci sīsaṃ yāceyya, sīsaṃ chinditvā tassa dadeyyaṃ. Sacepi maṃ koci hadayaṃ yāceyya, uraṃ bhinditvā hadayaṃ nīharitvā dadeyyaṃ. Sace akkhīni yāceyya, akkhīni uppāṭetvā dadeyyaṃ. Sace sarīramaṃsaṃ yāceyya, sakalasarīrato maṃsaṃ chinditvā dadeyyaṃ. Sacepi maṃ koci rudhiraṃ yāceyya, rudhiraṃ gahetvā dadeyyaṃ. Atha vāpi koci ‘dāso me hohī’’ti vadeyya, attānaṃsa sāvetvā dāsaṃ katvā dadeyya’’nti. Tassevaṃ sabhāvaṃ cintentassa catunahutādhikadvīyojanasatasahassabahalā ayaṃ mahāpathavī mattavaravāraṇo viya gajjamaṇā kampi. Sinerupabbatarājā suseditavettankuro viya onamitvā jetuttaranagarābhīmuḥho aṭṭhāsi. Pathavisaddena devā gajjanto khaṇīkavassaṃ vassi, akālaviḷḷatā nicchariṃsu, sāgaro saṅkhubhi. Sakko devarājā apphoṭesi, mahābrahmā sādhuḥkāramadāsi. Pathavitalato paṭṭhāya yāva brahmalokā ekakoḷāhalaṃ ahoṣi.

Vuttampi cetam –

‘‘Yadāhaṃ dāraḥo homi, jātiyā aṭṭhavassiko;  
Tadā nisajja pāsāde, dānaṃ dātuṃ vicintayim.

‘‘Hadayaṃ dadeyyaṃ cakkhuṃ, maṃsampi rudhirampi ca;  
Dadeyyaṃ kāyaṃ sāvetvā, yadi koci yācaye mamaṃ.

‘‘Sabhāvaṃ cintayantassa, akampitamasanṭhitam;  
Akampi tattha pathavī, sineruvanavaṭaṃsakā’’ti. (cariyā. 1.78-80);

Bodhisatto soḷasavassikakāleyeva sabbasippesu nipphattiṃ pāpuṇi. Athassa pitā rajjaṃ dātukāmo mātarā saddhiṃ mantetvā maddarājakulato mātuladhītaraṃ maddiṃ nāma rājakaññaṃ ānetvā soḷasannaṃ itthisahassānaṃ jeṭṭhikaṃ aggamahesiṃ katvā mahāsattam rajje abhisīñci. Mahāsatto rajje patiṭṭhitakālato paṭṭhāya devasikaṃ cha sataḥasahassāni vissajjento mahādānaṃ pavattesi. Aparabhāge maddidevī puttam vijāyi. Taṃ kañcanaḷelena sampācchiṃsu, tenassa ‘‘jālīkumāro’’tveva nāmaṃ kariṃsu. Tassa padasā gamanakāle dhītaraṃ vijāyi. Taṃ kañhājīnena sampācchiṃsu, tenassā ‘‘kañhājīnā’’tveva nāmaṃ kariṃsu. Mahāsatto māssassa chakkhattuṃ alaṅkataḥatthikkhandhavaragato cha dānasālāyo olokesi. Tadā kāliṅgaratṭhe dubbuṭṭhikā ahoṣi, sassāni na sampajjiṃsu, manussānaṃ mahantaṃ chātābhayaṃ pavatti. Manussā jīvitum asakkontācorakammaṃ karonti. Dubbhikkhapīṭā jānapadā rājaṅgaṇe sannipatitvā rājānaṃ upakkosiṃsu. Taṃ sutvā rañña ‘‘kiṃ, tātā’’ti vutte tamatthaṃ ārocayṃsu. Rājā ‘‘sādhu, tātā, devaṃ vassāpessāmī’’ti te uyyojetvā samādinnaṣiḷo uposathavāsaṃ vasantopi devaṃ vassāpetum nāsakkhi. So nāgare sannipāṭetvā ‘‘ahaṃ samādinnaṣiḷo sattāhaṃ

uposathavāsaṃ vasantopi devaṃ vassāpetuṃ nāsakkhiṃ, kiṃ nu kho kātabba’’nti pucchi. Sace, deva, devaṃ vassāpetuṃ na sakkosi, esa jetuttaranagare sañjayassa rañño putto vessantaro nāma dānābhirato. Tassaṃ kira sabbaseto maṅgalahatthī atthi, tassa gatagataṭṭhāne devo vassi. Brāhmaṇe pesetvā taṃ hatthiṃ yācāpetuṃ vaṭṭati, āṇāpethāti.

So “sādhū’’ti sampācchitvā brāhmaṇe sannipātetvā tesu guṇavaṇṇasampanne aṭṭha jane vicinitvā tesam paribbayaṃ datvā “gacchatha, tumhe vessantaraṃ hatthiṃ yācivā ānethā’’ti pesesi. Brāhmaṇā anupubbena jetuttaranagaraṃ gantvā dānagge bhattaṃ paribhuñjitvā attano sarīraṃ rajoparikiṇṇaṃ paṃsumakkhitaṃ katvā puṇṇamadivase rājānaṃ hatthiṃ yāciturāma hutvā rañño dānaggaṃ āgamanakāle pācīnadvāraṃ agamaṃsu. Rājāpi “dānaggaṃ olokessāmī’’ti pātova nhatvā nānaggarasabhojanaṃ bhūñjitvā alaṅkaritvā alaṅkatakataṭṭhikkhandhavaragato pācīnadvāraṃ agamāsi. Brāhmaṇā tattokāsaṃ alabhitvā dakkhiṇadvāraṃ gantvā unnatapadese ṭhatvā rañño pācīnadvāre dānaggaṃ oloketvā dakkhiṇadvārāgamanakāle hatthe pasāretvā “jayatu bhavaṃ vessantaro’’ti tikkhattuṃ āhaṃsu. Mahāsatto te brāhmaṇe disvā hatthiṃ tesam ṭhitaṭṭhānaṃ pesetvā hatthikkhandhe nisinno paṭhamaṃ gāthamāha –

**1668:** ‘Parūḷhakacchanakhalomā, paṅkadantā rajassirā;  
Paggayha dakkhiṇaṃ bāhuṃ, kiṃ maṃ yācanti brāhmaṇā’’ti.

Brāhmaṇā āhaṃsu –

**1669:** ‘Ratanaṃ deva yācāma, sivīnaṃ raṭṭhavaḍḍhana;  
Dadāhi pavaraṃ nāgaṃ, īsādantaṃ urūḷhava’’nti.

Tattha **urūḷhavanti** ubbāhanasamatthaṃ.

Taṃ sutvā mahāsatto “ahaṃ sīsaṃ ādiṃ katvā ajjhattikadānaṃ dātukāmomhi, ime pana maṃ bāhirakadānameva yācanti, pūressāmi tesam manoratha’’nti cintetvā hatthikkhandhavaragato tatiyaṃ gāthamāha –

**1670:** ‘Dadāmi na vikampāmi, yaṃ maṃ yācanti brāhmaṇā;  
Pabhinnaṃ kuñjaraṃ dantiṃ, opavayaṃ gajuttama’’nti.

Paṭijānitvā ca pana –

**1671:** ‘Hatthikkhandhato oruyha, rājā cāgādhimānaso;  
Brāhmaṇānaṃ adā dānaṃ, sivīnaṃ raṭṭhavaḍḍhano’’ti.

Tattha **opavayhanti** rājavāhanaṃ. **Cāgādhimānasoti** cāgena adhikamānaso rājā. **Brāhmaṇānaṃ adā dānanti** so vāraṇassa analaṅkatakataṭṭhānaṃ olokanatthaṃ tikkhattuṃ padakkhiṇaṃ katvā analaṅkatakataṭṭhānaṃ adisvā kusumamissakasugandhodakapūritaṃ suvaṇṇabhiṅgāraṃ gahetvā “īto ethā’’ti vatvā alaṅkatarajataḍḍamasadisam hatthisonḍaṃ gahetvā tesam hatthe ṭhapetvā udakaṃ pātetvā alaṅkatakavāraṇaṃ brāhmaṇānaṃ adāsi.

Tassa catūsu pādesu alaṅkāro cattāri satasahassāni agghati, ubhosu passesu alaṅkāro dve satasahassāni, heṭṭhā udare kambalaṃ satasahassaṃ, piṭṭhiyaṃ muttajālaṃ mañijālaṃ kañcanañjalanti tīṇi jālāni tīṇi satasahassāni, ubhosu kaṇṇesu alaṅkāro dve satasahassāni, piṭṭhiyaṃ attharaṇakambalaṃ satasahassaṃ, kumbhālaṅkāro satasahassaṃ, tayo vaṭṭasakā tīṇi satasahassāni, kaṇṇacūḷālaṅkāro dve satasahassāni, dvinnam dantānaṃ alaṅkāro dve satasahassāni, soṇḍāya sovaththikālaṅkāro satasahassaṃ, naṅguṭṭhālaṅkāro satasahassaṃ, ārohaṇanisseṇi satasahassaṃ, bhūñjanakaṭāhaṃ satasahassaṃ, ṭhapetvā anaggaṃ bhaṇḍaṃ kāyāruḷhapasādhaṇaṃ dvāvīsati satasahassāni. Evaṃ tāva ettakaṃ dhaṇaṃ

catuvīsatisatasahassāni agghati. Chattapiṇḍiyam pana maṇi, cūḷamaṇi, muttāhāre maṇi, ānkuse maṇi, hatthikaṅṭhe veṭhanamuttāhāre maṇi, hatthikumbhe maṇīti imāni cha anagghāni, hatthīpi anagghoyevāti hatthinā saddhiṃ satta anagghānīti sabbāni tāni brāhmaṇānaṃ adāsi. Tathā hatthino paricārakāni pañca kulasatāni hatthimeṇḍahatthigopakehi saddhiṃ adāsi. Saha dānenevassa heṭṭhā vuttanayeneva bhūmikampādayo ahesuṃ. Tamattham pakāsento satthā āha –

1672: ‘Tadāsi yaṃ bhimsanakam, tadāsi lomahaṃsanam;  
Hatthināge padinnamhi, medanī sampakampatha.

1673: ‘Tadāsi yaṃ bhimsanakam, tadāsi lomahaṃsanam;  
Hatthināge padinnamhi, khubhittha nagaram tadā.

1674: ‘Samākulam puram āsi, ghoso ca vipulo mahā;  
Hatthināge padinnamhi, sivīnam raṭṭhavaḍḍhane’ ti.

Tattha **tadāsī**ti tadā āsi. **Hatthināgeti** hatthisaṅkhāte nāge. **Khubhittha nagaram tadāti** tadā jetuttaranagaram saṅkhubhitam ahosi.

Brāhmaṇā kira dakkhiṇadvāre hatthiṃ labhitvā hatthipiṭṭhe nisīditvā mahājanaparivārā nagaramajjhena pāyimsu. Mahājano te disvā ‘‘ambho brāhmaṇā, amhākam hatthiṃ āruḷhā kuto vo hatthī laddhā’’ti āha. Brāhmaṇā ‘‘vessantaramahārājena no hatthī dinno, ke tumhe’’ti mahājanam hatthavikārādīhi ghaṭṭentā nagaramajjhena gantvā uttaradvārena nikkhamimsu. Nāgarā devatāvattānena bodhisattassa kuddhā rājadvāre sannipatitvā mahantaṃ upakkosamakamsu. Tena vuttaṃ –

‘‘Samākulam puram āsi, ghoso ca vipulo mahā;  
Hatthināge padinnamhi, sivīnam raṭṭhavaḍḍhane.

‘‘Athettha vattati saddo, tumulo bheravo mahā;  
Hatthināge padinnamhi, khubhittha nagaram tadā.

‘‘Athettha vattati saddo, tumulo bheravo mahā;  
Hatthināge padinnamhi, sivīnam raṭṭhavaḍḍhane’’ti.

Tattha **ghosoti** upakkosanasaddo patthaṭattā **vipulo**, uddham gatattā **mahā**. **Sivīnam raṭṭhavaḍḍhaneti** siviraṭṭhassa vuddhikare.

Athassa dānena saṅkhubhitacittā hutvā nagaravāsino rañño ārocesuṃ. Tena vuttaṃ –

1675: ‘Uggā ca rājaputtā ca, vesiyānā ca brāhmaṇā;  
Hatthārohā anīkaṭṭhā, rathikā pattikārakā.

1676: ‘Kevalo cāpi nigamo, sivayo ca samāgatā;  
Disvā nāgam nīyamānaṃ, te rañño paṭivedayum.

1677: ‘Vidhamam deva te raṭṭham, putto vessantaro tava;  
Katham no hatthinam dajjā, nāgam raṭṭhassa pūjitam.

1678: ‘Katham no kuñjaram dajjā, īsādantaṃ urūlhavam;  
Khettaññum sabbayuddhānaṃ, sabbasetam gajuttamaṃ.

1679: ‘Paṇḍukambalasañchannaṃ, pabhinnaṃ sattumaddanaṃ;

Dantiṃ savālabījanīṃ, setaṃ kelāsasādisaṃ.

**1680:**“Sasetacchattaṃ saupādheyyaṃ, sāthabbanāṃ sahatthipaṃ;  
Aggayānaṃ rājavāhiṃ, brāhmaṇānaṃ adā gaja”nti.

Tattha **uggāti** uggatā paññātā. **Nigamoti** negamakuṭumbikajano. **Vidhamāṃ deva te raṭṭhanti** deva, tava raṭṭhaṃ vidhamāṃ. **Kathaṃ no hatthinaṃ dajjāti** kena kāraṇena ambhākaṃ hatthinaṃ abhimaṅgalasammataṃ kāliṅgaraṭṭhavāsīnaṃ brāhmaṇānaṃ dadeyya. **Khettaññuṃ sabbayuddhānanti** sabbayuddhānaṃ khettabhūmisīsajānanasamatthaṃ. **Dantinti** manoramadantayuttaṃ. **Savālabījaninti** sahaavālabījanīṃ. **Saupādheyyanti** saattharaṇaṃ. **Sāthabbananti** sahatthivejjaṃ. **Sahatthipanti** hatthiparicārakānaṃ pañcannaṃ kulasatānaṃ hatthimeṇḍahatthigopakānaṃca vasena sahatthipaṃ.

Evañca pana vatvā punapi āhaṃsu –

**1681:**“Annaṃ pānañca yo dajjā, vatthasenāsanāni ca;  
Etaṃ kho dānaṃ patirūpaṃ, etaṃ kho brāhmaṇārahaṃ.

**1682:**“Ayaṃ te vaṃsarājā no, sivīnaṃ raṭṭhavaḍḍhano;  
Kathaṃ vessantaro putto, gajaṃ bhājeti sañjaya.

**1683:**“Sace tvamaṃ na karissasi, sivīnaṃ vacanaṃ idamaṃ;  
Maññe taṃ saha puttana, sivī hatthe karissare”ti.

Tattha **vaṃsarājāti** paveniyā āgato mahārājā. **Bhājetīti** deti. **Sivī hatthe karissareti** sivrāṭṭhavāsīno saha puttana taṃ attano hatthe karissantīti.

Taṃ sutvā rājā “ete vessantaraṃ mārāpetuṃ icchantī”ti saññāya āha –

**1684:**“Kāmaṃ janapado māsi, raṭṭhañcāpi vinassatu;  
Nāhaṃ sivīnaṃ vacanā, rājaputtaṃ adūsakaṃ;  
Pabbājeyyaṃ sakā raṭṭhā, putto hi mama oraso.

**1685:**“Kāmaṃ janapado māsi, raṭṭhañcāpi vinassatu;  
Nāhaṃ sivīnaṃ vacanā, rājaputtaṃ adūsakaṃ;  
Pabbājeyyaṃ sakā raṭṭhā, putto hi mama atrajo.

**1686:**“Na cāhaṃ tasmīṃ dubbheyyaṃ, ariyasīlavato hi so;  
Asilokopi me assa, pāpañca pasave bahuṃ;  
Kathaṃ vessantaraṃ puttaṃ, satthena ghātayāmasa”ti.

Tattha **māsīti** mā āsi, mā hotūti attho. **Ariyasīlavatoti** ariyena sīlavatena ariyāya ca ācārasampattiyā samannāgato. **Ghātayāmaseti** ghātayissāma.

Taṃ sutvā sivayo avocumaṃ –

**1687:**“Mā naṃ daṇḍena satthena, na hi so bandhanāraho;  
Pabbājehi ca naṃ raṭṭhā, vañke vasatu pabbate”ti.

Tattha **mā naṃ daṇḍena satthenāti** deva, tumhe taṃ daṇḍena vā satthena vā mā ghātayittha. **Na hi so bandhanārahoti** so bandhanārahopi na hotiyeva.

Rājā āha –

**1688:** ‘Eso ce sivīnaṃ chando, chandaṃ na panudāmase;  
Imaṃ so vasatu rattiṃ, kāme ca paribhuñjatu.

**1689:** ‘Tato ratyā vivasāne, sūriyassuggamaṃ pati;  
Samaggā sivayo hutvā, raṭṭhā pabbājayantu na’nti.

Tattha **vasatū**ti puttadārassa ovādaṃ dadamāno vasatu, ekarattiñcassa okāsaṃ dethāti vadati.

Te “ekarattimattaṃ vasatū”ti rañño vacanaṃ sampaṭicchimsu. Atha rājā ne uyyojetvā puttassa sāsaṇaṃ pesento kattāraṃ āmantetvā tassa santikaṃ pesesi. So “sādhū”ti sampaṭicchitvā vessantarassa nivesanaṃ gantvā taṃ pavattiṃ ārocesi. Tamatthaṃ pakāsento sathā āha –

**1690:** ‘Uṭṭhehi katte taramāno, gantvā vessantaraṃ vada;  
‘Sivayo deva te kuddhā, negamā ca samāgatā.

**1691:** ‘Uggā ca rājaputtā ca, vesiyānā ca brāhmaṇā;  
Hatthārohā anīkaṭṭhā, rathikā pattikārakā;  
Kevalo cāpi nigamo, sivayo ca samāgatā.

**1692:** ‘Asmā ratyā vivasāne, sūriyassuggamaṃ pati;  
Samaggā sivayo hutvā, raṭṭhā pabbājayanti taṃ’.

**1693:** ‘Sa kattā taramānova, sivrājena pesito;  
Āmuttahaṭṭhābharaṇo, suvattho candanabhūsito.

**1694:** ‘Sīsaṃ nhāto udake so, āmuttamaṇikuṇḍalo;  
Upāgami puraṃ rammaṃ, vessantaranivesanaṃ.

**1695:** ‘Tatthaddasa kumāraṃ so, ramamānaṃ sake pure;  
Parikiṇṇaṃ amaccehi, tidasānaṃva vāsavaṃ.

**1696:** ‘So tattha gantvā taramāno, kattā vessantaraṃbravi;  
‘Dukkhaṃ te vedayissāmi, mā me kujjhi rathesabha’.

**1697:** ‘Vanditvā rodamāno so, kattā rājānamabravi;  
Bhattā mesi mahārāja, sabbakāmarasāharo.

**1698:** ‘Dukkhaṃ te vedayissāmi, tattha assāsayaṃtu maṃ;  
Sivayo deva te kuddhā, negamā ca samāgatā.

**1699:** ‘Uggā ca rājaputtā ca, vesiyānā ca brāhmaṇā;  
Hatthārohā anīkaṭṭhā, rathikā pattikārakā;  
Kevalo cāpi nigamo, sivayo ca samāgatā.

**1700:** ‘Asmā ratyā vivasāne, sūriyassuggamaṃ pati;  
Samaggā sivayo hutvā, raṭṭhā pabbājayanti ta’nti.

Tattha **kumār**anti mātāpitūnaṃ atthitāya “kumāro”tveva saṅkhaṃ gataṃ rājānaṃ. **Ramamān**anti attanā dinnadānassa vaṇṇaṃ kathayamānaṃ somanassappattaṃ hutvā nisinnaṃ. **Parikiṇṇaṃ**



**amaccehīti** attanā sahaḷātehi saṭṭhisahashehi amaccehi parivutaṃ samussitasetacchatte rāḷāsane nisinnaṃ. **Vedayissāmīti** kathayissāmi. **Tattha assāsayaṃtu** manti tasmaṃ dukkhassāsanaṃrocane kathetuṃ avisahavasena kilantaṃ maṃ, deva, te pādā assāsayaṃtu, vissattho kathehīti maṃ vadathāti adhippāyenevamāha.

Mahāsatto āha –

**1701:** ‘Kismiṃ me sivayo kuddhā, nāhaṃ passāmi dukkaṭaṃ;  
Taṃ me katte viyācikkha, kasmā pabbājayanti ma’’nti.

Tattha **kisminti** katarasmiṃ kāraṇe. **Viyācikkhāti** vitthārato kathehi.

Kattā āha –

**1702:** ‘Uggā ca rāḷaputtā ca, vesiyānā ca brāhmaṇā;  
Hatthāroḷā anīkaṭṭhā, rathikā pattikārakā;  
Nāgadānena khiyyanti, tasmā pabbājayanti ta’’nti.

Tattha **khiyyantīti** kujjhanti.

Taṃ sutvā mahāsatto somanassappatto hutvā āha –

**1703:** ‘Hadaḷaṃ cakkhumpahaṃ dajjaṃ, kiṃ me bāhirakaṃ dhanam;  
Hiraññaṃ vā suvaṇṇaṃ vā, muttā veḷuriyā maṇi.

**1704:** ‘Dakkhīṇaṃ vāpahaṃ bāhuṃ, disvā yācakamāgate;  
Dadeyyaṃ na vikampeyyaṃ, dāne me ramate mano.

**1705:** ‘Kāmaṃ maṃ sivayo sabbe, pabbājentu hanantu vā;  
Neva dānā viramissaṃ, kāmaṃ chindantu sattadhā’’ti.

Tattha **yācakamāgateti** yācake āgate taṃ yācakaṃ disvā. **Neva dānā viramissanti** neva dānā viramissāmi.

Taṃ sutvā kattā neva rañña dinnam na nāgarehi dinnam attano matiyā eva aparaṃ sāsanam kathento āha –

**1706:** ‘Evaṃ taṃ sivayo āhu, negamā ca samāgatā;  
Kontimārāya tīrena, girimārañjaraṃ pati;  
Yena pabbājitā yanti, tena gacchatu subbato’’ti.

Tattha **kontimārāyāti** kontimārāya nāma nadiyā tīrena. **Girimārañjaraṃ patīti** ārañjaraṃ nāma giriṃ abhimukho hutvā. **Yenāti** yena maggena raṭṭhā pabbājitā rāḷāno gacchanti, tena subbato vessantaropi gacchatūti evaṃ sivayo kathentīti āha. Idaṃ kira so devatādhiggahito hutvā kathesi.

Taṃ sutvā bodhisatto ‘‘sādhu dosakārakānaṃ gatamaggena gamissāmi, maṃ kho pana nāgarā na añña dosena pabbājenti, mayā hatthissa dinnatā pabbājenti. Evaṃ santepi ahaṃ sattasatakaṃ mahādānaṃ dassāmi, nāgarā me ekadivasaṃ dānaṃ dātuṃ okāsaṃ dentu, sve dānaṃ datvā tatiyadivase gamissāmi’’ti vatvā āha –

**1707:** ‘Sohaṃ tena gamissāmi, yena gacchanti dūsakā;

Rattindivaṃ me khamatha, yāva dānaṃ dadāmaḥ’nti.

Taṃ sutvā kattā “sādhu, deva, nāgarānaṃ vakkhāmī”ti vatvā pakkāmi. Mahāsatto taṃ uyyojetvā mahāsenaguttaṃ pakkosāpetvā ‘tāta, ahaṃ sve sattasatakaṃ nāma mahādānaṃ dassāmi, satta hatthisatāni, satta assasatāni, satta rathasatāni, satta itthisatāni, satta dhenusatāni, satta dāsasatāni, satta dāsisatāni ca paṭiyādehi, nānappakārāni ca annapānādīni antamaso surampi sabbaṃ dātabbayuttakaṃ upaṭṭhāpehi’ti sattasatakaṃ mahādānaṃ vicāretvā amacce uyyojetvā ekakova maddiyā vasanaṭṭhānaṃ gantvā sirisayanapiṭṭhe nisīditvā tāya saddhiṃ kathaṃ pavattesi. Tamatthaṃ pakāsento satthā āha –

**1708:** ‘Āmantayittha rājānaṃ, maddiṃ sabbaṅgasobhanaṃ;  
Yaṃ te kiñci mayā dinnāṃ, dhanāṃ dhaññaṃca vijjati.

**1709:** ‘Hiraññaṃ vā suvaṇṇaṃ vā, muttā veḷuriyā bahū;  
Sabbāṃ taṃ nidaheyyāsi, yañca te pettikaṃ dhana’nti.

Tattha **nidaheyyāsīti** nidhiṃ katvā ṭhāpeyyāsi. **Pettikanti** pitito āgataṃ.

**1710:** ‘Tamabravi rājaputtī, maddī sabbaṅgasobhanā;  
Kuhim deva nidahāmi, taṃ me akkhāhi pucchito’nti.

Tattha **tamabravīti** “mayhaṃ sāmikena vessantarena ettakaṃ kālaṃ ‘dhanāṃ nidhehi’ti na vuttapubbaṃ, idāneva vadati, kuhiṃ nu kho nidhetabbaṃ, pucchissāmi na’nti cintetvā taṃ abravi.

Vessantaro āha –

**1711:** ‘Sīlavantesu dajjāsi, dānaṃ maddi yathārahaṃ;  
Na hi dānā paraṃ atthi, paṭiṭṭhā sabbapāṇina’nti.

Tattha **dajjāsīti** bhadde, maddi koṭṭhādīsu anidahitvā anugāmikanidhiṃ nidahamānā sīlavantesu dadeyyāsi. **Na hi dānā paranti** dānato uttaritaraṃ paṭiṭṭhā nāma na hi atthi.

Sā “sādhū”ti tassa vacanaṃ sampaṭicchi. Atha naṃ uttaripi oवादanto āha –

**1712:** ‘Puttesu maddi dayesi, sassuyā sasuramhi ca;  
Yo ca taṃ bhaddā maññeyya, sakkaccaṃ taṃ upaṭṭhahe.

**1713:** ‘No ce taṃ bhaddā maññeyya, mayā vipavasena te;  
Aññaṃ bhaddāraṃ pariyesa, mā kisittho mayā vinā’nti.

Tattha **dayesīti** dayaṃ mettaṃ kareyyāsi. **Yo ca taṃ bhaddā maññeyyāti** bhadde, yo ca mayi gate “ahaṃ te bhaddā bhavissāmī”ti taṃ maññissati, tampi sakkaccaṃ upaṭṭhaheyyāsi. **Mayā vipavasena teti** mayā saddhiṃ tava vipavāsena sace koci “ahaṃ te bhaddā bhavissāmī”ti taṃ na maññeyya, atha sayameva aññaṃ bhaddāraṃ pariyesa. **Mā kisittho mayā vināti** mayā vinā hutvā mā kisā bhavi, mā kilamīti attho.

Atha naṃ maddī “kiṃ nu kho esa evarūpaṃ vacanaṃ maṃ bhaṇatī”ti cintetvā “kasmā, deva, imaṃ ayuttaṃ kathaṃ kathesī”ti pucchi. Mahāsatto “bhadde, mayā hatthissa dinnatā sivayo kuddhā maṃ raṭṭhā pabbājenti, sve ahaṃ sattasatakaṃ mahādānaṃ datvā tatiyadivase nagarā nikkhamissāmī”ti vatvā āha –

**1714:** ‘Ahañhi vanaṃ gacchāmi, ghoraṃ vāḷamigāyutaṃ;

Saṃsayo jīvitam mayham, ekakassa brahāvane’’ti.

Tattha **saṃsayoti** anekapaccatthike ekakassa sukhumālassa mama vane vasato kuto jīvitam, nicchayena marissāmīti adhippāyenevaṃ āha.

1715: ‘Tamabravi rājaputtī, maddī sabbaṅgasobhanā;  
Abhumme katham nu bhaṇasi, pāpakaṃ vata bhāsasi.

1716: ‘Nesa dhammo mahārāja, yaṃ tvam gaccheyya ekako;  
Ahampi tena gacchāmi, yena gacchasi khattiya.

1717: ‘Maraṇam vā tayā saddhiṃ, jīvitam vā tayā vinā;  
Tadeva maraṇam seyyo, yaṃ ce jīve tayā vinā.

1718: ‘Aggiṃ ujjālayitvāna, ekajālasamāhitam;  
Tattha me maraṇam seyyo, yaṃ ce jīve tayā vinā.

1719: ‘Yathā āraññakaṃ nāgam, dantiṃ anveti hatthinī;  
Jessantaṃ giriduggesu, samesu visamesu ca.

1720: ‘Evaṃ taṃ anugacchāmi, putte ādāya pacchato;  
Subharā te bhavissāmi, na te hessāmi dubbharā’’ti.

Tattha **abhummeti** abhūtam vata me katheyyāsi. **Nesa dhammoti** na eso sabhāvo, netam kāraṇam. **Tadevāti** tayā saddhiṃ yaṃ maraṇam atthi, tadeva maraṇam seyyo. **Tatthāti** tasmim ekajālabhūte dārucitake. **Jessantanti** vicarantaṃ.

Evañca pana vatvā sā puna diṭṭhapubbaṃ viya himavantappadesaṃ vaṇṇentī āha –

1721: ‘Ime kumāre passanto, mañjuka piyabhāṇine;  
Āsīne vanagumbasmiṃ, na rajjassa sarissasi.

1722: ‘Ime kumāre passanto, mañjuka piyabhāṇine;  
Kīḷante vanagumbasmiṃ, na rajjassa sarissasi.

1723: ‘Ime kumāre passanto, mañjuka piyabhāṇine;  
Assame ramaṇīyamhi, na rajjassa sarissasi.

1724: ‘Ime kumāre passanto, mañjuka piyabhāṇine;  
Kīḷante assame ramme, na rajjassa sarissasi.

1725: ‘Ime kumāre passanto, māladhārī alaṅkate;  
Assame ramaṇīyamhi, na rajjassa sarissasi.

1726: ‘Ime kumāre passanto, māladhārī alaṅkate;  
Kīḷante assame ramme, na rajjassa sarissasi.

1727: ‘Yadā dakkhisi naccante, kumāre māladhārīne;  
Assame ramaṇīyamhi, na rajjassa sarissasi.

1728: ‘Yadā dakkhisi naccante, kumāre māladhārīne;

Kīlante assame ramme, na rajjassa sarissasi.

1729: ‘Yadā dakkhisi mātaṅgaṃ, kuñjaraṃ saṭṭhihāyaṇaṃ;  
Ekaṃ araññe carantaṃ, na rajjassa sarissasi.

1730: ‘Yadā dakkhisi mātaṅgaṃ, kuñjaraṃ saṭṭhihāyaṇaṃ;  
Sāyaṃ pāto vicarantaṃ, na rajjassa sarissasi.

1731: ‘Yadā kareṇusaṅghassa, yūthassa purato vajaṃ;  
Koñcaṃ kāhati mātaṅgo, kuñjaro saṭṭhihāyano;  
Tassa taṃ nadato sutvā, na rajjassa sarissasi.

1732: ‘Dubhato vanavikāse, yadā dakkhisi kāmado;  
Vane vāḷamigākiṇṇe, na rajjassa sarissasi.

1733: ‘Migaṃ disvāna sāyanhaṃ, pañcamālinamāgataṃ;  
Kimpurise ca naccante, na rajjassa sarissasi.

1734: ‘Yadā sossasi nigghosaṃ, sandamānāya sindhuyā;  
Gītaṃ kimpurisānañca, na rajjassa sarissasi.

1735: ‘Yadā sossasi nigghosaṃ, girigabbharacārino;  
Vassamānassulūkassa, na rajjassa sarissasi.

1736: ‘Yadā sīhassa byagghassa, khaggassa gavayassa ca;  
Vane sossasi vāḷānaṃ, na rajjassa sarissasi.

1737: ‘Yadā morīhi parikiṇṇaṃ, barihīnaṃ matthakāsinaṃ;  
Moraṃ dakkhisi naccantaṃ, na rajjassa sarissasi.

1738: ‘Yadā morīhi parikiṇṇaṃ, aṇḍajaṃ citrapakkhinaṃ;  
Moraṃ dakkhisi naccantaṃ, na rajjassa sarissasi.

1739: ‘Yadā morīhi parikiṇṇaṃ, nīlagīvaṃ sikhaṇḍinaṃ;  
Moraṃ dakkhisi naccantaṃ, na rajjassa sarissasi.

1740: ‘Yadā dakkhisi hemante, pupphite dharaṇīruhe;  
Surabhiṃ sampavāyante, na rajjassa sarissasi.

1741: ‘Yadā hemantike māse, haritaṃ dakkhisi medaniṃ;  
Indagopakasañchannaṃ, na rajjassa sarissasi.

1742: ‘Yadā dakkhisi hemante, pupphite dharaṇīruhe;  
Kuṭajaṃ bimbajālañca, pupphitaṃ loddapaddhakaṃ;  
Suratiṃ sampavāyante, na rajjassa sarissasi.

1743: ‘Yadā hemantike māse, vanaṃ dakkhisi pupphitaṃ;  
Opupphāni ca paddhāni, na rajjassa sarissasi’ ti.

Tattha **mañjuketi** madhurakathe. **Kareṇusaṅghassāti** hatthinighaṭṭāya. **Yūthassāti** hatthiyūthassa purato vajanto gacchanto. **Dubhatoti** ubhayappassesu. **Vanavikāseti** vanaghaṭṭāyo. **Kāmadoti** mayhaṃ sabbakāmado. **Sindhuyāti** nadiyā. **Vassamānassulūkassāti** ulūkasakuṇassa vassamānassa. **Vāḷānanti**

vālamigānaṃ. Tesañhi sāyanhasamaye so saddo pañcaṅgikatūriyasaddo viya bhavissati, tasmā tesam saddaṃ sutvā rajjassa na sarissasīti vadati, **barihīnanti** kalāpasañchannaṃ. **Matthakāsinanti** niccaṃ pabbatamatthake nisinnaṃ. ‘‘Mattakāsina’’ntipi pāṭho, kāmamadammattaṃ hutvā āsīnanti attho. **Bimbajālanti** rattaṅkurarukkhaṃ. **Opupphānīti** olambakapupphāni patitapupphāni.

Evam maddī himavantavāsini viya ettakāhi gāthāhi himavantaṃ vaṇṇesīti.

Hīmavantavaṇṇanā niṭṭhitā.

Dānakaṇḍavaṇṇanā

Phussatīpi kho devī ‘‘puttassa me kaṭukasāsaṇaṃ gataṃ, kiṃ nu kho karoti, gantvā jānissāmī’’ti paṭicchannayoggena gantvā sirigabbhadvāre ṭhitā tesam taṃ sallāpaṃ sutvā kalunaṃ paridevi. Tamatthaṃ pakāsento satthā āha –

1744: ‘‘Tesam lālippitaṃ sutvā, puttassa suṇisāya ca;  
Kalunaṃ paridevesi, rājaputtī yasassinī.

1745: ‘‘Seyyo viṣaṃ me khāyitaṃ, papātā papateyyahaṃ;  
Rajjuyā bajjha miyyāhaṃ, kasmā vessantaraṃ puttaṃ;  
Pabbājenti adūsakaṃ.

1746: ‘‘Ajjhāyakaṃ dānapatiṃ, yācayogaṃ amacchariṃ;  
Pūjitaṃ paṭirājūhi, kittimantaṃ yasassināṃ;  
Kasmā vessantaraṃ puttaṃ, pabbājenti adūsakaṃ.

1747: ‘‘Mātāpettibharaṃ jantaṃ, kule jetṭhāpacāyikaṃ;  
Kasmā vessantaraṃ puttaṃ, pabbājenti adūsakaṃ.

1748: ‘‘Rañño hitaṃ devihitaṃ, ñātīnaṃ sakhinaṃ hitaṃ;  
Hitāṃ sabbassa raṭṭhassa, kasmā vessantaraṃ puttaṃ;  
Pabbājenti adūsaka’’nti.

Tattha **rājaputtīti** phussatī maddarājadhītā. **Papateyyahanti** papateyyaṃ ahaṃ. **Rajjuyā bajjha miyyāhanti** rajjuyā gīvaṃ bandhitvā mareyyaṃ ahaṃ. **Kasmāti** evaṃ amatāyameva mayi kena kāraṇena mama puttaṃ adūsakaṃ raṭṭhā pabbājenti. **Ajjhāyakanti** tiṇṇaṃ vedānaṃ pāraṅgataṃ, nānāsippesu ca nipphattiṃ pattaṃ.

Iti sā kalunaṃ paridevitvā puttañca suṇisañca assāsetvā rañño santikaṃ gantvā āha –

1749: ‘‘Madhūniva palātāni, ambāva patitā chamā;  
Evam hessati te raṭṭhaṃ, pabbājenti adūsakaṃ.

1750: ‘‘Haṃso nikhīṇapattova, pallalasmaṃ anūdake;  
Apavidhho amacchehi, eko rājā vihiyyasi.

1751: ‘‘Taṃ taṃ brūmi mahārāja, attho te mā upaccagā;  
Mā naṃ sivīnaṃ vacanā, pabbājesi adūsaka’’nti.

Tattha **palātānīti** palātamakkhikāni madhūni viya. **Ambāva patitā chamāti** bhūmiyaṃ patitaambapakkāni viya. Evam mama putte pabbājite tava raṭṭhaṃ sabbasādhāraṇaṃ bhavissatīti dīpeti.

**Nikhīṇapattovā**ti paggharitatatto viya. **Apaviddho amacchē**ti mama puttana sahaḷātehi saṭṭhisahashehi amacchehi chaḍḍito hutvā. **Vihīyas**ti kilamissasi. **Sivīnaṃ vacanā**ti sivīnaṃ vacanena mā naṃ adūsakaṃ mama puttaṃ pabbājesīti.

Taṃ sutvā rājā āha –

**1752:** ‘Dhammassāpacitiṃ kummi, sivīnaṃ vinayaṃ dhajaṃ;  
Pabbājemi sakaṃ puttaṃ, pāṇā piyataro hi me’ ti.

Tassattho – bhadde, ahaṃ sivīnaṃ dhajaṃ vessantaraṃ kumāraṃ vinayanto pabbājento siviraṭṭhe porāṇakarājūnaṃ pavenīdhammassa apacitiṃ kummi karomi, tasmā sacepi me pāṇā piyataro so, tathāpi naṃ pabbājemīti.

Taṃ sutvā sā paridevamānā āha –

**1753:** ‘Yassa pubbe dhajaggāni, kaṇikārāva pupphitā;  
Yāyantamanuyāyanti, svajjekova gamissati.

**1754:** ‘Yassa pubbe dhajaggāni, kaṇikāraṇāniva;  
Yāyantamanuyāyanti, svajjekova gamissati.

**1755:** ‘Yassa pubbe anīkāni, kaṇikārāva pupphitā;  
Yāyantamanuyāyanti, svajjekova gamissati.

**1756:** ‘Yassa pubbe anīkāni, kaṇikāraṇāniva;  
Yāyantamanuyāyanti, svajjekova gamissati.

**1757:** ‘Indagopakavaṇṇābhā, gandhārā paṇḍukambalā;  
Yāyantamanuyāyanti, svajjekova gamissati.

**1758:** ‘Yo pubbe hatthinā yāti, sivikāya rathena ca;  
Svajja vessantaro rājā, kathaṃ gacchati pattiko.

**1759:** ‘Kathaṃ candanalittaṅgo, naccagītappabodhano;  
Khurājīnaṃ pharasuṇca, khārikājaṇca hāhiti.

**1760:** ‘Kasmā nābhiharissanti, kāsāvā ajināni ca;  
Pavisantaṃ brahāraṇṇaṃ, kasmā cīraṃ na bajjhare.

**1761:** ‘Kathaṃ nu cīraṃ dhārenti, rājapabbajitā janā;  
Kathaṃ kusamayaṃ cīraṃ, maddī paridahissati.

**1762:** ‘Kāsiyāni ca dhāretvā, khomakoṭumbarāni ca;  
Kusacīrāni dhārentī, kathaṃ maddī karissati.

**1763:** ‘Vayhāhi pariyāyitvā, sivikāya rathena ca;  
Sā kathajja anujjhaṅgī, pathaṃ gacchati pattikā.

**1764:** ‘Yassā mudutalā hatthā, caraṇā ca sukhedhitā;  
Sā kathajja anujjhaṅgī, pathaṃ gacchati pattikā.

- 1765: ‘Yassā mudutalā pādā, caraṇā ca sukhedhitā;  
Pādukāhi suvaṇṇāhi, pīḷamānāva gacchati;  
Sā kathajja anujjhaṅgī, pathaṃ gacchati pattikā.
- 1766: ‘Yāssu itthisahassānaṃ, purato gacchati mālinī;  
Sā kathajja anujjhaṅgī, vanaṃ gacchati ekikā.
- 1767: ‘Yāssu sivāya sutvāna, muhuṃ uttasate pure;  
Sā kathajja anujjhaṅgī, vanaṃ gacchati bhīrukā.
- 1768: ‘Yāssu indasagottassa, ulūkassa pavassato;  
Sutvāna nadato bhītā, vāruṇīva pavedhati;  
Sā kathajja anujjhaṅgī, vanaṃ gacchati bhīrukā.
- 1769: ‘Sakuṇī hataputtāva, suññaṃ disvā kulāvakaṃ;  
Ciraṃ dukkhena jhāyissaṃ, suññaṃ āgammimaṃ puraṃ.
- 1770: ‘Sakuṇī hataputtāva, suññaṃ disvā kulāvakaṃ;  
Kisā paṇḍu bhavissāmi, piye putte apassatī.
- 1771: ‘Sakuṇī hataputtāva, suññaṃ disvā kulāvakaṃ;  
Tena tena padhāvissaṃ, piye putte apassatī.
- 1772: ‘Kurarī hatachāpāva, suññaṃ disvā kulāvakaṃ;  
Ciraṃ dukkhena jhāyissaṃ, suññaṃ āgammimaṃ puraṃ.
- 1773: ‘Kurarī hatachāpāva, suññaṃ disvā kulāvakaṃ;  
Kisā paṇḍu bhavissāmi, piye putte apassatī.
- 1774: ‘Kurarī hatachāpāva, suññaṃ disvā kulāvakaṃ;  
Tena tena padhāvissaṃ, piye putte apassatī.
- 1775: ‘Sā nūna cakkavākīva, pallalasmaṃ anūdake;  
Ciraṃ dukkhena jhāyissaṃ, suññaṃ āgammimaṃ puraṃ.
- 1776: ‘Sā nūna cakkavākīva, pallalasmaṃ anūdake;  
Kisā paṇḍu bhavissāmi, piye putte apassatī.
- 1777: ‘Sā nūna cakkavākīva, pallalasmaṃ anūdake;  
Tena tena padhāvissaṃ, piye putte apassatī.
- 1778: ‘Evaṃ me vilapantiyā, rājā puttaṃ adūsakaṃ;  
Pabbājesi vanaṃ raṭṭhā, maññe hissāmi jīvita’ nti.

Tattha **kaṇikārāvā**ti suvaṇṇābharaṇasuvaṇṇavatthapaṭimaṇḍitattā supupphitā kaṇikārā viya. **Yāyantamanuyāyantī**ti uyyānavanakīḷādīnaṃ atthāya gacchantāṃ vessantaraṃ anugacchanti. **Svajjekovā**ti so ajja ekova hutvā gamissati. **Anīkānī**ti hatthānīkāḍīni. **Gandhārā paṇḍukambalā**ti gandhāraraṭṭhe uppannā satahassagghanakā senāya pārutā rattakambalā. **Hāhitī**ti khandhe katvā harissati. **Pavisantanti** pavisantassa. **Kasmā ciraṃ na bajjhareti** kasmā bandhituṃ jānantā vākaciraṃ na bandhanti. **Rājapabbajitā**ti rājāno hutvā pabbajitā. **Khomakoṭumbarānī**ti khomaraṭṭhe koṭumbararaṭṭhe uppannāni sāṭakāni.

**Sā kathajjāti** sā kathaṃ ajja. **Anujjhaṅgīti** agarahitaṅgī. **Pīlamānāva gacchatīti** kampitvā kampitvā tiṭṭhantī viya gacchati. **Yāssu itthisahassānantiādīsu assūti** nipāto, yāti attho. “Yā sā”tipi pāṭho. **Sivāyāti** siṅgāliyā. **Pureti** pubbe nagare vasantī. **Indasagottassāti** kosiyagottassa. **Vāruṇivāti** devatāpaviṭṭhā yakkhadāsī viya. **Dukkhenāti** puttaviyogasokadukkhena. **Āgammi maṃ puranti** imaṃ mama putte gate puttānivesanaṃ āgantvā. **Piye putteti** vessantarañceva maddiṅca sandhāyāha. **Hatachāpāti** hatapotakā. **Pabbājesi vanaṃ raṭṭhāti** yadi naṃ raṭṭhā pabbājesīti.

Deviyā paridevitasaddaṃ sutvā sabbā sañjayassa sivikaññā samāgatā pakkandiṃsu. Tāsaṃ pakkanditasaddaṃ sutvā mahāsattassapi nivesane tatheva pakkandiṃsu. Iti dvīsu rājakulesu keci sakabhāvena saṅghātuṃ asakkontā vātavegena pamadditā sālā viya patitvā parivattamānā parideviṃsu. Tamatthaṃ pakāsentō satthā āha –

**1779:** ‘Tassā lālappitaṃ sutvā, sabbā antepure bahū;  
Bāhā paggayha pakkanduṃ, sivikaññā samāgatā.

**1780:** ‘Sālāva sampamathitā, mālutena pamadditā;  
Senti puttā ca dārā ca, vessantaranivesane.

**1781:** ‘Orodhā ca kumārā ca, vesiyānā ca brāhmaṇā;  
Bāhā paggayha pakkanduṃ, vessantaranivesane.

**1782:** ‘Hatthārohā anīkaṭṭhā, rathikā pattikārakā;  
Bāhā paggayha pakkanduṃ, vessantaranivesane.

**1783:** ‘Tato ratyā vivasāne, sūriyassuggamaṃ pati;  
Atha vessantaro rājā, dānaṃ dātuṃ upāgami.

**1784:** ‘Vatthāni vatthakāmānaṃ, soṇḍānaṃ detha vāruṇiṃ;  
Bhojanaṃ bhojanatthīnaṃ, sammadeva paveccatha.

**1785:** ‘Mā ca kañci vanibbake, heṭṭhayittha idhāgate;  
Tappetha annapānena, gacchantu paṭipūjītā.

**1786:** ‘Athettha vattatī saddo, tumulo bheravo mahā;  
Dānena taṃ nīharantī, puna dānaṃ adā tuvaṃ.

**1787:** ‘Te su mattā kilantāva, sampatanti vanibbakā;  
Nikkhamante mahārāje, sivīnaṃ raṭṭhavaḍḍhane.

**1788:** ‘Acchecchuṃ vata bho rukkhaṃ, nānāphaladharaṃ dumaṃ;  
Yathā vessantaraṃ raṭṭhā, pabbājenti adūsakaṃ.

**1789:** ‘Acchecchuṃ vata bho rukkhaṃ, sabbakāmadadaṃ dumaṃ;  
Yathā vessantaraṃ raṭṭhā, pabbājenti adūsakaṃ.

**1790:** ‘Acchecchuṃ vata bho rukkhaṃ, sabbakāmarasāharaṃ;  
Yathā vessantaraṃ raṭṭhā, pabbājenti adūsakaṃ.

**1791:** ‘Ye vuḍḍhā ye ca daharā, ye ca majjhimaporisā;  
Bāhā paggayha pakkanduṃ, nikkhamante mahārāje;  
Sivīnaṃ raṭṭhavaḍḍhane.



- 1792:**‘Atiyakkhā vassavarā, itthāgārā ca rājino;  
Bāhā paggayha pakkandum, nikkhamante mahārāje;  
Sivīnaṃ raṭṭhavaḍḍhane.
- 1793:**‘Thiyopi tattha pakkandum, yā tamhi nagare ahu;  
Nikkhamante mahārāje, sivīnaṃ raṭṭhavaḍḍhane.
- 1794:**‘Ye brāhmaṇā ye ca samaṇā, aññe vāpi vanibbakā;  
Bāhā paggayha pakkandum, ‘adhammo kira bho’ iti.
- 1795:**‘Yathā vessantaro rājā, yajamāno sake pure;  
Sivīnaṃ vacanatthena, samhā raṭṭhā nirajjati.
- 1796:**‘Satta hatthisate datvā, sabbālaṅkārahūsīte;  
Suvaṇṇakacche mātaṅge, hemakappanavāsase;
- 1797:**‘Ārūḷhe gāmaṇīyehi, tomaraṅkusapāṇibhi;  
Esa vessantaro rājā, samhā raṭṭhā nirajjati.
- 1798:**‘Satta assasate datvā, sabbālaṅkārahūsīte;  
Ājānīyeva jātiyā, sindhave sīghavāhane.
- 1799:**‘Ārūḷhe gāmaṇīyehi, illiyācāpadhāribhi;  
Esa vessantaro rājā, samhā raṭṭhā nirajjati.
- 1800:**‘Satta rathasate datvā, sannaddhe ussitaddhaje;  
Dīpe athopi veyagghe, sabbālaṅkārahūsīte.
- 1801:**‘Ārūḷhe gāmaṇīyehi, cāpahatthehi vammibhi;  
Esa vessantaro rājā, samhā raṭṭhā nirajjati.
- 1802:**‘Satta itthisate datvā, ekamekā rathe ṭhitā;  
Sannaddhā nikkharajjūhi, suvaṇṇehi alaṅkatā.
- 1803:**‘Pītālaṅkāra pītavaṣaṇā, pītābharaṇabhūsītā;  
Āḷārapamhā hasulā, susaññā tanumajjhimā;  
Esa vessantarā rājā, samhā raṭṭhā nirajjati.
- 1804:**‘Satta dhenusate datvā, sabbā kaṃsupadhāraṇā;  
Esa vessantaro rājā, samhā raṭṭhā nirajjati.
- 1805:**‘Satta dāsīate datvā, satta dāsīatāni ca;  
Esa vessantaro rājā, samhā raṭṭhā nirajjati.
- 1806:**‘Hatthī assarathē datvā, nāriyo ca alaṅkatā;  
Esa vessantaro rājā, samhā raṭṭhā nirajjati.
- 1807:**‘Tadāsi yaṃ bhīṃsanakaṃ, tadāsi lomahaṃsanam;  
Mahādāne padinnamhi, medanī sampakampatha.
- 1808:**‘Tadāsi yaṃ bhīṃsanakaṃ, tadāsi lomahaṃsanam;  
Yaṃ pañjalikato rājā, samhā raṭṭhā nirajjati’ ti.

Tattha **sivikaññāti** bhikkhave, phussatiyā paridevitasaddaṃ sutvā sabbāpi sañjayassa sivirañño itthiyo samāgatā hutvā pakkandaṃ parideviṃsu. **Vessantarānivesaneti** tattha itthīnaṃ pakkanditasaddaṃ sutvā vessantarassapi nivesane tatheva pakkanditvā dvīsu rājakulesu keci sakabhāvena sañṭhātuṃ asakkontā vātavegena sampamathitā sālā viya patitvā parivattantā parideviṃsu. **Tato ratyā vivasānēti** bhikkhave, tato tassā rattiyā accayena sūriye uggate dānaveyyāvatikā “dānaṃ paṭiyādita”nti rañño ārocayiṃsu. Atha vessantaro rājā pātova nhatvā sabbālaṅkārapaṭimaṇḍito sādurasabhojanaṃ bhuñjitvā mahājanaparivuto sattasatakaṃ mahādānaṃ dātuṃ dānaggaṃ upāgami.

**Dethāti** tattha gantvā saṭṭhisahassaamacce āṇāpento evamāha. **Vāruṇinti** “majjadānaṃ nāma nipphala”nti jānāti, evaṃ santēpi “surāsoṇḍā dānaggaṃ patvā ‘vessantarassa dānagge suraṃ na labhimhā’ti vattuṃ mā labhantu”ti dāpesi. **Vanibbaketi** vanibbakajanesu kañci ekampi mā viheṭṭhayittha. **Paṭipūjītāti** mayā pūjita hutvā yathā maṃ thomayamānā gacchanti, tathā tumhe karothāti vadati.

Iti so suvaṇṇālaṅkāraṇaṃ suvaṇṇadhajānaṃ hemajālappaṭicchannānaṃ hatthīnaṃ sattasatāni ca, tathārūpānaññeva assānaṃ sattasatāni ca, sīhacammādīhi parikkhittānaṃ nānāratanavicitrānaṃ suvaṇṇadhajānaṃ rathānaṃ sattasatāni, sabbālaṅkārapaṭimaṇḍitānaṃ uttamarūpadharānaṃ khattiyakaññādīnaṃ itthīnaṃ sattasatāni, suvinītānaṃ susikkhitānaṃ dāsānaṃ sattasatāni, tathā dāsīnaṃ sattasatāni, varaṃsabhaṅgānaṃ kuṇḍopadohinīnaṃ dhenūnaṃ sattasatāni, aparimāṇāni pānabhojanānīti sattasatakaṃ mahādānaṃ adāsī. Tasmim evaṃ dānaṃ dadamāne jetuttaranagaravāsino khattiyabrāhmaṇavessasuddādayo “sāmi, vessantara sivaratṭhavāsino taṃ ‘dānaṃ deti’ti pabbājenti, tvaṃ puna dānameva desī”ti parideviṃsu. Tena vuttaṃ –

**1809:** ‘Athettha vattatī saddo, tumulo bheravo mahā;  
Dānena taṃ nīharanti, puna dānaṃ adā tuva’nti.

Dānapaṭiggāhakaṃ pana dānaṃ gahetvā “idāni kira vessantaro rājā amhe anāthe katvā araññaṃ pavissati, ito paṭṭhāya kassa santikaṃ gamissāmā”ti chinnaṃ pādā viya patantā āvattantā parivattantā mahāsaddena parideviṃsu. Tamatthaṃ pakāsento satthā āha –

**1810:** ‘Te su mattā kilantāva, sampatanti vanibbakā;  
Nikkhamante mahārāje, sivīnaṃ raṭṭhavaḍḍhane’nti.

Tattha **te su mattāti su-kāro** nipātamatto, te vanibbakāti attho. **Mattā kilantāvāti** mattā viya kilantā viya ca hutvā. **Sampatantīti** parivattitvā bhūmiyaṃ patanti. **Accheccuṃ vatāti** chindimṃsu, **vatāti** nipātamattaṃ. **Yathāti** yena kāraṇena. **Atiyakkhāti** bhūtavijjā ikkhaṇikāpi. **Vassavarāti** uddhaṭṭābhijā orodhapālakā. **Vacanaṭṭhēti** vacanakāraṇena. **Samhā raṭṭhā nirajjātīti** attano raṭṭhā niggacchati. **Gāmaṇīyehīti** hatthācariyehi. **Ājānīyevāti** jātisampanne. **Gāmaṇīyehīti** assācariyehi. **Illiyācāpadhāribhīti** illiyañca cāpañca dhārentehi. **Dīpe athopi veyyaggheti** dīpicammabyagghacammaaparikkhitte. **Ekamekā rathe ṭhitāti** so kira ekamekaṃ itthiratanāṃ rathe ṭhapetvā aṭṭhaaṭṭhavaṇṇadāsīhi parivutaṃ katvā adāsī.

**Nikkharajjūhīti** suvaṇṇasuttamayehi pāmaṅgehi. **Ālārapamhāti** visālakkhigaṇḍā. **Hasulāti** mhitapubbaṅgamakathā. **Susaññāti** sussoṇiyo. **Tanumajjhimāti** karatalamiva tanumajjhimabhāgā. Tadā pana devatāyo jambudīpatale rājūnaṃ “vessantaro rājā mahādānaṃ deti”ti ārocayiṃsu, tasmā te khattiyā devatānubhāvenāgantvā tā gaṇhitvā pakkamiṃsu. **Kaṃsupadhāraṇāti** idha **kaṃsanti** rajatassa nāmaṃ, rajatamayena khīrapaṭicchanaḥajānena saddhiññeva adāsīti attho. **Padinnamhīti** dīyamāne. **Sampakampathāti** dānatejēna kampittha. **Yaṃ pañjalikatoti** yaṃ so vessantaro rājā mahādānaṃ datvā añjaliṃ paggayha attano dānaṃ namassamāno “sabbāññutaññāṇassa me idaṃ paccayo hotū”ti pañjalikato ahoṣi, tadāpi bhīsanakameva ahoṣi, tasmim khaṇe pathavī kampitthāti attho. **Nirajjātīti** evaṃ katvā niggacchatiyeva, na koci naṃ nivāretīti attho.

Apica kho tassa dānaṃ dadantasseva sāyaṃ ahoṣi. So attano nivesanameva gantvā “mātāpitaro vanditvā sve gamissāmi”’ti cintetvā alaṅkatarathena mātāpitūnaṃ vasanaṭṭhānaṃ gato. Maddādevīpi “ahaṃ sāminā saddhiṃ gantvā mātāpitaro anujānāpessāmi”’ti teneva saddhiṃ gatā. Mahāsatto pitarāṃ vanditvā attano gamanabhāvaṃ kathesi. Tamatthaṃ pakāsento satthā āha –

**1811:**“Āmantayittha rājānaṃ, sañjayaṃ dhammiṇaṃ varam;  
Avaruddhasi maṃ deva, vaṅkaṃ gacchāmi pabbataṃ.

**1812:**“Ye hi keci mahārāja, bhūtā ye ca bhavissare;  
Atittāyeva kāmehi, gacchanti yamasādhanāṃ.

**1813:**“Svāhaṃ sake abhissasiṃ, yaṃamāno sake pure;  
Sivīnaṃ vacanathena, samhā raṭṭhā nirajjahaṃ.

**1814:**“Aghaṃ taṃ paṭisevissaṃ, vane vāḷamigākiṇṇe;  
Khaggadīpinisevite, ahaṃ puññāni karomi;  
Tumhe paṅkamhi sīdathā”’ti.

Tattha **dhammiṇaṃ varanti** dhammikaṃ rājūnaṃ antare uttamaṃ. **Avaruddhasīti** raṭṭhā nīharasi. **Bhūtāti** atītā. **Bhavissareti** ye ca anāgate bhavissanti, paccuppanne ca nibbattā. **Yamasādhananti** yamañña ānāpavattiṭṭhānaṃ. **Svāhaṃ sake abhissasinti** so ahaṃ attano nagaravāsino yeva pīlesim. Kim karonto? **Yaṃamāno sake pureti**. Pāḷiyaṃ pana “so aha”’nti likhitā. **Nirajjahanti** nikkhanto ahaṃ. **Aghaṃ tanti** yaṃ araṇṇe vasantena paṭisevitabbaṃ dukkhaṃ, taṃ paṭisevissāmi. **Paṅkamhīti** tumhe pana kāmapaṅkamhi sīdathāti vadati.

Iti mahāsatto imāhi catūhi gāthāhi pitarā saddhiṃ kathetvā mātu santikaṃ gantvā vanditvā pabbajjaṃ anujānāpento evamāha –

**1815:**“Anujānāhi maṃ amma, pabbajjā mama rucati;  
Svāhaṃ sake abhissasiṃ, yaṃamāno sake pure;  
Sivīnaṃ vacanathena, samhā raṭṭhā nirajjahaṃ.

**1816:**“Aghaṃ taṃ paṭisevissaṃ, vane vāḷamigākiṇṇe;  
Khaggadīpinisevite, ahaṃ puññāni karomi;  
Tumhe paṅkamhi sīdathā”’ti.

Taṃ sutvā phussatī āha –

**1817:**“Anujānāmi taṃ putta, pabbajjā te samijjhatu;  
Ayañca maddī kalyāṇī, susaṇṇā tanumajjhimā;  
Acchataṃ saha puttehi, kiṃ araṇṇe karissatī”’ti.

Tattha **samijjhatūti** jhānena samiddhā hotu. **Acchataṃ** acchatu, idheva hotūti vadati.

Vessantaro āha –

**1818:**“Nāhaṃ akāmā dāsimpi, araṇṇaṃ netumussahe;  
Sace icchati anvetu, sace nicchati acchatū”’ti.

Tattha **akāmāti** amma, kiṃ nāmetāṃ kathetha, ahaṃ anicchāya dāsimpi netuṃ na ussahāmīti.

Tato puttassa katham sutvā rājā suṇhaṃ yācituṃ paṭipajji. Tamatthaṃ pakāsento satthā āha –

**1819:** ‘Tato suṇhaṃ mahārājā, yācituṃ paṭipajjatha;  
Mā candanasamācāre, rajojallaṃ adhārayi.

**1820:** ‘Mā kāsiyāni dhāretvā, kusacīraṃ adhārayi;  
Dukkho vāso araññasmiṃ, mā hi tvaṃ lakkhaṇe gamī’ ti.

Tattha **paṭipajjathā**ti bhikkhave, puttassa katham sutvā rājā suṇhaṃ yācituṃ paṭipajji.  
**Candanasamācāreti** lohitacandanena parikiṇṇasarīre. **Mā hi tvaṃ lakkhaṇe gamī**ti subhalakkhaṇena samannāgate mā tvaṃ araññaṃ gamīti.

**1821:** ‘Tamabravi rājaputtī, maddī sabbaṅgasobhanā;  
Nāhaṃ taṃ sukhamiccheyyaṃ, yaṃ me vessantaraṃ vinā’ ti.

Tattha **tamabravī**ti taṃ sasuraṃ abravi.

**1822:** ‘Tamabravi mahārājā, sivīnaṃ raṭṭhavaḍḍhano;  
Ingha maddi nisāmehi, vane ye honti dussahā.

**1823:** ‘Bahū kīṭā paṅgā ca, makasā madhumakkhikā;  
Tepi taṃ tattha hiṃ seyyuṃ, taṃ te dukkhataraṃ siyā.

**1824:** ‘Apare passa santāpe, nadīnupanisevite;  
Sappā ajagarā nāma, avisā te mahabbalā.

**1825:** ‘Te manussaṃ migaṃ vāpi, api māsannamāgatam;  
Parikkhipivā bhogehi, vasamānenti attano.

**1826:** ‘Aññepi kaṇhajaṭino, acchā nāma aghammigā;  
Na tehi puriso diṭṭho, rukkhamāruyha muccati.

**1827:** ‘Saṅghaṭṭayantā siṅgāni, tikkhaggātipphārino;  
Mahiṃsā vicarantettha, nadīṃ sotumbaram pati.

**1828:** ‘Disvā migānaṃ yūthānaṃ, gavaṃ sañcarataṃ vane;  
Dhenuva vacchagiddhāva, katham maddi karissasi.

**1829:** ‘Disvā sampatite ghore, dumaggesu plavaṅgame;  
Akhetaññāya te maddi, bhavissate mahabbhayaṃ.

**1830:** ‘Yā tvaṃ sivāya sutvāna, muhuṃ uttasayī pure;  
Sā tvaṃ vaṅkamanuppattā, katham maddi karissasi.

**1831:** ‘Ṭhite majjhanhike kāle, sannisinnesu pakkhisu;  
Saṇateva brahāraññaṃ, tattha kiṃ gantumicchasi’ ti.

Tattha **tamabravī**ti taṃ suṇhaṃ abravi. **Apare passa santāpeti** aññepi santāpe bhayajanake pekkha. **Nadīnupanisevite**ti nadīnaṃ upanisevite āsannaṭṭhāne, nadīkūle vasanteti attho. **Avisāti** nibbisā. **Api māsannanti** āsannaṃ attano sarīrasamphassaṃ āgatanti attho. **Aghammigāti** aghakarā migā, dukkhāvahā migāti attho. **Nadīṃ sotumbaram patī**ti sotumbarāya nāma nadiyā tūre. **Yūthānanti**

yūthāni, ayameva vā pāṭho. **Dhenuva vacchagiddhāvā**ti tava dārake apassantī vacchagiddhā dhenu viya katham karissasi. **Va-kāro** panettha nipātamattova. **Sampatiteti** sampatante. **Ghoreti** bhīsanake virūpe. **Plavaṅgameti** makkaṭe. **Akhettaññāyā**ti araññabhūmiakusalatāya. **Bhavissateti** bhavissati. **Sivāya sutvānā**ti siṅgāliyā saddam sutvā. **Muhunti** punappunam. **Uttasayī**ti uttasasi. **Saṅatevā**ti nadati viya saṅantam viya bhavissati.

**1832:**‘Tamabravi rājaputtī, maddī sabbaṅgasobhanā;  
Yāni etāni akkhāsi, vane paṭibhayāni me;  
Sabbāni abhisambhossam, gacchaññeva rathesabha.

**1833:**‘Kāsam kusam poṭakilaṃ, usiraṃ muñcapabbajam;  
Urasā panudahissāmi, nassa hessāmi dunnayā.

**1834:**‘Bahūhi vata cariyāhi, kumārī vindate patiṃ;  
Udarassuparodhena, gohanuveṭhanena ca.

**1835:**‘Aggissa pāricariyāya, udakummuḍjanena ca;  
Vedhabyam kaṭukam loke, gacchaññeva rathesabha.

**1836:**‘Apissā hoti appatto, ucchiṭṭhamapi bhuñjitaṃ;  
Yo nam hatthe gahetvāna, akāmaṃ parikaḍḍhati;  
Vedhabyam kaṭukam loke, gacchaññeva rathesabha.

**1837:**‘Kesaggahaṇamukkhepā, bhūmyā ca parisumbhanā;  
Datvā ca no pakkamati, bahuṃ dukkham anappakam;  
Vedhabyam kaṭukam loke, gacchaññeva rathesabha.

**1838:**‘Sukkacchavī vedhaverā, datvā subhagamānino;  
Akāmaṃ parikaḍḍhanti, ulūkaññeva vāyasā;  
Vedhabyam kaṭukam loke, gacchaññeva rathesabha.

**1839:**‘Api nātikule phīte, kaṃsapajjotane vasam;  
Nevātivākyam na labhe, bhātūhi sakhinīhipi;  
Vedhabyam kaṭukam loke, gacchaññeva rathesabha.

**1840:**‘Naggā nadī anudakā, naggam raṭṭham arājakaṃ;  
Itthipi vidhavā naggā, yassāpi dasa bhātaro;  
Vedhabyam kaṭukam loke, gacchaññeva rathesabha.

**1841:**‘Dhajo rathassa paññāṇam, dhūmo paññāṇamaggino;  
Rājā raṭṭhassa paññāṇam, bhattā paññāṇamitthiyā;  
Vedhabyam kaṭukam loke, gacchaññeva rathesabha.

**1842:**‘Yā daliddī daliddassa, aḍḍhā aḍḍhassa kittimā;  
Tam ve devā pasamsanti, dukkarañhi karoti sā.

**1843:**‘Sāmikaṃ anubandhissam, sadā kāsāyavāsini;  
Pathabyāpi abhijjantiyā, vedhabyam kaṭukitthiyā.

**1844:**‘Api sāgarapariyantam, bahuvittadharam mahim;  
Nānāratana-paripūram, nicche vessantaram vinā.

**1845:** ‘Kathaṃ nu tāsamaṃ hadayaṃ, sukharā vata itthiyo;  
Yā sāmike dukkhitamhi, sukhamicchanti attano.

**1846:** ‘Nikkhamante mahārāje, sivīnaṃ raṭṭhavaḍḍhane;  
Tamaḥaṃ anubandhissaṃ, sabbakāmadado hi me’’ti.

Tattha **tamabravīti** bhikkhave, maddī rañño vacanaṃ sutvā taṃ rājānaṃ abravi.

**Abhisambhossanti** saḥissāmi adhivāsessāmi. **Poṭakilanti** poṭakilatiṇaṃ. **Panudahissāmīti** dvedhā katvā vessantarassa purato gamissāmi. **Udarassuparodhenāti** upavāsena khudādhivāsena. **Gohanuveṭṭhanena cāti** visālakaṭṭhiyo onatapassā ca itthiyo sāmikaṃ labhantīti katvā gohanunā kaṭṭhiphalakaṃ koṭṭāpetvā veṭṭhanena ca passāni onāmetvā kumārikā patim labhati. **Kaṭukanti** asātaṃ. **Gacchaññevāti** gamissāmiyeva.

**Apissā hoti appattoti** tassā vidhavāya ucchiṭṭhakampi bhuñjituṃ ananucchavikova. **Yo nanti** yo nīcayacco taṃ vidhavaṃ anicchamaññaññeva hatthe gahetvā kaḍḍhati. **Kesaggahaṇamukkhepā, bhūmyā ca parisumbhanāti** asāmikaṃ itthim hatthapādehi kesaggahaṇaṃ, ukkhepā, bhūmiyaṃ pātananti etāni avamaññānāni katvā atikkamanti. **Datvā cāti** asāmikāya itthiyā evarūpaṃ bahuṃ anappakaṃ dukkhaṃ parapuriṣo datvā ca **no pakkamati** nirāsaṅko oloketova tiṭṭhati.

**Sukkacchavīti** nhānīyacunṇena utṭhāpitacchavivaṇṇā. **Vedhaverāti** vidhavitthikāmā purisā. **Datvāti** kiñciveva appamattakaṃ dhanaṃ datvā. **Subhagamāninoti** mayaṃ subhagāti maññaṃ mānā. **Akāmanti** taṃ vidhavaṃ asāmikaṃ akāmaṃ. **Ulūkaññeva vāyasāti** kākā viyaulūkaṃ parikaḍḍhanti. **Kaṃsapajjotanti** suvaṇṇabhājanābhāya pajjotante. **Vasanti** evarūpepi ñātikule vasamānā. **Nevativākyam na labheti** ‘‘ayaṃ itthī nissāmikā, yāvajīvaṃ amhākaññeva bhāro jāto’’tiādīni vacanāni vadantehi bhātūhipi sakhinīhipi ativākyam garahavacanaṃ neva na labhati. **Paññāṇanti** pākāṭabhāvakāraṇaṃ.

**Yā daliddī daliddassāti** deva, kittisampannā yā itthī attano sāmikassa daliddassa dukkhappattakāle sayampi daliddī samānā dukkhāva hoti, tassa aḍḍhakāle teneva saddhim aḍḍhā sukhappattā hoti, taṃ ve devā pasamsanti. Abhijjantyāti abhijjantiyā. Sacepi hi itthiyā sakalāpathavī na bhijjati, tāya sakalāya pathaviyā sāva issarā hoti, tathāpi vedhabyaṃ kaṭukamevāti attho. Sukharā vata itthiyoti suṭṭhu kharā vata itthiyo.

**1847:** ‘Tamabravi mahārājā, maddim sabbaṅgasobhanaṃ;  
Ime te daharā puttā, jālī kaṇhājīnā cubho;  
Nikkhippa lakkhaṇe gaccha, mayaṃ te posayāmasē’’ti.

Tattha **jālī kaṇhājīnā cubhoti** jālī ca kaṇhājīnā cāti ubho. **Nikkhippāti** ime nikkhipitvā gacchāhīti.

**1848:** ‘Tamabravi rājaputtī, maddī sabbaṅgasobhanā;  
Piyā me puttakā deva, jālī kaṇhājīnā cubho;  
Tyamaṃ tattha ramessanti, araññe jīvasokina’’nti.

Tattha **tyamhanti** te dārakā amhākaṃ tattha araññe. **Jīvasokinanti** avigatasokānaṃ hadayaṃ ramayissantīti attho.

**1849:** ‘Tamabravi mahārājā, sivīnaṃ raṭṭhavaḍḍhano;  
Sālīnaṃ odanaṃ bhutvā, suciṃ maṃsūpasecanaṃ;  
Rukkhaphalāni bhuñjantā, kathaṃ kāhanti dārakā.

**1850:** ‘Bhutvā satapale kaṃsē, sovaṇṇe satarājike;

Rukkhapattesu bhuñjantā, kathaṃ kāhanti dārakā.

1851: ‘Kāsiyāni ca dhāretvā, khomakoṭumbarāni ca;  
Kusacīrāni dhārentā, kathaṃ kāhanti dārakā.

1852: ‘Vayhāhi pariyāyivā, sivikāya rathena ca;  
Pattikā paridhāvanta, kathaṃ kāhanti dārakā.

1853: ‘Kūṭāgāre sayitvāna, nivāte phusitaggale;  
Sayantā rukkhāmūlasmim, kathaṃ kāhanti dārakā.

1854: ‘Pallañkesu sayitvāna, gonake cittasanthate;  
Sayantā tiṇasanthāre, kathaṃ kāhanti dārakā.

1855: ‘Gandhakena vilimpitvā, agarucandanena ca;  
Rajojallāni dhārentā, kathaṃ kāhanti dārakā.

1856: ‘Cāmaramorahatthehi, bījitaṅgā sukhedhitā;  
Phuṭṭhā ḍaṃsehi makasehi, kathaṃ kāhanti dārakā’’ti.

Tattha **palasate kaṃseti** palasatena katāya kañcanapātiyā. **Gonake cittasanthate** mahāpiṭṭhiyaṃ kāḷakojava ceva vicittake santhare ca. **Cāmaramorahatthehīti** cāmārehi ceva morahatthehi ca bījitaṅgā.

Evam tesam sallapantānaññeva ratti vibhāyi, sūriyo uggañchi. Mahāsattassa catusindhavayuttaṃ alaṅkatarathaṃ ānetvā rājadvāre ṭhapaṃsu. Maddīpi sassusasure vanditvā sesitthiyo apaloketvā dve putte ādāya vessantarato paṭhamataraṃ gantvā rathe aṭṭhāsi. Tamatthaṃ pakāsento satthā āha –

1857: ‘Tamabravi rājaputtī, maddī sabbaṅgasobhanā;  
Mā deva paridevesi, mā ca tvaṃ vimano ahu;  
Yathā mayaṃ bhavissāma, tathā hessanti dārakā.

1858: ‘Idaṃ vatvāna pakkāmi, maddī sabbaṅgasobhanā;  
Sivimaggena anvesi, putte ādāya lakkhaṇā’’ti.

Tattha **sivimaggenāti** sivirañño gantabbamaggena. **Anvesīti** taṃ agamāsi, pāsādā otarivā rathaṃ abhiruhīti attho.

1859: ‘Tato vessantaro rājā, dānaṃ datvāna khattiyo;  
Pītu mātu ca vanditvā, katvā ca naṃ padakkhiṇaṃ.

1860: ‘Catuvāhiṃ rathaṃ yuttaṃ, sīghamāruyha sandanaṃ;  
Ādāya puttadārañca, vaṅkaṃ pāyāsi pabbata’’nti.

Tattha **tatoti** bhikkhave, tassā maddiyā rathaṃ abhiruhitvā ṭhitakāle. **Datvāti** hiyyo dānaṃ datvā. **Katvā ca naṃ padakkhiṇanti** padakkhiṇaṃ katvā. **Nanti** nipātamattaṃ.

1861: ‘Tato vessantaro rājā, yenāsi bahuko jano;  
Āmanta kho taṃ gacchāma, arogā hontu ñātayo’’ti.

Tassattho – bhikkhave, tato vessantaro rājā yattha “vessantaraṃ rājānaṃ passissāmā’’ti bahuko jano ṭhito āsi, tattha rathaṃ pesetvā mahājanaṃ āpucchanto “āmanta kho taṃ gacchāma, arogā hontu

ñātayo’’ti āha. Tattha **tanti** nipātamattaṃ. Bhikkhave, tato vessantaro rājā ñātake āha – “tumhe āmantetvā mayamaṃ gacchāma, tumhe sukhitā hotha nidukkhā’’ti.

Evamaṃ mahāsatto mahājanaṃ āmantetvā “appamattā hotha, dānādīni puññāni karothā’’ti tesamaṃ ovaditvā pakkāmi. Gacchante pana bodhisatte mātā “putto me dānavittako dānaṃ detū’’ti ābharaṇehi saddhiṃ sattaratanapūrāni sakaṭāni ubhosu passesu pesesi. Sopi attano kāyāruḷhameva ābharaṇabhaṇḍamaṃ omuñcitvā sampattayācakānaṃ aṭṭhārasa vāre datvā avasesamaṃ sabbaṃ adāsi. So nagarā nikkhamitvā ca nivattitvā oloketukāmo ahosi. Athassa manamaṃ paṭicca rathappamaṇaṭṭhāne mahāpathavī bhijjivā kulālacakkaṃ viya parivattitvā rathamaṃ nagarābhimukkaṃ akāsi. So mātāpitūnaṃ vasanaṭṭhānaṃ olokesi. Tena kāraṇena pathavīkampa ahosi. Tena vuttaṃ –

“Nikkhamitvāna nagarā, nivattitvā vilokite;  
Tadāpi pathavī kampa, sineruvanaṭṭhānaṃ sakā’’ti. (cariyā. 1.93);

Sayamaṃ pana oloketvā maddimpi olokāpetumaṃ gāthamāha –

**1862:** ‘Ingha maddi nisāmehi, rammarūpaṃva dissati;  
Āvāsaṃ siviṣeṭṭhassa, pettikaṃ bhavanaṃ mamā’’ti.

Tattha **nisāmehi**ti olokehi.

Atha mahāsatto sahaṃjāte saṭṭhisahassaamacce ca sesajanaṅca nivattāpetvā rathamaṃ pājento maddimaṃ āha – “bhaddhe, sace pacchato yācakā āgacchanti, upadhāreyyāsī’’ti. Sāpi oloketi nisīdi. Athassa sattaṣaṭṭhamaṃ mahādānaṃ sampāpuṇitumaṃ asakkontā cattāro brāhmaṇā nagaraṃ āgantvā “kuhiṃ vessantaro rājā’’ti pucchitvā “dānaṃ datvā gato’’ti vutte “kiñci gahetvā gato’’ti pucchitvā “rathena gato’’ti sutvā “asse naṃ yācissāmā’’ti anubandhiṃsu. Atha maddi te āgacchante disvā “yācakā āgacchanti, devā’’ti ārocesi. Mahāsatto rathamaṃ ṭhapesi. Te āgantvā asse yāciṃsu. Mahāsatto asse adāsi. Tamatthamaṃ pakāsento satthā āha –

**1863:** ‘Tamaṃ brāhmaṇā anvagamaṃ, te naṃ asse ayācisumaṃ;  
Yācito paṭipādesi, catunnaṃ caturo haye’’ti.

Assesu pana dinnesu rathadhuraṃ ākāseyeva aṭṭhāsi. Atha brāhmaṇesu gatamattesuyeva cattāro devaputtā rohiccamigavaṇṇena āgantvā rathadhuraṃ sampaṭicchitvā agamaṃsu. Mahāsatto tesamaṃ devaputtabhāvaṃ ñatvā imaṃ gāthamāha –

**1864:** ‘Ingha maddi nisāmehi, cittaṛūpaṃva dissati;  
Migarohiccavaṇṇena, dakkhiṇassā vahanti ma’’nti.

Tattha **dakkhiṇassā**ti susikkhitā assā viya maṃ vahanti.

Atha naṃ evamaṃ gacchantaṃ aparo brāhmaṇo āgantvā rathamaṃ yāci. Mahāsatto puttadāraṃ otāretvā tassa rathamaṃ adāsi. Rathe pana dinne devaputtā antaradhāyimaṃsu. Rathassa dinnabhāvaṃ pakāsento satthā āha –

**1865:** ‘Athettha pañcama āgā, so tamaṃ rathamayācatha;  
Tassa tamaṃ yācitodāsi, na cassupahato mano.

**1866:** ‘Tato vessantaro rājā, oropetvā sakaṃ janaṃ;  
Assāsayaṃ assarathamaṃ, brāhmaṇassa dhanesino’’ti.



Tattha **athetthā**ti atha tasmim̐ vane. **Na cassupahato manoti** na cassa mano olīno. **Assāsayīti** paritosento niyyādesi.

Tato paṭṭhāya pana te sabbepi pattikāva ahesuṃ. Atha mahāsatto maddim̐ avoca –

**1867:** ‘Tvam̐ maddi kaṇham̐ gaṇhāhi, lahu esā kaniṭṭhikā;  
Aham̐ jālim̐ gahessāmi, garuko bhātiko hi so’’ti.

Evañca pana vatvā ubhopi khattiyā dve dārake ankenādāya pakkamiṃsu. Tamattham̐ pakāsento satthā āha –

**1868:** ‘Rājā kumāramādāya, rājaputtī ca dārikam̐;  
Sammodamānā pakkāmuṃ, aññamaññaṃ piyaṃvadā’’ti.

Dānakaṇḍavaṇṇanā niṭṭhitā.

Vanapavesanakaṇḍavaṇṇanā

Te paṭipatham̐ āgacchante manusse disvā ‘kuhim̐ vaṅkapabbato’’ti pucchanti. Manussā ‘‘dūre’’ti vadanti. Tena vuttaṃ –

**1869:** ‘Yadi keci manujā enti, anumagge paṭipathe;  
Maggam̐ te paṭipucchāma, ‘kuhim̐ vaṅkatapabbato’.

**1870:** ‘Te tattha amhe passivā, kalunaṃ paridevayum̐;  
Dukkham̐ te paṭivedenti, dūre vaṅkatapabbato’’ti.

Maggassa ubhosu passesu vividhaphaladhārino rukkhe disvā dārakā kandanti. Mahāsattassānubhāvena phaladhārino rukkḥā onamitvā hatthasamphassam̐ āgacchanti. Tato supakkaphalāphalāni uccinitvā tesam̐ deti. Tam̐ disvā maddī acchariyam̐ pavedesi. Tena vuttaṃ –

**1871:** ‘Yadi passanti pavane, dārakā phaline dume;  
Tesaṃ phalānaṃ hetumhi, uparodanti dārakā.

**1872:** ‘Rodante dārake disvā, ubbidhā vipulā dumā;  
Sayamevonamitvāna, upagacchanti dārake.

**1873:** ‘Idam̐ accherakam̐ disvā, abbhutam̐ lomahaṃsanam̐;  
Sādhukāram̐ pavattesi, maddī sabbaṅgasobhanā.

**1874:** ‘Accheram̐ vata lokasmim̐, abbhutam̐ lomahaṃsanam̐;  
Vessantarassa tejena, sayamevonatā dumā’’ti.

Jetuttaranagarato suvaṇṇagiritālo nāma pabbato pañca yojanāni, tato kontimārā nāma nadī pañca yojanāni, tato añcaragiri nāma pabbato pañca yojanāni, tato dunniviṭṭhabrahmaṇagāmo nāma pañca yojanāni, tato mātulanagaraṃ dasa yojanāni. Iti tam̐ maggam̐ jetuttaranagarato tiṃsayojanam̐ hoti. Devatā tam̐ maggam̐ saṃkhipiṃsu. Te ekadivaseneva mātulanagaraṃ pāpuṇiṃsu. Tena vuttaṃ –

**1875:** ‘Saṅkhipiṃsu patham̐ yakkhā, anukampāya dārake;  
Nikkhantadivaseneva, cetaṛaṭṭham̐ upāgamu’’nti.

Upagacchantā ca pana jetuttaranagarato pātārāsasamaye nikkhamitvā sāyanhasamaye cetaṛaṭṭhe mātulanagaraṃ pattā. Tamatthaṃ pakāseṇo satthā āha –

**1876:**“Te gantvā dīghamaddhānaṃ, cetaṛaṭṭhaṃ upāgamuṃ;  
Iddhaṃ phītaṃ janapadaṃ, bahumaṃsasurodana’’nti.

Tadā mātulanagare saṭṭhi khattiyasahassāni vasanti. Mahāsatto antonagaraṃ apavisitvā nagaradvāreya sālāyaṃ nisīdi. Athassa maddī bodhisattassa pādesu rajaṃ puñchitvā pāde sambāhitvā “vessantarassa āgatabhāvaṃ jānāpessāmī’’ti sālāto nikkhamitvā tassa cakkhupathe sālādvāre aṭṭhāsī. Nagaraṃ pavasiṇtiyo ca nikkhamantiyo ca itthiyo taṃ disvā parivāresuṃ. Tamatthaṃ pakāseṇo satthā āha –

**1877:**“Cetiyo parivāriṃsu, disvā lakkhaṇamāgataṃ;  
Sukhumālī vata ayyā, pattikā paridhāvati.

**1878:**“Vayhāhi pariyāyitvā, sivikāya rathena ca;  
Sājja maddī araññasmim, pattikā paridhāvati’’ti.

Tattha **lakkhaṇamāgataṃ** lakkhaṇasampannaṃ maddiṃ āgataṃ. **Paridhāvati** evaṃ sukhumālī hutvā pattikāya vicarati. **Pariyāyitvā**ti jetuttaranagare vicaritvā. **Sivikāyā**ti suvaṇṇasivikāya.

Mahājano maddiṇca vessantaraṇca dve putte cassa anāthāgamanena āgate disvā gantvā rājūnaṃ ācikkhi. Saṭṭhisahassā rājāno rodantā paridevantā tassa santikaṃ āgamaṃsu. Tamatthaṃ pakāseṇo satthā āha –

**1879:**“Taṃ disvā cetapāmokkhā, rodamānā upāgamuṃ;  
Kacci nu deva kusalaṃ, kacci deva anāmayāṃ;  
Kacci pitā arogo te, sivīnaṇca anāmayāṃ.

**1880:**“Ko te balaṃ mahārāja, ko nu te rathamaṇḍalaṃ;  
Anassako arathako, dīghamaddhānamāgato;  
Kaccāmittehi pakato, anuppattosimaṃ disa’’nti.

Tattha **disvā**ti dūratova passitvā. **Cetapāmokkhā**ti cetaṛājāno. **Upāgamuṃ**ti upasaṅkamimṃsu. **Kusalanti** ārogyaṃ. **Anāmayanti** niddukkhabhāvaṃ. **Ko te balanti** kuhiṃ tava balakāyo. **Rathamaṇḍalanti** yenāsi rathena āgato, so kuhinti pucchanti. **Anassakoti** assavirahito. **Arathakoti** ayānako. **Dīghamaddhānamāgato**ti dīghamaggaṃ āgato. **Pakatoti** abhibhūto.

Atha nesaṃ mahāsatto attano āgatakāraṇaṃ kathento āha –

**1881:**“Kusalaṇceva me sammā, atho sammā anāmayāṃ;  
Atho pitā arogo me, sivīnaṇca anāmayāṃ.

**1882:**“Ahañhi kuñjaraṃ dajjaṃ, īsādantaṃ urūlhavaṃ;  
Khettaññuṃ sabbayuddhānaṃ, sabbasetāṃ gajuttamaṃ.

**1883:**“Paṇḍukambalasañchannaṃ, pabhinnaṃ sattumaddanaṃ;  
Dantiṃ savālabījanaṃ, setāṃ kelāsasādisaṃ.

**1884:**“Sasetacchattaṃ saupādheyyaṃ, sāthabbanāṃ sahatthipaṃ;  
Aggayānaṃ rājavāhiṃ, brāhmaṇānaṃ adāsahaṃ.

**1885:** ‘Tasmiṃ me sivayo kuddhā, pitā cupahatomano;  
Avaruddhasi maṃ rājā, vaṅkaṃ gacchāmi pabbataṃ;  
Okāsaṃ sammā jānātha, vane yattha vasāmase’’ti.

Tattha **tasmiṃ meti** tasmiṃ kāraṇe mayhaṃ sivayo kuddhā. **Upahatomanoti** upahatacitto kuddhova maṃ raṭṭhā pabbājesi. **Yatthāti** yasmiṃ vane mayaṃ vaseyyāma, tattha vasanokāsaṃ jānāthāti.

Te rājāno āhaṃsu –

**1886:** ‘Svāgataṃ te mahārāja, atho te adurāgataṃ;  
Issarosi anuppatto, yaṃ idhatthi pavedaya.

**1887:** ‘Sākaṃ bhisaṃ madhuṃ maṃsaṃ, suddhaṃ sālīnamodanaṃ;  
Paribhuñja mahārāja, pāhuno nosi āgato’’ti.

Tattha **pavedayāti** kathehi, sabbaṃ paṭiyādetvā dassāma. **Bhisanti** bhisamūlaṃ, yaṃkiñci kandaḷātaṃ vā.

Vessantaro āha –

**1888:** ‘Paṭiggahitaṃ yaṃ dinnaṃ, sabbassa agghiyaṃ kataṃ;  
Avaruddhasi maṃ rājā, vaṅkaṃ gacchāmi pabbataṃ;  
Okāsaṃ sammā jānātha, vane yattha vasāmase’’ti.

Tattha **paṭiggahitanti** sabbametaṃ tumhehi dinnaṃ mayā ca paṭiggahitameva hotu, sabbassa tumhehi mayhaṃ agghiyaṃ nivedanaṃ kataṃ. Rājā pana maṃ avaruddhasi raṭṭhā pabbājesi, tasmā vaṅkameva gamissāmi, tasmiṃ me araṅṅe vasanaṭṭhānaṃ jānāthāti.

Te rājāno āhaṃsu –

**1889:** ‘Idheva tāva acchassu, cetaṛaṭṭhe rathesabha;  
Yāva cetā gamissanti, raṅṅo santika yācituṃ.

**1890:** ‘Nijjhāpetuṃ mahārājaṃ, sivīnaṃ raṭṭhavaḍḍhanaṃ;  
Taṃ taṃ cetā purakkhatvā, patītā laddhapaccayā;  
Parivāretvāna gacchanti, evaṃ jānāhi khattiyā’’ti.

Tattha **raṅṅo santika yācituṃ** raṅṅo santikaṃ yācanatthāya gamissanti. **Nijjhāpetunti** tumhākaṃ niddosabhāvaṃ jānāpetuṃ. **Laddhapaccayāti** laddhapatiṭṭhā. **Gacchanti** gamissanti.

Mahāsatto āha –

**1891:** ‘Mā vo rucitttha gamaṇaṃ, raṅṅo santika yācituṃ;  
Nijjhāpetuṃ mahārājaṃ, rājāpi tattha nissaro.

**1892:** ‘Accuggatā hi sivayo, balaggā negamā ca ye;  
Te vidhaṃsetumicchanti, rājānaṃ mama kāraṇā’’ti.

Tattha **tatthāti** tasmiṃ mama niddosabhāvaṃ nijjhāpane rājāpi anissaro. **Accuggatāti** atikuddhā. **Balaggāti** balakāyā. **Vidhaṃsetunti** rajjato nīharituṃ. **Rājānanti** rājānampi.

Te rājāno āhaṃsu –

**1893:** ‘Sace esā pavattettha, raṭṭhasmiṃ raṭṭhavaḍḍhana;  
Idheva rajjaṃ kārehi, cetehi parivārito.

**1894:** ‘Iddhaṃ phītañcidaṃ raṭṭhaṃ, iddho janapado mahā;  
Matim karohi tvaṃ deva, rajjassa manusāsitu’nti.

Tattha **sace esā pavattetthā**ti sace etasmiṃ raṭṭhe esā pavatti. **Rajjassa manusāsitunti** rajjaṃ samanūsāsituṃ, ayameva vā pāṭho.

Vessantaro āha –

**1895:** ‘Na me chando mati atthi, rajjassa anusāsituṃ;  
Pabbājitassa raṭṭhasmā, cetaputtā suṇātha me.

**1896:** ‘Atuṭṭhā sivayo āsuṃ, balaggā negamā ca ye;  
Pabbājitassa raṭṭhasmā, cetā rajjebhisecayūṃ.

**1897:** ‘Asammodiyampi vo assa, accantaṃ mama kāraṇā;  
Sivīhi bhaṇḍanaṃ cāpi, viggaho me na ruccati.

**1898:** ‘Athassa bhaṇḍanaṃ ghoraṃ, sampahāro anappako;  
Ekassa kāraṇā mayhaṃ, hiṃseyya bahuko jano.

**1899:** ‘Paṭiggahitaṃ yaṃ dinnāṃ, sabbassa agghiyaṃ kataṃ;  
Avaruddhasi maṃ rājā, vaṅkaṃ gacchāmi pabbataṃ;  
Okāsaṃ sammā jānātha, vane yattha vasāmase’nti.

Tattha **cetā rajjebhisecayunti** cetaṃ raṭṭhavāsino kira vessantaraṃ rajje abhisiñciṃsūti tumhākampi te atuṭṭhā āsuṃ. **Asammodiyanti** asāmaggiyaṃ. **Assāti** bhaveyya. **Athassāti** atha mayhaṃ ekassa kāraṇā tumhākaṃ bhaṇḍanaṃ bhavissatīti.

Evam mahāsatto anekapariyāyena yācitopi rajjaṃ na icchi. Athassa te cetaṃ rājāno mahantaṃ sakkāraṃ kariṃsu. So nagaraṃ pavisitūṃ na icchi. Atha naṃ sālameva alaṅkaritvā sāṇiyā parikkhepaṃ katvā mahāsayaṇaṃ paññāpetvā sabbe ārakkhaṃ kariṃsu. So ekarattim tehi saṅgahitārakkho sālāyaṃ sayitvā punadivase pātova nhatvā nānaggarasabhojanaṃ bhuñjitvā tehi parivuto nikkhami. Saṭṭhisahassā khattiyā tena saddhiṃ pannarasayojanamaggaṃ gantvā vanadvāre ṭhatvā purato pannarasayojanamaggaṃ ācikkhantā āhaṃsu –

**1900:** ‘Taggha te mayamakkhāma, yathāpi kusalā tathā;  
Rājīsī yattha sammanti, āhutaggī samāhitā.

**1901:** ‘Esa selo mahārāja, pabbato gandhamādano;  
Yattha tvaṃ saha puttehi, saha bhariyāya cacchasi.

**1902:** ‘Taṃ cetā anusāsimsu, assunettā rudaṃmukhā;  
Ito gaccha mahārāja, ujūṃ yenuttarāmukho.

**1903:** ‘Atha dakkhisi bhaddante, vepullaṃ nāma pabbataṃ;  
Nānādumagaṇākiṇṇaṃ, sītacchāyaṃ manoramaṃ.

- 1904:** ‘Tamatikkamma bhaddante, atha dakkhisi āpagam;  
Nadiṃ ketumatīṃ nāma, gambhīraṃ girigabbharam.
- 1905:** ‘Puthulomamacchākiṇṇaṃ, supatitthaṃ mahodakaṃ;  
Tattha nhatvā pivitvā ca, assāsetvā saputtake.
- 1906:** ‘Atha dakkhisi bhaddante, nigrodhaṃ madhupipphalaṃ;  
Rammake sikhare jātaṃ, sītacchāyaṃ manoramam.
- 1907:** ‘Atha dakkhisi bhaddante, nālikaṃ nāma pabbataṃ;  
Nānādiḷḷajagaṇākiṇṇaṃ, selaṃ kimpurisāyutaṃ.
- 1908:** ‘Tassa uttarapubbena, mucalīṇḍo nāma so saro;  
Puṇḍarīkehi sañchanno, setasogandhikehi ca.
- 1909:** ‘So vanaṃ meghasaṅkāsaṃ, dhuvaṃ haritasaddalaṃ;  
Sīhovāmisapekkhīva, vanasaṇḍaṃ vigāhaya;  
Puppharukkhehi sañchannaṃ, phalarukkhehi cūbhayaṃ.
- 1910:** ‘Tattha bindussarā vaggū, nānāvāṇṇā bahū diḷḷā;  
Kūjantamupakūjanti, utusampupphite dume.
- 1911:** ‘Gantvā girividuggānaṃ, nadīnaṃ pabhavāni ca;  
So dakkhisi pokkharāṇiṃ, karaṇḍjakakudhāyutaṃ.
- 1912:** ‘Puthulomamacchākiṇṇaṃ, supatitthaṃ mahodakaṃ;  
Samañca caturaṃsañca, sādumaṃ appaṭṭigandhiyaṃ.
- 1913:** ‘Tassā uttarapubbena, paṇṇasālaṃ amāpaya;  
Paṇṇasālaṃ amāpetvā, uñchācariyāya ihathā’’ti.

Tattha **rājisīti** rājāno hutvā pabbajitā. **Samāhitāti** ekaggacittā. **Esāti** dakkhiṇahatthaṃ ukkhipitvā iminā pabbatapādena gacchathāti ācikkhantā vadanti. **Acchasīti** vasissasi. **Āpaganti** udakavāhanadiāvattaṃ. **Girigabbharanti** girīnaṃ kucchito pavattaṃ. **Madhupipphalanti** madhuraphalaṃ. **Rammaketi** ramaṇīye. **Kimpurisāyutanti** kimpurisehi āyutaṃ parikiṇṇaṃ. **Setasogandhikehi cāti** nānappakārehi setuppalehi ceva sogandhikehi ca sañchanno. **Sīhovāmisapekkhīvāti** āmisam pekkhanto sīho viya.

**Bindussarāti** sampiṇḍitassarā. **Vaggūti** madhurassarā. **Kūjantamupakūjantīti** paṭṭhamaṃ kūjamānaṃ pakkhiṃ pacchā upakūjanti. **Utusampupphite dumeti** utusamaye pupphite dume nilīyitvā kūjantaṃ upakūjanti. **So dakkhisīti** so tvaṃ passissasīti attho. **Karaṇḍjakakudhāyutanti** karaṇḍjarukkhehi ca kakudharukkhehi ca samparikiṇṇaṃ. **Appaṭṭigandhiyanti** paṭṭikūlagandhavirahitaṃ madhurodakaparikiṇṇaṃ nānappakārapadumuppālādīhi sañchannaṃ. **Paṇṇasālaṃ amāpayāti** paṇṇasālaṃ māpeyyāsī. **Amāpetvāti** māpetvā. **Uñchācariyāya ihathāti** atha tumhe, deva, uñchācariyāya yāpentā appamattā ihatha, āraddhaviriyā hutvā vihareyyāthāti attho.

Evam te rājāno tassa pannarasayojanamaggaṃ ācikkhitvā taṃ uyyojetvā vessantarassa antarāyabhayassa vinodanattaṃ ‘‘mā kocideva paccāmitto okāsaṃ labheyyā’’ti cintetvā ekaṃ byattaṃ susikkhitaṃ cetaputtaṃ āmantetvā ‘‘tvaṃ gacchante ca āgacchante ca pariggaṇhāhī’’ti vanadvāre ārakkhaṇatthāya ṭhapetvā sakanagaraṃ gamiṃsu. Vessantaropi saputtadāro gandhamādanapabbataṃ patvā, taṃ divasaṃ tattha vasitvā tato uttarābhimukho vepullapabbatapādena gantvā, ketumatīyā nāma

nadiyā tīre nisīditvā vanacarakena dinnam madhumamsam khāditvā tassa suvaṇṇasūciṃ datvā tattha nhatvā pivitvā paṭippassaddhadaratho nadito uttaritvā sānupabbatasikhare ṭhitassa nigrodhassa mūle thokaṃ nisīditvā nigrodhaphalāni khāditvā utthāya gacchanto nāḷikaṃ nāma pabbataṃ patvā taṃ pariharanto mucalindasaram gantvā sarassa tīrena pubbuttarakaṇṇam patvā, ekapadikamaggena vanaghaṭam pavisitvā taṃ atikkamma girividuggānam nadippabhavānam purato caturamsapokkharāṇiṃ pāpuṇi.

Tasmim khaṇe sakko āvajjento “mahāsatto himavantam pavittḥo”ti ṇatvā “tassa vasanaṭṭhānam laddhum vaṭṭatī”ti cintetvā vissakammaṃ pakkosāpetvā “gaccha, tāta, tvaṃ vaṅkapabbatakujhacchimhi ramaṇīye thāne assamapadam māpetvā ehi”ti pesesi. So “sādhū, devā”ti devalokato otarivā tattha dve paṇṇasālāyo dve caṅkame rattitṭhānadivāṭṭhānāni ca māpetvā caṅkamakoṭiyam tesu tesu thānesu nānāphaladhare rukkhe ca kadalivanāni ca dassetvā sabbe pabbajitaparikkhāre paṭiyādetvā “ye keci pabbajitukāmā, te ime gaṇhantū”ti akkharāni likhitvā amanusse ca bheravasadde migapakkhino ca paṭikkamāpetvā sakatṭhānameva gato.

Mahāsatto ekapadikamaggam disvā “pabbajitānam vasanaṭṭhānam bhavissatī”ti maddiṅca putte ca assamapadadvāre ṭhapetvā assamapadam pavisitvā akkharāni oloketvā “sakkenamhi diṭṭho”ti ṇatvā paṇṇasālam pavisitvā khaggaṅca dhanuṅca apantvā sātāke omuṅcitvā rattavākacīram nivāsetvā ajinacammaṃ aṃse katvā jaṭamaṇḍalam bandhitvā isivesam gahetvā kattaradaṇḍam ādāya paṇṇasālato nikkhamitvā pabbajitasirim samubbahanto “aho sukham, aho sukham, pabbajjā me adhigatā”ti udānam udānetvā caṅkamaṃ āruyha aparāparam caṅkamitvā paccekabuddhasadisena upasamena puttadārānam santikaṃ agamāsi. Maddīpi mahāsattassa pādesu patitvā roditvā teneva saddhim assamapadam pavisitvā attano paṇṇasālam gantvā isivesam gaṇhi. Pacchā puttepi tāpasakumārake kariṃsu. Cattāro khattiyā vaṅkapabbatakujhacchimhi vasimṃsu. Atha maddī mahāsattam varam yāci “deva, tumhe phalāphalattḥāya vanaṃ agantvā putte gahetvā idheva hotha, aham phalāphalam āharissāmī”ti. Tato paṭṭhāya sā araṇṇato phalāphalāni āharitvā tayo jane paṭijaggati.

Bodhisattopi taṃ varam yāci “bhadde, maddi mayaṃ ito paṭṭhāya pabbajitā nāma, itthī ca nāma brahmacariyassa malaṃ, ito paṭṭhāya akāle mama santikaṃ mā āgacchāhi”ti. Sā “sādhū”ti sampaṭicchi. Mahāsattassa mettānubhāvena samantā tiyojane sabbe tiracchānāpi aññamaññaṃ mettacittam paṭilabhimṃsu. Maddīdevīpi pātova utthāya pāṇiyaparibhojanīyam upaṭṭhāpetvā mukhodakam āharitvā dantakaṭṭham datvā assamapadam sammajjitvā dve putte pitu santike ṭhapetvā pacchikhaṇṭhiṅkusahattā araṇṇam pavisitvā vanamūlaphalāphalāni ādāya pacchim pūretvā sāyanhasamaye araṇṇato āgantvā paṇṇasālāya phalāphalam ṭhapetvā nhatvā putte nhāpesi. Atha cattāropi janā paṇṇasāladvāre nisīditvā phalāphalam paribhuṅjanti. Tato maddī putte gahetvā attano paṇṇasālam pāvisi. Iminā niyāmena te pabbatakujhacchimhi satta māse vasimṃsūti.

Vanapavesanakaṇḍavaṇṇanā niṭṭhitā.

### Jūjakapabbavaṇṇanā

Tadā kāliṅgaratṭhe dunniviṭṭhabrāhmaṇagāmavāsī jūjako nāma brāhmaṇo bhikkhācariyāya kahāpaṇasatam labhitvā ekasmim brāhmaṇakule ṭhapetvā puna dhanapariyesanattḥāya gato. Tasmim cirāyante brāhmaṇakulā kahāpaṇasatam valañjetvā pacchā itarena āgantvā codiyamānā kahāpaṇe dātum asakkontā amittatāpanam nāma dhītaram tassa adamsu. So taṃ ādāya kāliṅgaratṭhe dunniviṭṭhabrāhmaṇagāmaṃ gantvā vasi. Amittatāpanā sammā brāhmaṇam paricarati. Atha aññe taruṇabrāhmaṇā tassā ācārasampattiṃ disvā “ayaṃ mahallakabrāhmaṇam sammā paṭijaggati, tumhe pana amhesu kiṃ pamajjathā”ti attano attano bhariyāyo tajjenti. Tā “imaṃ amittatāpanam imamahā gāmā palāpessāmā”ti naditṭhādīsū sannipatitvā taṃ paribhāsimṃsu. Tamattham pakāsento sathā āha –

1914: ‘Ahu vāsī kalīngesu, jūjako nāma brāhmaṇo;

Tassāsi daharā bhariyā, nāmenāmittatāpanā.

1915: ‘Tā naṃ tattha gatāvocaṃ, nadiṃ udakahāriyā;  
Thiyo naṃ paribhāsiṃsu, samāgantvā kutūhalā.

1916: ‘Amitā nūna te mātā, amitto nūna te pitā;  
Ye taṃ jīṇṇassa pādamsu, evaṃ dahariyaṃ satīṃ.

1917: ‘Ahiṭaṃ vata te ñātī, mantayīṃsu rahogaṭā;  
Ye taṃ jīṇṇassa pādamsu, evaṃ dahariyaṃ satīṃ.

1918: ‘Amitā vata te ñātī, mantayīṃsu rahogaṭā;  
Ye taṃ jīṇṇassa pādamsu, evaṃ dahariyaṃ satīṃ.

1919: ‘Dukkaṭaṃ vata te ñātī, mantayīṃsu rahogaṭā;  
Ye taṃ jīṇṇassa pādamsu, evaṃ dahariyaṃ satīṃ.

1920: ‘Pāpakaṃ vata te ñātī, mantayīṃsu rahogaṭā;  
Ye taṃ jīṇṇassa pādamsu, evaṃ dahariyaṃ satīṃ.

1921: ‘Amanāpaṃ vata te ñātī, mantayīṃsu rahogaṭā;  
Ye taṃ jīṇṇassa pādamsu, evaṃ dahariyaṃ satīṃ.

1922: ‘Amanāpavāsaṃ vasi, jīṇṇena patinā saha;  
Yā tvaṃ vasasi jīṇṇassa, mataṃ te jīvitaṃ varam.

1923: ‘Na hi nūna tuyhaṃ kalyāṇi, pitā mātā ca sobhane;  
Aññaṃ bhattāraṃ vindiṃsu, ye taṃ jīṇṇassa pādamsu;  
Evaṃ dahariyaṃ satīṃ.

1924: ‘Duyiṭṭhaṃ te navamiyaṃ, akataṃ aggihuttakaṃ;  
Ye taṃ jīṇṇassa pādamsu, evaṃ dahariyaṃ satīṃ.

1925: ‘Samaṇe brāhmaṇe nūna, brahmacariyaparāyaṇe;  
Sā tvaṃ loke abhisapi, sīlavante bahussute;  
Yā tvaṃ vasasi jīṇṇassa, evaṃ dahariyā satī.

1926: ‘Na dukkhaṃ ahinā daṭṭhaṃ, na dukkhaṃ sattiyā haṭaṃ;  
Taṅca dukkhaṅca tibbaṅca, yaṃ passe jīṇṇakaṃ patīṃ.

1927: ‘Natthi khiḍḍā natthi rati, jīṇṇena patinā saha;  
Natthi ālāpasallāpo, jagghitampi na sobhati.

1928: ‘Yadā ca daharo daharā, mantayanti rahogaṭā;  
Sabbesaṃ sokā nassanti, ye keci hadayassitā.

1929: ‘Daharā tvaṃ rūpavatī, purisānaṃbhipatthitā;  
Gaccha ñātikule accha, kiṃ jīṇṇo ramayissatī’ ti.

Tattha **ahūti** ahoṣi. **Vāsī kaliṅgesūti** kāliṅgaratṭhesu dunniviṭṭhabrāhmaṇaḡamavāsī. **Tā naṃ tattha gatāvocuntī** tattha gāme tā itthiyo nadītīthe udakahārikā hutvā gatā naṃ avocaṃ. **Thiyo naṃ paribhāsiṃsūtī** itthiyo na aññaṃ kiṅci avocaṃ, atha kho naṃ paribhāsiṃsu. **Kutūhalātī** kotūhalajātā

viya hutvā. **Samāgantvā**ti samantā parikkhipitvā. **Dahariyaṃ satinti** dahariyaṃ taruṇiṃ sobhaggappattaṃ samānaṃ. **Jiṇṇassā**ti jarājiṇṇassa gehe. **Duyiṭṭhaṃ te navamiyaṃ** tava navamiyaṃ yāgaṃ duyiṭṭhaṃ bhavissati, so te yāgapiṇḍo paṭhamaṃ mahallakakākena gahito bhavissati. “Duyiṭṭhā te navamiyā”’tī pāṭho, navamiyā tayā duyiṭṭhā bhavissatīti attho. **Akataṃ aggihuttakanti** aggijuhanampi tayā akataṃ bhavissati. **Abhisapī**ti samaṇabrāhmaṇe samitapāpe vā bāhitapāpe vā akkosi. Tassa te pāpassa idaṃ phalanti adhippāyeneva āhaṃsu. **Jagghitampi na sobhatī**ti khaṇḍadante vivaritvā hasantassa mahallakassa hasitampi na sobhati. **Sabbesaṃ sokā nassantī**ti sabbe etesaṃ sokā vinassanti. **Kim jiṇṇoti** ayaṃ jiṇṇo taṃ pañcahi kāmagaṇehi kathaṃ ramayissatīti.

Sā tāsāṃ santikā paribhāsaṃ labhitvā udakaghaṭaṃ ādāya rodamānā gharaṃ gantvā “kim bhoti rodasī”’ti brāhmaṇena puṭṭhā tassa ārocentī imaṃ gāthamāha –

**1930:** ‘Na te brāhmaṇa gacchāmi, nadiṃ udakahāriyā;  
Thiyo maṃ paribhāsanti, tayā jiṇṇena brāhmaṇā’’ti.

Tassattho – brāhmaṇa, tayā jiṇṇena maṃ itthiyo paribhāsanti, tasmā ito paṭṭhāya tava udakahārikā hutvā nadiṃ na gacchāmīti.

Jūjako āha –

**1931:** ‘Mā me tvaṃ akarā kammaṃ, mā me udakamāhari;  
Ahaṃ udakamāhissaṃ, mā bhoti kupitā ahū’’ti.

Tattha **udakamāhissanti** bhoti ahaṃ udakamāharissāmi.

Brāhmaṇī āha –

**1932:** ‘Nāhaṃ tamhi kule jātā, yaṃ tvaṃ udakamāhare;  
Evaṃ brāhmaṇa jānāhi, na te vacchāmahaṃ ghare.

**1933:** ‘Sace me dāsaṃ dāsiṃ vā, nānayissasi brāhmaṇa;  
Evaṃ brāhmaṇa jānāhi, na te vacchāmi santike’’ti.

Tattha **nāhanti** brāhmaṇa, yaṃhi kule sāmiko kammaṃ karoti, nāhaṃ tattha jātā. **Yaṃ tvanti** tasmā yaṃ udakamā tvaṃ āharissasi, na mayhaṃ tena attho.

Jūjako āha –

**1934:** ‘Natthi me sippaṭṭhānaṃ vā, dhanam dhaññaṇca brāhmaṇi;  
Kutoham dāsaṃ dāsiṃ vā, ānayissāmi bhotiyā;  
Ahaṃ bhotiṃ upaṭṭhissaṃ, mā bhoti kupitā ahū’’ti.

Brāhmaṇī āha –

**1935:** ‘Ehi te ahamakkhissaṃ, yathā me vacanaṃ sutam;  
Esa vessantaro rājā, vaṅke vasati pabbate.

**1936:** ‘Taṃ tvaṃ gantvāna yācassu, dāsaṃ dāsiṇca brāhmaṇa;  
So te dassati yācito, dāsaṃ dāsiṇca khattiyo’’ti.

Tattha **ehi te ahamakkhissanti** ahaṃ te ācikkhissāmi. Idaṃ sā devatādhiggahitā hutvā āha.



Jūjako āha –

**1937:** ‘Jiṇṇohamasmi dubbalo, dīgho caddhā suduggamo;  
Mā bhoti paridevesi, mā ca tvaṃ vimanā ahu;  
Ahaṃ bhotiṃ upaṭṭhissaṃ, mā bhoti kupitā ahū’ ti.

Tattha **jiṇṇohamasmīti** bhadde, ahaṃ jiṇṇo amhi, kathaṃ gamissāmīti.

Brāhmaṇī āha –

**1938:** ‘Yathā agantvā saṅgāmaṃ, ayuddhova parājito;  
Evameva tuvaṃ brahme, agantvāva parājito.

**1939:** ‘Sace me dāsaṃ dāsiṃ vā, nānayissasi brāhmaṇa;  
Evaṃ brāhmaṇa jānāhi, na te vacchāmahaṃ ghare;  
Amanāpaṃ te karissāmi, taṃ te dukkhaṃ bhavissati.

**1940:** ‘Nakkhatte utupubbesu, yadā maṃ dakkhisilaṅkataṃ;  
Aññehi saddhiṃ ramamānaṃ, taṃ te dukkhaṃ bhavissati.

**1941:** ‘Adassanena mayhaṃ te, jiṇṇassa paridevato;  
Bhiyyo vaṅkā ca palitā, bahū hessanti brāhmaṇā’ ti.

Tattha **amanāpaṃ teti** vessantarassa santikaṃ gantvā dāsaṃ vā dāsiṃ vā anāharantassa tava aruccanakaṃ kammaṃ karissāmi. **Nakkhatte utupubbesūti** nakkhattayogavasena vā channaṃ utūnaṃ tassa tassa pubbavasena vā pavattesu chaṇesu.

Taṃ sutvā brāhmaṇo bhīto ahosi. Tamatthaṃ pakāsento satthā āha –

**1942:** ‘Tato so brāhmaṇo bhīto, brāhmaṇiyā vasānugo;  
Aṭṭito kāmarāgena, brāhmaṇiṃ etadabravi.

**1943:** ‘Pātheyyaṃ me karohi tvaṃ, saṃkulyā saguḷāni ca;  
Madhupiṇḍikā ca sukatāyo, sattubhattaṅca brāhmaṇi.

**1944:** ‘Ānayissaṃ methunake, ubho dāsakumārake;  
Te taṃ paricarissanti, rattindivamatanditā’ ti.

Tattha **aṭṭitoti** upadduto pīḷito. **Saguḷāni cāti** saguḷapūve ca. **Sattubhattanti** baddhasattuabaddhasattuñceva puṭabhattaṅca. **Methunaketi** jātigottakulapadesehi sadise. **Dāsakumāraketi** tava dāsattāya kumārake.

Sā khippaṃ pātheyyaṃ paṭiyādetvā brāhmaṇassa ārocesi. So gehe dubbalaṭṭhānaṃ thiraṃ katvā dvāraṃ saṅkharitvā araññā dārūni āharitvā ghaṭena udakaṃ āharitvā gehe sabbabhājanāni pūretvā tattheva tāpasavesaṃ gahetvā ‘‘bhadde, ito paṭṭhāya vikāle mā nikkhami, yāva mamāgamanā appamattā hohī’’ ti ovaditvā upāhanaṃ āruya pātheyyapasibbakaṃ aṃse laggetvā amittatāpanaṃ padakkhiṇaṃ katvā assupuṇṇehi nettehi roditvā pakkāmi. Tamatthaṃ pakāsento satthā āha –

**1945:** ‘Idaṃ vatvā brahmabandhu, paṭimuñci upāhanā;  
Tato so mantayitvāna, bhariyaṃ katvā padakkhiṇaṃ.

1946: ‘Pakkāmi so ruṇṇamukho, brāhmaṇo sahitabbato;  
Sivīnaṃ nagaraṃ phītaṃ, dāsapariyesanaṃ cara’nti.

Tattha **ruṇṇamukhoti** rudamṇmukho. **Sahitabbatoti** samādinnavato, gahitatāpasavesoti attho. **Caranti** dāsapariyesanaṃ caranto sivīnaṃ nagaraṃ ārabha pakkāmi.

So taṃ nagaraṃ gantvā sannipatitaṃ janaṃ “vessantaro kuhi”nti pucchati. Tamatthaṃ pakāsento sathā āha –

1947: ‘So tattha gantvā avaca, ye tathāsuaṃ samāgatā;  
Kuhimṃ vessantaro rājā, kattha passemu khattiyam.

1948: ‘Te janā taṃ avaciṃsu, ye tathāsuaṃ samāgatā;  
Tumhehi brahme pakato, atidānena khattiyō;  
Pabbājito sakā raṭṭhā, vaṅke vasati pabbate.

1949: ‘Tumhehi brahme pakato, atidānena khattiyō;  
Ādāya puttadāraṇca, vaṅke vasati pabbate’nti.

Tattha **pakatoti** upadduto pīḷito attano nagare vasituaṃ alabhivā idāni vaṅkapabbate vasati.

Evam “tumhe amhākaṃ rājānaṃ nāsetvā punapi āgatā idha tiṭṭhathā”nti te leḍḍudaṇḍādihathā brāhmaṇaṃ anubandhiṃsu. So devatādhiḡḡahito hutvā vaṅkapabbatamaggameva gaṇhi. Tamatthaṃ pakāsento sathā āha –

1950: ‘So codito brāhmaṇiyā, brāhmaṇo kāmagiddhimā;  
Aghaṃ taṃ paṭisevittha, vane vālamigākīṇṇe;  
Khaggadīpinisevite.

1951: ‘Ādāya beḷuvaṃ daṇḍaṃ, aggihuttaṃ kamaṇḍalaṃ;  
So pāvīsi brahāraṇṇaṃ, yattha assosi kāmadaṃ.

1952: ‘Taṃ pavīṭṭhaṃ brahāraṇṇaṃ, kokā naṃ parivārayuaṃ;  
Vikkandi so vippanaṭṭho, dūre panthā apakkami.

1953: ‘Tato so brāhmaṇo gantvā, bhogaluddho asaṇṇato;  
Vaṅkassorohaṇe naṭṭhe, imā gāthā abhāsathā’nti.

Tattha **aghaṃ tanti** taṃ mahājanena anubandhanadukkhaṇceva vanapariyogāhanadukkhaṇca. **Aggihuttanti** aggījuhanakaṭacchuaṃ. **Kokā naṃ parivārayunti** so hi araṇṇaṃ pavisitvā vaṅkapabbatagāmiṃmaggaṃ ajānanto maggaṃūḷho hutvā araṇṇe vicari. Atha naṃ ārakkhaṇatthāya nisinnassa cetaputtassa sunakhā parivārayiṃsūti attho. **Vikkandi** soti so ekarukkhaṃ āruyha mahantena ravena kandi. **Vippanaṭṭhoti** vinaṭṭhamaggo. **Dūre panthāti** vaṅkapabbatagāmiṃpanthato dūre pakkāmi. **Bhogaluddhoti** bhogaratto. **Asaṇṇatoti** dussīlo. **Vaṅkassorohaṇe naṭṭheti** vaṅkapabbatassa gamanamagge vinaṭṭhe.

So sunakhehi parivārito rukkhe nisinnova imā gāthā abhāsatha –

1954: ‘Ko rājaputtaṃ nisabhaṃ, jayantamaparājitaṃ;  
Bhaye khemassa dātāraṃ, ko me vessantaraṃ vidū.

1955: ‘Yo yācatam patitthāsi, bhūtānam dharaṇīriva;  
Dharaṇūpamaṃ mahārājam, ko me vessantaram vidū.

1956: ‘Yo yācatam gatī āsi, savantīnaṃva sāgaro;  
Sāgarūpamaṃ mahārājam, ko me vessantaram vidū.

1957: ‘Kalyāṇatittham sucimaṃ, sītūdakaṃ manoramaṃ;  
Puṇḍarīkehi sañchannaṃ, yuttam kiṇḍakkhareṇunā;  
Rahadūpamaṃ mahārājam, ko me vessantaram vidū.

1958: ‘Assatthamva pathe jātam, sītacchāyaṃ manoramaṃ;  
Santānaṃ visametāram, kilantānaṃ paṭiggahaṃ;  
Tathūpamaṃ mahārājam, ko me vessantaram vidū.

1959: ‘Nigrodhamva pathe jātam, sītacchāyaṃ manoramaṃ;  
Santānaṃ visametāram, kilantānaṃ paṭiggahaṃ;  
Tathūpamaṃ mahārājam, ko me vessantaram vidū.

1960: ‘Ambam iva pathe jātam, sītacchāyaṃ manoramaṃ;  
Santānaṃ visametāram, kilantānaṃ paṭiggahaṃ;  
Tathūpamaṃ mahārājam, ko me vessantaram vidū.

1961: ‘Sālam iva pathe jātam, sītacchāyaṃ manoramaṃ;  
Santānaṃ visametāram, kilantānaṃ paṭiggahaṃ;  
Tathūpamaṃ mahārājam, ko me vessantaram vidū.

1962: ‘Dumam iva pathe jātam, sītacchāyaṃ manoramaṃ;  
Santānaṃ visametāram, kilantānaṃ paṭiggahaṃ;  
Tathūpamaṃ mahārājam, ko me vessantaram vidū.

1963: ‘Evañca me vilapato, pavitthassa brahāvane;  
Aham jānanti yo vajjā, nandim so janaye mama.

1964: ‘Evañca me vilapato, pavitthassa brahāvane;  
Aham jānanti yo vajjā, tāya so ekavācāya;  
Pasave puññaṃ anappaka’nti.

Tattha **jayantanti** maccheracittam vijayantam. **Ko me vessantaram vidūti** ko mayham vessantaram ācikkheyyāti vadati. **Patitthāsīti** patitthā āsi. **Santānanti** parissantānaṃ. **Kilantānanti** maggakilantānaṃ. **Paṭiggahanti** paṭiggāhakaṃ patitthābhūtam. **Aham jānanti yo vajjāti** aham vessantarassa vasanaṭṭhānaṃ jānāmīti yo vadeyyāti attho.

Tassa tam paridevasaddam sutvā ārakkhaṇatthāya ṭhapito cetaputto migaluddako hutvā araññe vicaranto ‘‘ayam brāhmaṇo vessantarassa vasanaṭṭhānatthāya paridevati, na kho panesa dhammatāya āgato, maddim vā dārake vā yācissati, idheva nam māressāmī’’ti tassa santikam gantvā ‘‘brāhmaṇa, na te jīvitaṃ dassāmī’’ti dhanum āropetvā ākaḍḍhitvā tajjesi. Tamattham pakāsento satthā āha –

1965: ‘Tassa ceto paṭissosi, araññe luddako caram;  
Tumhehi brahme pakato, atidānena khattiyo;  
Pabbājito sakā raṭṭhā, vaṅke vasati pabbate.

1966: ‘Tumhehi brahme pakato, atidānena khattiyo;  
Ādāya puttadārañca, vañke vasati pabbate.

1967: ‘Akiccakārī dummedho, raṭṭhā pavanamāgato;  
Rājaputtaṃ gavesanto, bako macchamivodake.

1968: ‘Tassa tyāhaṃ na dassāmi, jīvitaṃ idha brāhmaṇa;  
Ayañhi te mayā nunno, saro pissati lohitaṃ.

1969: ‘Siro te vajjhayitvāna, hadayaṃ chetvā sabandhanaṃ;  
Panthasakuṇaṃ yajissāmi, tuyhaṃ maṃsena brāhmaṇa.

1970: ‘Tuyhaṃ maṃsena medena, matthakena ca brāhmaṇa;  
Āhutiṃ paggahessāmi, chetvāna hadayaṃ tava.

1971: ‘Taṃ me suyitthaṃ suhutaṃ, tuyhaṃ maṃsena brāhmaṇa;  
Na ca tvaṃ rājaputtassa, bhariyaṃ putte ca nessasī’’ti.

Tattha **akiccakārī**ti tvaṃ akiccakārako. **Dummedhoti** nippañño. **Raṭṭhā pavanamāgato**ti raṭṭhato mahāraññaṃ āgato. **Saro pissatī**ti ayaṃ saro tava lohitaṃ pivissati. **Vajjhayitvānā**ti taṃ māretvā rukkhā patitassa te sīsaṃ tālaphalaṃ viya luñcivā sabandhanaṃ hadayamaṃsaṃ chinditvā panthadevatāya panthasakuṇaṃ nāma yajissāmi. **Na ca tvanti** evaṃ sante na tvaṃ rājaputtassa bhariyaṃ vā putte vā nessasīti.

So tassa vacanaṃ sutvā maraṇabhayatajjito musāvādaṃ kathento āha –

1972: ‘Avajjho brāhmaṇo dūto, cetaputta suṇohi me;  
Tasmā hi dūtaṃ na hanti, esa dhammo sanantano.

1973: ‘Nijjhataṃ sivayo sabbe, pitā naṃ daṭṭhumicchati;  
Mātā ca dubbalā tassa, acirā cakkhūni jīyare.

1974: ‘Tesāhaṃ pahito dūto, cetaputta suṇohi me;  
Rājaputtaṃ nayissāmi, yadī jānāsi saṃsa me’’ti.

Tattha **nijjhata**ti saññattā. **Acirā cakkhūni jīyare**ti niccarodanena na cirasseva cakkhūni jīyissanti.

Tadā cetaputto ‘‘vessantaraṃ kira ānetuṃ āgato’’ti somanassappatto hutvā sunakhe bandhitvā ṭhapetvā brāhmaṇaṃ otāretvā sākhasanthare nisīdāpetvā bhojanaṃ datvā imaṃ gāthamāha –

1975: ‘Piyassa me piyo dūto, puṇṇapattaṃ dadāmi te;  
Imañca madhuno tumbaṃ, migasatthiñca brāhmaṇa;  
Tañca te desamakkhissaṃ, yattha sammati kāmado’’ti.

Tattha **piyassa meti** mama piyassa vessantarassa tvaṃ piyo dūto. **Puṇṇapattanti** tava ajjhāsayaṇaṃ puṇṇapattaṃ dadāmīti.

Jūjakapabbavaṇṇanā niṭṭhitā.

**Cūḷavanavaṇṇanā**

Evam cetaputto brāhmaṇaṃ bhojetvā pātheyyatthāya tassa madhuno tumbañceva pakkamigasatthiñca datvā magge ʃatvā dakkhiṇahatthaṃ ukkhipitvā mahāsattassa vasanokāsaṃ ācikkhanto āha –

**1976:** ‘Esa selo mahābrahme, pabbato gandhamādano;  
Yattha vessantaro rājā, saha puttehi sammati.

**1977:** ‘Dhārento brāhmaṇavaṇṇaṃ, āsadañca masaṃ jaṭaṃ;  
Cammavāsī chamā seti, jātavedaṃ namassati.

**1978:** ‘Ete nīlā padissanti, nānāphaladharā dumā;  
Uggatā abbhakūṭāva, nīlā añjanapabbatā.

**1979:** ‘Dhavassakaṇṇā khadirā, sālā phandanamāluvā;  
Sampavedhanti vātena, sakiṃ pītāva māṇavā.

**1980:** ‘Upari dumapariyāyesu, saṅgītiyova suyyare;  
Najjuhā kokilasaṅghā, sampatanti dumā dumaṃ.

**1981:** ‘Avhayanteva gacchantaṃ, sākḥāpattasamīritā;  
Ramayanteva āgantaṃ, modayanti nivāsinaṃ;  
Yattha vessantaro rājā, saha puttehi sammati.

**1982:** ‘Dhārento brāhmaṇavaṇṇaṃ, āsadañca masaṃ jaṭaṃ;  
Cammavāsī chamā seti, jātavedaṃ namassati’’ti.

Tattha **gandhamādanoti** esa gandhamādanapabbato, etassa pādena uttarābhimukho gacchanto yattha sakkadattiye assamapade vessantaro rājā saha puttadārehi vasati, taṃ passissasīti attho. **Brāhmaṇavaṇṇanti** seṭṭhapabbajitavesaṃ. **Āsadañca masaṃ jaṭanti** ākaḍḍhitvā phalānaṃ gahaṇatthaṃ aṅkusañca aggijuhanakaṭacchuñca jaṭamaṇḍalañca dhārento. **Cammavāsīti** ajinacammadharo. **Chamā setīti** pathaviyaṃ paṇṇasanthare sayati. **Dhavassakaṇṇā khadirāti** dhavā ca assakaṇṇā ca khadirā ca. **Sakiṃ pītāva māṇavāti** ekavārameva pītā surāsoṇḍā viya. **Upari dumapariyāyesūti** rukkhasākḥāsu. **Saṅgītiyova suyyareti** nānāsakuṇānaṃ vassantānaṃ saddā dibbasāṅgītiyo viya suyyare. **Najjuhāti** najjuhasakuṇā. **Sampatantīti** vikūjantā vicaranti. **Sākḥāpattasamīritāti** sākḥānaṃ pattehi saṅghaṭṭitā hutvā vikūjantā sakuṇā, vātena samīritā pattasākḥāyeva vā. **Āgantanti** āgacchantaṃ janaṃ. **Yatthāti** yasmim assame vessantaro vasati, tattha gantvā imaṃ assamapadasampattiṃ passissasīti.

Tato uttariṇi assamapadaṃ vaṇṇento āha –

**1983:** ‘Ambā kapitthā panasā, sālā jambū vibhītakā;  
Harītakī āmalakā, assatthā badarāni ca.

**1984:** ‘Cārutimbarukkḥā cettha, nigrodhā ca kapitthanā;  
Madhumadhukā thevanti, nīce pakkā cudumbarā.

**1985:** ‘Pārevatā bhavyeyā ca, muddikā ca madhutthikā;  
Madhuṃ anelakaṃ tattha, sakamādāya bhuñjare.

**1986:** ‘Aññettha pupphitā ambā, aññe tiṭṭhanti dovilā;  
Aññe āmā ca pakkā ca, bhekavaṇṇā tadūbhayaṃ.

- 1987: ‘Athettha heṭṭhā puriso, ambapakkāni gaṇhati;  
Āmāni ceva pakkāni, vaṇṇagandharasuttame.
- 1988: ‘Ateva me acchariyaṃ, hīnkāro paṭibhāti maṃ;  
Devānamiva āvāso, sobhati nandanūpamo.
- 1989: ‘Vibhedikā nāḷikerā, khajjurīnaṃ brahāvane;  
Mālāva ganthitā ṭhanti, dhajaggāneva dissare;  
Nānāvaṇṇehi pupphehi, nabhaṃ tārācitāmiva.
- 1990: ‘Kuṭajī kuṭṭhatagarā, pāṭaliyo ca pupphitā;  
Punnāgā giripunnāgā, koviḷārā ca pupphitā.
- 1991: ‘Uddālakā somarukkā, agaruphalliyā bahū;  
Puttajīvā ca kakudhā, asanā cettha pupphitā.
- 1992: ‘Kuṭajā salaḷā nīpā, kosambā labujā dhavā;  
Sālā ca pupphitā tattha, palālakhalasannibhā.
- 1993: ‘Tassāvidūre pokkharāṇī, bhūmibhāge manorame;  
Padumuppalasañchannā, devānamiva nandane.
- 1994: ‘Athettha puppharasamattā, kokilā mañjubhāṇikā;  
Abhinā denti pavanaṃ, utusampupphite dume.
- 1995: ‘Bhassanti makarandehi, pokkhare pokkhare madhū;  
Athettha vātā vāyanti, dakkhiṇā atha pacchimā;  
Padumakiṇṇajakkhareṇūhi, okiṇṇo hoti assamo.
- 1996: ‘Thūlā siṅghāṭakā cettha, saṃsādiyā pasādiyā;  
Macchakacchapabyāviddhā, bahū cettha mupayānakā;  
Madhuṃ bhisehi savati, khīrasappi muḷālibhi.
- 1997: ‘Surabhī taṃ vanaṃ vāti, nānāgandhasamoditaṃ;  
Sammaddateva gandhena, pupphasākhāhi taṃ vanaṃ;  
Bhamarā pupphagandhena, samantā mabhināditā.
- 1998: ‘Athettha sakuṇā santi, nānāvaṇṇā bahū dijā;  
Modanti saha bhariyāhi, aññamaññaṃ pakūjino.
- 1999: ‘Nandikā jīvaputtā ca, jīvaputtā piyā ca no;  
Piyā puttā piyā nandā, dijā pokkharāṇigharā.
- 2000: ‘Mālāva ganthitā ṭhanti, dhajaggāneva dissare;  
Nānāvaṇṇehi pupphehi, kusaleheva suganthitā;  
Yattha vessantaro rājā, saha puttehi sammati.
- 2001: ‘Dhārento brāhmaṇavaṇṇaṃ, āsadañca masaṃ jaṭaṃ;  
Cammavāsī chamā seti, jātavedaṃ namassatī’ ti.

Tattha **cārutimbarukkhā**ti suvaṇṇatimbarukkhā. **Madhumadhukā**ti madhurasā madhukā. **Thevantī**ti virocanti. **Pārevatā**ti pārevatapādasadisā rukkā. **Bhaveyyā**ti dīghaphalā kadaliyo.

**Madhutthikā**ti madhuttheve paggharantiyo, madhuratāya vā madhutthevasadisā. **Sakamādāyā**ti taṃ sayameva gahetvā paribhuñjanti. **Dovilā**ti patitapupphapattā sañjāyamānaphalā. **Bhekavaṇṇā tadūbhayanti** te ubhopi āmā ca pakkā ca maṇḍūkapiṭṭhivaṇṇāyeva. **Athettha heṭṭhā purisoti** atha ettha assame tesam ambānaṃ heṭṭhā ṭhitakova puriso ambaphalāni gaṇhāti, ārohaṇakiccaṃ natthi. **Vaṇṇagandharasuttameti** etehi vaṇṇādīhi uttamāni.

**Ateva me acchariyanti** ativiya me acchariyaṃ. **Hiṅkāro**ti hinti karaṇaṃ. **Vibhedikā**ti tālā. **Mālāva ganthitā**ti supupphitarukkhānaṃ upari ganthitā mālā viya pupphāni tiṭṭhanti. **Dhajaggāneva dissareti** tāni rukkhāni alaṅkatadhajaggāni viya dissanti. **Kuṭajī kuṭṭhatagarā**ti kuṭajī nāmekā rukkhajāti kuṭṭhagacchā ca taḡaragacchā ca. **Giripunnāgā**ti mahāpunnāgā. **Koviḷārā**ti koviḷāraruḷkhā nāma. **Uddālakā**ti uddālarukkhā. **Somarukkhā**ti pītapupphavaṇṇā rājarukkhā. **Phalliyā**ti phalliyaruḷkhā nāma. **Puttajīvā**ti mahānigrodhā. **Labujā**ti labujaruḷkhā nāma. **Palālakhalasannibhā**ti tesam heṭṭhā paggharitaḡapupphapuñjā palālakhalasannibhāti vadati.

**Pokkharāṇī**ti caturassapokkharāṇī. **Nandaneti** nandanavane nandāpokkharāṇī viya. **Puppharasamattā**ti puppharasena mattā calitā. **Makarandehī**ti kiñjakkhehi. **Pokkhare pokkhareti** paduminipaṇṇe paduminipaṇṇe. Tesu hi kiñjakkhato reṇu bhassitvā pokkharamadhu nāma hoti. **Dakkhinā atha pacchimā**ti ettāvatā sabbā disā vidisāpi vātā dassitā honti. **Thūlā siṅghāṭakā**ti mahantā siṅghāṭakā ca. **Samsādiyā**ti sayam jātasālī, sukasālītipi vuccanti. **Pasādiyā**ti teyeva bhūmiyam patitā. **Byāviddhā**ti pasanne udake byāviddhā paṭipāṭiyā gacchantā dissanti. **Mupayānakā**ti kakkāṭakā. **Madhaunti** bhisakoṭiyā bhinnāya paggharaṇaraso madhusadiso hoti. **Khīrasappi muḷālibhī**ti muḷālehi paggharaṇaraso khīramissakanavanītasappi viya hoti.

**Sammaddatevā**ti sampattajanaṃ madayati viya. **Samantā mabhināditā**ti samantā abhinadantā vicaranti. “**Nandikā**”tiādīni tesam nāmāni. Tesu hi paṭhamā “sāmi vessantara, imasmim vane vasanto nandā”ti vadanti. Dutiyā “tvaṅca sukhena jīva, puttā ca te”ti vadanti. Tatiyā “tvaṅca jīva, piyā puttā ca te”ti vadanti. Catutthā “tvaṅca nanda, piyā puttā ca te”ti vadanti. Tena tesam etāneva nāmāni ahesuṃ. **Pokkharāṇīgharā**ti pokkharāṇivāsino.

Evam cetaputtana vessantarassa vasanaṭṭhāne akkhāte jūjako tussitvā paṭisanthāraṃ karonto imaṃ gāthamāha –

**2002:**“Idaṅca me sattubhattaṃ, madhunā paṭisaṃyutaṃ;  
Madhupiṇḍikā ca sukatāyo, sattubhattaṃ dadāmi te”ti.

Tattha **sattubhattanti** pakkamadhusannibhaṃ sattusaṅkhātāṃ bhattaṃ. Idaṃ vuttaṃ hoti – idaṃ mama atthi, taṃ te dammi, gaṇhāhi nanti.

Taṃ sutvā cetaputto āha –

**2003:**“Tuyheva sambalaṃ hotu, nāhaṃ icchāmi sambalaṃ;  
Itopi brahme gaṇhāhi, gaccha brahme yathāsukhaṃ.

**2004:**“Ayaṃ ekapadī eti, ujum gacchati assamaṃ;  
Isipi accuto tattha, paṅkadanto rajassiro;  
Dhārento brāhmaṇavaṇṇaṃ, āsadaṅca masaṃ jaṭaṃ.

**2005:**“Cammavāsī chamā seti, jātavedaṃ namassati;  
Taṃ tvaṃ gantvāna pucchassu, so te maggaṃ pavakkhatī”ti.

Tattha **sambalanti** pātheyyaṃ. **Etī**ti yo ekapadikamaggo amhākaṃ abhimukho eti, esa assamaṃ

ujum gacchati. **Accutoti** evaṃnāmako isi tattha vasati.

**2006:**“Idaṃ sutvā brahmabandhu, cetam katvā padakkhiṇaṃ;  
Udaggacitto pakkāmi, yenāsi accuto isi”’ti.

Tattha **yenāsīti** yasmiṃ ṭhāne accuto isi ahosi, tattha gatoti.

Cūḷavanavaṇṇanā niṭṭhitā.

### **Mahāvanavaṇṇanā**

**2007:**“Gacchanto so bhāradvājo, addassa accutaṃ isiṃ;  
Disvāna taṃ bhāradvājo, sammodi isinā saha.

**2008:**“Kacci nu bhoto kusalaṃ, kacci bhoto anāmayam;  
Kacci uñchena yāpesi, kacci mūlaphalā bahū.

**2009:**“Kacci ḍaṃsā makasā ca, appameva sarīsapā;  
Vane vāḷamigākiṇṇe, kacci hiṃsā na vijjati”’ti.

Tattha **bhāradvājoti** jūjako. **Appamevāti** appāyeva. **Hiṃsāti** tesam vasena tumhākaṃ vihiṃsā.

Tāpaso āha –

**2010:**“Kusalañceva me brahme, atho brahme anāmayam;  
Atho uñchena yāpemi, atho mūlaphalā bahū.

**2011:**“Atho ḍaṃsā makasā ca, appameva sarīsapā;  
Vane vāḷamigākiṇṇe, hiṃsā mayham na vijjati.

**2012:**“Bahūni vassapūgāni, assame vasato mama;  
Nābhijānāmi uppannaṃ, ābādhaṃ amanoramaṃ.

**2013:**“Svāgataṃ te mahābrahme, atho te adurāgataṃ;  
Anto pavisa bhaddante, pāde pakkhālayassu te.

**2014:**“Tindukāni piyālāni, madhuke kāsūmāriyo;  
Phalāni khuddakappāni, bhuñja brahme varam varam.

**2015:**“Idampi pānīyam sītaṃ, ābhatam girigabbharā;  
Tato piva mahābrahme, sace tvaṃ abhikaṅkhasī”’ti.

Jūjako āha –

**2016:**“Paṭiggahitaṃ yaṃ dinnam, sabbassa agghiyaṃ kataṃ;  
Sañjayassa sakaṃ puttaṃ, sivīhi vippavāsitaṃ;  
Tamaḥam dassanamāgato, yadi jānāsi saṃsa me”’ti.

Tattha **tamaḥam dassanamāgatoti** taṃ aham dassanāya āgato. Tāpaso āha –

**2017:**“Na bhavaṃ eti puññattham, sivrājassa dassanam;



Maññe bhavaṃ patthayati, rañño bhariyaṃ patibbatam;  
Maññe kaṇhājinaṃ dāsimaṃ, jāliṃ dāsañca icchasi.

**2018:** ‘Atha vā tayo mātāputte, arañña netumāgato;  
Na tassa bhogā vijjanti, dhanam dhaññañca brāhmaṇā’ ti.

Tattha **na tassa bhogā**ti bho brāhmaṇa, tassa vessantarassa arañña viharantassa neva bhogā vijjanti, dhanadhaññañca na vijjati, duggato hutvā vasati, tassa santikaṃ gantvā kiṃ karissasīti?

Taṃ sutvā jūjako āha –

**2019:** ‘Akuddharūpoḥam bhoto, nāham yāciturāgato;  
Sādhu dassanamariyaṇam, sannivāso sadā sukho.

**2020:** ‘Adiṭṭhapubbo sivrājā, sivīhi vippavāsito;  
Tamaḥam dassanamāgato, yadi jānāsi saṃsa me’ ti.

Tassattho – aham, bho tāpasa, akuddharūpo, aḥam ettāvatā, aham pana na kiñci vessantaram yāciturāgato, ariyaṇam pana dassanam sādhu, sannivāso ca tehi saddhiṃ sukho. Aham tassa ācariyabrāhmaṇo, mayā ca so yato sivīhi vippavāsito, tato paṭṭhāya adiṭṭhapubbo, tenāham taṃ dassanatthāya āgato. Yadi tassa vasanaṭṭhānam jānāsi, saṃsa meti.

So tassa vacanam sutvā saddahitvā ‘hotu sve saṃsissāmi te, ajja tāva idheva vasāhī’ ti taṃ phalāphalehi santappetvā punadivase maggaṃ dassento dakkhiṇahattham pasāretvā āha –

**2021:** ‘Esa selo mahābrahme, pabbato gandhamādano;  
Yattha vessantaro rājā, saha puttehi sammati.

**2022:** ‘Dhārento brāhmaṇavaṇṇam, āsadañca masaṃ jaṭam;  
Cammavāsī chamā seti, jātavedam namassati.

**2023:** ‘Ete nīlā padissanti, nānāphaladharā dumā;  
Uggatā abbhakūṭāva, nīlā añjanapabbatā.

**2024:** ‘Dhavassakaṇṇā khadirā, sālā phandanamāluvā;  
Sampavedhanti vātena, sakim pītāva māṇavā.

**2025:** ‘Upāri dumapariyāyesu, saṃgītiyova suyare;  
Najjuhā kokilasaṅghā, sampatanti dumā dumaṃ.

**2026:** ‘Avhayanteva gacchantam, sākḥāpattasamīritā;  
Ramayanteva āgantam, modayanti nivāsinaṃ;  
Yattha vessantaro rājā, saha puttehi sammati.

**2027:** ‘Dhārento brāhmaṇavaṇṇam, āsadañca masaṃ jaṭam;  
Cammavāsī chamā seti, jātavedam namassati.

**2028:** ‘Karerimālā vitatā, bhūmibhāge manorame;  
Saddalāharitā bhūmi, na tatthuddhamasate rajo.

**2029:** ‘Mayūragīvasaṅkāsa, tūlaphassasamūpamā;

Tiṇāni nātivattanti, samantā caturaṅgulā.

**2030:** ‘Ambā jambū kapitthā ca, nīce pakkā cudumbarā;  
Paribhogehi rukkhehi, vanam taṃ rativaḍḍhanaṃ.

**2031:** ‘Veḷuriyavaṇṇasannibham, macchagumbanisevitam;  
Sucim sugandham salilam, āpo tatthapi sandati.

**2032:** ‘Tassāvidūre pokkharāṇī, bhūmibhāge manorame;  
Padumuppalasañchannā, devānamiva nandane.

**2033:** ‘Tīṇi uppalajātāni, tasmim sarasi brāhmaṇa;  
Vicittam nīlānekāni, setā lohitakāni cā’’ti.

Tassattho heṭṭhā vuttasadisoyeva. **Karerimālā vitatā**ti kareripupphehi vitatā. **Saddalāharitā**ti dhuvasaddalena haritā. **Na tatthuddhamṣate rajoti** tasmim vane appamattakopi rajo na uddhamṣate. **Tūlaphassasamūpamā**ti mudusamphassatāya tūlaphassasadisā. **Tiṇāni nātivattantī**ti tāni tassā bhūmiyā mayūragīvavaṇṇāni tiṇāni samantato caturaṅgulappamāṇāneva vattanti, tato pana uttari na vaḍḍhanti. **Ambā jambū kapitthā cāti** ambā ca jambū ca kapitthā ca. **Paribhogeḥī**ti nānāvidhehi pupphūpagaphalūpagehi paribhogarukkhehi. **Sandatī**ti tasmim vanasaṇḍe vaṅkapabbate kunnadīhi otarantaṃ udakaṃ sandati, pavattatīti attho. **Vicittam nīlānekāni, setā lohitakāni cāti** ekāni nīlāni, ekāni setāni, ekāni lohitakānīti imehi tīhi uppalajātehi taṃ saram vicittam. Susajjitapupphacaṅkoṭakam viya sobhatīti dasseti.

Evam caturassapokkharāṇim vaṇṇetvā puna mucalindasaram vaṇṇento āha –

**2034:** ‘Khomāva tattha padumā, setasogandhikehi ca;  
Kalambakehi sañchanno, mucalindo nāma so saro.

**2035:** ‘Athettha padumā phullā, apariyantāva dissare;  
Gimhā hemantikā phullā, jaṇṇutagghā upattharā.

**2036:** ‘Surabhī sampavāyanti, vicittapupphasanthatā;  
Bhamarā pupphagandhena, samantā mabhinādītā’’ti.

Tattha **khomāvā**ti khomamayā viya paṇḍarā. **Setasogandhikehi cāti** setuppalehi ca sogandhikehi ca kalambakehi ca so saro sañchanno. **Apariyantāva dissare**ti aparimāṇā viya dissanti. **Gimhā hemantikā**ti gimhe ca hemantike ca pupphitapadumā. **Jaṇṇutagghā upattharā**ti jaṇṇupamāṇe uduke upattharā phullā honti, santhatā viya khāyanti. **Vicittapupphasanthatā**ti vicittā hutvā pupphehi santhatā sadā surabhī sampavāyanti.

**2037:** ‘Athettha udakantasmim, rukkhā tiṭṭhanti brāhmaṇa;  
Kadambā pāḷalī phullā, koviḷārā ca pupphitā.

**2038:** ‘Ankolā kacchikārā ca, pārijaññā ca pupphitā;  
Vāraṇā vayanā rukkhā, mucalindamubhato saram.

**2039:** ‘Sirīsā setapārisā, sādhu vāyanti paddhakā;  
Nigguṇḍī sirīnigguṇḍī, asanā cettha pupphitā.

**2040:** ‘Paṅgurā bahulā selā, sobhañjanā ca pupphitā;

Ketakā kaṇikārā ca, kaṇaverā ca pupphitā.

2041: ‘Ajjunā ajjukañṇā ca, mahānāmā ca pupphitā;  
Supupphitagā tiṭṭhanti, pajjalanteva kiṃsukā.

2042: ‘Setapaṇṇī sattapaṇṇā, kadaliyo kusumbharā;  
Dhanutakkārī pupphehi, sīsapāvaraṇāni ca.

2043: ‘Acchivā sallavā rukkhā, sallakiyo ca pupphitā;  
Setageru ca tagarā, maṃsikuṭṭhā kulāvarā.

2044: ‘Daharā rukkhā ca vuddhā ca, akuṭṭilā cettha pupphitā;  
Assamaṃ ubhato ṭhanti, agyāgāraṃ samantato’’ti.

Tattha **tiṭṭhantī**ti saraṃ parikkhipitvā tiṭṭhanti. **Kadambā**ti kadambarukkhā. **Kacchikārā cāti** evaṃnāmakā rukkhā. **Pārijañṇā**ti rattamālā. **Vāraṇā vayanā**ti vāraṇarukkhā ca vayanarukkhā ca. **Mucalindamubhato saranti** mucalindassa sarassa ubhayapassesu. **Setapārisāti** setagaccharukkhā. Te kira setakkhandhā mahāpaṇṇā kaṇikārasadisapupphā honti. **Nigguṇḍī sirīnigguṇḍī**ti pakatinigguṇḍī ceva kāḷanigguṇḍī ca. **Paṅgurāti** paṅgurarukkhā. **Kusumbharāti** ekagacchā. **Dhanutakkārī pupphehī**ti dhanūnaṅca takkārīnaṅca pupphehi sobhitā. **Sīsapāvaraṇāni cāti** sīsapehi ca varaṇehi ca sobhitā. **Acchivāti**tiādayopi rukkhāyeva. **Setageru ca tagarāti** setageru ca tagarā ca. **Maṃsikuṭṭhā kulāvarāti** maṃsigacchā ca kuṭṭhagacchā ca kulāvarā ca. **Akuṭṭilāti** ujukā. **Agyāgāraṃ samantatoti** agyāgāraṃ parikkhipitvā ṭhitāti atho.

2045: ‘Athettha udakantasmim, bahujāto phaṇijjako;  
Muggatiyo karatiyo, sevālasāsakā bahū.

2046: ‘Uddāpavattaṃ ulluḷitaṃ, makkhikā hiṅgujālikā;  
Dāsimaṅjako cettha, bahū nīcekalambakā.

2047: ‘Elamphurakasañchannā, rukkhā tiṭṭhanti brāhmaṇa;  
Sattāhaṃ dhāriyamānānaṃ, gandho tesam na chijjati.

2048: ‘Ubhato saraṃ mucalindaṃ, pupphā tiṭṭhanti sobhanā;  
Indivarehi sañchannaṃ, vanaṃ taṃ upasobhati.

2049: ‘Aḍḍhamāsaṃ dhāriyamānānaṃ, gandho tesam na chijjati;  
Nīlapupphī setavārī, pupphitā girikaṇṇikā;  
Kalerukkhehi sañchannaṃ, vanaṃ taṃ tulasīhi ca.

2050: ‘Sammaddateva gandhena, pupphasākhāhi taṃ vanaṃ;  
Bhamarā pupphagandhena, samantā mabhinādītā.

2051: ‘Tīṇi kakkārujātāni, tasmim sarasi brāhmaṇa;  
Kumbhamattāni cekāni, murajamattāni tā ubho’’ti.

Tattha **phaṇijjakoti** bhūtanako. **Muggatiyoti** ekā muggajāti. **Karatiyoti** rājamāso. **Sevālasāsakāti** imepi gacchāyeva, api ca **sīsakāti** rattacandanaṃ vuttaṃ. **Uddāpavattaṃ ulluḷitanti** taṃ udakaṃ tīramariyādabandhaṃ vātāpahaṭṭaṃ ulluḷitaṃ hutvā tiṭṭhati. **Makkhikā hiṅgujālikāti** hiṅgujālasaṅkhāte vikasitapupphagacche pañcavaṇṇā madhumakkhikā madhurassarena viravantiyo tattha vicarantīti atho. **Dāsimaṅjako cetthāti** imāni dve rukkhajātiyo ca ettha. **Nīcekalambakāti** nīcekalambakā.

**Elamphurakasañchannā**ti evaṃnāmikāya vallyā sañchannā. **Tesanti** tesam tassā vallyā pupphānaṃ sabbesampi vā etesaṃ dāsimaṅṅakādīnaṃ pupphānaṃ sattāhaṃ gandho na chijjati. Evaṃ gandhasampannāni pupphāni, rajatapaṭṭasadisavālukapuṇṇā bhūmibhāgā. **Gandho tesanti** tesam indīvarapupphādīnaṃ gandho aḍḍhamāsaṃ na chijjati. **Nilapupphī**tiādikā pupphavallyo. **Tulasīhi cāti** tulasigacchehi ca. **Kakkārujātānī**ti vallyāphalāni. Tattha ekissā vallyā phalāni mahāghaṭamattāni, dvinnāṃ mudīṅgamattāni. Tena vuttaṃ “murajamattāni tā ubho”ti.

**2052:**“Athettha sāsapo bahuko, nādiyo haritāyuto;  
Asī tālāva tiṭṭhanti, chejjā indīvarā bahū.

**2053:**“Apphoṭā sūriyavallī ca, kāḷiyā madhugandhiyā;  
Asokā mudayantī ca, vallibho khuddapupphiyō.

**2054:**“Koraṇḍakā anojā ca, pupphitā nāgamallikā;  
Rukkhamāruyha tiṭṭhanti, phullā kiṃsukavallyo.

**2055:**“Kaṭeruhā ca vāsantī, yūthikā madhugandhiyā;  
Niliyā sumanā bhaṇḍī, sobhati padumuttaro.

**2056:**“Pāṭalī samuddakappāsī, kaṇikārā ca pupphitā;  
Hemajālāva dissanti, ruciraggi sikhūpamā.

**2057:**“Yāni tāni ca pupphāni, thalajānudukāni ca;  
Sabbāni tattha dissanti, evaṃ rammo mahodadhī”ti.

Tattha **sāsapoti** siddhatthako. **Bahukoti** bahu. **Nādiyo haritāyutoti** haritena āyuto nādiyo. Imā dvepi lasuṅṅajātiyo, sopi lasuṅṅo tattha bahukoti attho. **Asī tālāva tiṭṭhantī** asīti evaṃnāmakā rukkhaṃ siniddhāya bhūmiyā ṭhitā tālā viya tiṭṭhanti. **Chejjā indīvarā bahū**ti udakapariyante bahū suvaṇṇaindīvarā muṭṭhinā chinditabbā hutvā ṭhitā. **Apphoṭā**ti apphoṭavallyo. **Vallibho khuddapupphiyoti** vallibho ca khuddapupphiyō ca. **Nāgamallikā**ti vallināgā ca mallikā ca. **Kiṃsukavallyoti** sugandhapattā vallyāti. **Kaṭeruhā ca vāsantī**ti ime ca dve pupphagacchā. **Madhugandhiyā**ti madhusamānagandhā. **Niliyā sumanā bhaṇḍī**ti nīlavallisumanā ca pakatisumanā ca bhaṇḍī ca. **Padumuttaroti** evaṃnāmako rukkho. **Kaṇikārā**ti vallyākaṇikārā rukkhaṅṅakārā. **Hemajālāvā**ti pasāritahemajālā viya dissanti. **Mahodadhī**ti mahato udakakkhandhassa ādhārabhūto mucalindasaroti.

**2058:**“Athassā pokkharāṇiyā, bahukā vārigocarā;  
Rohitā naḷapī siṅgū, kumbhilā makarā susū.

**2059:**“Madhu ca madhulaṭṭhi ca, tālisā ca piyaṅgukā;  
Kuṭandajā bhaddamuttā, setapupphā ca lolupā.

**2060:**“Surabhī ca rukkhaṃ tagarā, bahukā tuṅgavaṇṅakā;  
Paddhakā naradā kuṭṭhā, jhāmakā ca hareṅgukā.

**2061:**“Haliddakā gandhasilā, hiriverā ca guggulā;  
Vibhedikā corakā kuṭṭhā, kappūrā ca kaliṅgukā”ti.

Tattha **athassā pokkharāṇiyā**ti idha pokkharāṇisadisatāya sarameva pokkharāṇīti vadati. **Rohitā**tiādīni tesam vārigocarānaṃ nāmāni. **Madhu cāti** nimmakkhikamadhu ca. **Madhulaṭṭhi cāti** laṭṭhimadhukaṅṅa. **Tālisā cāti**tiādikā sabbā gandhajātiyo.

2062: ‘Athettha sīhabyagghā ca, purisālū ca hatthiyo;  
Eṇeyyā pasadā ceva, rohiccā sarabhā migā.

2063: ‘Koṭṭhasuṇā suṇopi ca, tuliyā naḷasannibhā;  
Cāmarī calanī laṅghī, jhāpitā makkaṭṭā picu.

2064: ‘Kakkaṭṭā kaṭamāyā ca, ikkā goṇasirā bahū;  
Khaggā varāhā nakulā, kālakettha bahūtaso.

2065: ‘Mahimsā soṇasingālā, pampakā ca samantato;  
Ākucchā pacalākā ca, citrakā cāpi dīpiyo.

2066: ‘Pelakā ca vighāsādā, sīhā gogaṇisādakā;  
Aṭṭhapādā ca morā ca, bhassarā ca kukutthakā.

2067: ‘Caṅkorā kukkuṭṭā nāgā, aññamaññaṃ pakūjino;  
Bakā balākā najjuhā, dindibhā kuṅjavājita.

2068: ‘Byagghinasā lohapiṭṭhā, pampakā jīvajīvākā;  
Kapiṅjarā tittirāyo, kulā ca paṭikutthakā.

2069: ‘Mandālakā celakeṭṭu, bhaṇḍutittiranāmakā;  
Celāvakā piṅgalāyo, goṭakā aṅgahetukā.

2070: ‘Karaviyā ca saggā ca, uhuṅkārā ca kukkuhā;  
Nānādiḷḷajagaṇākiṇṇaṃ, nānāsaranikūjita’ nti.

Tattha **purisālūti** vaḷavāmukhayakkhiniyo. **Rohiccā sarabhā migāti** rohitā ceva sarabhā migā ca. **Koṭṭhasukāti** siṅgālasunakhā. ‘‘Kotthusuṇā’’ tipi pāṭho. **Suṇopi cāti** esāpekā khuddakamigajāti. **Tuliyāti** pakkhibiḷārā. **Naḷasannibhāti** naḷapupphavaṇṇā rukkhasunakhā. **Cāmarī calanī laṅghīti** cāmarīmigā ca calanīmigā ca laṅghīmigā ca. **Jhāpitā makkaṭṭāti** dve makkaṭṭajātiyo. **Picu**ti sarapariyante gocaraggāhī eko makkaṭṭo. **Kakkaṭṭā kaṭamāyā cāti** dve mahāmigā. **Ikkāti** acchā. **Goṇasirāti** araṇṇagoṇā. **Kālakettha bahūtasoti** kālamigā nāmettha bahūtaso. **Soṇasingālāti** rukkhasunakhā ca siṅgālā ca. **Pampakāti** assamapadaṃ parikkhipitvā ṭhitā mahāveḷupampakā. **Ākucchāti** godhā. **Pacalākā cāti** gajakumbhamigā. **Citrakā cāpi dīpiyoti** citrakamigā ca dīpimigā ca.

**Pelakā cāti** sasā. **Vighāsādāti** ete giḷḷhā sakuṇā. **Sīhāti** kesarasīhā. **Gogaṇisādakāti** gogaṇe gahetvā khādanasīlā duṭṭhamigā. **Aṭṭhapādāti** sarabhā migā. **Bhassarāti** setahaṃsā. **Kukutthakāti** kukutthakasakuṇā. **Caṅkorāti** caṅkorasakuṇā. **Kukkuṭṭāti** vanakukkuṭṭā. **Dindibhā kuṅjavājita**ti ime tayopi sakuṇāyeva. **Byagghinasāti** senā. **Lohapiṭṭhāti** lohitavaṇṇasakuṇā. **Pampakāti** pampaṭakā. **Kapiṅjarā tittirāyoti** kapiṅjarā ca tittirā ca. **Kulā ca paṭikutthakāti** imepi dve sakuṇā. **Mandālakā celakeṭṭu**ti mandālakā ceva celakeṭṭu ca. **Bhaṇḍutittiranāmakāti** bhaṇḍū ca tittirā ca nāmakā ca. **Celāvakā piṅgalāyoti** dve sakuṇajātiyo ca, tathā **goṭakā aṅgahetukā**. **Saggāti** cātakasakuṇā. **Uhuṅkārāti** ulūkā.

2071: ‘Athettha sakuṇā santi, nīlakā maṅjubhāṇakā;  
Modanti saha bhariyāhi, aññamaññaṃ pakūjino.

2072: ‘Athettha sakuṇā santi, dijā maṅjussarā sitā;  
Setacchikūṭṭā bhadraḷḷhā, aṇḍajā citrapekhuṇā.

- 2073: ‘Athettha sakuṇā santi, dijā mañjussarā sitā;  
Sikhaṇḍī nīlagīvāhi, aññamaññaṃ pakūjino.
- 2074: ‘Kukutthakā kuḷīrakā, koṭṭhā pokkharasātakā;  
Kālameyyā balīyakkhā, kadambā suvasālikā.
- 2075: ‘Haliddā lohitā setā, athettha nalakā bahū;  
Vāraṇā bhīngarājā ca, kadambā suvakokilā.
- 2076: ‘Ukkusā kurarā haṃsā, āṭā parivadantikā;  
Pākahaṃsā atibalā, najjuhā jīvajīvākā.
- 2077: ‘Pārevatā ravihaṃsā, cakkavākā nadīcarā;  
Vāraṇābhirudā rammā, ubho kālūpakūjino.
- 2078: ‘Athettha sakuṇā santi, nānāvaṇṇā bahū dijā;  
Modanti saha bhariyāhi, aññamaññaṃ pakūjino.
- 2079: ‘Athettha sakuṇā santi, nānāvaṇṇā bahū dijā;  
Sabbe mañjū nikūjanti, mucalindamubhato saraṃ.
- 2080: ‘Athettha sakuṇā santi, karaviyā nāma te dijā;  
Modanti saha bhariyāhi, aññamaññaṃ pakūjino.
- 2081: ‘Athettha sakuṇā santi, karaviyā nāma te dijā;  
Sabbe mañjū nikūjanti, mucalindamubhato saraṃ.
- 2082: ‘Eṇeyyapasadākiṇṇaṃ, nāgasamsevitaṃ vanam;  
Nānālatāhi sañchannaṃ, kadalīmīgasevitaṃ.
- 2083: ‘Athettha sāsapo bahuko, nīvāro varako bahu;  
Sāli akaṭṭhapāko ca, ucchu tattha anappako.
- 2084: ‘Ayaṃ ekapadī eti, ujum gacchati assamaṃ;  
Khudaṃ pipāsaṃ aratiṃ, tattha patto na vindati;  
Yattha vessantaro rājā, saha puttehi sammati.
- 2085: ‘Dhārento brāhmaṇavaṇṇaṃ, āsadañca masaṃ jaṭaṃ;  
Cammavāsī chamā seti, jātavedaṃ namassatī’ ti.

Tattha **nīlakā**ti citrarājipattā. **Mañjūssarā sitā**ti nibaddhamadhurassarā. **Setacchikūṭā bhadra**kkhāti ubhayapassesu setehi akkhikūṭehi samannāgatā sundarakkhā. **Citrapekhuṇā**ti vicitrapattā. **Kuḷīrakā**ti kakkāṭakā. **Koṭṭhā**tiādayo sakuṇāva. **Vāraṇā**ti hatthiliṅgasakuṇā. **Kadambā**ti mahākadambā gahitā. **Suvakokilā**ti kokilehi saddhiṃ vicaraṇasuvakā ceva kokilā ca. **Ukkusā**ti kāḷakurarā. **Kurarā**ti setakurarā. **Haṃsā**ti sakuṇahaṃsā. **Āṭā**ti dabbisaṇṭhānamukhasakuṇā. **Parivadantikā**ti ekā sakuṇajāti. **Vāraṇābhirudā rammā**ti rammābhirudā vāraṇā. **Ubho kālūpakūjino**ti sāyaṃ pāto pabbatapādaṃ ekaninnādaṃ karontā nikūjanti. **Eṇeyyapasadākiṇṇanti** eṇeyyamigehi ca pasadamigehi ca ākiṇṇaṃ. **Tattha patto na vindatī**ti brāhmaṇa, vessantarassa assamapadaṃ patto puriso tattha assame chātakaṃ vā pānīyapipāsaṃ vā ukkaṇṭhitaṃ vā na paṭilabhati.

- 2086: ‘Idaṃ sutvā brahmabandhu, isiṃ katvā padakkhiṇaṃ;  
Udaggacitto pakkāmi, yattha vessantaro ahū’ ti.

Tattha **yattha vessantaro ahūti** yasmim̄ ṭhāne vessantaro ahosi, taṃ ṭhānaṃ gatoti.

Mahāvanavaṇṇanā niṭṭhitā.

### Dārapabbavaṇṇanā

Jūjakopi accutatāpasena kathitamaggena gacchanto caturassapokkharaniṃ patvā cintesi “ajja atisāyanho, idāni maddī araṇṇato āgamissati. Mātugāmo hi nāma dānassa antarāyakaro hoti, sve tassā araṇṇaṃ gatakāle assamaṃ gantvā vessantaraṃ upasaṅkamtivā dārake yācivā tāya anāgatāya te gahetvā pakkamissāmi”ti. Athassa avidūre ekaṃ sānupabbataṃ āruya ekasmiṃ phāsukaṭṭhāne nipajji. Taṃ pana rattim̄ paccūsakāle maddī supinaṃ addasa. Evarūpo supino ahosi – eko puriso kaṇho dve kāsāyāni paridahitvā dvīsu kaṇṇesu rattamālaṃ piḷandhitvā āvudhahattho tajjento āgantvā paṇṇasālaṃ pavisitvā maddim̄ jaṭāsu gahetvā ākaḍḍhitvā bhūmiyaṃ uttānakaṃ pātetvā viravantiyā tassā dve akkhīni uppāṭetvā bāhāni chinditvā uraṃ bhinditvā paggharantalohitabinduṃ hadayamaṃsaṃ ādāya pakkāmīti. Sā pabujjhivā bhītatasitā “pāpako supino me diṭṭho, supinapāṭhako pana vessantarena sadiso nāma natthi, pucchissāmi na”nti cintetvā paṇṇasālaṃ gantvā mahāsattassa paṇṇasāladvāraṃ ākoṭesi. Mahāsatto “ko eso”ti āha. “Ahaṃ deva, maddī”ti. “Bhadde, amhākaṃ katikavattaṃ bhinditvā kasmā akāle āgatāsī”ti. “Deva, nāhaṃ kilesavasena āgacchāmi, apica kho pana me pāpako supino diṭṭho”ti. “Tena hi kathehi, maddī”ti. Sā attanā diṭṭhaniyāmeneva katesi.

Mahāsattopi supinaṃ pariggaṇhitvā “mayhaṃ dānapāramī pūrisati, sve maṃ yācako āgantvā putte yācissati, maddim̄ assāsetvā uyyojessāmi”ti cintetvā “maddi, tava dussayanadubbhojanehi cittam̄ āluḷitaṃ bhavissati, mā bhāyī”ti saṃmohetvā assāsetvā uyyojesi. Sā vibhātāya rattiyā sabbam̄ kattabbakiccaṃ katvā dve putte āliṅgitvā sīse cumbitvā “tātā, ajja me dussupino diṭṭho, appamattā bhaveyyāthā”ti ovaditvā “deva, tumhe dvīsu kumāresu appamattā hothā”ti mahāsattaṃ putte paṭicchāpetvā pacchikhaṇṇitvā ādāya assūni puñchantī mūlaphalāphalattāya vanaṃ pāvīsi. Tadā jūjakopi “idāni maddī araṇṇaṃ gatā bhavissati”ti sānupabbatā oruya ekapadikamaggena assamābhimukho pāyāsi. Mahāsattopi paṇṇasālato nikkhamitvā paṇṇasāladvāre pāsānaphalake suvaṇṇapaṭimā viya nisinno “idāni yācako āgamissati”ti pipāsito viya surāsoṇḍo tassāgamanamaggaṃ olokontova nisīdi. Puttāpissa pādamaḷe kiḷanti. So maggaṃ olokonto brāhmaṇaṃ āgacchantam̄ disvā satta māse nikkhattam̄ dānadhuraṃ ukkhipanto viya ‘ehi, tvaṃ bho brāhmaṇā”ti somanassajāto jālikumāraṃ āmantento imaṃ gāthamāha –

**2087:**“Uṭṭhehi jāli patitṭha, porānaṃ viya dissati;  
Brāhmaṇaṃ viya passāmi, nandiyo mābhikīrare”ti.

Tattha **porānaṃ viya dissatīti** pubbe jetuttaranagare nānādisāhi yācakānaṃ āgamaṇaṃ viya ajja yācakānaṃ āgamaṇaṃ dissati. **Nandiyo mābhikīrareti** etassa brāhmaṇassa diṭṭhakālato paṭṭhāya maṃ somanassāni abhikīranti, ghammābhittatassa purisassa sīse sītūdakaghaṭasahashehi abhisecanakālo viya jātoti.

Taṃ sutvā kumāro āha –

**2088:**“Ahampi tāta passāmi, yo so brahmāva dissati;  
Addhiko viya āyāti, atithī no bhavissati”ti.

Vatvā ca pana kumāro mahāsattassa apacitim̄ karonto utṭhāyāsanā brāhmaṇaṃ paccuggantvā parikkhāraggaṇaṃ āpucchi. Brāhmaṇo taṃ olokonto “ayaṃ vessantarassa putto jālikumāro nāma bhavissati, ādito paṭṭhāyeva pharusavacanaṃ kathessāmi”ti cintetvā “apehi apehi”ti accharaṃ pahari. Kumāro apagantvā “ayaṃ brāhmaṇo atipharuso, kiṃ nu kho”ti tassa sarīraṃ olokonto aṭṭhārasa purisadose passi. Brāhmaṇopi bodhisattaṃ upasaṅkamtivā paṭisanthāraṃ karonto āha –

**2089:** ‘Kacci nu bhoto kusalaṃ, kacci bhoto anāmayam;  
Kacci uñchena yāpetha, kacci mūlaphalā bahū.

**2090:** ‘Kacci ḍaṃsā makasā ca, appameva sarīsapā;  
Vane vāḷamigākiṇṇe, kacci hiṃsā na vijjati’ ti.

Bodhisattopi tena saddhiṃ paṭisanthāraṃ karonto āha –

**2091:** ‘Kusalañceva no brahme, atho brahme anāmayam;  
Atho uñchena yāpema, atho mūlaphalā bahū.

**2092:** ‘Atho ḍaṃsā makasā ca, appameva sarīsavā;  
Vane vāḷamigākiṇṇe, hiṃsā amhaṃ na vijjati.

**2093:** ‘Satta no māse vasataṃ, araññe jīvasokinaṃ;  
Imampi paṭhamaṃ passāma, brāhmaṇaṃ devavaṇṇinaṃ;  
Ādāya veḷuvaṃ daṇḍaṃ, aggihuttaṃ kamaṇḍaluṃ.

**2094:** ‘Svāgataṃ te mahābrahme, atho te adurāgataṃ;  
Anto pavisa bhaddante, pāde pakkhālayassu te.

**2095:** ‘Tiṇḍukāni piyālāni, madhuke kāsūmāriyo;  
Phalāni khuddakappāni, bhuñja brahme varam varam.

**2096:** ‘Idampi pānīyaṃ sītaṃ, ābhatam girigabbharā;  
Tato piva mahābrahme, sace tvaṃ abhikaṅkhasi’ ti.

Evañca pana vatvā mahāsatto ‘‘ayaṃ brāhmaṇo na akāraṇena imaṃ brahāraññaṃ āgato,  
āgamanakāraṇaṃ papañcaṃ akatvā pucchissāmi na’’ nti cintetvā imaṃ gāthamāha –

**2097:** ‘Atha tvaṃ kena vaṇṇena, kena vā pana hetunā;  
Anuppatto brahāraññaṃ, taṃ me akkhāhi pucchito’’ ti.

Tattha **vaṇṇenā**ti kāraṇena. **Hetunā**ti paccayena.

Jūjako āha –

**2098:** ‘Yathā vārivaho pūro, sabbakālaṃ na khīyati;  
Evaṃ taṃ yācitāgacchiṃ, putte me dehi yācito’’ ti.

Tattha **vārivahoti** pañcasu mahānadīsu udakavāho. **Na khīyatī**ti pipāsītehi āgantvā hatthehipi bhājanehipi ussiñcivā piviyamāno na khīyati. **Evaṃ taṃ yācitāgacchinti** tvampi saddhāya pūritattā evarūpoyevāti maññaṃaṃ ahaṃ taṃ yācituṃ āgacchiṃ. **Putte me dehi yācitoti** mayā yācito tava putte mayhaṃ dāsathāya dehīti.

Taṃ sutvā mahāsatto somanassajāto pasāritahatthe sahasatthavikaṃ ṭhapento viya pabbatapādaṃ unnādentō imā gāthā āha –

**2099:** ‘Dadāmi na vikampāmi, issaro naya brāhmaṇa;  
Pāto gatā rājaputtī, sāyaṃ uñchāto eheti.



**2100:** ‘Ekarattiṃ vasitvāna, pāto gacchasi brāhmaṇa;  
Tassā nhāte upaghāte, atha ne māladhārine.

**2101:** ‘Ekarattiṃ vasitvāna, pāto gacchasi brāhmaṇa;  
Nānāpupphehi sañchanne, nānāgandhehi bhūsite;  
Nānāmūlaphalākiṇṇe, gaccha svādāya brāhmaṇā’’ti.

Tattha **issaroti** tvam mama puttānaṃ issaro sāmiko hutvā ete naya, apica kho panekaṃ kāraṇaṃ atthi. Etesaṃ mātā rājaputtī phalāphalathāya pāto gatā sāyaṃ araṇṇiāto āgamissati, tāya ānītāni madhuraphalāphalāni bhūñjitvā idheva thāne ajjekarattiṃ vasitvā pātova dārake gahetvā gamissasi. **Tassā nhātetī** tāya nhāpīte. **Upaghātetī** sīsamhi upasiṅghite. **Atha ne māladhārineti** atha ne vicitrāya mālāya alaṅkate taṃ mālāṃ vahamāne. Pālīpotthakesu pana ‘‘atha ne māladhāriṇo’’ti likhitaṃ, tassattho na vicārito. **Nānāmūlaphalākiṇṇeti** magge pātheyyatthāya dinnehi nānāmūlaphalāphalehi ākiṇṇe.

Jūjako āha –

**2102:** ‘Na vāsamabhirocāmi, gamanaṃ mayha rucati;  
Antarāyopi me assa, gacchaññeva rathesabha.

**2103:** ‘Na hetā yācayogī naṃ, antarāyassa kāriyā;  
Itthiyo mantāṃ jānanti, sabbaṃ gaṇhanti vāmato.

**2104:** ‘Saddhāya dānaṃ dadato, māsāṃ adakkhi mātaraṃ;  
Antarāyampi sā kayirā, gacchaññeva rathesabha.

**2105:** ‘Āmantayassu te putte, mā te mātaramaddasūṃ;  
Saddhāya dānaṃ dadato, evaṃ puññaṃ pavaḍḍhati.

**2106:** ‘Āmantayassu te putte, mā te mātaramaddasūṃ;  
Mādisassa dhaṇaṃ datvā, rāja saggaṃ gamissasī’’ti.

Tattha **na hetā yācayogī nanti** ettha **nanti** nipātamattaṃ. Idaṃ vuttaṃ hoti – mahārāja, etā itthiyo ca nāma na hi yācayogī, na yācanāya anucchavikā honti, kevalaṃ antarāyassa kāriyā dāyakaṇaṃ puññantarāyaṃ, yācakānañca lābhantarāyaṃ karontīti. **Itthiyo mantanti** itthi māyaṃ nāma jānanti. **Vāmato**ti sabbaṃ vāmato gaṇhanti, na dakkhiṇato. **Saddhāya dānaṃ dadatoti** kammañca phalañca saddahitvā dānaṃ dadato. **Māsanti** mā etesaṃ mātaraṃ adakkhi. **Kayirā**ti kareyya. **Āmantayassūti** jānāpehi, mayā saddhiṃ pesehīti vadati. **Dadatoti** dadantassa.

Vessantaro āha –

**2107:** ‘Sace tvam nicchase daṭṭhūṃ, mama bhariyaṃ patibbatāṃ;  
Ayyakassapi dassēhi, jāliṃ kaṇhājinaṃ cubho.

**2108:** ‘Ime kumāre disvāna, mañjūke piyabhāṇine;  
Patīto sumano vitto, bahuṃ dassati te dhana’’nti.

Tattha **ayyakassā**ti mayhaṃ pituno sañjayamahārājassa dvinnaṃ kumārānaṃ ayyakassa. **Dassati te dhananti** so rājā tuyhaṃ bahuṃ dhaṇaṃ dassati.

Jūjako āha –

**2109:** ‘Acchedanassa bhāyāmi, rājaputta suṇohi me;  
Rājadaṇḍāya maṃ dajjā, vikkiṇeyya haneyya vā;  
Jino dhanañca dāse ca, gārayhassa brahmabandhuyā’ ti.

Tattha **acchedanassā**ti acchinditvā gahaṇassa bhāyāmi. **Rājadaṇḍāya maṃ dajjāti** ‘‘ayaṃ brāhmaṇo dārakacoro, daṇḍamassa dethā’’ti evaṃ daṇḍatthāya maṃ amaccānaṃ dadeyya. **Gārayhassa brahmabandhuyāti** kevalaṃ brāhmaṇiyāva garahitabbo bhavissāmīti.

Vessantaro āha –

**2110:** ‘Ime kumāre disvāna, mañjuka piyabhāṇine;  
Dhamme ṭhito mahārājā, sivīnaṃ raṭṭhavaḍḍhano;  
Laddhā pītisomanassaṃ, bahuṃ dassati te dhana’’nti.

Jūjako āha –

**2111:** ‘Nāhaṃ tampi karissāmi, yaṃ maṃ tvamaṃ anusāsasi;  
Dārakeva ahaṃ nessaṃ, brāhmaṇyā paricārake’’ti.

Tattha **dārakevāti** alaṃ mayhaṃ aññena dhanena, ahaṃ ime dārakeva attano brāhmaṇiyā paricārake nesaṃti.

Taṃ tassa pharusavacanaṃ sutvā dārakā bhītā palāyitvā piṭṭhipaṇṇasālaṃ gantvā tatopi palāyitvā gumbagahane nilīyitvā tatrāpi jūjakenāgantvā gahitā viya attānaṃ sampassamānā kampanṭā katthaci ṭhātuṃ asamattā ito cito ca dhāvitvā caturassapokkharāṇitīraṃ gantvā daḷhaṃ vākacīraṃ nivāsetvā udakaṃ oruyha pokkharapattaṃ sīse ṭhapetvā udakena paṭicchannā hutvā aṭṭhaṃsu. Tamattamaṃ pakāsento satthā āha –

**2112:** ‘Tato kumārā byathitā, sutvā luddassa bhāsitaṃ;  
Tena tena padhāviṃsu, jālī kaṇhājina cubho’’ti.

Jūjakopi kumāre adisvā bodhisattaṃ apasādesi ‘‘bho vessantara, idāneva tvamaṃ mayhaṃ dārake datvā mayā ‘nāhaṃ jetuttaranagaraṃ gamissāmi, dārake mama brāhmaṇiyā paricārake nesaṃti’’ti vutte iṅghitasaññaṃ datvā putte palāpetvā ajānanto viya nisinno, natthi maññe lokasmiṃ tayā sadiso musāvādī’’ti. Taṃ sutvā mahāsatto pakampitacitto hutvā ‘‘dārakā palātā bhavissanti’’ti cintetvā ‘‘bho brāhmaṇa, mā cintayi, ānessāmi te kumāre’’ti utṭhāya piṭṭhipaṇṇasālaṃ gantvā tesamaṃ vanagahanaṃ pavitṭhabhāvaṃ ñatvā padavalañjānusārena pokkharāṇitīraṃ gantvā uduke otiṇṇapadaṃ disvā ‘‘kumārā udakaṃ oruyha ṭhitā bhavissanti’’ti ñatvā ‘‘tāta, jālī’’ti pakkosanto imaṃ gāthādvayamāha –

**2113:** ‘Ehi tāta piyaputta, pūretha mama pāraṃhiṃ;  
Hadayaṃ mebhisiñcetha, karoṭha vacanaṃ mama.

**2114:** ‘Yānā nāvā ca me hotha, acalā bhavasāgare;  
Jātipāraṃ tarissāmi, santāressaṃ sadevaka’’nti.

Kumāro pitu vacanaṃ sutvā ‘‘brāhmaṇo maṃ yathārucci karotu, pitarā saddhiṃ dve kathā na kathessāmī’’ti sīsaṃ nīharitvā pokkharapattāni viyūhitvā udakā uttaritvā mahāsattassa dakkhiṇapāde nipatitvā gopphakasandhiṃ daḷhaṃ gahetvā parodi. Atha naṃ mahāsatto āha ‘‘tāta, bhaginī te kuhi’’nti. ‘‘Tāta, ime sattā nāma bhaye uppanne attānameva rakkhanti’’ti. Atha mahāsatto ‘‘puttehi me katikā katā bhavissati’’ti ñatvā ‘‘ehi amma kaṇhe’’ti pakkosanto gāthādvayamāha –

2115: ‘Ehi amma piyadhīti, pūretha mama pāramiṃ;  
Hadayaṃ mebhisiñcetha, karotha vacanaṃ mama.

2116: ‘Yānā nāvā ca me hotha, acalā bhavasāgare;  
Jātipāraṃ tarissāmi, uddharissaṃ sadevaka’nti.

Sāpi ‘‘pitarā saddhiṃ dve kathā na kathessāmi’’ti tatheva udakā uttaritvā mahāsattassa vāmapāde nipatitvā gopphakasandhiṃ dalhaṃ gahetvā parodi. Tesam assūni mahāsattassa phullapadumavaṇṇe pādapiṭṭhe patanti. Tassa assūni tesam suvaṇṇaphalakasadisāya piṭṭhiyā patanti. Atha mahāsatto kumāre utṭhāpetvā assāsetvā ‘‘tāta, jāli kiṃ tvam mama dānavittakabhāvaṃ na jānāsi, ajjhāsayaṃ me, tāta, matthakaṃ pāpehī’’ti vatvā goṇe agghāpento viya tattheva tṭhito kumāre agghāpesi. So kira puttaṃ āmantetvā āha ‘‘tāta, jāli tvam bhujisso hotukāmo brāhmaṇassa nikkhasahassaṃ datvā bhujisso bhaveyyāsi, bhaginī kho pana te uttamarūpadharā, koci nīcajātiko brāhmaṇassa kiñcideva dhanaṃ datvā tava bhaginiṃ bhujissaṃ katvā jātisambhedaṃ kareyya, aññataraññā sabbasatadāyako nāma natthi, tasmā bhaginī te bhujissā hotukāmā brāhmaṇassa dāsasataṃ dāsīsataṃ hatthīsataṃ assasataṃ usabhasataṃ nikkhasatanti evaṃ sabbasatāni datvā bhujissā hotū’’ti evaṃ kumāre agghāpetvā samassāsetvā assamapadaṃ gantvā kamaṇḍalunā udakaṃ gahetvā ‘‘ehi vata, bho brāhmaṇā’’ti āmantetvā sabbaññutaññāṇassa paccayo hotūti patthanaṃ katvā udakaṃ pātetvā ‘‘ambho brāhmaṇa, puttehi me sataguṇena sahasaguṇena satasahassaguṇena sabbaññutaññāṇameva piyatara’’nti pathaviṃ unnādentō brāhmaṇassa piyaputtadānaṃ adāsi. Tamatthaṃ pakāsento satthā āha –

2117: ‘Tato kumāre ādāya, jāliṃ kaṇhājinaṃ cubho;  
Brāhmaṇassa adā dānaṃ, sivīnaṃ raṭṭhavaḍḍhana.

2118: ‘Tato kumāre ādāya, jāliṃ kaṇhājinaṃ cubho;  
Brāhmaṇassa adā vitto, puttake dānamuttamaṃ.

2119: ‘Tadāsi yaṃ bhimsanakaṃ, tadāsi lomahaṃsanam;  
Yaṃ kumāre padinnamhi, medanī sampakampatha.

2120: ‘Tadāsi yaṃ bhimsanakaṃ, tadāsi lomahaṃsanam;  
Yaṃ pañjalikato rājā, kumāre sukhavacchite;  
Brāhmaṇassa adā dānaṃ, sivīnaṃ raṭṭhavaḍḍhana’’ti.

Tattha **vittoti** pītisomanassajāto hutvā. **Tadāsi yaṃ bhimsanakanti** tadā dānatejena unnadantī mahāpathavī catunahutādhikadvījanasatasahassabahalā mattavāraṇo viya gajjamānā kampi, sāgaro saṅkhubhi. Sinerupabbatarājā suseditavettaṅkuro viya onamitvā vaṅkapabbatābhimukho aṭṭhāsi. Sakko devarājā apphoṭesi, mahābrahmā sādhuḥkāramadāsi. Yāva brahmalokā ekakolāhalaṃ ahosi. Pathavisaddena devo gajjanto khaṇikavassaṃ vassi, akālavijjulatā nicchariṃsu. Himavantavāsino sīhādāyo sakalahimavantam ekaninnādam karimṣūti evarūpaṃ bhimsanakaṃ ahosi. Pāḷiyaṃ pana ‘‘medanī sampakampathā’’ti ettakameva vuttaṃ. **Yanti** yadā. **Sukhavacchiteti** sukhavasite sukhasamvaḍḍhite. **Adā dānanti** ambho brāhmaṇa, puttehi me sataguṇena sahasaguṇena satasahassaguṇena sabbaññutaññāṇameva piyataranti tassatthāya adāsi.

Mahāsatto dānaṃ datvā ‘‘sudinnaṃ vata me dāna’’nti pītiṃ uppādetvā kumāre oloketova aṭṭhāsi. Jūjakopi vanagumbaṃ pavisitvā valliṃ dantehi chinditvā ādāya kumāraṃ dakkhiṇahatthaṃ kumārīkāya vāmahatthena saddhiṃ ekato bandhitvā tameva valliḷoṭiṃ gahetvā pothayamāno pāyāsi. Tamatthaṃ pakāsento satthā āha –

2121: ‘Tato so brāhmaṇo luddo, lataṃ dantehi chindiya;  
Latāya hatthe bandhitvā, latāya anumajjatha.

2122: ‘Tato so rajjumādāya, daṇḍaṅcādāya brāhmaṇo;  
Ākoṭayanto te neti, sivrājassa pekkhato’ ti.

Tattha **sivrājassāti** vessantarassa.

Tesaṃ pahaṭapahaṭaṭṭhāne chavi chijjati, lohitaṃ paggharati. Paharaṇakāle aññamaññassa piṭṭhiṃ dadanti. Athekasmiṃ visamaṭṭhāne brāhmaṇo pakkhalitvā pati. Kumārānaṃ muduhatthehi baddhavalli gaḷitvā gatā. Te rodamānā palāyitvā mahāsattassa santikaṃ āgamaṃsu. Tamatthaṃ pakāsento sathā āha

2123: ‘Tato kumārā pakkāmuṃ, brāhmaṇassa pamuñciya;  
Assupuññehi nettehi, pitaraṃ so udikkhati.

2124: ‘Vedhamassatthapattaṃva, pitu pādāni vandati;  
Pitu pādāni vanditvā, idaṃ vacanamabravi.

2125: ‘Ammā ca tāta nikkhantā, tvañca no tāta dassasi;  
Yāva ammampi passemu, atha no tāta dassasi.

2126: ‘Ammā ca tāta nikkhantā, tvañca no tāta dassasi;  
Mā no tvaṃ tāta adadā, yāva ammāpi etu no;  
Tadāyaṃ brāhmaṇo kāmaṃ, vikkiṇātu hanātu vā.

2127: ‘Balaṅkapādo andhanakho, atho ovaddhapiṇḍiko;  
Dīghuttaroṭṭho capalo, kaḷāro bhaggaṅāsako.

2128: ‘Kumbhodaro bhaggapiṭṭhi, atho visamacakkhuko;  
Lohamassu haritakeso, valīnaṃ tilakāhato.

2129: ‘Piṅgalo ca vinato ca, vikaṭo ca brahā kharo;  
Ajināni ca sannaddho, amanusso bhayānako.

2130: ‘Manusso udāhu yakkho, maṃsalohitabhojano;  
Gāmā araññamāgama, dhanam taṃ tāta yācati.

2131: ‘Nīyamāne pisācena, kiṃ nu tāta udikkhasi;  
Asmā nūna te hadayaṃ, āyasaṃ daḷhabandhanaṃ.

2132: ‘Yo no baddhe na jānāsi, brāhmaṇena dhanesinā;  
Accāyikena luddena, yo no gāvova sumbhati.

2133: ‘Idheva acchataṃ kaṇhā, na sā jānāti kismiñci;  
Migīva khirasammattā, yūthā hīnā pakandati’ ti.

Tattha **udikkhatīti** so pitu santikaṃ gantvā kampamāno oloketi. **Vedhanti** vedhamāno. **Tvañca no tāta, dassasīti** tvañca amhe tāya anāgatāya eva brāhmaṇassa dadāsi, evaṃ mā kari, adhivāsehi tvaṃ tāva. Yāva ammaṃ passemu, atha no tāya diṭṭhakāle tvaṃ puna dassasi. **Vikkiṇātu hanātu vāti** tāta, ammāya āgatakāle esa amhe vikkiṇātu vā hanatu vā. Yaṃ icchati, taṃ karotu. Apica kho panesa kakkhaḷo pharusu, aṭṭhārasahi purisadosehi samannāgatoti aṭṭhārasa purisadose kathesi.

Tattha **balāṅkapādoti** patthaṭapādo. **Andhanakhoti** pūtinakho. **Ovaddhapiṇḍikoti**

hetṭhāgalitapiṇḍikamaṃso. **Dīghuttaroṭṭhoti** mukhaṃ pidahitvā ṭhitena dīghena uttaroṭṭhena samannāgato. **Capaloti** paggharitalālo. **Kaḷāroti** sūkaradāṭhāhi viya nikkhantadantehi samannāgato. **Bhagganāsakoti** bhaggāya viśamāya nāsāya samannāgato. **Lohamassūti** tambalohavaṇṇamassu. **Haritakesoti** suvaṇṇavaṇṇavirūlhakeso. **Valīnanti** sarīracammamassa valiggahitaṃ. **Tilakāhatoti** kālatilakehi parikiṇṇo. **Piṅgaloti** nibbidhapiṅgalo biḷārakkhisadisehi akkhīhi samannāgato. **Vinatoti** kaṭiyam piṭṭhiyam khandheti tīsu ṭhānesu vaṅko. **Vikaṭoti** vikaṭapādo. “Abaddhasandhī”tipi vuttaṃ, “kaṭakaṭā”ti viravantehi aṭṭhisandhīhi samannāgato. **Brahāti** dīgho. **Amanussoti** na manusso, manussavesena vicarantopi yakkho esa. **Bhayānakoti** ativiya bhīṃsanako.

**Manusso udāhu yakkhoti** tāta, sace koci imaṃ brāhmaṇam disvā evaṃ puccheyya “manussoyam brāhmaṇo, udāhu yakkho”ti. “Na manusso, atha kho maṃsalohitabhojano yakkho”ti vattum yuttaṃ. **Dhanam taṃ tāta yācatīti** tāta, esa amhākaṃ maṃsam khādītukāmo tumhe puttadhanam yācati. **Udikkhasīti** ajjupekkhasi. **Asmā nūna te hadayanti** tāta, mātāpitūnam hadayam nāma puttesu mudukaṃ hoti, puttānam dukkham na sahati, tvaṃ ajānanto viya acchasi, tava pana hadayam pāsāṇo viya maññe, atha vā **āyasam dalhabandhanam**. Tena amhākaṃ evarūpe dukkhe uppanne na rujati.

**Na jānāsīti** ajānanto viya acchasi. **Accāyikena luddenāti** ativiya luddena pamāṇātikkantena. **Yo notī** brāhmaṇena no amhe kaniṭṭhabhātike baddhe bandhite yo tvaṃ na jānāsī. **Sumbhatīti** potheti. **Idheva acchatanti** tāta, ayam kaṇhājina kiñci dukkham na jānāti. Yathā nāma khīrasammattā migapotikā yūthā parihīnā mātaram apassantī khīratthāya kandati, evaṃ ammaṃ apassantī kanditvā sussitvā marissati, tasmā maṃyeva brāhmaṇassa dehi, aham gamissāmi, ayam kaṇhājina idheva hotūti.

Evaṃ vuttepi mahāsatto na kiñci katheti. Tato kumāro mātāpitāro ārabba paridevanto āha –

**2134:**“Na me idaṃ tathā dukkham, labbhā hi pumunā idaṃ;  
Yañca ammaṃ na passāmi, taṃ me dukkhataram ito.

**2135:**“Na me idaṃ tathā dukkham, labbhā hi pumunā idaṃ;  
Yañca tātaṃ na passāmi, taṃ me dukkhataram ito.

**2136:**“Sā nūna kapaṇā ammā, cirarattāya rucchati;  
Kaṇhājinaṃ apassantī, kumāriṃ cārudassaniṃ.

**2137:**“So nūna kapaṇo tāto, cirarattāya rucchati;  
Kaṇhājinaṃ apassanto, kumāriṃ cārudassaniṃ.

**2138:**“Sā nūna kapaṇā ammā, ciraṃ rucchati assame;  
Kaṇhājinaṃ apassantī, kumāriṃ cārudassaniṃ.

**2139:**“So nūna kapaṇo tāto, ciraṃ rucchati assame;  
Kaṇhājinaṃ apassanto, kumāriṃ cārudassaniṃ.

**2140:**“Sā nūna kapaṇā ammā, cirarattāya rucchati;  
Aḍḍharatte va ratte vā, nadīva avasucchati.

**2141:**“So nūna kapaṇo tāto, cirarattāya rucchati;  
Aḍḍharatte va ratte vā, nadīva avasucchati.

**2142:**“Ime te jambukā rukkhā, vedisā sinduvārakā;  
Vividhāni rukkhajātāni, tāni ajja jahāmase.

2143: ‘Assatthā panasā ceme, nigrodhā ca kapitthanā;  
Vividhāni phalajātāni, tāni ajja jahāmase.

2144: ‘Ime tiṭṭhanti ārāmā, ayaṃ sītūdakā nadī;  
Yatthassu pubbe kīlāma, tāni ajja jahāmase.

2145: ‘Vividhāni pupphajātāni, asmim̐ uparipabbate;  
Yānassu pubbe dhārema, tāni ajja jahāmase.

2146: ‘Vividhāni phalajātāni, asmim̐ uparipabbate;  
Yānassu pubbe bhujjāma, tāni ajja jahāmase.

2147: ‘Ime no hatthikā assā, balibaddā ca no ime;  
Yehissu pubbe kīlāma, tāni ajja jahāmase’ ti.

Tattha **pumunā**ti bhava vicarantena purisena. **Labbhā**ti labhitabbaṃ. **Taṃ me dukkhataraṃ itoti** yaṃ me ammaṃ passituṃ alabhantassa dukkhaṃ, taṃ ito pothanadukkhato satagaṇena sahasagaṇena satahasagaṇena dukkhataraṃ. **Rucchatī**ti rodissati. **Aḍḍharatte va ratte vā**ti aḍḍharatte vā sakalaratte vā amhe saritvā ciraṃ rodissati. **Avasucchatī**ti appodakā kunnadī avasussati. Yathā sā khippameva sussati, evaṃ aruṇe uggacchanteyeva sussitvā marissatīti adhippāyenevamāha. **Vedisā**ti olambanasākhā. **Tānī**ti yesaṃ no mūlapupphaphalāni gaṇhantehi ciraṃ kīlitaṃ, tāni ajja ubhopi mayaṃ jahāma. **Hatthikā**ti tātena amhākaṃ kīlanatthāya katā hatthikā.

Taṃ evaṃ paridevamānameva saddhim̐ bhaginiyā jūjako āgantvā pothento gahetvā pakkāmi.  
Tamatthaṃ pakāsento satthā āha –

2148: ‘Nīyamānā kumārā te, pitaraṃ etadabravum̐;  
Ammaṃ ārogyaṃ vajjāsī, tvañca tāta sukhī bhava.

2149: ‘Ime no hatthikā assā, balibaddā ca no ime;  
Tāni ammāya dajjesi, sokaṃ tehi vinessati.

2150: ‘Ime no hatthikā assā, balibaddā ca no ime;  
Tāni ammā udikkhantī, sokaṃ paṭivinessatī’ ti.

Tadā bodhisattassa putte ārabha balavasoko uppajji, hadayamaṃsaṃ uṇhaṃ ahoṣi. So kesarasīhena gahitamattavāraṇo viya rāhumukhaṃ pavitṭhacando viya ca kampamāno sakabhāvena saṇṭhātuṃ asakkonto assupuṇṇehi nettehi paṇṇasālaṃ pavisitvā kalunaṃ paridevi. Tamatthaṃ pakāsento satthā āha –

2151: ‘Tato vessantaro rājā, dānaṃ datvāna khattiyo;  
Paṇṇasālaṃ pavisitvā, kalunaṃ paridevayī’ ti.

Tato parā mahāsattassa vilāpagāthā honti –

2152: ‘Kaṃ nvajja chātā tasitā, uparucchanti dārakā;  
Sāyaṃ saṃvesanākāle, ko ne dassati bhojanaṃ.

2153: ‘Kaṃ nvajja chātā tasitā, uparucchanti dārakā;  
Sāyaṃ saṃvesanākāle, ‘ammā chātamha detha no’.

**2154:** ‘Kathaṃ nu pathaṃ gacchanti, pattikā anupāhanā;  
Santā sūnehi pādehi, ko ne hatthe gahessati.

**2155:** ‘Kathaṃ nu so na lajjeyya, sammukhā paharaṃ mama;  
Adūsakānaṃ puttānaṃ, alajjī vata brāhmaṇo.

**2156:** ‘Yopi me dāsīdāsassa, añño vā pana pesiyo;  
Tassāpi suvihīnassa, ko lajjī paharissati.

**2157:** ‘Vārijasseva me sato, baddhassa kumināmukhe;  
Akkosati paharati, piye putte apassato’’ti.

Tattha **kaṃ nvajjāti** kaṃ nu ajja. **Uparucchantī**ti saṭṭhiyojanamaggaṃ gantvā uparodissanti. **Samvesanākāletī** mahājanassa parivesanākāle. **Kone dassatī**ti ko nesaṃ bhojanaṃ dassati. **Kathaṃ nu pathaṃ gacchantī**ti kathaṃ nu saṭṭhiyojanamaggaṃ gamissanti. **Pattikā**ti hatthiyānādīhi virahitā. **Anupāhanā**ti upāhanamattenapi viyuttā sukhumālapādā. **Gahessatī**ti kilamathavinodanathāya ko gaṇhissati. **Dāsīdāsassā**ti dāsīyā dāso assa. **Añño vā pana pesiyoti** tassapi dāso, tassapi dāsoti evaṃ dāsapatidāsaparamparāya ‘‘yo mayhaṃ catuttho pesiyo pesanakārako assa, tassa evaṃ suvihīnassapi ayaṃ vessantarassa dāsapatidāso’’ti ñatvā. **Ko lajjī**ti ko lajjāsampanno pahareyya, yuttaṃ nu kho tassa nillajjassa mama putte paharītunti. **Vārijassevā**ti kumināmukhe baddhassa macchasseva sato mama. **Apassatoti a-kāro** nipātamatto, passantasseva piyaputte akkosati ceva paharati ca, aho vata dāruṇoti.

Athassa kumāresu sinehena evaṃ parivittakko udapādi ‘‘ayaṃ brāhmaṇo mama putte ativiya vihettheti, sokaṃ sandhāretuṃ na sakkomi, brāhmaṇaṃ anubandhitvā jīvitakkhayaṃ pāpetvā ānessāmi te kumāre’’ti. Tato ‘‘aṭṭhānametaṃ kumārānaṃ piḷanaṃ atidukkhanti dānaṃ datvā pacchānutappaṃ nāma sataṃ dhammo na hotī’’ti cintesi. Tadatthajotanaṃ imā dve parivittakkagāthā nāma honti –

**2158:** ‘Adu cāpaṃ gahetvāna, khaggaṃ bandhiya vāmato;  
Ānessāmi sake putte, puttānañhi vadho dukho.

**2159:** ‘Aṭṭhānametaṃ dukkharūpaṃ, yaṃ kumārā vihaññare;  
Satañca dhammamaññāya, ko datvā anutappatī’’ti.

Tattha **satanti** pubbabodhisattānaṃ paveṇidhammaṃ.

So kira tasmim̐ khaṇe bodhisattānaṃ paveṇim̐ anussari. Tato ‘‘sabbabodhisattānaṃ dhanapariccāgaṃ, aṅgapariccāgaṃ, puttapariccāgaṃ, bhariyapariccāgaṃ, jīvitapariccāganti ime pañca mahāpariccāge apariccājitvā buddhabhūtapubbo nāma natthi. Ahampi tesam̐ abbhantaro homi, mayāpi piyaputtadhītarō adatvā na sakkā buddhena bhavitu’’nti cintetvā ‘‘kiṃ tvaṃ vessantara paresaṃ dāsathāya dinnaputtānaṃ dukkhabhāvaṃ na jānāsi, yena brāhmaṇaṃ anubandhitvā jīvitakkhayaṃ pāpessāmīti saññaṃ uppādesi, dānaṃ datvā pacchānutappo nāma tava nānurūpo’’ti evaṃ attānaṃ paribhāsītva ‘‘sacepi eso kumāre māressati, dinnakālato paṭṭhāya mama na kiñci hotī’’ti daḷhasamādānaṃ adhiṭṭhāya paṇṇasālato nikkhamitvā paṇṇasāladvāre pāsāṇaphalake kañcanapaṭimā viya nisīdi. Jūjakopi bodhisattassa sammukhe kumāre pothetvā neti. Tato kumāro vilapanto āha –

**2160:** ‘Saccaṃ kirevamāhaṃsu, narā ekacchīyā idha;  
Yassa natthi sakā mātā, yathā natthi tatheva so.

**2161:** ‘Ehi kaṇhe marissāma, natthattho jīvitena no;  
Dinnamhāti janindena, brāhmaṇassa dhanesino;  
Accāyikassa luddassa, yo no gāvova sumbhati.

**2162:** ‘Ime te jambukā rukkhā, vedisā sinduvāarakā;  
Vividhāni rukkhajātāni, tāni kaṇhe jahāmase.

**2163:** ‘Assatthā panasā ceme, nigrodhā ca kapitthanā;  
Vividhāni phalajātāni, tāni kaṇhe jahāmase.

**2164:** ‘Ime tiṭṭhanti ārāmā, ayaṃ sītūdakā nadī;  
Yatthassu pubbe kīlāma, tāni kaṇhe jahāmase.

**2165:** ‘Vividhāni pupphajātāni, asmim̐ uparipabbate;  
Yānassu pubbe dhārema, tāni kaṇhe jahāmase.

**2166:** ‘Vividhāni phalajātāni, asmim̐ uparipabbate;  
Yānassu pubbe bhujjāma, tāni kaṇhe jahāmase.

**2167:** ‘Ime no hatthikā assā, balibaddā ca no ime;  
Yehissu pubbe kīlāma, tāni kaṇhe jahāmase’’ti.

Tattha **yassāti** yassa santike sakā mātā natthi. Pitā atthi, yathā natthiyeva.

Puna brāhmaṇo ekasmim̐ visamaṭṭhāne pakkhalitvā pati. Tesam̐ hatthato bandhanavalli mucchitvā gatā. Te pahaṭakukkuṭā viya kampantā palāyitvā ekavegeneva pitu santikaṃ āgamim̐su. Tamattham̐ pakāsento sathā āha –

**2168:** ‘Nīyamānā kumārā te, brāhmaṇassa pamuñciya;  
Tena tena padhāvim̐su, jālī kaṇhājīnā cubho’’ti.

Tattha **tena tenāti** tena muttakhaṇena yena disābhāgena tesam̐ pitā atthi, tena padhāvim̐su, padhāvitvā pitu santikaññeva āgamim̐sūti attho.

Jūjako vegenuṭṭhāya vallidaṇḍahattho kappuṭṭhānaggi viya avattharanto āgantvā ‘‘ativiya palāyitum̐ chekā tumhe’’ti hatthe bandhitvā puna nesi. Tamattham̐ pakāsento sathā āha –

**2169:** ‘Tato so rajjumādāya, daṇḍañcādāya brāhmaṇo;  
Ākoṭayanto te neti, sivrājassa pekkhato’’ti.

Evam̐ nīyamānesu kaṇhājīnā nivattitvā oloketī pitarā saddhim̐ sallapi. Tamattham̐ pakāsento sathā āha –

**2170:** ‘Taṃ taṃ kaṇhājīnāvoca, ayaṃ maṃ tāta brāhmaṇo;  
Laṭṭhiyā paṭikoṭeti, ghare jātaṃva dāsiyaṃ.

**2171:** ‘Na cāyaṃ brāhmaṇo tāta, dhammikā honti brāhmaṇā;  
Yakkho brāhmaṇavaṇṇena, khāditum̐ tāta neti no;  
Nīyamāne pisācena, kiṃ nu tāta udikkhasī’’ti.

Tattha **tanti** taṃ passamānaṃ nisinnaṃ pitarāṃ sivrājānaṃ. **Dāsiyanti** dāsikaṃ. **Khāditunti** khādanatthāya ayaṃ no giridvāraṃ asampattheyeva ubhoḥi cakkhūhi rattalohitabindum̐ paggharantehi khādissāmīti neti, tvañca khāditum̐ vā pacitum̐ vā nīyamāne kiṃ amhe udikkhasī, sabbadā sukhito hohīti paridevi.



Daharakumārikāya vilapantiyā kampamānāya gacchantiyā mahāsattassa balavasoko uppajji, hadayavatthu uṇhaṃ ahosi. Nāsikāya appahontiyā mukhena uṇhe assāsapassāse vissajjesi. Assūni lohitabindūni hutvā nettehi nikkhamiṃsu. So “idaṃ evarūpaṃ dukkhaṃ sinehadosena jātaṃ, na aññaena kāraṇena. Sinehaṃ akatvā majjhatteneva bhavitaṃ”nti tathārūpaṃ sokaṃ attano ñāṇabalena vinodetvā pakatinisinnākāreṇeva nisīdi. Giridvāraṃ asampattāyeva kumārikā vilapantī agamāsi.

2172: “Ime no pādakā dukkhā, dīgho caddhā suduggamo;  
Nīce colambate sūriyo, brāhmaṇo ca dhāreti no.

2173: “Okandāmase bhūtāni, pabbatāni vanāni ca;  
Sarassa sirasā vandāma, supatitthe ca āpake.

2174: “Tiṇalatāni osadhyo, pabbatāni vanāni ca;  
Amaṃ ārogyaṃ vajjātha, ayaṃ no neti brāhmaṇo.

2175: “Vajjantu bhonto ammañca, maddiṃ asmāka mātaraṃ;  
Sace anupatitukāmāsi, khippaṃ anupatīyāsi no.

2176: “Ayaṃ ekapadī eti, ujum gacchati assamaṃ;  
Tamevānupateyyāsi, api passesi ne lahuṃ.

2177: “Aho vata re jaṭinī, vanamūlaphalahārike;  
Suññaṃ disvāna assamaṃ, taṃ te dukkhaṃ bhavissati.

2178: “Ativelaṃ nu ammāya, uñchā laddho anappako;  
Yā no baddhe na jānāsi, brāhmaṇena dhanesinā.

2179: “Accāyikena luddena, yo no gāvova sumbhati;  
Apajja ammaṃ passemu, sāyaṃ uñchāto āgataṃ.

2180: “Dajjā ammā brāhmaṇassa, phalaṃ khuddena missitaṃ;  
Tadāyaṃ asito dhāto, na bālhaṃ dhārayeyya no.

2181: “Sūnā ca vata no pādā, bālhaṃ dhāreti brāhmaṇo;  
Iti tattha vilapiṃsu, kumārā mātugiddhino”ti.

Tattha **pādakā**ti khuddakapādā. **Okandāmase**ti avakandāma, apacitiṃ nīcavuttiṃ dassentā jānāpema. **Sarassā**ti imassa padumasarassa pariggāhakāneva nāgakulāni sirasā vandāma. **Supatitthe ca āpake**ti supatitthāya nadiyā adhivatthā devatāpi vandāma. **Tiṇalatānī**ti tiṇāni ca olambakalatāyo ca. **Osadhyo**ti osadhiyo. Sabbattha adhivatthā devatā sandhāyevamāha. **Anupatitukāmāsi**ti sacepi sā amhākaṃ padānupadaṃ āgantukāmāsi. **Api passesi ne lahanti**ti api nāma etāya ekapadiyā anupatamānā puttake te lahuṃ passeyyāsīti evaṃ taṃ vadeyyāthāti. **Jaṭinī**ti baddhajaṭaṃ ārabha mātaraṃ parammukhālapanena ālapantī āha. **Ativelanti**ti pamāṇātikantaṃ katvā. **Uñchā**ti uñchācariyāya. **Phalanti**ti vanamūlaphalāphalaṃ. **Khuddena missitanti**ti khuddakamadhunā missitaṃ. **Asitoti**ti asitāsano paribhuttaphalo. **Dhātoti**ti suhito. **Na bālhaṃ dhārayeyya notī**ti na no bālhaṃ vegena nayeyya. **Mātugiddhinoti**ti mātari giddhena samannāgatā balavasinehā evaṃ vilaviṃsūti.

Dārapabbavaṇṇanā niṭṭhitā.

**Maddīpabbavaṇṇanā**

Yaṃ pana taṃ rañña pathaviṃ unnādetvā brāhmaṇassa piyaputtesu dinnesu yāva brahmalokā ekakolāhalaṃ jātaṃ, tenapi bhijjamānahadaya viya himavantavāsino devā tesam brāhmaṇena niyamānaṃ taṃ vilāpaṃ sutvā mantayiṃsu “sace maddī kālasseva assamaṃ āgamissati, tattha puttake adisvā vessantaraṃ pucchitvā brāhmaṇassa dinnabhāvaṃ sutvā balavasinehena padānupadaṃ dhāvitvā mahantaṃ dukkhaṃ anubhaveyyā”ti. Atha te tayo devaputte “tumhe sīhabyagghadīpiveve nimminivā deviyā āgamanamaggaṃ sannirumbhitvā yāciyamānāpi yāva sūriyatthaṅgamanā maggaṃ adatvā yathā candālokena assamaṃ pavisissati, evamassā sīhādīnampi aviheṭṭhanatthāya ārakkhaṃ susaṃvihitaṃ kareyyāthā”ti āṇāpesuṃ. Tamatthaṃ pakāsento satthā āha –

**2182:**“Tesam lālippitaṃ sutvā, tayo vāḷā vane migā;  
Sīho byaggho ca dīpi ca, idaṃ vacanamabravuṃ.

**2183:**“Mā heva no rājaputtī, sāyaṃ uñchāto āgamā;  
Mā hevamhāka nibbhoge, heṭṭhayittha vane migā.

**2184:**“Sīho ce naṃ viheṭṭheyya, byaggho dīpi ca lakkhaṇaṃ;  
Neva jālikumārassa, kuto kaṇhājīnā siyā;  
Ubhayeneva jīyetha, patim putte ca lakkhaṇā”ti.

Tattha **idaṃ vacanamabravunti** “tumhe tayo janā sīho ca byaggho ca dīpi cāti evaṃ tayo vāḷā vane migā hothā”ti idaṃ tā devatā tayo devaputte vacanamabravuṃ. **Mā heva noti** maddī rājaputtī uñchāto sāyaṃ mā āgami, candālokena sāyaṃ āgacchatūti vadanti. **Mā hevamhāka nibbhogeti** amhākaṃ nibbhoge vijite vanaghaṭṭayaṃ mā naṃ kocipi vane vāḷamigo viheṭṭhesi. Na yathā viheṭṭheti, evamassā ārakkhaṃ gaṇhathāti vadanti. **Sīho ce nanti** sace hi taṃ anārakkhaṃ sīhādīsu koci viheṭṭheyya, athassā jīvitakkhayaṃ pattāya neva jālikumāro assa, kuto kaṇhājīnā siyā. Evaṃ sā lakkhaṇasampannā **ubhayeneva jīyetha patim putte cāti** dvīhi koṭṭhāsehi jīyetheva, tasmā susaṃvihitamassā ārakkhaṃ karoṭhāti.

Atha te tayo devaputtā “sādhū”ti tāsam devatānaṃ taṃ vacanaṃ paṭissuṇitvā sīhabyagghadīpino hutvā āgantvā tassā āgamanamagge paṭipāṭiyā nipajjiṃsu. Maddīpi kho “ajja mayā dussupino diṭṭho, kālasseva mūlaphalāphalaṃ gahetvā assamaṃ gamissāmī”ti kampamānā mūlaphalāphalāni upadhāresi. Athassā hatthato khaṇṭṭi pati, tathā aṃsato uggīvañca pati, dakkhiṇakkhica phandati, phalino rukkhā aphaḷā viya aphaḷā ca phalino viya khāyiṃsu, dasa disā na paññāyiṃsu. Sā “kiṃ nu kho idaṃ, pubbe abhūtapubbaṃ ajja me hoti, kiṃ bhavissati, mayhaṃ vā antarāyo bhavissati, mama puttānaṃ vā, udāhu vessantarassā”ti cintetvā āha –

**2185:**“Khaṇṭṭikaṃ me patitaṃ, dakkhiṇakkhi ca phandati;  
Aphaḷā phalino rukkhā, sabbā muyhanti me disā”ti.

Evaṃ sā paridevantī pakkāmi.

**2186:**“Tassā sāyanhakālasmiṃ, assamāgamaṃ pati;  
Atthaṅgataṃhī sūriye, vāḷā panthe upaṭṭhahuṃ.

**2187:**“Nīce colambate sūriyo, dūre ca vata assamo;  
Yañca nesam ito hassam, taṃ te bhuñjeyyu bhojanaṃ.

**2188:**“So nūna khattiyō eko, paṇṇasālāya acchati;  
Tosento dārake chāte, mamaṃ disvā anāyatim.

**2189:**“Te nūna puttakā mayhaṃ, kapaṇāya varākiyā;

Sāyaṃ saṃvesanākāle, khīrapītāva acchare.

**2190:**“Te nūna puttakā mayhaṃ, kapaṇāya varākiyā;  
Sāyaṃ saṃvesanākāle, vāripītāva acchare.

**2191:**“Te nūna puttakā mayhaṃ, kapaṇāya varākiyā;  
Paccuggatā maṃ tiṭṭhanti, vacchā bālāva mātaraṃ.

**2192:**“Te nūna puttakā mayhaṃ, kapaṇāya varākiyā;  
Paccuggatā maṃ tiṭṭhanti, haṃsāvuparipallale.

**2193:**“Te nūna puttakā mayhaṃ, kapaṇāya varākiyā;  
Paccuggatā maṃ tiṭṭhanti, assamassāvidūrato.

**2194:**“Ekāyano ekapatho, sarā sobbhā ca passato;  
Aññaṃ maggaṃ na passāmi, yena gaccheyya assamaṃ.

**2195:**“Migā namatthu rājāno, kānanasmim mahabbalā;  
Dhammena bhātaro hotha, maggaṃ me detha yācitā.

**2196:**“Avaruddhassāhaṃ bhariyā, rājaputtassa sirīmato;  
Taṃ cāhaṃ nātimaññaṃ, rāmaṃ sītāvanubbatā.

**2197:**“Tumhe ca putte passatha, sāyaṃ saṃvesanaṃ pati;  
Ahañca putte passeyyaṃ, jāliṃ kaṇhājinaṃ cubho.

**2198:**“Bahū cidāṃ mūlaphalaṃ, bhakkho cāyaṃ anappako;  
Tato upaḍḍhaṃ dassāmi, maggaṃ me detha yācitā.

**2199:**“Rājaputtī ca no mātā, rājaputto ca no pitā;  
Dhammena bhātaro hotha, maggaṃ me detha yācitā”ti.

Tattha **tassāti** tassā mama. **Assamāgamaṇaṃ patīti** assamaṃ paṭicca sandhāya āgacchantiyā. **Upaṭṭhahanti** utṭhāya ṭhitā. Te kira paṭhamaṃ paṭipāṭiyā nipajjitvā tāya āgamanakāle utṭhāya vijambhitvā maggaṃ rumbhantā paṭipāṭiyā tiriyaṃ aṭṭhaṃsu. **Yañca tesanti** ahañca yaṃ ito mūlaphalāphalaṃ tesam harissaṃ, tameva vessantaro ca ubho puttakā cāti te tayopi janā bhuñjeyyūṃ, aññaṃ tesam bhojanaṃ natthi. **Anāyatinti** anāgacchantiṃ maṃ ñatvā ekakova nūna dārake tosentō nisinno. **Saṃvesanākāleti** aññesu divasesu attano khādāpanapivāpanakāle **khīrapītāvāti** yathā khīrapītā migapotakā khīratthāya kanditvā taṃ alabhivā kandantāva niddaṃ okkamanti, evaṃ me puttakā phalāphalatthāya kanditvā taṃ alabhivā kandantāva niddaṃ upagatā bhavissantīti vadati.

**Vāripītāvāti** yathā pipāsītā migapotakā pānīyatthāya kanditvā taṃ alabhivā kandantāva niddaṃ okkamantīti imināva nayena attho vedītabbo. **Acchareti** acchanti. **Paccuggatā maṃ tiṭṭhantīti** maṃ paccuggatā hutvā tiṭṭhanti. “Paccuggantunā”tipi pāṭho, paccuggantvāti attho. **Ekāyanoti** ekasseva ayano ekapadikamaggo. **Ekapathoti** so ca ekova, dutiyo natthi, okkamitvā gantuṃ na sakkā. Kasmā? Yasmā sarā sobbhā ca passato. **Migā namatthūti** sā aññaṃ maggaṃ adisvā “ete yācitvā paṭikkamāpessāmi”ti phalapacchiṃ sīsato otāretvā añjalim paggayha namassamānā evamāha. **Bhātaroti** ahampi manussarājaputtī, tumhīpi migarājaputtā, iti me dhammena bhātaro hotha.

**Avaruddhassāti** raṭṭhato pabbājitassa. **Rāmaṃ sītāvanubbatāti** yathā dasaratharājaputtaṃ rāmaṃ tassa kaniṭṭhabhaginī sītādevī tasseva aggamaheṣī hutvā taṃ anubbatā patidevatā hutvā appamattā

upaṭṭhāsi, tathā ahampi vessantaraṃ upaṭṭhahāmi, nātimaññāmīti vadati. **Tumhe cāti** tumhe ca mayhaṃ maggaṃ datvā sāyaṃ gocaraggahaṇakāle putte passatha, ahañca attano putte passeyyaṃ, detha me magganthi yācāti.

Atha te tayo devaputtā velaṃ oloketvā “idānissā maggaṃ dātum velā”ti ñatvā uṭṭhāya apagacchimsu. Tamatthaṃ pakāsento satthā āha –

**2200:**“Tassā lālappamānāya, bahuṃ kāruññasañhitam;  
Sutvā nelapatiṃ vācaṃ, vālā panthā apakkamu”nti.

Tattha **nelapatinti** na elapatiṃ elapātavirahitaṃ visaṭṭhaṃ madhuravācaṃ.

Sāpi vālesu apagatesu assamaṃ agamāsi. Tadā ca puñṇamuposatho hoti. Sā caṅkamanakoṭiṃ patvā yesu yesu ṭhānesu pubbe putte passati, tesu tesu ṭhānesu apassantī āha –

**2201:**“Imamhi naṃ padesamhi, puttakā paṃsukuṇṭhitā;  
Paccuggatā maṃ tiṭṭhanti, vacchā bālāva mātaraṃ.

**2202:**“Imamhi naṃ padesamhi, puttakā paṃsukuṇṭhitā;  
Paccuggatā maṃ tiṭṭhanti, haṃsāvuparipallale.

**2203:**“Imamhi naṃ padesamhi, puttakā paṃsukuṇṭhitā;  
Paccuggatā maṃ tiṭṭhanti, assamassāvidūrato.

**2204:**“Dve migā viya ukkaṇṇā, samantā mabhidhāvino;  
Ānandino pamuditā, vaggamānāva kampare;  
Tyajja putte na passāmi, jāliṃ kaṇhājinaṃ cubho.

**2205:**“Chakalīva migī chāpaṃ, pakkhī muttāva pañjarā;  
Ohāya putte nikkhamiṃ, sīhīvāmisagiddhinī;  
Tyajja putte na passāmi, jāliṃ kaṇhājinaṃ cubho.

**2206:**“Idaṃ nesaṃ padakkantaṃ, nāgānamiva pabbate;  
Citakā parikiṇṇāyo, assamassāvidūrato;  
Tyajja putte na passāmi, jāliṃ kaṇhājinaṃ cubho.

**2207:**“Vālikāyapi okiṇṇā, puttakā paṃsukuṇṭhitā;  
Samantā abhidhāvanti, te na passāmi dārake.

**2208:**“Ye maṃ pure paccuṭṭhenti, araññā dūramāyatim;  
Tyajja putte na passāmi, jāliṃ kaṇhājinaṃ cubho.

**2209:**“Chakaliṃva migiṃ chāpā, paccuggantuna mātaraṃ;  
Dūre maṃ pavilokenti, te na passāmi dārake.

**2210:**“Idaṃ nesaṃ kīḷanakaṃ, patitaṃ paṇḍubeluvaṃ;  
Tyajja putte na passāmi, jāliṃ kaṇhājinaṃ cubho.

**2211:**“Thanā ca mayhime pūrā, uro ca sampadālati;  
Tyajja putte na passāmi, jāliṃ kaṇhājinaṃ cubho.

2212: ‘Ucchaṅgeko vicināti, thanamekāvalambati;  
Tyajja putte na passāmi, jāliṃ kaṇhājinam cubho.

2213: ‘Yassu sāyanhasamayam, puttakā paṃsukuṇṭhitā;  
Ucchaṅge me vivattanti, te na passāmi dārake.

2214: ‘Ayaṃ so assamo pubbe, samajjo paṭibhāti maṃ;  
Tyajja putte apassantyā, bhamate viya assamo.

2215: ‘Kimidaṃ appasaddova, assamo paṭibhāti maṃ;  
Kākolāpi na vassanti, matā me nūna dārakā.

2216: ‘Kimidaṃ appasaddova, assamo paṭibhāti maṃ;  
Sakuṇāpi na vassanti, matā me nūna dārakā’ ti.

Tattha **nanti** nipātamattaṃ. **Paṃsukuṇṭhitāti** paṃsumakkhitā. **Paccuggatā manti** maṃ paccuggatā hutvā. ‘Paccuggantunā’ tipī pāṭho, paccuggantvāicceva attho. **Ukkaṇṇāti** yathā migapotakā mātaram disvā kaṇṇe ukkhipitvā gīvaṃ pasāretvā mātaram upagantvā haṭṭhatuṭṭhā samantā abhidhāvino. **Vaggamānāva kampareti** vajjamānāyeva mātu hadayamaṃsaṃ kamenti viya evaṃ pubbe mama puttā. **Tyajjāti** te ajja na passāmi. **Chakalīva migī chāpanti** yathā chakalī ca migī ca pañjarasaṅkhātā kulāvakā muttā pakkhī ca āmisagiddhinī sīhī ca attano chāpaṃ ohāya gocarāya pakkamanti, tathāhampi ohāya putte gocarāya nikkhaminti vadati. **Idaṃ nesam padakkantanti** vassāratte sānupabbate nāgānaṃ padavalañjaṃ viya idaṃ nesam kīlanatṭhāne ādhāvanaparidhāvanapadakkantaṃ paññāyati. **Citakāti** sañcitanicitā kavālukapuñjā. **Parikiṇṇāyoti** vippakiṇṇāyo. **Samantā mabhidhāvanti** aññesu divasesu samantā abhidhāvanti.

**Paccuṭṭhentīti** paccuggacchanti. **Dūramāyatīti** dūrato āgacchantiṃ. **Chakaliṃva migiṃ chāpāti** attano mātaram chakaliṃ viya migiṃ viya ca chāpā. **Idaṃ nesam kīlanakanti** hatthirūpakādīhi kīlantānaṃ idaṅca tesam hatthato suvaṇṇavaṇṇaṃ kīlanabeluvaṃ parigaḷitvā patitaṃ. **Mayhimeti** mayhaṃ ime thanā ca khīrassa pūrā. **Uro ca sampadālatīti** hadayaṅca phalati. **Ucchaṅge me vivattanti** mama ucchaṅge āvattanti vivattanti. **Samajjo paṭibhāti manti** samajjaṭṭhānaṃ viya mayhaṃ upaṭṭhāti. **Tyajjāti** te ajja. **Apassantyāti** apassantiyā mama. **Bhamate viyāti** kulālacakkaṃ viya bhamati. **Kākolāti** vanakākā. **Matā nūnāti** addhā matā vā kenaci nītā vā bhavissanti. **Sakuṇāti** avasesasakuṇā.

Iti sā vilapantī mahāsattassa santikaṃ gantvā phalapacchiṃ otāretvā mahāsattaṃ tuṇhimāsīnaṃ disvā dārake cassa santike apassanti āha –

2217: ‘Kimidaṃ tuṇhibhūtosī, api ratteva me mano;  
Kākolāpi na vassanti, matā me nūna dārakā.

2218: ‘Kimidaṃ tuṇhibhūtosī, api ratteva me mano;  
Sakuṇāpi na vassanti, matā me nūna dārakā.

2219: ‘Kacci nu me ayyaputta, migā khādiṃsu dārake;  
Araññe iriṇe vivane, kena nītā me dārakā.

2220: ‘Adu te pahitā dūtā, adu sutṭā piyaṃvadā;  
Adu bahī no nikkhantā, khiḍḍāsu pasutā nu te.

2221: ‘Nevāsaṃ kesā dissanti, hatthapādā ca jālino;

Sakuṇānañca opāto, kena nītā me dārakā’’ti.

Tattha **api ratteva me manoti** api balavapaccūse supinaṃ passantiyā viya me mano. **Migāti** sīhādayo vālamigā. **Iriṇeti** niroje. **Vivaneti** vivitte. **Dūtāti** adu jetuttaranagare sivirañño santikaṃ tayā dūtā katvā pesitā. **Suttāti** antopaṇṇasālaṃ pavisitvā sayitā. **Adu bahi noti** adu te dārakā khiḍḍāpasutā hutvā bahi nikkhantāti pucchati. **Nevāsaṃ kesā dissantīti** sāmi vessantara, neva tesāṃ kālañjanavaṇṇā kesā dissanti. **Jālinoti** kañcanajālavicittā hatthapādā. **Sakuṇānañca opātoti** himavantapadesa hatthiliṅgasakuṇā nāma atthi, te opatitvā ādāya ākāseneva gacchanti. Tena taṃ pucchāmi ‘‘kiṃ tehi sakuṇehi nītā, ito aññesampi kesañci tesāṃ sakuṇānaṃ viya opāto jāto, akkhāhi, kena nītā me dārakā’’ti?

Evam vuttepi mahāsatto na kiñci āha. Atha naṃ sā ‘‘deva, kasmā mayā saddhiṃ na kathesi, ko mama doso’’ti vatvā āha –

**2222:** ‘‘Idaṃ tato dukkhatarāṃ, sallaviddho yathā vaṇo;  
Tyajja putte na passāmi, jāliṃ kaṇhājinaṃ cubho.

**2223:** ‘‘Idampi dutiyaṃ sallaṃ, kampeti hadayaṃ mama;  
Yañca putte na passāmi, tvañca maṃ nābhibhāsasi.

**2224:** ‘‘Ajjeva me imaṃ rattim, rājaputta na saṃsati;  
Maññe okkantasantaṃ maṃ, pāto dakkhisi no mata’’nti.

Tattha **idaṃ tato dukkhataranti** sāmi vessantara, yaṃ mama raṭṭhā pabbājītāya araññe vasantiyā putte ca apassantiyā dukkhaṃ, idaṃ tava mayā saddhiṃ akathanāṃ mayhaṃ tato dukkhatarāṃ. Tvañhi maṃ aggidaḍḍhaṃ paṭidahanto viya papātā patitaṃ daṇḍena pothento viya sallena vaṇaṃ vijjhanto viya tuṇhībhāvena kilamesi. Idañhi me hadayaṃ sallaviddho yathā vaṇo tatheva kampati ceva rujati ca. ‘‘Sampaviddho’’tipi pātho, sampatividdhoti attho. **Okkantasantaṃ manti** apagatajīvitaṃ maṃ. **Dakkhisi no matanti** ettha **no-kāro** nipātamatto, mataṃ maṃ kālasseva tvaṃ passissasīti attho.

Atha mahāsatto ‘‘kakkhaḷakathāya naṃ puttasaṃsāraṃ jahāpessāmī’’ti cintetvā imaṃ gāthamāha –

**2225:** ‘‘Nūna maddī varārohā, rājaputtī yasassinī;  
Pāto gatāsi uñchāya, kimidaṃ sāyamāgatā’’ti.

Tattha **kimidaṃ sāyamāgatāti** ‘‘maddi, tvaṃ abhirūpā pāsādikā, himavante ca nāma bahū vanacarakā tāpasavijjādharādayo vicaranti. Ko jānāti, kiṃ bhavissati, kiñci tayā kataṃ, tvaṃ pātova gantvā kimidaṃ sāyamāgacchasi, daharakumārake ohāya araññagatitthiyo nāma sasāmikitthiyo evarūpā na honti, ‘kā nu kho me dārakānaṃ pavatti, kiṃ vā me sāmiko cintessati’’ti ettakampi te nāhosi. Tvaṃ pātova gantvā candālokena āgacchasi, mama duggatabhāvasseseva doso’’ti tajjetvā vañcetvā kathesi.

Sā tassa kathaṃ sutvā āha –

**2226:** ‘‘Nanu tvaṃ saddamassosi, ye saraṃ pātumāgatā;  
Sīhassapi nadantassa, byagghassa ca nikujjitaṃ.

**2227:** ‘‘Ahu pubbanimittaṃ me, vicarantīyā brahāvane;  
Khañitto me hatthā patito, uggīvañcāpi aṃsato.

**2228:** ‘‘Tadāhaṃ byathitā bhītā, puthu katvāna añjaliṃ;  
Sabbadisā namassissaṃ, api sotthi ito siyā.

2229: ‘Mā heva no rājaputto, hato sīhena dīpinā;  
Dārakā vā parāmaṭṭhā, acchakokataracchihi.

2230: ‘Sīho byaggho ca dīpi ca, tayo vāḷā vane migā;  
Te maṃ pariyāvaruṃ maggaṃ, tena sāyamhi āgatā’’ti.

Tattha **ye saraṃ pātumāgatā**ti ye pānīyaṃ pātuṃ imaṃ saraṃ āgatā. **Byagghassa cāti** byagghassa ca aññesaṃ hatthiādīnaṃ catuppadānañceva sakuṇasaṅghassa ca nikūjitaṃ ekaninnādasaddaṃ kiṃ tvaṃ na assosīti pucchati. So pana mahāsattena puttānaṃ dinnavelāya saddo ahosi. **Ahu pubbanimittaṃ meti** deva, imassa me dukkhassa anubhavanatthāya pubbanimittaṃ ahosi. **Uggivanti** aṃsakūṭe pacchilagganakaṃ. **Puthūti** visuṃ visuṃ. **Sabbadisā namassissanti** sabbā dasa disā namassim. **Mā heva noti** amhākaṃ rājaputto sīhādīhi hato mā hotu, dārakāpi acchādīhi parāmaṭṭhā mā hontūti patthayantī namassissaṃ. **Te maṃ pariyāvaruṃ maggantī** sāmi vessantara, ahaṃ ‘‘imāni ca bhīsanakāni mahantāni, dussupino ca me diṭṭho, ajja sakālasseva gamissāmī’’ti kampamānā mūlaphalāphalāni upadhāresim, atha me phalitarukkhāpi aphaḷā viya aphaḷā ca phalīno viya dissanti, kicchena phalāphalāni gahetvā giridvāraṃ sampāpuṇim. Atha te sīhādayo maṃ disvā maggaṃ paṭipāṭiyā rumbhitvā aṭṭhaṃsu. Tena sāyaṃ āgatāmhi, khamāhi me, sāmīti.

Mahāsatto tāya saddhiṃ ettakameva kathaṃ vatvā yāva aruṇuggamanā na kiñci kathesi. Tato paṭṭhāya maddī nānappakāraṃ vilapantī āha –

2231: ‘Ahaṃ patiṅca putte ca, āceramiva māṇavo;  
Anuṭṭhitā divārattim, jaṭinī brahmacārinī.

2232: ‘Ajināni paridahitvā, vanamūlaphalahāriyā;  
Vicarāmi divārattim, tumhaṃ kāmā hi puttakā.

2233: ‘Ahaṃ suvaṇṇahaliddim, ābhatam paṇḍubeluvaṃ;  
Rukkhapakkāni cāhāsim, ime vo putta kīḷanā.

2234: ‘Imaṃ mūḷālivattakaṃ, sālukaṃ ciñcabhedakaṃ;  
Bhuñja khuddehi saṃyuttaṃ, saha puttehi khattiya.

2235: ‘Padumaṃ jālino dehi, kumudañca kumāriyā;  
Māline passa naccante, sivi puttāni avhaya.

2236: ‘Tato kaṇhājīnāyapi, nisāmehi rathesabha;  
Mañjussarāya vagguyā, assamaṃ upayantiyā.

2237: ‘Samānasukhadukkhamaḥā, raṭṭhā pabbājītā ubho;  
Api sivi putte passesi, jālim kaṇhājīnaṃ cubho.

2238: ‘Samaṇe brāhmaṇe nūna, brahmacariyaparāyaṇe;  
Ahaṃ loke abhissapim, sīlavante bahussute;  
Tyajja putte na passāmi, jālim kaṇhājīnaṃ cubho’’ti.

Tattha **āceramiva māṇavoti** vattasampanno antevāsiko ācariyaṃ viya paṭijaggati. **Anuṭṭhitāti** pāricariyānuṭṭhānena anuṭṭhitā appamattā hutvā paṭijaggāmi. **Tumhaṃ kāmāti** tumhākaṃ kāmēna tumhe patthayantī. **Puttakāti** kumāre ālapantī paridevati. **Suvaṇṇahaliddinti** puttakā ahaṃ tumhākaṃ nhāpanatthāya suvaṇṇavaṇṇaṃ haliddim ghaṃsitvā ādāya āgatā. **Paṇḍubeluvanti** kīḷanatthāya ca vo idaṃ suvaṇṇavaṇṇaṃ beluvapakkam mayā ābhatam. **Rukkhapakkānīti** tumhākaṃ kīḷanatthāya

aññānīpi manāpāni rukkhaphalāni āhāsiṃ. **Ime voti** puttakā ime vo kīlanāti vadati. **Mūlālivattakanti** mūlālakuṇḍalakam. **Sālūkanti** idaṃ uppalādisālūkampi me bahu ābhatam. **Ciñcabhedakanti** siṅghātakam. **Bhuñjāti** idaṃ sabbam khuddamadhunā saṃyuttam puttehi saddhiṃ bhuñjāhīti paridevati. **Sivi puttāni avhayāti** sāmi sivrāja, paṇṇasālāya sayāpitaṭṭhānato siṅgham puttake pakkosāhi. **Api sivi putte passesīti** sāmi sivrāja, api putte passasi, sace passasi, mama dassehi, kiṃ maṃ ativiya kilamesi. **Abhissapinti** tumhākam puttadhītarō mā passitthāti evaṃ nūna akkosinti.

Evaṃ vilapamānāyapi tāya saddhiṃ mahāsatto na kiñci kathesi. Sā tasmīṃ akathente kampamānā candālokena putte vicināntī yesu yesu jamburukkhādīsu pubbe kīlīṃsu, tāni tāni patvā paridevantī āha –

**2239:** ‘Ime te jambukā rukkhā, vedisā sinduvārakā;  
Vividhāni rukkhajātāni, te kumārā na dissare.

**2240:** ‘Assathā panasā ceme, nigrodhā ca kapitthanā;  
Vividhāni phalajātāni, te kumārā na dissare.

**2241:** ‘Ime tiṭṭhanti ārāmā, ayaṃ sītūdakā nadī;  
Yatthassu pubbe kīlīṃsu, te kumārā na dissare.

**2242:** ‘Vividhāni pupphajātāni, asmīṃ uparipabbate;  
Yānassu pubbe dhāriṃsu, te kumārā na dissare.

**2243:** ‘Vividhāni phalajātāni, asmīṃ uparipabbate;  
Yānassu pubbe bhuñjiṃsu, te kumārā na dissare.

**2244:** ‘Ime te hatthikā assā, balibaddā ca te ime;  
Yehissu pubbe kīlīṃsu, te kumārā na dissare’’ti.

Tattha **ime te hatthikāti** sā pabbatūpari dārake adisvā paridevamānā tato oruyha puna assamapadam āgantvā tattha te upadhārentī tesam kīlanabhaṇḍakāni disvā evamāha.

Athassā paridevanasaddena ceva padasaddena ca migapakkhino caliṃsu. Sā te disvā āha –

**2245:** ‘Ime sāmā sasolūkā, bahukā kadalīmigā;  
Yehissu pubbe kīlīṃsu, te kumārā na dissare.

**2246:** ‘Ime haṃsā ca koñcā ca, mayūrā citrapekhuṇā;  
Yehissu pubbe kīlīṃsu, te kumārā na dissare’’ti.

Tattha **sāmāti** khuddakā sāmā suvaṇṇamigā. **Sasolūkāti** sasā ca ulūkā ca.

Sā assamapade piyaputte adisvā nikkhamitvā pupphitavanaghaṭam pavisitvā tam tam ṭhānam oloketī āha –

**2247:** ‘Imā tā vanagumbāyo, pupphitā sabbakālikā;  
Yatthassu pubbe kīlīṃsu, te kumārā na dissare.

**2248:** ‘Imā tā pokkharāṇī rammā, cakkavākūpakūjitā;  
Mandālakehi sañchannā, padumuppalakehi ca;  
Yatthassu pubbe kīlīṃsu, te kumārā na dissare’’ti.



Tattha **vanagumbāyoti** vanaghaṭāyo.

Sā katthaci piyaputte adisvā puna mahāsattassa santikaṃ āgantvā taṃ dummukhaṃ nisinnaṃ disvā āha –

**2249:** ‘Na te kaṭṭhāni bhinnāni, na te udakamāhaṭaṃ;  
Aggipi te na hāpito, kiṃ nu mandova jhāyasi.

**2250:** ‘Piyo piyena saṅgama, samo me byapahaññati;  
Tyajja putte na passāmi, jāliṃ kaṇhājinaṃ cubho’’ti.

Tattha **na hāpitoti** na jalito. Idaṃ vuttaṃ hoti – sāmi, tvaṃ pubbe kaṭṭhāni bhindasi, udakaṃ āharitvā ṭhapesi, aṅgārapalle aggiṃ karosi, ajja tesu ekampi akatvā kiṃ nu mandova jhāyasi, tava kiriyā mayhaṃ na rucchatī. **Piyo piyenāti** vessantaro mayhaṃ piyo, ito me piyataro natthi, iminā me piyena saṅgama samāgantvā pubbe samo me byapahaññati dukkhaṃ vigacchati, ajja pana me imaṃ passantiyāpi soko na vigacchati, kiṃ nu kho kāraṇanti. **Tyajjāti** hotu, diṭṭhaṃ me kāraṇaṃ, te ajja putte na passāmi, tena me imaṃ passantiyāpi soko na vigacchatī.

Tāya evaṃ vuttepi mahāsatto tuṅhībhūtova nisīdi. Sā tasmim akathente sokasamappitā pahaṭakukkuṭī viya kampamānā puna paṭhamam vicaritaṭṭhānāni vicarivā mahāsattassa santikaṃ paccāgantvā āha –

**2251:** ‘Na kho no deva passāmi, yena te nīhatā matā;  
Kākolāpi na vassanti, matā me nūna dārakā.

**2252:** ‘Na kho no deva passāmi, yena te nīhatā matā;  
Sakuṇāpi na vassanti, matā me nūna dārakā’’ti.

Tattha **na kho noti** deva, na kho amhākaṃ putte passāmi. **Yena te nīhatāti** kenaci tesam nīhatabhāvampi na jānāmīti adhippāyenevamāha.

Evaṃ vuttepi mahāsatto na kiñci kathesiyeva. Sā puttasokena phuṭṭhā putte upadhārentī tatiyampi tāni tāni ṭhānāni vātavegena vicari. Tāya ekarattiṃ vicaritaṭṭhānaṃ pariggayhamānaṃ pannarasayojanamattaṃ ahoṣi. Atha ratti vibhāsi, aruṇodayo jāto. Sā puna gantvā mahāsattassa santike ṭhitā paridevi. Tamatthaṃ pakāsento satthā āha –

**2253:** ‘Sā tattha paridevitvā, pabbatāni vanāni ca;  
Punadevassamaṃ gantvā, rodi sāmikasantike.

**2254:** ‘Na kho no deva passāmi, yena te nīhatā matā;  
Kākolāpi na vassanti, matā me nūna dārakā.

**2255:** ‘Na kho no deva passāmi, yena te nīhatā matā;  
Sakuṇāpi na vassanti, matā me nūna dārakā.

**2256:** ‘Nu kho no deva passāmi, yena te nīhatā matā;  
Vicarantī rukkhamūlesu, pabbatesu guhāsu ca.

**2257:** ‘Iti maddī varārohā, rājaputtī yasassinī;  
Bāhā paggayha kanditvā, tattheva patitā chamā’’ti.

Tattha **sāmikasantiketi** bhikkhave, sā maddī tattha vaṅkapabbatakucchiyaṃ sānupabbatāni vanāni ca vicarantī paridevitvā puna gantvā sāmikaṃ nissāya tassa santike ʘhitā puttānaṃ atthāya rodi, “na kho no”tiādīni vadantī paridevīti attho. **Iti maddī varārohā**ti bhikkhave, evaṃ sā uttamarūpadharā varārohā maddī rukkhamūlādīsu vicarantī dārake adīsvā “nissaṃsayāṃ matā bhavissantī”ti bāhā paggayha kandītvā tattheva vessantarassa pādamūle chinnaṣuvaṇṇakadalī viya chamāyaṃ pati.

Atha mahāsatto “matā maddī”ti saññāya kampamāno “aṭṭhāne padese matā maddī. Sace hissā jetuttaranagare kālakiriyā abhaviṣṣa, mahanto parivāro abhaviṣṣa, dve raṭṭhāni caleyyuṃ. Ahaṃ pana araṅṅe ekakova, kiṃ nu kho karissāmī”ti uppannalavasokopi satīṃ paccupaṭṭhāpetvā “jānissāmi tāvā”ti uṭṭhāya tassā hadaye hatthaṃ ʘhapetvā santāpapavattīṃ ṇatvā kamaṇḍalunā udakaṃ āharitvā satta māse kāyasāṃsaggaṃ anāpannapubbopi balavasokena pabbajitabhāvaṃ sallakkhetuṃ asakkonto assupuṇṇehi nettehi tassā sīsaṃ ukkhipitvā ūrusu ʘhapetvā udakena parippositvā mukhaṅca hadayaṅca parimajjanto nisīdi. Maddīpi kho thokaṃ vītināmetvā satīṃ paṭilabhītvā hīrottappaṃ paccupaṭṭhāpetvā uṭṭhāya mahāsattaṃ vandītvā “sāmi vessantara, dārakā te kuhiṃ gatā”ti āha. “Devi, ekassa brāhmaṇassa dāsathāya dinnā”ti. Tamatthaṃ pakāseto satthā āha –

**2258:**“Tamajjhappattaṃ rājaputtīṃ, udakenābhisiṅcatha;  
Assatthaṃ naṃ vidītvāna, atha naṃ etadabravī”ti.

Tattha **ajjhappattanti** attano santikaṃ pattaṃ, pādamūle patītvā visaññibhūtanti attho. **Etadabravīti** etaṃ “ekassa me brāhmaṇassa dāsathāya dinnā”ti vacanaṃ abravi.

Tato tāya “deva, putte brāhmaṇassa datvā mama sabbarattīṃ paridevitvā vicarantiyā kiṃ nācikkhasī”ti vutte mahāsatto āha –

**2259:**“Ādiyeneva te maddi, dukkhaṃ nakkhātumicchisaṃ;  
Daliddo yācako vuḍḍho, brāhmaṇo gharamāgato.

**2260:**“Tassa dinnā mayā puttā, maddi mā bhāyi assasa;  
Maṃ passa maddi mā putte, mā bālhaṃ paridevasi;  
Lacchāma putte jīvantā, arogā ca bhavāmase.

**2261:**“Putte pasuṅca dhaññaṅca, yaṅca aññaṃ ghare dhanāṃ;  
Dajjā sappuriso dānaṃ, disvā yācakamāgataṃ;  
Anumodāhi me maddi, puttake dānamuttama”nti.

Tattha **ādiyenevā**ti ādikeneva. Idaṃ vuttaṃ hoti – sace te ahaṃ āditova tamatthaṃ ācikkhissaṃ, tato tava sokaṃ sandhāretuṃ asakkontiyā hadayaṃ phaleyya, tasmā ādikeneva te maddi dukkhaṃ na akkhātuṃ icchissanti. **Gharamāgatoti** imaṃ amhākaṃ vasanaṭṭhānaṃ āgato. **Arogā ca bhavāmaseti** yathā tathā mayaṃ arogā homa, jīvamānā avassaṃ putte brāhmaṇena nītepi passissāma. **Yaṅca aññanti** yaṅca aññaṃ ghare savīññākaṃ dhanāṃ. **Dajjā sappuriso dānanti** sappuriso uttamatthaṃ patthento uraṃ bhindītvā hadayaṃsaṃsāpi gahetvā dānaṃ dadeyyāti.

Maddī āha –

**2262:**“Anumodāmi te deva, puttake dānamuttamaṃ;  
Datvā cittaṃ pasādehi, bhīyyo dānaṃ dado bhava.

**2263:**“Yo tvaṃ maccherabhūtesu, manussesu janādhipa;  
Brāhmaṇassa adā dānaṃ, sivīnaṃ raṭṭhavaḍḍhanaṃ”ti.

Tattha **anumodāmi teti** dasa māse kucchiyā dhāretvā divasassa dvattikkhattuṃ nhāpetvā pāyevā bhojetvā ure nipajjāpetvā paṭijaggitaputtakesu bodhisattena dinnesu sayaṃ puttadānaṃ anumodantī evamāha. Iminā kāraṇena jānitabbaṃ “pitāva puttānaṃ sāmiko”ti. **Bhiyyo dānaṃ dado bhavāti** mahārāja, uttaripi punappunaṃ dānaṃ dāyakova hohi, “sudinnaṃ me dāna”nti cittaṃ pasādehi, yo tvaṃ maccherabhūtesu sattesu piyaputte adāsīti.

Evam vutte mahāsatto “maddi, kinnāmetam kathesi, sace hi mayā putte datvā cittaṃ pasādetuṃ nābhavissa, imāni pana me acchariyāni na pavatteyyu”nti vatvā sabbāni pathavininnādādāni kathesi. Tato maddī tāni acchariyāni kittetvā dānaṃ anumodantī āha –

**2264:** ‘Ninnādītā te pathavī, saddo te tidivaṅgato;  
Samantā vijjutā āguṃ, girīnaṃva patissutā’ ti.

Tattha **vijjutā āgunti** akālavijjulātā himavantapadese samantā nicchariṃsu. **Girīnaṃva patissutāti** girīnaṃ patissutasaddā viya viravā uṭṭhahiṃsu.

**2265:** ‘Tassa te anumodanti, ubho nāradapabbatā;  
Indo ca brahmā pajāpati, somo yamo vessavaṇo;  
Sabbe devānumodanti, tāvatimsā saindakā.

**2266:** ‘Iti maddī varārohā, rājaputtī yasassinī;  
Vessantarassa anumodī, puttake dānamuttama’nti.

Tattha **ubho nāradapabbatāti** imepi dve devanikāyā attano vimānadvāre ṭhitāva “sudinnaṃ te dāna”nti anumodanti. **Tāvatimsā saindakāti** indajetṭhakā tāvatimsāpi devā te dānaṃ anumodantīti.

Evam mahāsattena attano dāne vaṇṇite tamevatthaṃ parivattetvā “mahārāja vessantara, sudinnaṃ nāma te dāna”nti maddīpi tatheva dānaṃ vaṇṇayitvā anumodamānā nisīdi. Tena sathā “iti maddī varārohā”ti gāthamāha.

Maddīpabbavaṇṇanā niṭṭhitā.

### Sakkapabbavaṇṇanā

Evam tesu aññamaññaṃ sammodanīyaṃ kathaṃ kathentesu sakko cintesi “ayaṃ vessantaro rājā hiyyo jūjakassa pathaviṃ unnādetvā dārake adāsī, idāni taṃ koci hīnapuriso upasaṅkamitvā sabbalakkhaṇasampannaṃ maddiṃ yācitvā rājānaṃ ekakaṃ katvā maddiṃ gahetvā gaccheyya, tato esa anātho nippaccayo bhavēyya. Ahaṃ brāhmaṇavaṇṇena naṃ upasaṅkamitvā maddiṃ yācitvā pāramikūtaṃ gāhāpetvā kassaci avissajjiyaṃ katvā puna naṃ tasseva datvā āgamissāmī”ti. So sūriyuggamanavelāya tassa santikaṃ agamāsī. Tamatthaṃ pakāsento sathā āha –

**2267:** ‘Tato ratyā vivasāne, sūriyassuggamaṃ pati;  
Sakko brāhmaṇavaṇṇena, pāto tesam adissathā’ ti.

Tattha **pāto tesam adissathāti** pātova nesaṃ dvinnampi janānaṃ paññāyamānarūpo purato aṭṭhāsī, ṭhatvā ca pana paṭisanthāraṃ karonto āha –

**2268:** ‘Kacci nu bhoto kusalaṃ, kacci bhoto anāmayam;  
Kacci uñchena yāpetha, kacci mūlaphalā bahū.

**2269:** ‘Kacci ḍamsā makasā ca, appameva sarīsapā;

Vane vālamigākiṇṇe, kacci hiṃsā na vijjati’’ti.

Mahāsatto āha –

**2270:**‘Kusalañceva no brahme, atho brahme anāmayam;  
Atho uñchena yāpema, atho mūlaphalā bahū.

**2271:**‘Atho ḍaṃsā makasā ca, appameva sarīsapā;  
Vane vālamigākiṇṇe, hiṃsā mayham na vijjati.

**2272:**‘Satta no māse vasatam, araññe jīvasokinam;  
Idam dutiyam passāma, brāhmaṇam devavaṇṇinam;  
Ādāya veḷuvam daṇḍam, dhārentam ajinakkhipam.

**2273:**‘Svāgataṃ te mahābrahme, atho te adurāgataṃ;  
Anto pavisa bhaddante, pāde pakkhālayassu te.

**2274:**‘Tindukāni piyālāni, madhuke kāsumāriyo;  
Phalāni khuddakappāni, bhuñja brahme varam varam.

**2275:**‘Idampi pānīyam sītam, ābhatam girigabbharā;  
Tato piva mahābrahme, sace tvam abhikaṅkhasi’’ti.

Evam tena saddhiṃ paṭisanthāram katvā mahāsatto –

**2276:**‘Atha tvam kena vaṇṇena, kena vā pana hetunā;  
Anupatto brahāraññaṃ, tam me akkhāhi pucchito’’ti. –

Āgamanakāraṇam pucchi. Atha nam sakko ‘‘mahārāja, aham mahallako, idhāgacchanto tava bhariyam maddiṃ yācituṃ āgato, tam me dehi’’ti vatvā imam gāthamāha –

**2277:**‘Yathā vārivaho pūro, sabbakālam na khīyati;  
Evam tam yācitāgacchiṃ, bhariyam me dehi yācito’’ti.

Evam vutte mahāsatto ‘‘hiyyo me brāhmaṇassa dārakā dinnā, araññe ekako hutvā katham te maddiṃ dassāmi’’ti avatvā pasāritahatthe sahasatthavikam ṭhapento viya asajjitvā abajjhivā anolīnamānaso hutvā giriṃ unnādentō imam gāthamāha –

**2278:**‘Dadāmi na vikampāmi, yam mam yācasi brāhmaṇa;  
Santam nappaṭiguyhāmi, dāne me ramatī mano’’ti.

Tattha **santam nappaṭiguyhāmīti** samvijjamānam na guyhāmi.

Evañca pana vatvā sīghameva kamaṇḍalunā udakam āharitvā udakam hatthe pātetvā piyabhariyam brāhmaṇassa adāsi. Taṅkhaṇeyeva heṭṭhā vuttappakārāni sabbāni acchariyāni pāturaheṣuṃ. Tamattham pakāsento satthā āha –

**2279:**‘Maddiṃ hatthe gahetvāna, udakassa kamaṇḍaluṃ;  
Brāhmaṇassa adā dānam, sivīnam raṭṭhavaḍḍhano.

**2280:**‘Tadāsi yam bhimsanakam, tadāsi lomahamsanam;

Maddiṃ pariccajantassa, medanī sampakampatha.

**2281:** ‘Nevassa maddī bhākuṭi, na sandhīyati na rodati;  
Pekkhatevassa tuṅhī sā, eso jānāti yaṃ vara’nti.

Tattha **adā dānanti** ‘‘ambho brāhmaṇa, maddito me sataguṇena sahasaguṇena satasahasaguṇena sabbaññutaññānameva piyataraṃ, idaṃ me dānaṃ sabbaññutaññāṇappaṭivedhassa paccayo hotū’’ti vatvā dānaṃ adāsi vuttampi cetam –

‘‘Jāliṃ kaṇhājinaṃ dhītaṃ, maddiṃ deviṃ patibbatam;  
Cajamāno na cintesiṃ, bodhiyāyeva kāraṇā.

‘‘Na me dessā ubho puttā, maddī devī na dessiyā;  
Sabbaññutaṃ piyaṃ mayhaṃ, tasmā piye adāsaha’’nti. (cariyā. 1.118-119);

Tattha **sampakampathā**ti pathavī udakapariyantaṃ katvā kampittha. **Nevassa maddī bhākuṭi**ti bhikkhave, tasmīṃ khaṇe maddī ‘‘maṃ mahallakassa brāhmaṇassa rājā detī’’ti kodhavasena bhākuṭipi nāhosi. **Na sandhīyati na rodati**ti neva maṅku ahosi, na akkhīni pūretvā rodati, atha kho tuṅhī sā hutvā ‘‘mādisaṃ itthiratanam dadamāno na nikkāraṇā dassati, eso yaṃ varam, taṃ jānātī’’ti phullapadumavaṇṇaṃ assa mukhaṃ **pekkhateva**, olokayamānāva ṭhitāti attho.

Atha mahāsatto ‘‘kīdisā maddī’’ti tassā mukhaṃ olokesi. Sāpi ‘‘sāmi kiṃ maṃ olokesī’’ti vatvā sīhanādaṃ nadantī imaṃ gāthamāha –

**2282:** ‘Komārī yassāhaṃ bhariyā, sāmiko mama issaro;  
Yassicche tassa maṃ dajjā, vikkiṇeyya haneyya vā’’ti.

Tattha **komārī yassāhaṃ bhariyā**ti ahaṃ yassa tava daharikā bhariyā, so tvaññeva mama issaro sāmiko. **Yassicche tassā**ti issaro ca nāma dāsiṃ maṃ yassa dātuṃ iccheyya, tassa dadeyya. **Vikkiṇeyya vā**ti dhanena vā atthe satī vikkiṇeyya, maṃsena vā atthe satī haneyya, tasmā yaṃ vo ruccati, taṃ karotha, nāhaṃ kujjhāmīti.

Sakko tesam paṇītajjhāsayataṃ viditvā thutiṃ akāsi. Tamatthaṃ pakāsento sathā āha –

**2283:** ‘Tesaṃ saṅkappamaññāya, devindo etadabravi;  
Sabbe jitā te paccūhā, ye dībbā ye ca mānūsā.

**2284:** ‘Ninnādītā te pathavī, saddo te tidivaṅgato;  
Samantā vijjutā āguṃ, girīnaṃva patissutā.

**2285:** ‘Tassa te anumodanti, ubho nāradapabbatā;  
Indo ca brahmā pajāpati, somo yamo vessavaṇo;  
Sabbe devānumodanti, dukkarañhi karoti so.

**2286:** ‘Duddadaṃ dadamānānaṃ, dukkaraṃ kamma kubbatam;  
Asanto nānukubbanti, sataṃ dhammo durannayo.

**2287:** ‘Tasmā satañca asataṃ, nānā hoti ito gati;  
Asanto nirayaṃ yanti, santo saggaparāyaṇā.

**2288:** ‘Yametaṃ kumāre adā, bhariyaṃ adā vane vasam;

Brahmayānamanokkamma, sagge te taṃ vipaccatū’’ti.

Tattha **paccūhā**ti paccatthikā. **Dibbā**ti dibbasampattiṭṭipāṭibāhakā. **Mānusā**ti manussasampattiṭṭipāṭibāhakā. Ke pana teti? Macchariyadhammā. Te sabbe puttadāraṃ dentena mahāsattena jitā. Tenāha ‘‘sabbe jitā te paccūhā’’ti. **Dukkarañhi karoti soti** so vessantaro rājā ekakova araññe vasanto bhariyaṃ brāhmaṇassa dento dukkaraṃ karotīti evaṃ sabbe devā anumodantīti vadati. ‘‘**Yameta**’’nti gāthaṃ anumodanaṃ karonto āha. **Vane vasanti** vane vasanto. **Brahmayānanti** seṭṭhayānaṃ. Tividho hi sucaritadhammo evarūpo ca dānadhammo ariyamaggassa paccayo hotīti ‘‘brahmayāna’’nti vuccati. Tasmā yaṃ taṃ idaṃ ajja dānaṃ dadatopi nipphannaṃ brahmayānaṃ apāyabhūmiṃ anokkamitvā sagge te taṃ vipaccatu, vipākāpariyosāne ca sabbaññutaññāṇadāyakaṃ hotūti.

Evamassa sakko anumodanaṃ katvā ‘‘idāni mayā idha papañcaṃ akatvā imaṃ imasseva datvā gantūṃ vaṭṭati’’ti cintetvā āha –

**2289:** ‘‘Dadāmi bhoto bhariyaṃ, maddiṃ sabbaṅgasobhanaṃ;  
Tvañceva maddiyā channo, maddī ca patinā saha.

**2290:** ‘‘Yathā payo ca saṅkho ca, ubho samānavañṇino;  
Evaṃ tuvañca maddī ca, samānamanacetasā.

**2291:** ‘‘Avaruddhettha araññasmim, ubho sammatha assame;  
Khattiyā gottasampannā, sujātā mātupettito;  
Yathā puññāni kayirātha, dadantā aparāpara’’nti.

Tattha **channoti** anurūpo. **Ubho samānavañṇinoti** samānavañṇā ubhopi parisuddhāyeva. **Samānamanacetasā**ti ācārādīhi kammehi samānena manasaṅkhātena cetasā samannāgatā. **Avaruddhetthā**ti raṭṭhato pabbājita hutvā ettha araññe vasatha. **Yathā puññānī**ti yathā jetuttaranagare vo bahūni puññāni katāni, hiyyo puttānaṃ ajja bhariyāya dānavasenaṃ katānīti ettakeneva paritosāṃ akatvā ito uttaripi aparāparaṃ dadantā yathānurūpāni puññāni kareyyāthāti.

Evañca pana vatvā sakko mahāsattassa maddiṃ paṭicchāpetvā varam dātūṃ attānaṃ ācikkhanto āha –

**2292:** ‘‘Sakkohamasmi devindo, āgatosmi tavantike;  
Varam varassu rājisi, vare aṭṭha dadāmi te’’ti.

Kathentoyeva ca dibbatabhāvena jalanto taruṇasūriyo viya ākāse aṭṭhāsi. Tato bodhisatto varam gaṇhanto āha –

**2293:** ‘‘Varam ce me ado sakka, sabbabhūtānamissara;  
Pitā maṃ anumodeyya, ito pattaṃ sakaṃ gharaṃ;  
Āsana nimanteyya, paṭhametaṃ varam vare.

**2294:** ‘‘Purisassa vadhaṃ na roceyyaṃ, api kibbisakāraṃ;  
Vajjhaṃ vadhamhā moceyyaṃ, dutiyetaṃ varam vare.

**2295:** ‘‘Ye vuḍḍhā ye ca daharā, ye ca majjhimaporisā;  
Mameva upajīveyyūṃ, tatiyetaṃ varam vare.

**2296:** ‘‘Paradāraṃ na gaccheyyaṃ, sadārapasuto siyaṃ;

Thīnaṃ vasaṃ na gaccheyyaṃ, catutthetaṃ varaṃ vare.

**2297:** ‘Putto me sakka jāyetha, so ca dīghāyuko siyā;  
Dhammena jine pathaviṃ, pañcametaṃ varaṃ vare.

**2298:** ‘Tato ratyā vivasāne, sūriyassuggamaṃ pati;  
Dibbā bhakkhā pātubhaveyyuṃ, chaṭṭhametaṃ varaṃ vare.

**2299:** ‘Dadato me na khīyetha, datvā nānutapeyyahaṃ;  
Dadaṃ cittaṃ pasādeyyaṃ, sattametaṃ varaṃ vare.

**2300:** ‘Ito vimuccamānāhaṃ, saggagāmī visesagū;  
Anivatti tato assaṃ, aṭṭhametaṃ varaṃ vare’ ti.

Tattha **anumodeyyāti** sampañccheyya na kujjheyya. **Ito pattanti** imamhā araññā sakaṃ gharaṃ anuppattaṃ. **Āsanenāti** rājāsanena. Rajjaṃ me detūti vadati. **Api kibbisakārakanti** rājā hutvā rājāparādhikampi vajjhaṃ vadhamhā moceyyaṃ, evarūpassapi me vadho nāma na ruccatu. **Mameva upajīveyyunti** sabbete maññeva nissāya upajīveyyūṃ. **Dhammena jineti** dhammena jinātu, dhammena rajjaṃ kāretūti attho. **Visesagūti** visesagamano hutvā tusitapure nibbato homīti vadati. **Anivatti tato assanti** tusitabhavanato cavitvā manussattaṃ āgato punabhava anivatti assaṃ, sabbaññutaṃ sampāpuṇeyyanti vadati.

**2301:** ‘Tassa taṃ vacanaṃ sutvā, devindo etadabravi;  
‘Aciraṃ vata te tato, pitā taṃ daṭṭhumessatī’ ti.

Tattha **daṭṭhumessatīti** mahārāja, tava mātā ca pitā ca acireneva taṃ passitukāmo hutvā idhāgamissati, āgantvā ca pana setacchattaṃ datvā rajjaṃ niyyādetvā jetuttaranagaraṃ meva nessati, sabbe te manorathā matthakaṃ pāpuṇissanti, mā cintayi, appamatto hohi, mahārājāti.

Evam mahāsattassa ovādaṃ datvā sakko sakaṭṭhānameva gato. Tamatthaṃ pakāsento satthā āha –

**2302:** ‘Idaṃ vatvāna maghavā, devarājā sujampati;  
Vessantare varaṃ datvā, saggakāyaṃ apakkamī’ ti.

Tattha **vessantareti** vessantarassa. **Apakkamīti** gato anuppattoyevāti.

Sakkapabbavaṇṇanā niṭṭhitā.

### Mahārājapabbavaṇṇanā

Bodhisatto ca maddī ca sammodamānā sakkadattiye assame vasiṃsu. Jūjakopi kumāre gahetvā satṭhiyojanamaggaṃ paṭipajji. Devatā kumārānaṃ ārakkhamakaṃsu. Jūjakopi sūriye atthaṅgate kumāre gacche bandhitvā bhūmiyaṃ nipajjāpetvā sayaṃ caṇḍavālamigabhayena rukkaṃ āruya viṭapantare sayati. Tasmim̐ khaṇe eko devaputto vessantaravaṇṇena, ekā devadhītā maddivaṇṇena āgantvā kumāre mocetvā hatthapāde sambāhitvā nhāpetvā maṇḍetvā dibbabhojanaṃ bhojetvā dibbasayane sayāpetvā aruṇuggamanakāle baddhākāreneva nipajjāpetvā antaradhāyi. Evaṃ te devatāsaṅgahena arogā hutvā gacchanti. Jūjakopi devatādhiggahito hutvā ‘‘kāliṅgaratṭhaṃ gacchāmī’’ ti gacchanto aḍḍhamāseṇa jetuttaranagaraṃ patto. Taṃ divasaṃ paccūsakāle sañjayo mahārājā supinaṃ passi. Evarūpo supino ahosi – rañño mahāvinicchaye nisinnassa eko puriso kaṇho dve padumāni āharitvā rañño hatthe ṭhapesi. Rājā tāni dvīsu kaṇhesu piḷandhi. Tesam̐ reṇu bhassitvā rañño ure patati. So pabujjhitvā pātova brāhmaṇe pucchi. Te ‘‘cirapavutthā vo, deva, bandhavā āgamissanti’’ ti byākariṃsu. So pātova sīsaṃ

nhāyitvā nānaggarasabhojanaṃ bhuñjitvā alaṅkaritvā vinicchaye nisīdi. Devatā brāhmaṇaṃ dvīhi kumārehi saddhiṃ ānetvā rājaṅgaṇe ṭhapayimsu. Tasmim̐ khaṇe rājā maggaṃ olokeno kumāre disvā āha –

**2303:** ‘Kassetam̐ mukhamābhāti, hemaṃ-vuttattamagginā;  
Nikkhamva jātarūpassa, ukkā mukhapahaṃsitam̐.

**2304:** ‘Ubho sadisapaccāṅgā, ubho sadisalakkhaṇā;  
Jālissa sadiso eko, ekā kaṇhājinā yathā.

**2305:** ‘Sīhā bilāva nikkhantā, ubho sampatirūpakā;  
Jātarūpamayāyeva, ime dissanti dārakā’ ti.

Tattha **hemaṃvuttattamagginā**ti hemaṃ iva uttattam̐ agginā. **Sīhā** bilāva nikkhantāti kañcanaguhato nikkhantā sīhā viya.

Evam̐ rājā tīhi gāthāhi kumāre vaṇṇetvā ekaṃ amaccaṃ āṇāpesi ‘‘gacchetam̐ brāhmaṇaṃ dārakehi saddhiṃ ānehi’’ti. So vegena gantvā brāhmaṇaṃ ānesi. Atha rājā brāhmaṇaṃ āha –

**2306:** ‘Kuto nu bhavaṃ bhāradvāja, ime ānesi dārake;  
Ajja raṭṭham̐ anuppatto, kuhiṃ gacchasi brāhmaṇā’ ti.

Jūjako āha –

**2307:** ‘Mayham̐ te dārakā deva, dinnā vittena sañjaya;  
Ajja pannarasā ratti, yato laddhā me dārakā’ ti.

Tattha **vittena**ti tuṭṭhena pasannena. **Ajja pannarasā rattī**ti imesaṃ laddhadivasato paṭṭhāya ajja pannarasā rattīti vadati.

Rājā āha –

**2308:** ‘Kena vā vācāpeyyena, sammāñāyena saddahe;  
Ko tetam̐ dānamadadā, puttake dānamuttama’ nti.

Tattha **kena vā vācāpeyyena**ti brāhmaṇa, kena piyavacanena te tayā laddhā. **Sammāñāyena saddahe**ti musāvādaṃ akatvā sammāñāyena kāraṇena amhe saddahāpeyyāsi. **Puttaket**ti attano piyaputtake uttamaṃ dānaṃ katvā ko te etaṃ dānaṃ adadāti.

Jūjako āha –

**2309:** ‘Yo yācataṃ paṭiṭṭhāsi, bhūtānaṃ dharaṇīriva;  
So me vessantaro rājā, puttedāsi vane vasam̐.

**2310:** ‘Yo yācataṃ gatī āsi, savantīnaṃva sāgaro;  
So me vessantaro rājā, puttedāsi vane vasa’ nti.

Tattha **paṭiṭṭhāsī**ti paṭiṭṭhā āsi.

Tam̐ sutvā amaccā vessantaram̐ garahamānā āhaṃsu –



**2311:**“Dukkaṭaṃ vata bho raññā, saddhena gharamesinā;  
Kathaṃ nu puttake dajjā, araññe avaruddhako.

**2312:**“Imaṃ bhonto nisāmetha, yāvattettha samāgatā;  
Kathaṃ vessantaro rājā, puttedāsi vane vasaṃ.

**2313:**“Dāsiṃ dāsañca so dajjā, assaṃ cassatarīrathaṃ;  
Hatthiñca kuñjaraṃ dajjā, kathaṃ so dajja dārake’’ti.

Tattha **saddhenā**ti saddhāya sampannenapī satā gharaṃ āvasantena raññā idaṃ dukkaṭaṃ vata, ayuttaṃ vata kataṃ. **Avaruddhakoti** raṭṭhā pabbājito araññe vasanto. **Imaṃ bhontoti** bhonto nagaravāsino yāvanto ettha samāgatā, sabbe imaṃ nisāmetha upadhāretha, kathaṃ nāmeso puttake dāse katvā adāsi, kena nāma evarūpaṃ katapubbanti adhippāyenevamāhaṃsu. **Dajjāti** dāsādīsu yaṃ kiñci dhanam detu. **Kathaṃ so dajja dāraketi** ime pana dārake kena kāraṇena adāsīti.

Taṃ sutvā kumāro pitu garaṃ asahanto vātābhihatassa sineruno bāhaṃ oḍḍento viya imaṃ gāthamāha –

**2314:**“Yassa nassa ghare dāso, asso cassatarīratho;  
Hatthī ca kuñjaro nāgo, kiṃ so dajjā pitāmaha’’ti.

Rājā āha –

**2315:**“Dānamassa pasamsāma, na ca nindāma puttakā;  
Kathaṃ nu hadayaṃ āsi, tumhe datvā vanibbake’’ti.

Tattha **dānamassa pasamsāmāti** puttakā mayaṃ tava pitu dānaṃ pasamsāma na nindāma.

Taṃ sutvā kumāro āha –

**2316:**“Dukkassa hadayaṃ āsi, atho uñhampi passasi;  
Rohiniheva tambakkhī, pitā assūni vattayī’’ti.

Tattha **dukkassa hadayaṃ āsīti** pitāmaha kaṇhājīnāya vuttaṃ etaṃ vacanaṃ sutvā tassa hadayaṃ dukkaṃ āsi. **Rohiniheva tambakkhīti** tambavaṇṇehi viya rattaakkhīhi mama pitā tasmīṃ khaṇe assūni pavattayī.

Idānissā taṃ vacanaṃ dassento āha –

**2317:**“Yaṃ taṃ kaṇhājīnāvoca, ayaṃ maṃ tāta brāhmaṇo;  
Laṭṭhiyā paṭikoṭeti, ghare jātaṃva dāsiyaṃ.

**2318:**“Na cāyaṃ brāhmaṇo tāta, dhammikā honti brāhmaṇā;  
Yakkho brāhmaṇavaṇṇena, khādituṃ tāta neti no;  
Nīyamāne pisācena, kiṃ nu tāta udikkhasī’’ti.

Atha ne kumāre brāhmaṇaṃ amuñcante disvā rājā gāthamāha –

**2319:**“Rājaputtī ca vo mātā, rājaputto ca vo pitā;  
Pubbe me aṅkamāruyha, kiṃ nu tiṭṭhatha ārakā’’ti.

Tattha **pubbe meti** tumhe ito pubbe maṃ disvā vegenāgantvā mama añkamāruyha, idāni kiṃ nu ārakā tiṭṭhathāti?

Kumāro āha –

**2320:** ‘Rājaputtī ca no mātā, rājaputto ca no pitā;  
Dāsā mayaṃ brāhmaṇassa, tasmā tiṭṭhāma ārakā’ ti.

Tattha **dāsā mayanti** idāni pana mayaṃ brāhmaṇassa dāsā bhavāma.

Rājā āha –

**2321:** ‘Mā sammevaṃ avacuttha, ḍayhate hadayaṃ mama;  
Citakāyaṃva me kāyo, āsane na sukhaṃ labhe.

**2322:** ‘Mā sammevaṃ avacuttha, bhiyyo sokaṃ janetha maṃ;  
Nikkiṇissāmi dabbena, na vo dāsā bhavissatha.

**2323:** ‘Kimagghiyañhi vo tāta, brāhmaṇassa pitā adā;  
Yathābhūtaṃ me akkhātha, paṭipādentu brāhmaṇa’ nti.

Tattha **sammāti** piyavacanaṃ. **Citakāyaṃva me kāyoti** idāni mama kāyo aṅgaracitakāyaṃ āropito viya jāto. **Janetha manti** janetha me, ayameva vā pāṭho. **Nikkiṇissāmi dabbena**ti dhanaṃ datvā mocessāmi. **Kimagghiyanti** kiṃ agghaṃ katvā. **Paṭipādentūti** dhanaṃ paṭicchāpentu.

Kumāro āha –

**2324:** ‘Sahassagghañhi maṃ tāta, brāhmaṇassa pitā adā;  
Atha kaṇhājinaṃ kaññaṃ, hatthinā ca satena cā’ ti.

Tattha **sahassagghaṃ hīti** deva, maṃ pitā tadā nikkhasahassaṃ agghāpetvā adāsi. **Atha kaṇhājinanti** kaniṭṭhaṃ pana me kaṇhājinaṃ. **Hatthinā ca satena cāti** hatthīnañca assānañca usabhānañca nikkhānañcāti sabbesaṃ etesaṃ satena antamaso mañcapīṭhapāduke upādāya sabbasatena agghāpesīti.

Rājā kumārānaṃ nikkayaṃ dāpento āha –

**2325:** ‘Uṭṭhehi katte taramāno, brāhmaṇassa avākara;  
Dāsisataṃ dāsasataṃ, gavaṃ hatthusabhaṃ satam;  
Jātarūpasahassañca, puttānaṃ dehi nikkaya’ nti.

Tattha **avākarāti** dehi.

**2326:** ‘Tato kattā taramāno, brāhmaṇassa avākari;  
Dāsisataṃ dāsasataṃ, gavaṃ hatthusabhaṃ satam;  
Jātarūpasahassañca, puttānaṃ dāsi nikkaya’ nti.

Tattha **avākarīti** adāsi. **Nikkayanti** agghassa mūlaṃ.

Evam brāhmaṇassa sabbasatañca nikkhasahassañca kumārānaṃ nikkayaṃ adāsi, sattabhūmikañca pāsādaṃ, brāhmaṇassa parivāro mahā ahoṣi. So dhanaṃ paṭisāmetvā pāsādaṃ abhiruyha

sādurasabhojanam bhuñjivā mahāsayane nipajji. Kumāre sīsam nahāpetvā bhojetvā alaṅkaritvā ekaṃ ayyako, ekaṃ ayyikāti dvepi ucchaṅge upavesesum. Tamattham pakāsentō satthā āha –

2327: ‘Nikkiṇitvā nahāpetvā, bhojayitvāna dārake;  
Samalaṅkaritvā bhaṅgena, ucchaṅge upavesayum.

2328: ‘Sīsam nhāte sucivatthe, sabbābharaṇabhūsite;  
Rājā anke karitvāna, ayyako paripucchatha.

2329: ‘Kuṇḍale ghusite māle, sabbābharaṇabhūsite;  
Rājā anke karitvāna, idaṃ vacanamabravi.

2330: ‘Kacci ubho arogā te, jāli mātāpitā tava;  
Kacci uñchena yāpentī, kacci mūlaphalā bahū.

2331: ‘Kacci ḍamsā makasā ca, appameva sarīsapā;  
Vane vāḷamigākiṅṅe, kacci hiṃsā na vijjati’ ti.

Tattha **kuṇḍaleti** kuṇḍalāni pilandhāpetvā. **Ghusiteti** ugghosite manoramam ravaṃ ravante. **Māletī** pupphāni pilandhāpetvā. **Anke karitvānāti** jālikumāram anke nisīdāpetvā.

Kumāro āha –

2332: ‘Atho ubho arogā me, deva mātāpitā mama;  
Atho uñchena yāpentī, atho mūlaphalā bahū.

2333: ‘Atho ḍamsā makasā ca, appameva sarīsapā;  
Vane vāḷamigākiṅṅe, hiṃsā nesam na vijjati.

2334: ‘Khaṇantālukulambāni, bilāni takkalāni ca;  
Kolaṃ bhallātakam bellaṃ, sā no āhatva posati.

2335: ‘Yañceva sā āharati, vanamūlaphalahāriyā;  
Taṃ no sabbe samāgantvā, rattiṃ bhuñjāma no divā.

2336: ‘Ammāva no kisā paṇḍu, āharantī dumapphalam;  
Vātātapena sukhumālī, padumam hatthagatāmiva.

2337: ‘Ammāya patanū kesā, vicarantiyā brahāvane;  
Vane vāḷamigākiṅṅe, khaggadīpinisevite.

2338: ‘Kesesu jaṭam bandhitvā, kacche jallamadhārayi;  
Cammavāsī chamā seti, jātavedam namassati’ ti.

Tattha **khaṇantālukulambānīti** khaṇantī ālūni ca kalambāni ca. Iminā mātāpitūnam kicchajīvikam vaṇṇeti. **Taṃ notī** ettha **notī** nipātamattam. **Padumam hatthagatāmivāti** hatthena parimadditam padumam viya jātā. **Patanū kesāti** deva, ammāya me mahāvane vicarantiyā te bhamarapattavaṇṇā kālakesā rukkhāsākhādīhi viluttā patanū jātā. **Jallamadhārayīti** ubho hi kacchehi jallam dhāreti, kilīṭṭhavesena vicarātīti.

So evam mātu dukkhitabhāvam kathetvā ayyakam codento imam gāthamāha –

**2339:** ‘Puttā piyā manussānaṃ, lokasmiṃ udapajjisuṃ;  
Na hi nūnamhākaṃ ayyassa, putte sneho ajāyathā’ ti.

Tattha **udapajjisunti** uppajjisū.

Tato rājā attano dosaṃ āvikaronto āha –

**2340:** ‘Dukkaṭaṅga hi no putta, bhūnahaccaṃ kataṃ mayā;  
Yohaṃ sivīnaṃ vacanā, pabbājesimadūsakaṃ.

**2341:** ‘Yaṃ me kiñci idha atthi, dhaṇaṃ dhaññaṅga vijjati;  
Etu vessantaro rājā, sivrattaṃthe pasāsātū’ ti.

Tattha **puttāti** putta jāli etaṃ amhākaṃ dukkaṭaṃ. **Bhūnahaccanti** vuḍḍhighātakammaṃ. **Yaṃ me kiñcīti** tāta, yaṃ me kiñci idha atthi, sabbaṃ te pitu demi. **Sivrattaṃthe pasāsātūti** imasmiṃ nagare so rājā hutvā pasāsātūti.

Kumāro āha –

**2342:** ‘Na deva mayhaṃ vacanā, ehiti siviuttamo;  
Sayameva devo gantvā, siṅga bhogehi atraja’ ti.

Tattha **siviuttamoti** siviṣeṭṭho vessantaro. **Siṅcāti** mahāmegho viya vuṭṭhiyā bhogehi abhisīṅga.

**2343:** ‘Tato senāpatiṃ rājā, sañjayo ajjhabhāsatha;  
Hatthī assā rathā pattī, senā sannāhayantu naṃ;  
Negamā ca maṃ anventu, brāhmaṇā ca purohitā.

**2344:** ‘Tato saṭṭhisahassāni, yodhino cārudassanā;  
Khippamāyantu sannaddhā, nānāvaṇṇehilaṅkatā.

**2345:** ‘Nīlavatthadharā neke, pītāneke nivāsītā;  
Aññe lohitaṅghīsā, suddhāneke nivāsītā;  
Khippamāyantu sannaddhā, nānāvaṇṇehilaṅkatā.

**2346:** ‘Himavā yathā gandhadharo, pabbato gandhamādano;  
Nānārukkhehi sañchanno, mahābhūtagaṇālayo.

**2347:** ‘Osadhehi ca dibbehi, disā bhāti pavāti ca;  
Khippamāyantu sannaddhā, disā bhantu pavantu ca.

**2348:** ‘Tato nāgasahassāni, yojayantu catuddasa;  
Suvaṇṇakacchā mātaṅgā, hemakappanavāsasā.

**2349:** ‘Ārūḷhā gāmaṇīyehi, tomaraṅkusapāṇibhi;  
Khippamāyantu sannaddhā, hatthikkhandhehi dassitā.

**2350:** ‘Tato assasahassāni, yojayantu catuddasa;  
Ājāṇīyāva jātiyā, sindhavā sīghavāhanā.

**2351:** ‘Ārūḷhā gāmaṇīyehi, illiyācāpadhāribhi;

Khippamāyantu sannaddhā, assapiṭṭhehīlankatā.

**2352:**‘Tato rathasahassāni, yojayantu catuddasa;  
Ayo sukatanemiyo, suvaṇṇacitapakkhare.

**2353:**‘Āropentu dhaje tattha, cammāni kavacāni ca;  
Vippāleṇtu ca cāpāni, daḥhadhammā pahāriṇo;  
Khippamāyantu sannaddhā, rathesu rathajīvino’’ti.

Tattha **sannāhayantunanti** sannayhantu. **Saṭṭhisahassānīti** mama puttana sahaḥjātā saṭṭhisahassā amaccā. **Nīlavatthadharā neketi** eke nīlavatthanivāsītā hutvā āyantu. **Mahābhūtagaṇālayoti** bahuyakkhagaṇānaṃ ālayo. **Disā bhantu pavantu cāti** vuttappakāro himavā viya ābharaṇavilepanādīhi obhāsentu ceva pavāyantu ca. **Hatthikkhandhehīti** te hatthigāmaṇino hatthikkhandhehi khippamāyantu. **Dassitāti** dassitavibhūsanā. **Ayo sukatanemiyo** ayena suṭṭhu parikkhittanemiyo. **Suvaṇṇacitapakkhareti** suvaṇṇena khacitapakkhare. Evarūpe cuddasa sahasse rathe yojayantūti vadati. **Vippāleṇtūti** āropentu.

Evam rājā senaṅgaṃ vicāretvā ‘‘puttassa me jetuttaranagarato yāva vaṅkapabbatā aṭṭhusabhavitthāraṃ āgamanamaggaṃ samatalaṃ katvā maggālaṅkāratthāya idaṅcīdaṅca karoṭhā’’ti āṇapento āha –

**2354:**‘Lājā olopiyā pupphā, mālāgandhavilepanā;  
Agghiyāni ca tiṭṭhantu, yena maggena ehiti.

**2355:**‘Gāme gāme satam kumbhā, merayassa surāya ca;  
Maggamhi patitiṭṭhantu, yena maggena ehiti.

**2356:**‘Maṃsā pūvā saṅkuliyo, kummāsā macchasaṃyutā;  
Maggamhi patitiṭṭhantu, yena maggena ehiti.

**2357:**‘Sappi telaṃ dadhi khīraṃ, kaṅgubījā bahū surā;  
Maggamhi patitiṭṭhantu, yena maggena ehiti.

**2358:**‘Ālārikā ca sūdā ca, naṭanaṭṭakagāyino;  
Pāṇissarā kumbhathūṇiyo, mandakā sokajjhāyikā.

**2359:**‘Āhaññantu sabbavīṇā, bheriyo dindimāni ca;  
Kharamukhāni dhamentu, nadantu ekapokkharā.

**2360:**‘Mudiṅgā paṇavā saṅkhā, godhā parivadentikā;  
Dindimāni ca haññantu, kutumpadindimāni cā’’ti.

Tattha **lājā olopiyā pupphāti** lājehi saddhiṃ lājapaṅcamakāni pupphāni okirantānaṃ okiraṇapupphāni paṭiyādeṭhāti āṇapeti. **Mālāgandhavilepanāti** maggavitāne olambakamālā ceva gandhavilepanāni ca. **Agghiyāni cāti** pupphaagghiyāni ceva ratanaagghiyāni ca yena maggena mama putto ehiti, tattha tiṭṭhantu. **Gāme gāmeti** gāmadvāre gāmadvāre. **Patitiṭṭhantūti** pipāsītānaṃ pivanatthāya paṭiyādītā hutvā surāmerayamajjakumbhā tiṭṭhantu. **Macchasaṃyutāti** macchehi saṃyutā. **Kaṅgubījāti** kaṅgupiṭṭhamayā. **Mandakāti** mandakagāyino. **Sokajjhāyikāti** māyākārā, aññepi vā ye keci uppannasokaharaṇasamattā sokajjhāyikāti vuccanti, socante jane attano vaṃsaghosaparamparānaṃ nacce kate nissoke katvā sayāpakāti attho. **Kharamukhānīti** sāmuddikamahāmukhasaṅkhā. **Saṅkhāti** dakkhiṇāvattā muṭṭhisāṅkhā, nālisāṅkhāti dve saṅkhā. Godhā

parivadantikā dindimāni kutumpadindimānīti imānīpi cattāri tūriyāneva.

Evam rājā maggālaṅkāraṇi vicāresi. Jūjakopi pamāṇātikantam bhuñjitvā jīrāpetum asakkonto tattheva kālamakāsi. Rājā tassa sarīrakiccaṃ kārapetvā “nagare koci brāhmaṇassa ñātako atthi, idaṃ gaṇhātū”ti bherim carāpesi. Na kañcissa ñātakaṃ passi, dhanam puna raññoyeva ahoṣi. Atha sattame divase sabbā senā sannipati. Atha rājā mahantena parivārena jālim magganāyakaṃ katvā nikkhami. Tamattham pakāsento satthā āha –

**2361:**“Sā senā mahatī āsi, uyyuttā siviṅghinī;  
Jālinā magganāyena, vaṅkaṃ pāyāsi pabbataṃ.

**2362:**“Koñcaṃ nadati mātango, kuñjaro saṅghihāyano;  
Kacchāya baddhamānāya, koñcaṃ nadati vāraṇo.

**2363:**“Ājānīyā hasiyanti, nemighoso ajāyatha;  
Abbham rājo acchādesi, uyyuttā siviṅghinī.

**2364:**“Sā senā mahatī āsi, uyyuttā hārahārinī;  
Jālinā magganāyena, vaṅkaṃ pāyāsi pabbataṃ.

**2365:**“Te pāvimsu brahāraññaṃ, bahusākhā mahodakaṃ;  
Puppharukkhehi sañchannaṃ, phalarukkhehi cūbhayaṃ.

**2366:**“Tattha bindussarā vaggū, nānavaṇṇā bahū dijā;  
Kūjantamupakūjanti, utusampupphite dume.

**2367:**“Te gantvā dīghamaddhānaṃ, ahorattānamaccaye;  
Padesaṃ taṃ upāgacchum, yattha vessantaro ahū”ti.

Tattha **mahatīti** dvādasaakkhobhaṇisaṅkhātā senā. **Uyyuttāti** payātā. **Koñcaṃ nadatīti** tadā kāliṅgaratṭhavāsino brāhmaṇā attano raṭṭhe deve vuṭṭhe taṃ nāgaṃ āharitvā sañjayassa adamsu. So hatthi “sāmikaṃ vata passitum labhissāmī”ti tuṭṭho koñcanādamakāsi. Taṃ sandhāyetaṃ vuttaṃ. **Kacchāyāti** suvaṇṇakacchāya baddhamānāyapi tussitvā koñcaṃ nadati. **Hasiyantīti** hasasaddamakamsu. **Hārahārinīti** haritabbaharaṇasamatthā. **Pāvimsūti** pavisimsu. **Bahusākhanti** bahurukkhasākhā. **Dīghamaddhānanti** saṅghiyojanamaggaṃ. **Upāgacchunti** yattha vessantaro ahoṣi, taṃ padesaṃ upagatāti.

Mahārājapabbavaṇṇanā niṭṭhitā.

### Chakhattiyakammavaṇṇanā

Jālikumāro mucalindasaratīre khandhāvāraṃ nivāsāpetvā cuddasa rathasahassāni āgatamaggābhimukhāneva ṭhapāpetvā tasmim tasmim padese sīhabyagghadīpiādīsu ārakkhaṃ saṃvidahi. Hatthiādīnaṃ saddo mahā ahoṣi. Atha mahāsatto taṃ saddaṃ sutvā “kiṃ nu kho me paccāmittā mama pitaraṃ ghātetvā mamatthāya āgatā”ti maraṇabhayaabhīto maddim ādāya pabbataṃ āruya senaṃ olokesi. Tamattham pakāsento satthā āha –

**2368:**“Tesaṃ sutvāna nigghosaṃ, bhīto vessantaro ahu;  
Pabbataṃ abhiruhitvā, bhīto senaṃ udikkhati.

**2369:**“Ingha maddi nisāmehi, nigghoso yādiso vane;

Ājānīyā hasiyanti, dhajaggāni ca dissare.

**2370:** ‘Ime nūna araññasmiṃ, migasaṅghāni luddakā;  
Vāgurāhi parikkhippa, sobbhaṃ pātetvā tāvade;  
Vikkosamānā tībbaḥi, hanti nesam varam varam.

**2371:** ‘Yathā mayaṃ adūsakā, araññe avaruddhakā;  
Amittahatthattaṃ gatā, passa dubbalaghātaka’ nti.

Tattha **iṅghāti** codanatthe nipāto. **Nisāmeḥīti** sakasenā vā parasenā vāti olokehi upadhārehi. ‘‘Ime nūna araññasmi’’ ntiādīnaṃ aḍḍhateyyagāthānaṃ evamatthasambandho veditabbo ‘‘maddi yathā araññamhi migasaṅghāni luddakā vāgurāhi parikkhippa atha vā pana sobbhaṃ pātetvā tāvadeva ‘hanatha, are, duṭṭhamige’ ti vikkosamānā tībbaḥi migamāraṇasattīhi nesam migānaṃ varam varam thūlaṃ thūlaṃ hananti, ime ca nūna tatheva amhe asabbhāhi vācāhi vikkosamānā tībbaḥi sattīhi hanissanti, mayaṃca adūsakā araññe avaruddhakā raṭṭhā pabbajitā vane vasāma, evaṃ santepi amittānaṃ hatthattaṃ gatā, passa dubbalaghātaka’’ nti. Evaṃ so maraṇabhayena paridevi.

Sā tassa vacanaṃ sutvā senaṃ oloketvā ‘‘sakasenāya bhavitabba’’ nti mahāsattaṃ assāsenti imaṃ gāthamāha –

**2372:** ‘Amittā nappasāheyyuṃ, aggīva udakaṇṇave;  
Tadeva tvaṃ vicintehi, api sotthi ito siyā’’ ti.

Tattha **aggīva udakaṇṇaveti** yathā tiṇukkādīnaṃ vasena upanīto aggi aṇṇavasāṅkhātāni puthulagambhīrāni udakāni nappasahati, tāpetuṃ na sakkoti, tathā taṃ amittā nappasāheyyuṃ nābhivhavissanti. **Tadevāti** yaṃ sakkena tuyhaṃ varam datvā ‘‘mahārāja, na cirasseva te pitā ehitī’’ ti vuttaṃ, tadeva tvaṃ vicintehi, api nāma ito balakāyato amhākaṃ sotthi siyāti mahāsattaṃ assāsesi.

Atha mahāsatto sokaṃ tanukaṃ katvā tāya saddhiṃ pabbatā oruyha paṇṇasālādvāre nisīdi, itarāpi attano paṇṇasālādvāre nisīdi. Tamatthaṃ pakāsento satthā āha –

**2373:** ‘Tato vessantaro rājā, orohitvāna pabbatā;  
Nisīdi paṇṇasālāyaṃ, daḷhaṃ katvāna mānasa’’ nti.

Tattha **daḷhaṃ katvāna mānasanti** mayaṃ pabbajitā nāma, amhākaṃ ko kiṃ karissatīti thiraṃ hadayaṃ katvā nisīdi.

Tasmiṃ khaṇe sañjāyo rājā devīṃ āmantetvā – ‘‘bhadde, phussati amhesu sabbesu ekato gatesu soko mahā bhavissati, paṭhamaṃ tāva ahaṃ gacchāmi, tato ‘idāni sokaṃ vinodetvā nisinnā bhavissanti’’ ti sallakkhetvā tvaṃ mahantena parivārena āgaccheyyāsi. Atha thokaṃ kālaṃ vītināmetvā jālikāṇhājīnā pacchato āgacchantū’’ ti vatvā rathaṃ nivattāpetvā āgatamaggābhimukhaṃ katvā tattha tattha ārakkhaṃ saṃvidahitvā alaṅkatahatthikkhandhato oruyha puttassa santikaṃ agamāsi. Tamatthaṃ pakāsento satthā āha –

**2374:** ‘Nivattayitvāna rathaṃ, vuṭṭhapetvāna seniyo;  
Ekaṃ araññe viharantaṃ, pitā puttaṃ upāgami.

**2375:** ‘Hatthikkhandhato oruyha, ekaṃso pañjalīkato;  
Parikiṇṇo amaccehi, puttaṃ siñcitumāgami.

**2376:** ‘Tatthaddasa kumāraṃ so, rammarūpaṃ samāhitaṃ;

Nisinnam paṇṇasālāyam, jhāyantam akutobhaya’’nti.

Tattha **vuṭṭhapetvāna seniyoti** ārakkhatthāya balakāye ṭhapetvā. **Ekamsoti** ekamsakatauttarāsaṅgo. **Siñciturāgamīti** rajje abhisiñciturā upāgami. **Rammarūpanti** anañjitaṃ amaṇḍitaṃ.

**2377:**‘Tañca disvāna āyantam, pitaram puttāgiddhinam;  
Vessantaro ca maddī ca, paccuggantvā avandisum.

**2378:**‘Maddī ca sirasā pāde, sasurassābhivādayi;  
Maddī ahañhi te deva, pāde vandāmi te suṇhā;  
Te su tattha palissajja, pāṇinā parimajjathā’’ti.

Tattha **pāde vandāmi te suṇhāti** aham, deva, tava suṇhā pāde vandāmīti evaṃ vatvā vandī. **Te su tatthāti** te ubhoṇi jane tasmim sakkadattiye assame palissajitvā hadaye nipajjāpetvā sīse paricumbitvā mudukena pāṇinā parimajjatha, piṭṭhiyo nesam parimajji.

Tato roditvā paridevitvā rājā soke parinibbute tehi saddhim paṭisanthāram karonto āha –

**2379:**‘Kacci vo kusalam putta, kacci putta anāmayam;  
Kacci uñchena yāpetha, kacci mūlaphalā bahū.

**2380:**‘Kacci ḍamsā makasā ca, appameva sarīsapā;  
Vane vālamigākiṇṇe, kacci hiṃsā na vijjati’’ti.

Pitu vacanam sutvā mahāsatto āha –

**2381:**‘Atthi no jīvikā deva, sā ca yādisakīdisā;  
Kasirā jīvikā homa, uñchācariyāya jīvitam.

**2382:**‘Aniddhinam mahārāja, dametassamva sārathi;  
Tyamhā aniddhikā dantā, asamiddhi dameti no.

**2383:**‘Api no kisāni maṃsāni, pitu mātu adassanā;  
Avaruddhānam mahārāja, araṇṇe jīvasokina’’nti.

Tattha **yādisakīdisāti** yā vā sā vā, lāmakāti attho. **Kasirā jīvikā homāti** tāta, amhākam uñchācariyāya jīvitam nāma kiccam, dukkhā no jīvikā ahosi. **Aniddhinanti** mahārāja, aniddhim asamiddhim daliddapurisam nāma sāva aniddhi cheko sārathi assam viya dameti, nibbisevanam karoti, te mayam idha vasantā aniddhikā dantā nibbisevanā katā, asamiddhiyeva no dametīti. ‘‘Dametha no’’tipi pāṭho, damayittha noti attho. **Jīvasokinanti** avigatasokānam araṇṇe vasantānam kiṃ nāma amhākam sukhanti vadati.

Evañca pana vatvā puna puttānam pavattim pucchanto āha –

**2384:**‘Yepi te siviṣeṭṭhassa, dāyādāpattamānasā;  
Jālī kaṇhājīnā cubho, brāhmaṇassa vasānugā;  
Accāyikassa luddassa, yo ne gāvova sumbhāti.

**2385:**‘Te rājaputtīyā putte, yadi jānātha saṃsatha;  
Pariyāpuṇātha no khippam, sappadaṭṭhamva māṇava’’nti.



Tattha **dāyādāpattamānasā**ti mahārāja, yepi te tava siviṣeṭṭhassa dāyādā apattamānasā asampunṇamanorathā hutvā brāhmaṇassa vasānugā jātā, te dve kumāre yo brāhmaṇo gāvova sumbhati paharati, te rājaputtiyā putte yadi diṭṭhavasena vā sutavasena vā jānātha saṃsatha. **Sappadaṭṭhaṃva māṇavanti** viṣanimmadanatthāya sappadaṭṭhaṃ māṇavaṃ tikicchantā viya khippaṃ no pariyāpuṇātha kathethāti vadati.

Rājā āha –

**2386:** ‘Ubho kumārā nikkītā, jālī kaṇhājinā cubho;  
Brāhmaṇassa dhanam datvā, putta mā bhāyi assasā’ ti.

Tattha **nikkītā**ti nikkayaṃ datvā gahitā.

Taṃ sutvā mahāsatto paṭiladdhassāso pitarā saddhiṃ paṭisanthāramakāsi –

**2387:** ‘Kacci nu tāta kusalaṃ, kacci tāta anāmayam;  
Kacci nu tāta me mātu, cakkhu na parihāyatī’ ti.

Tattha **cakkhu na parihāyatī**ti puttāsokena rodantiyā cakkhu na parihāyatīti.

Rājā āha –

**2388:** ‘Kusalañceva me putta, atho putta anāmayam;  
Atho ca putta te mātu, cakkhu na parihāyatī’ ti.

Bodhisatto āha –

**2389:** ‘Kacci arogaṃ yoggaṃ te, kacci vahati vāhanaṃ;  
Kacci phīto janapado, kacci vuṭṭhi na chijjati’ ti.

Tattha **vuṭṭhī**ti vuṭṭhidhārā.

Rājā āha –

**2390:** ‘Atho arogaṃ yoggaṃ me, atho vahati vāhanaṃ;  
Atho phīto janapado, atho vuṭṭhi na chijjati’ ti.

Evam tesam sallapantānaññeva phussatī devī ‘idāni sokaṃ tanukaṃ katvā nisinnā bhavissantī’ ti sallakkhetvā mahāparivārena saddhiṃ puttassa santikaṃ agamāsi. Tamatthaṃ pakāsento satthā āha –

**2391:** ‘Icevaṃ mantayantānaṃ, mātā nesam adissatha;  
Rājaputtī giridvāre, pattikā anupāhanā.

**2392:** ‘Tañca disvāna āyantim, mātaram puttagiddhinim;  
Vessantaro ca maddī ca, paccuggantvā avandisum.

**2393:** ‘Maddī ca sirasā pāde, sassuyā abhivādayi;  
Maddī ahañhi te ayye, pāde vandāmi te suṇhā’ ti.

Tesam phussatideviṃ vanditvā ṭhitakāle puttakā kumārakumārikāhi parivutā āgamiṃsu. Maddī ca tesam āgamanamaggaṃ oloketīyeva aṭṭhāsi. Sā te sotthinā āgacchante disvā sakabhāvena saṅṭhātum

asakkontī taruṇavacchā viya gāvī paridevamānā tato pāyāsi. Tepi taṃ disvā paridevantā mātarābhimukhāva padhāvimsu. Tamatthaṃ pakāsento satthā āha –

**2394:** ‘Maddiñca puttakā disvā, dūrato sotthimāgatā;  
Kandantā mabhidhāvimsu, vacchabālāva mātaraṃ.

**2395:** ‘Maddī ca puttake disvā, dūrato sotthimāgate;  
Vāruṇīva pavedhentī, thanadhārābhisiñcathā’’ti.

Tattha **kandantā mabhidhāvimsūti** kandantā abhidhāvimsu. **Vāruṇīvāti** yakkhāviṭṭhā ikkhaṇikā viya pavedhamānā thanadhārā abhisiñcathāti.

Sā kira mahāsaddena paridevitvā kampamānā visaññī hutvā dīghato pathaviyaṃ pati. Kumārāpi vegenāgantvā visaññīno hutvā mātu upariyeva paṭimsu. Tasmim̐ khaṇe tassā dvīhi thanehi dve khīradhārā nikkhamitvā tesam̐ mukheyeva pavimsu. Sace kira ettako assāso nābhavissa, dve kumārā sukkhahadayā hutvā addhā nassissanti. Vessantaropi piyaputte disvā sokaṃ sandhāretuṃ asakkonto visaññī hutvā tattheva pati. Mātāpitaropissa visaññīno hutvā tattheva paṭimsu, tathā sahaṃjātā saṭṭhisahassā amaccā. Taṃ kāruññaṃ passantesu ekopi sakabhāvena saṅṭhātuṃ nāsakkhi. Sakalaṃ assamapadaṃ yugantavātena pamadditaṃ viya sālavanaṃ ahoṣi. Tasmim̐ khaṇe pabbatā nadiṃsu, mahāpathavī kampi, mahāsamuddo saṅkhubhi, sineru girirājā onami. Cha kāmāvacaradevalokā ekakolāhalā ahesuṃ.

Sakko devarājā ‘‘cha khattiyā saporisā visaññīno jātā, tesu ekopi utṭhāya kassaci sarīre udakaṃ siñcituṃ samattho nāma natthi, ahaṃ dāni imesaṃ pokkharavassaṃ vassāpessāmī’’ti cintevā chakhattiyasamāgame pokkharavassaṃ vassāpesi. Tattha ye temitukāmā, te tementi, atemitukāmānaṃ upari ekabindumattampi na patati, padumapattato udakaṃ viya nivattitvā gacchati. Iti pokkharavane patitaṃ vassaṃ viya taṃ vassaṃ ahoṣi. Cha khattiyā assāsaṃ paṭilabhim̐su. Mahājano tampi disvā ‘‘aho acchariyaṃ, aho abbhutaṃ evarūpe ñāṭisamāgame pokkharavassaṃ vassī, mahāpathavī kampi’’ti acchariyaṃ pavedesi. Tamatthaṃ pakāsento satthā āha –

**2396:** ‘Samāgatānaṃ ñātīnaṃ, mahāghoso ajāyatha;  
Pabbatā samanādiṃsu, mahī pakampitā ahu.

**2397:** ‘Vuṭṭhidhāraṃ pavattento, devo pāvassi tāvade;  
Atha vessantaro rājā, ñātīhi samagacchatha.

**2398:** ‘Nattāro suṇisā putto, rājā devī ca ekato;  
Yadā samāgatā āsuṃ, tadāsi lomahaṃsanaṃ.

**2399:** ‘Pañjalikā tassa yācanti, rodantā bherave vane;  
Vessantarañca maddiñca, sabbe raṭṭhā samāgatā;  
Tvam̐ nosi issaro rājā, rajjaṃ kāretha no ubho’’ti.

Tattha **ghosoti** kāruññaghoso. **Pañjalikāti** sabbe nāgarā ceva negamā ca jānapadā ca pagghitañjalikā hutvā. **Tassa yācantīti** tassa pādesu patitvā roditvā kanditvā ‘‘deva, tvam̐ no sāmī issaro, pitā te idheva abhisiñcivā nagaraṃ netukāmo, kulasantakaṃ setacchattaṃ paṭicchathā’’ti yācimsu.

Chakhattiyakammavaṇṇanā niṭṭhitā.

**Nagarakaṇḍavaṇṇanā**

Taṃ sutvā mahāsatto pitarā saddhiṃ sallapanto imaṃ gāthamāha –

**2400:** ‘Dhammena rajjaṃ kārentaṃ, raṭṭhā pabbājayittha maṃ;  
Tvaṅca jānapadā ceva, negamā ca samāgatā’ ti.

Tato rājā puttaṃ attano dosaṃ khamāpento āha –

**2401:** ‘Dukkaṭaṅca hi no putta, bhūnahaccaṃ kataṃ mayā;  
Yohaṃ sivīnaṃ vacanā, pabbājesimadūsaka’ nti.

Imaṃ gāthaṃ vatvā attano dukkhaharaṇatthaṃ puttaṃ yācanto itaraṃ gāthamāha –

**2402:** ‘Yena kenaci vaṇṇena, pitu dukkhaṃ udabbahe;  
Mātu bhaginiyā cāpi, api pāṇehi attano’ ti.

Tattha **udabbaheti** hareyya. **Api pāṇehīti** tāta puttena nāma jīvitam pariccajitvāpi mātāpitūnaṃ sokadukkhaṃ haritabbaṃ, tasmā mama dosaṃ hadaye akatvā mama vacanaṃ karohi, imaṃ isilingaṃ hāretvā rājavesaṃ gaṇha tātāti iminā kira naṃ adhippāyenevamāha.

Bodhisatto rajjaṃ kāretukāmopi “ettake pana akathite garukaṃ nāma na hotī” ti kathesi. Mahāsatto “sādhū” ti sampaṭicchi. Athassa adhivāsanaṃ viditvā sahaajāta saṭṭhisahassā amaccā “nahānakālo mahārāja, rajojallaṃ pavāhayā” ti vadiṃsu. Atha ne mahāsatto “thokaṃ adhivāsethā” ti vatvā paṇṇasālaṃ pavisitvā isibhaṇḍaṃ omuñcitvā paṭisāmetvā saṅkhavaṇṇasāṭakaṃ nivāsetvā paṇṇasālato nikkhamitvā “idaṃ mayā nava māse aḍḍhamāsaṅca vasantena samaṇadhammassa kataṭṭhānaṃ, pāramikūtaṃ gaṇhantena mayā dānaṃ datvā mahāpathaviyā kampāpitattāna” nti paṇṇasālaṃ tikkhattuṃ padakkhiṇaṃ katvā pañcapaṭiṭṭhitena vanditvā aṭṭhāsi. Athassa kappakādayo kesamassukammādīni kariṃsu. Tameṇaṃ sabbābharaṇabhūsitam devarājānaṃiva virocamaṇaṃ rajje abhisiñciṃsu. Tena vuttaṃ –

**2403:** ‘Tato vessantaro rājā, rajojallaṃ pavāhayā;  
Rajojallaṃ pavāhetvā, saṅkhavaṇṇaṃ adhārayī’ ti.

Tattha **pavāhayīti** hāresi, hāretvā ca pana rājavesaṃ gaṇhīti attho.

Athassa yaso mahā ahoṣi. Olokitaolokitaṭṭhānaṃ kampati, mukhamaṅgalikā mukhamaṅgalāni ghoṣayīṃsu, sabbatūriyāni paggaṇhiṃsu, mahāsamuddakucchiyaṃ meghagajjitaghoso viya tūriyaghoso ahoṣi. Hatthiratanam alaṅkaritvā upānayīṃsu. So khaggaratanam bandhitvā hatthiratanam abhiruhi. Tāvadeva naṃ sahaajāta saṭṭhisahassā amaccā sabbālaṅkārapaṭimaṇḍitā parivārayīṃsu, sabbakaṅṅāyo maddidevimpī nahāpetvā alaṅkaritvā abhisiñciṃsu. Sīse ca panassā abhisekaudakaṃ abhisiñcamānā “vessantaro taṃ pāletū” tiādīni maṅgalāni vadiṃsu. Tamatthaṃ pakāsento satthā āha –

**2404:** ‘Sīsaṃ nhāto sucivattho, sabbābharaṇabhūsito;  
Paccayaṃ nāgamāruya, khaggaṃ bandhi parantapaṃ.

**2405:** ‘Tato saṭṭhisahassāni, yodhino cārudassanā;  
Sahaajāta pakiriṃsu, nandayantā rathesabhaṃ.

**2406:** ‘Tato maddimpī nhāpesuṃ, sivikaṅṅā samāgatā;  
Vessantaro taṃ pāletu, jāli kaṇhājīnā cubho;  
Athopi taṃ mahārājā, saṅjāyo abhirakkhatū’ ti.

Tattha **paccayaṃ nāgamāruy**hāti taṃ attano jātadivase uppannaṃ hatthināgaṃ. **Parantapanti** amittatāpanaṃ. **Pakiriṃsūti** parivārayiṃsu. **Nandayantāti** tosentā. **Sivikaññāti** sivirañño pajāpatiyo sannipatitvā gandhodakena nhāpesuṃ. **Jālī kaṇḥajinā cubhoti** ime te puttāpi mātaraṃ rakkhantūti.

**2407:**‘Idaṅca paccayaṃ laddhā, pubbe saṃklesamattano;  
Ānandiyāṃ ācariṃsu, ramaṅīye giribbaje.

**2408:**‘Idaṅca paccayaṃ laddhā, pubbe saṃklesamattano;  
Ānandi vittā sumanā, putte saṅgama lakkhaṇā.

**2409:**‘Idaṅca paccayaṃ laddhā, pubbe saṃklesamattano;  
Ānandi vittā patītā, saha puttehi lakkhaṇā’ ti.

Tattha **idaṅca paccayaṃ laddhāti** bhikkhave, vessantaro maddī ca idaṅca paccayaṃ laddhā imaṃ patiṭṭhaṃ labhitvā, rajje patiṭṭhahitvāti attho. **Pubbeti** ito pubbe attano vanavāsasaṃklesaṅca anussaritvā. **Ānandiyāṃ ācariṃsu, ramaṅīye giribbajeti** ramaṅīye vaṅkagirikucchimhi “vessantarassa rañño āṇa” ti kaṅcanalatāvinaddhaṃ ānandabheriṃ carāpetvā ānandachaṇaṃ ācariṃsu. **Ānandi vittā sumanāti** lakkhaṇasampannā maddī putte saṅgama sampāpuṇitvā vittā sumanā hutvā ativiya nandīti attho. **Patītāti** somanassā hutvā.

Evāṃ patītā hutvā ca pana putte āha –

**2410:**‘Ekabhata pure āsiṃ, niccaṃ thaṇḍilasāyini;  
Iti metaṃ vataṃ āsi, tumhaṃ kāmā hi puttakā.

**2411:**‘Taṃ me vataṃ samiddhajja, tumhe saṅgama puttakā;  
Mātujaṃpi taṃ pāletu, pitujaṃpi ca puttakā;  
Athopi taṃ mahārājā, saṅjāyo abhirakkhatu.

**2412:**‘Yaṃ kiṅcitti kataṃ puññaṃ, mayhañceva pitucca te;  
Sabbena tena kusalena, ajaro amaro bhavā’ ti.

Tattha **tumhaṃ kāmā hi puttakāti** puttakā ahaṃ tumhākaṃ kāmā tumhe patthayamānā pure tumhesu brāhmaṇena nītesu ekabhataṃ bhuñjitvā bhūmiyaṃ sayiṃ, iti me tumhākaṃ kāmā etaṃ vataṃ āsīti vadati. **Samiddhajjāti** taṃ me vataṃ ajja samiddhaṃ. **Mātujaṃpi taṃ pāletu, pitujaṃpi ca puttakāti** puttajālī taṃ mātujaṃtaṃ somanassampi pitujaṃtaṃ somanassampi pāletu, mātipitūnaṃ santakaṃ puññaṃ taṃ pāletūti attho. Tenevāha “**yaṃ kiṅcitti kataṃ puñña**”nti.

Phussatīpi devī “ito paṭṭhāya mama suṇhā imāneva vatthāni nivāsetu, imāni ābharaṇāni dhāretū” ti suvaṇṇasamugge pūretvā paṇiṇi. Tamatthaṃ pakāsento satthā āha –

**2413:**‘Kappāsikaṅca koseyyaṃ, khomakoṭumbarāni ca;  
Sassu suṇhāya pāhesi, yehi maddī asobhatha.

**2414:**‘Tato hemaṅca kāyūraṃ, gīveyyaṃ ratanāmayāṃ;  
Sassu suṇhāya pāhesi, yehi maddī asobhatha.

**2415:**‘Tato hemaṅca kāyūraṃ, aṅgadaṃ maṇimekhalāṃ;  
Sassu suṇhāya pāhesi, yehi maddī asobhatha.

**2416:**‘Uṇṇataṃ mukhaphullaṅca, nānāratte ca māṇike;

Sassu suṅhāya pāhesi, yehi maddī asobhatha.

**2417:** ‘Uggatthanam giṅgamakam, mekhalam pātipādakam;  
Sassu suṅhāya pāhesi, yehi maddī asobhatha.

**2418:** ‘Suttañca suttavajjañca, upanijjhāya seyyasi;  
Asobhatha rājaputtī, devakaññāva nandane.

**2419:** ‘Sīsam nhātā sucivatthā, sabbālaṅkārahūsitā;  
Asobhatha rājaputtī, tāvatimseva accharā.

**2420:** ‘Kadalīva vātacchupitā, jātā cittalatāvane;  
Antāvaraṇasampannā, rājaputtī asobhatha.

**2421:** ‘Sakuṇī mānusinīva, jātā cittapattā patī;  
Nigrodhapakkabimboṭṭhī, rājaputtī asobhathā’ ti.

Tattha **hemañca kāyūranti** suvaṇṇamayaṃ vanakhajjūriphalasaṅṭhānaṃ gīvāpasādhanameva. **Ratanamayanti** aparampi ratanamayaṃ gīveyyaṃ. **Aṅgadam maṇimekhalanti** aṅgadābharaṇaṃ maṇimayamekhalāṇca. **Uṇṇatanti** ekaṃ nalāṭapasādhanam. **Mukhaphullanti** nalāṭante tilakamālābharaṇam. **Nānāratte** nānāvaṇṇe. **Māṇiketi** maṇimaye. **Uggatthanam giṅgamakanti** etānipi dve ābharaṇāni. **Mekhalanti** suvaṇṇarajatamayaṃ mekhalam. **Pātipādakanti** pādapasādhanam. **Suttañca suttavajjam cāti** suttārūḷhañca asuttārūḷhañca pasādhanam. Pāḷiyam pana ‘suppañca suppvajjañcā’ ti likhitam. **Upanijjhāya seyyasīti** etaṃ suttārūḷhañca asuttārūḷhañca ābharaṇam taṃ taṃ ūnaṭṭhānaṃ oloketvā alaṅkaritvā ṭhitā seyyasī uttamarūpadharā maddī devakaññāva nandane asobhatha. **Vātacchupitāti** cittalatāvane jātā vātasamphuṭṭhā suvaṇṇakadalī viya taṃ divasaṃ sā vijambhamānā asobhatha. **Dantāvaraṇasampannāti** bimbaphalasadisehi rattadantāvaraṇehi samannāgatā. **Sakuṇī mānusinīva, jātā cittapattā patīti** yathā mānusiya sarīrena jātā mānusinī nāma sakuṇī cittapattā ākāse uppatamānā pakkhe pasāretvā gacchantī sobhati, evaṃ sā rattoṭṭhatāya nigrodhapakkabimbaphalasadisoṭṭhehi asobhatha.

Saṭṭhisahassā amaccā maddim abhiruhanatthāya sabbālaṅkārappaṭimaṇḍitaṃ nātivaddham sattisarapahārakkhamam ekaṃ taruṇahatthim upanāmesuṃ. Tena vuttaṃ –

**2422:** ‘Tassā ca nāgamānesuṃ, nātivaddhamva kuṅjaram;  
Sattikkhamam sarakkhamam, īsādantaṃ urūḷhavam.

**2423:** ‘Sā maddī nāgamāruhi, nātivaddhamva kuṅjaram;  
Sattikkhamam sarakkhamam, īsādantaṃ urūḷhava’ nti.

Tattha **tassā cāti** bhikkhave, tassāpi maddiyā sabbālaṅkārappaṭimaṇḍitaṃ katvā nātivaddham sattisarapahārakkhamam ekaṃ taruṇahatthim upanesuṃ. **Nāgamāruhīti** varahatthipiṭṭhim abhiruhi.

Iti te ubhopi mahantena yasena khandhāvaram agamaṃsu. Sañjayarājā dvādasahi akkhobhiṇihi saddhim māsamattaṃ pabbatakīlam vanakīlam kīli. Mahāsattassa tejena tāvamahante araṇṇe koci vālamigo vā pakkhī vā kañci na viheṭhesi. Tamattham pakāsento satthā āha –

**2424:** ‘Sabbamhi taṃ araṇṇamhi, yāvattettha migā ahum;  
Vessantarassa tejena, naññamaññam viheṭhayum.

**2425:** ‘Sabbamhi taṃ araṇṇamhi, yāvattettha dijā ahum;

Vessantarassa tejena, naññamaññaṃ viheṭṭheyuṃ.

**2426:**“Sabbamhi taṃ araññaṃhi, yāvattettha migā ahuṃ;  
Ekajjhaṃ sannipātiṃsu, vessantare payātamhi;  
Sivīnaṃ raṭṭhavaḍḍhane.

**2427:**“Sabbamhi taṃ araññaṃhi, yāvattettha dijā ahuṃ;  
Ekajjhaṃ sannipātiṃsu, vessantare payātamhi;  
Sivīnaṃ raṭṭhavaḍḍhane.

**2428:**“Sabbamhi taṃ araññaṃhi, yāvattettha migā ahuṃ;  
Nāssu mañjū nikūjiṃsu, vessantare payātamhi;  
Sivīnaṃ raṭṭhavaḍḍhane.

**2429:**“Sabbamhi taṃ araññaṃhi, yāvattettha dijā ahuṃ;  
Nāssu mañjū nikūjiṃsu, vessantare payātamhi;  
Sivīnaṃ raṭṭhavaḍḍhane”ti.

Tattha **yāvattetthā**ti yāvanto ettha. **Ekajjhaṃ sannipātiṃsū**ti ekasmiṃ ṭhāne sannipatiṃsu, sannipatitvā ca pana “ito paṭṭhāya idāni amhākaṃ aññaṃmaññaṃ lajjā vā hirottappaṃ vā saṃvaro vā na bhavissatī”ti domanassapattā ahesuṃ. **Nāssu mañjū nikūjiṃsū**ti mahāsattassa viyogadukkhitā madhuraṃ ravaṃ pubbe viya na raviṃsu.

Sañjayanarindo māsamattaṃ pabbatakīlaṃ, vanakīlaṃ kīḷitvā senāpatiṃ pakkosāpetvā “tāta, ciraṃ no araññaṃ vuttaṃ, kiṃ te mama puttassa gamanamaggo alaṅkato”ti pucchitvā “āma, deva, kālo vo gamanāyā”ti vutte vessantarassa ārocāpetvā senaṃ ādāya nikkhami. Vāṅkagirikucchito yāva jetuttaranagarā saṭṭhiyojanaṃ alaṅkatamaggaṃ mahāsatto mahantena parivārena saddhiṃ paṭipajji. Tamatthaṃ pakāsento sathā āha –

**2430:**“Paṭiyatto rājamaggo, vicitto pupphasanthato;  
Vasi vessantaro yattha, yāvatāva jetuttarā.

**2431:**“Tato saṭṭhisahassāni, yodhino cārudassanā;  
Samantā parikirīṃsu, vessantare payātamhi;  
Sivīnaṃ raṭṭhavaḍḍhane.

**2432:**“Orodhā ca kumārā ca, vesiyānā ca brāhmaṇā;  
Samantā parikirīṃsu, vessantare payātamhi;  
Sivīnaṃ raṭṭhavaḍḍhane.

**2433:**“Hatthārohā anīkaṭṭhā, rathikā pattikārakā;  
Samantā parikirīṃsu, vessantare payātamhi;  
Sivīnaṃ raṭṭhavaḍḍhane.

**2434:**“Samāgatā jānapadā, negamā ca samāgatā;  
Samantā parikirīṃsu, vessantare payātamhi;  
Sivīnaṃ raṭṭhavaḍḍhane.

**2435:**“Karoṭiyā cammadharā, illīhatthā suvammino;  
Purato paṭipajjiṃsu, vessantare payātamhi;  
Sivīnaṃ raṭṭhavaḍḍhane”ti.

Tattha **paṭiyattoti** visākhāpuṇṇamapūjākāle viya alaṅkato. **Vicittoti** kadalipuṇṇaghaṭadhajapaṭākādīhi vicitto. **Pupphasanthatoti** lājāpañcamakehi pupphehi santhato. **Yatthāti** yasmim vaṅkapabbate vessantaro vasati, tato paṭṭhāya yāva jetuttaranagarā nirantaram alaṅkatappaṭiyattova. **Karoṭiyāti** sīsakaroṭīti laddhanāmāya sīse paṭimukkakaroṭikā yodhā. **Cammadharāti** kaṇḍavāraṇacammadharā. **Suvamminoti** vicitrāhi jālikāhi suṭṭhu vammikā. **Purato paṭipajjimsūti** mattahatthīsupi āgacchantesu anivattino sūrayodhā rañño vessantarassa purato paṭipajjimsu.

Rājā saṭṭhiyojanamaggaṃ dvīhi māsehi atikkamma jetuttaranagaraṃ patto alaṅkatappaṭiyattanagaraṃ pavisitvā pāsādaṃ abhiruhi. Tamatthaṃ pakāsento satthā āha –

**2436:** ‘Te pāvisuṃ puram rammaṃ, mahāpākāratorañam;  
Upetaṃ annapānehi, naccagītehi cūbhayaṃ.

**2437:** ‘Vittā jānapadā āsuṃ, negamā ca samāgatā;  
Anuppatte kumāramhi, sivīnaṃ raṭṭhavaḍḍhane.

**2438:** ‘Celukkhepo avattittha, āgate dhanadāyake;  
Nandiṃ pavesi nagare, bandhanā makkho aghosathā’ ti.

Tattha **mahāpākāratorañanti** mahantehi pākārehi ca torañehi ca samannāgataṃ. **Naccagītehi cūbhayanti** naccehi ca gītehi ca ubhayehi samannāgataṃ. **Vittāti** tuṭṭhā somanassappattā. **Āgate dhanadāyake** mahājanassa dhanadāyake mahāsatte āgate. **Nandiṃ pavesīti** ‘vessantarassa mahārājassa āṇā’ ti nagare nandibherī cari. **Bandhanā makkho aghosathāti** sabbasattānaṃ bandhanā makkho ghosito. Antamaso biḷāraṃ upādāya vessantaramahārājā sabbasatte bandhanā vissajjāpesi.

So nagaraṃ pavitṭhadivaseyeva paccūsakāle cintesi ‘‘ye vibhātāya rattiyā mama āgatabhāvaṃ sutvā yācakā āgamissanti, tesāhaṃ kiṃ dassāmī’’ ti? Tasmim khaṇe sakkassa bhavanaṃ uṇhākāraṃ dassesi. So āvajjento taṃ kāraṇaṃ ñatvā tāvadeva rājanivesanassa purimavatthuñca pacchimavatthuñca kaṭippamāṇaṃ pūrento ghanamegho viya sattaratanavassaṃ vassāpesi, sakalanagare jāṇupparamāṇaṃ vassāpesi. Punadivase mahāsatto ‘‘tesaṃ tesaṃ kulānaṃ purimapacchimavatthūsu vuṭṭhadhanaṃ tesaṃ tesaññeva hotū’’ ti dāpetvā avasesaṃ āharāpetvā attano gehavatthusmim saddhim dhanena koṭṭhāgāresu okirāpetvā dānamukhe ṭhapesi. Tamatthaṃ pakāsento satthā āha –

**2439:** ‘Jātarūpamayaṃ vassaṃ, devo pāvassi tāvade;  
Vessantare pavitṭhamhi, sivīnaṃ raṭṭhavaḍḍhane.

**2440:** ‘Tato vessantaro rājā, dānaṃ datvāna khattiyo;  
Kāyassa bhedā sappañño, saggam so upapajjathā’ ti.

Tattha **saggam so upapajjathāti** tato cuto dutiyacittena tusitapure uppajjīti.

Nagaraṇḍavaṇṇanā niṭṭhitā.

Satthā imaṃ gāthāsahassappaṭimaṇḍitaṃ mahāvessantaradhammadesanaṃ āharitvā jātakam samodhānesi – ‘‘tadā jūjako devadatto ahosi, amittatāpanā ciñcamāṇavikā, cetaputto channo, accutatāpaso sārīputto, sakko anuruddho, sañcayanarindo suddhodanamahārājā, phussatī devī sirimahāmāyā, maddī devī rāhulamātā, jālikumāro rāhulo, kaṇhājīnā uppalavaṇṇā, sesaparīsā buddhaparīsā, mahāvessantaro rājā pana ahameva sammāsambuddho ahosi’’ nti.

Vessantarajātakavaṇṇanā dasamā.

Mahānipātavaṇṇanā niṭṭhitā.

Jātaka-aṭṭhakathā samattā.